

आचार्य श्रीमत्प्रद्युम्नसूरि विरचितं
मूलशुद्धिप्रकरणम्
(द्वितीयो भागः)

सम्पादक
आचार्य धर्मधुरंधरसूरिजी
पं. अमृतलाल मोहनलाल भोजक

प्रकाशक
श्रुतनिधि
शारदाबेन चिमनभाई एज्युकेशनल रिसर्च सेन्टर
अहमदाबाद-३८०००४

आचार्यश्रीमत्प्रद्युम्नसूरिविरचितं
मूलशुद्धिप्रकरणम्
[द्वितीयो भागः]

श्रुतनिधि-ग्रन्थांक : २

**प्रधान सम्पादक
जितेन्द्र बी. शाह**

श्रीमद् देवचन्द्रसूरिसन्ध्ववृत्तिसहितं
आचार्यश्रीमत्प्रद्युम्नसूरिविरचितं 'स्थानकानि' इत्यपरनामकं

मूलशुद्धिप्रकरणम्

[द्वितीयो भागः]

सम्पादक

आचार्य धर्मधुरंधरसूरिजी
पं. अमृतलाल मोहनलाल भोजक

प्रकाशक

श्रुतनिधि

शारदाबहेन चीमनभाई ऐज्युकेशनल रिसर्च सेन्टर,
अहमदाबाद-३८० ००४.

वीरसंवत् २५२८

विक्रमसंवत् २०५८

ईस्वीसन् २००२

मूलशुद्धिप्रकरणम्
आचार्य धर्मधुरंधरसूरिजी
पं. अमृतलाल मोहनलाल भोजकं

•

प्रकाशक
श्रुतनिधि

शारदाबेन चिमनभाई एज्युकेशनल रिसर्च सेन्टर
'दर्शन', शाहीबाग, अहमदाबाद-३८० ००४
PHONE : 079-2868739. FAX : 079-2862026
e-mail : sambodhiad1@Sancharnet.in
Website : www.scerc.org

•

© श्रुतनिधि

•

द्वितीय आवृत्ति, सन् २००२

•

मूल्य : रुपये २२५/-

•

प्रति : ५००

•

मुद्रक :

नवप्रभात प्रिन्टिंग प्रेस
नोवेल्टी सिनेमा के समीप,
घी-काँटा मार्ग, अहमदाबाद-३८० ००१.
फोन : ५५०८६३१, ५५०९०८३

श्रुतनिधि के सहयोगी

प. पू. युवाचार्य श्री रत्नाकरसूरिजी म. सा. की प्रेरणा से

१. श्री पंच महाजन संमस्त संघ : रानीवाडा खुर्द (राजस्थान)

२. श्री झवेरी पार्क जैन संघ, अहमदाबाद

की ओर से

प्रस्तुत ग्रंथ के प्रकाशन में हार्दिक आर्थिक सहयोग प्राप्त हुआ है ।

संस्था उनके प्रति कृतज्ञता व्यक्त करती है ।

पुस्तक प्राप्तिस्थान

अहमदाबाद :

श्री पारसगंगा ज्ञानमंदिर

बी-१०४, केदार टावर

राजस्थान हॉस्पिटल के सामने,

शाहीबाग, अहमदाबाद-३८० ००४.

दूरभाष : C/o. ०७९-२८६०२४७ (राजेन्द्रभाई)

मुंबई :

मणिलाल यु. शाह

D-1-२०३, स्टार गेलेक्सी

एल. टी. रोड, बोरीवली (वेस्ट)

मुंबई-४०००९२

दूरभाष : (R) ८०११४६९ (O) ८९३१०११

प्रकाशकीय

'मूलशुद्धि प्रकरणम्' ग्रंथ का प्रकाशन करते हुए हम अत्यन्त हर्षान्वित हैं। प्रस्तुत ग्रंथ का प्रथम भाग कुछ समय पहले प्राकृत टेक्स्ट सोसायटी के द्वारा प्रकाशित हुआ था किन्तु उसका दूसरा भाग छप नहीं पाया था। हालाँकि दूसरे भाग का संपादन कार्य ही शेष था और इस कार्य के लिए पं. श्री दलसुखभाई मालवणियाजी एवं आचार्य प्रद्युम्नसूरिजी अत्यन्त चिंतित भी थे पर संजोग ही कुछ ऐसे बनते चले की कार्य खटाई में पड़ गया पर आखिरकर पंडित श्री अमृतभाई भोजक एवं आचार्यश्रीधर्मधुरंधरसूरिजी ने गंभीरतापूर्वक इस कार्य को हाथ में लिया और संपन्न किया। आज यह ग्रंथ दो भाग में प्रकाशित हो रहा है। यह ग्रंथ जैन सिद्धान्त के परिचय के लिए काफी महत्त्वपूर्ण है। इस के प्रकाशन के लिए प्रज्ञाशील आचार्य श्री प्रद्युम्नसूरिजी म. की सतत प्रेरणा एवं अनुरोध रहे हैं और आचार्य श्री रत्नाकरसूरिजी म. के उपदेश से ग्रंथ प्रकाशन के लिए सुंदर आर्थिक सहयोग प्राप्त हुआ है, हम दोनों आचार्य भगवंतों के प्रति कृतज्ञताभाव व्यक्त करते हैं। रंज इस बात का है कि इस ग्रंथ के एक संपादक श्री अमृतभाई भोजक आज हमारे बीच नहीं हैं। यदि वे जीवित होते तो इस ग्रंथ के प्रकाशन से अवश्य संतुष्ट होते। पू. विद्वान् आचार्य श्री धर्मधुरंधरसूरिजी म. ने भी बड़ी मेहनत व लगन के साथ संपादनकार्य संपन्न किया है। वे हम उनके भी ऋणी हैं।

इस ग्रंथ के प्रकाशन में आर्थिक सहयोग प्रदान करने वाले श्री झवेरी पार्क जैन संघ, अहमदाबाद का हम आभार व्यक्त करते हैं।

हमें आशा एवं विश्वास है कि प्रस्तुत ग्रंथ जिसकी संरचना ग्यारहवीं शताब्दी के समर्थ जैनाचार्य आचार्य श्री प्रद्युम्नसूरिजी ने की है, जिज्ञासुजनों के लिए अत्यन्त उपयुक्त सिद्ध होगा।

अहमदाबाद

जितेन्द्र बी. शाह

फरवरी - २००२.

प्रस्तुत प्रत में पादटीप में जो स्थाननिर्देश किये गये हैं,
उनकी संज्ञागत सूची इस प्रकार है ।

- सं. यह प्रति श्री हेमचन्द्राचार्य जैन ज्ञानमंदिर पाटन में स्थित श्री संघ जैन ज्ञानभंडार की है ।
- वा. यह प्रति उपर्युक्त ज्ञानमंदिर में स्थित श्री वाडीपार्श्वनाथ जैन ज्ञानभंडार की है ।
- ला. यह प्रति श्री कच्छी दशा ओसवाल जैन महाजन के हस्तक अनंतनाथजी महाराज के मन्दिर (मुंबई) में रखे हुए ज्ञानभंडार की है एवं सेठ श्री डोसाभाई अभेचन्द्र जैन संघ (भावनगर) के भंडार की है ।

विषयानुक्रमः

विषयः

पृष्ठाङ्कः

पंचमस्थानके साध्वीकृत्यस्थानकम् :-

१-६६

निर्वाणकारणं, निर्जराहेतुः, दुःशीलाः, विहारनिषिद्धक्षेत्र, विहारयोग्य क्षेत्र, उचित वसति, शय्यातरः, सारणादिस्वरूप, स्त्रीदोषाः, साध्वीगुणाः, अष्टादशसहस्र शीलाङ्गाः, ब्रह्मचर्यं विषये स्थूलभद्र कथानकम्, ब्रह्मव्रतगुणाः, आशातना-गोशालक आख्यानकम्, सङ्गमाख्यानकम्, उपसंहार-उपदेशसर्वस्वम्

श्रावककृत्याख्यं षष्ठस्थानकम् :-

६६-१२५

जिनागमसार, तीर्थ परिभाषाः, साधर्मिक प्रीति, द्रव्यकृत्य, धर्मबान्धवाः सन्धीरणम्, भावकृत्य, स्थिरीकरण, धर्मानुष्ठाने प्रेरणा, अष्टप्रकार प्रमादभेदाः, प्रमादविषये ब्रह्मदत्त कथानकम्, चण्डपुत्राख्यानकम्, प्रमादपरिणाम, साधर्मिक कृत्य-उपसंहार,

श्राविकाकृत्याख्यं सप्तमस्थानकम् :-

१२५-३२२

नारीदोषाः, नूपुरपण्डिता कथानकम्, पतिमारिकाकथानकम्, प्रियदर्शनाऽऽख्यानकम्, पद्मावती कथानकम्, ज्वालावली कथानकम्, सुकुमालिका कथानकम्, वज्राकथानकम्, स्त्री-क्रीडनकम्, स्त्री-पुरुष दोषजालं तुल्यम्, स्त्रीभिः विना तीर्थं न पूर्णम्, चातुर्वर्णसंघः, पुण्यवती श्राविका, रेवती कथानकम्, देवकी कथानकम्, सीता कथानकम्, नन्दाख्यानकम्, भद्राख्यानकम्, मनोरमाख्यानकम्, सुभद्राकथानकम्, नर्मदासुन्दरीकथानकम्, अभयश्रीकथानकम्, कीर्तिः कारणम् शीलसम्पदाः, सतीनां सामर्थ्यं, प्रभावं च, तीर्थपर्यन्त श्राविका सन्ततिः, श्राविकावात्सल्यम् विधेयम्, प्रकरणे उपसंहारः

सर्वस्थानककृत्यशेषः

३२२-३३२

शरीर अनित्यता, सत्पात्रे दानं, साधुवर्ग सन्मानः, अर्थस्य अनित्यता, पुण्यानुबन्धिपुण्यद्रव्य सप्तस्थाने कर्तव्यम्, प्रतिमा विवरण, दर्शनप्रतिमा, अणुव्रतपालने प्रतिमा, सामायिक प्रतिमा, पौषधप्रतिमा, कायोत्सर्गप्रतिमा, ब्रह्मचर्यं प्रतिमा, सचित्तवर्जनप्रतिमा, सावद्यत्याग प्रतिमा, व्यापारत्याग प्रतिमा, श्रमणप्रतिमा, मूलशुद्धि-विनयशुद्धिः, पंचप्रकारविनयः,

उपसंहार-उपदेशम्

३३३-३३४

मिथ्यादुष्कृतम्, निजनामनिर्देशः

विवरणकार-प्रशस्ति

३३४

[साध्वीकृत्याख्यं पञ्चमस्थानकम्]

व्याख्यातं चतुर्थं स्थानकम्, सम्प्रति पञ्चममारभ्यते । अस्य च पूर्वेण सहाऽयमभिसम्बन्धः-
पूर्वत्र साधुकृत्यमुक्तम् ।

तदनन्तरं साध्वीकृत्यम् । अतस्तत्स्थानकम्, तस्य चाऽऽदिवृत्तमिदं-

साहूण जं पावयणे पसिद्धं, तं चेव अज्जाण वि जाण किच्चं ।

पाएण ताणं नवरं विसेसो, वट्टावणाई बहुनिज्जरं ति ॥१०१॥

साधूनां=यतीनाम्, 'जं' ति यत्, 'पावयणे' ति प्रवचने प्राकृतत्वादीर्घत्वम्, 'पसिद्धं' ति प्रसिद्धं='प्रकटम्', 'तं चेव' ति तदेव, 'अज्जाणं' ति आर्याणां=साध्वीनाम् 'जाण' ति जानीहि=अवबुध्यस्व, 'किच्चं' ति कृत्यम्, 'पाएण' ति प्रायः=बाहुल्येन, 'ताणं' ति तासाम् 'नवरं' ति केवलम्, 'विसेसो' ति विशेषोऽयमिति गम्यते, 'वट्टावणाइ' ति वर्तनादि तासां यत् संयमकृत्यादिषु प्रवर्तनमिति भावः 'बहुनिज्जरं' ति बहुनिर्जरं= भूरिकर्मक्षयकारि । इतिशब्दो वृत्तसमाप्ताविति वृत्तार्थः ॥१०१॥

कस्मादिदंबहुनिर्जरं ? यस्माज्जिनोक्तं जिनाज्ञया विधीयमानस्य मोक्षकारणत्वाद् । अत आह -

जिणाणाए कुणंताणं, नूणं निव्वाणकारणं ।

सुंदरं पि सबुद्धीए, सव्वं भवनिबंधणं ॥१०२॥

जिनाज्ञया=तीर्थकरोपदेशेन, कुर्वतां=विदधतां कृत्यमिति शेषः, नूणं=निश्चितम्, निर्वाणकारणं=मोक्षविधायि । सुन्दरमपि=शोभनमपि, स्वबुद्ध्या=निजाभिप्रायेण, सर्वमपि=अशेषमपि आस्तामार्यिकाकृत्यम् भवनिबन्धनं=संसारकारणम्,

उक्तं च -

समइपवित्ती सव्वा आणाबज्झ त्ति भवफला चेव ।

तित्थकरुद्देसेण वि, न तत्तओ सा तदुद्देसा ॥३२६॥

पञ्चा० गा० ३६३ इति श्लोकार्थः ॥१०२॥

किमेतदेव संयतीकृत्यमाज्ञया विधीयमानं मोक्षाय भवत्युताऽन्यदपि ? अत आह-

जं जं जिणोहिं पन्नत्तं वेयावच्चाइ कीरई ।

तं तं विणिज्जराहेउ विसेसेण पुणो इमं ॥१०३॥

१. सं.वा. सु.पु. *ति सूत्रार्थः ॥ २. सं.वा. *रहेउं, सु० प्रतौ पाठभङ्गः ॥

यद्ययज्जनैः प्रज्ञप्तं=प्ररूपितं वैयावृत्यादि, तत्र वैयावृत्यं दशधा, उक्तं च-

आचार्योपाध्याय-तपस्वि-शिक्षक-ग्लान-कुल-गण-सङ्घ-साधु-समनोज्ञानाम्
(तत्त्वा० अ०९ सू० २४)

आदिशब्दाद् विनय-तपश्चरणादिपरिग्रहः, क्रियते=विधीयते, तत्तद् विनिर्जराहेतुः=
विशिष्टकर्मक्षयकारणम्, विशेषतः पुनरिदं=साध्वीकृत्यमिति श्लोकार्थः ॥१०३॥

अत्राऽन्तरे परः प्राह-

कामं खु निज्जरा णंता वीयरगेहि वण्णया ।

अज्जावट्ठावणे किंतु विहीए दुक्करं इमं ॥१०४॥

कामम्=अनुमतार्थे, 'खु' इति निश्चये, निर्जरा=कर्मक्षयः, अनन्ता=अपरिमेया,
वीतरागैर्जनैः, वर्णिता=प्ररूपिता । क्व? इति, अत आह-आर्यावर्तने=साध्वीसंयमप्रवर्तने,
किन्तु=किमुत, विधिना=विधानेन, दुःकरं=दुःशकमिति श्लोकार्थः ॥१०४॥

स्वपक्षे पर एव दृष्टान्तमाह

जहा सीहगुहा काई नाणारयणसंकुला ।

धरिसित्ता तर्हि सीहं, घेत्तुंरत्ताणि दुक्करं ॥१०५॥

यथा सिंहगुहा=कण्ठीरवाश्रयः, काचिद्=अनिर्दिष्टनामा, नानारत्नसङ्कुला=
विविधरत्नपरिपूर्णा, 'धरिसित्ता' धर्षयित्वा, 'तर्हि' ति तत्र, सिंहं=केसरिणम्, 'घेत्तुं'ति ग्रहीतुम्,
'रत्ताणि' रत्नानि, दुःकरं=दुःशकमिति श्लोकार्थः ॥१०५॥

पर एव दार्ष्टान्तिकमाह-

अण्णाण-राग-दोसाईजीयदुहंतदोसओ ।

अज्जापओयणं काउं दुक्करं निज्जरा तथा ॥१०६॥

अज्ञानं=मत्यज्ञानादि, रागः=अभिष्वङ्गलक्षणः द्वेषः=अप्रीतिलक्षणः, अज्ञानं=
चेत्यादिद्वन्द्वः, त आदिर्यस्याऽसौ तदादिः, स चाऽसौ पूर्वापरनिपाताद् दुर्दान्तजीवदोषश्च;
तस्मात्, आर्याप्रयोजनं कृत्वा 'दुक्करं' दुःशकं निज्जरा तथा ग्रहीतुमिति शेष इति
श्लोकार्थः ॥१०६॥

आचार्य आह-

१. सं.वा.सु. पर आह ॥ २. 'रयणाणि' सर्वासु प्रतिषु वर्तते । अत्र विवरणगतः 'रत्ताणि' इति
अनुष्टुप्छन्दानुसारी पाठः स्वीकृतोऽस्ति ॥ ३. सं.वा.सु.पु. °श्रया ॥

महासत्तो जहा कोइ सूरु वीरो परक्कमो ।
धरिसित्तातहिं सीहं लीलाए लेइ ताणि वि ॥१०७॥

महासत्त्वः=प्रधानसत्त्वः, यथा कोऽपि=अनिर्दिष्टनामा, शूरः=सिंहवद्, वीरः=विक्रान्तः, पराक्रमः=महोत्साहयुक्तः, धर्षयित्वा तद्द्वैर्यनिष्फलीकरणेन 'तहिं' ति तत्र, सिंहं=मृगारिम्, लीलया=हेलया, लाति=गृह्णाति, तान्यपि=रत्नानीति श्लोकार्थः ॥१०७॥

दार्ष्टान्तिकमाह-

एवं धीरा य गंभीरा भावियप्पा जिणागमे ।
अज्जाकज्जाइ काऊणं सज्जो अज्जिजति निज्जरं ॥१०८॥

एवम्=अमुना प्रकारेण, धीराः=अक्षोभ्याः च=शब्दोऽवधारणे, तं चाऽग्रे योजयिष्यामः, गम्भीराश्च=अलब्धमध्याः, भावितात्मानः जिनागमे=जिनप्रवचने, आर्याकार्याणि कृत्वा सद्यः=तत्क्षणादर्जयन्ति निर्जरामिति श्लोकार्थः ॥१०८॥

कृत्यमेव श्लोकत्रयेणाऽऽह-

दुस्सीला सावया चोरा पच्चवायभयं जहिं ।
संजईणं तहिं खित्ते विहारो वीरवारिओ ॥१०९॥

दुःशीलाः=कुत्सितशीलाः, उक्तं च-

जू इयर-मिठ-सोला चट्टा उब्भामगाइणो जे य ।
एए होंति कुसीला, वज्जेयव्वा पयत्तेणं ॥३२७॥

सोलाः=तुरगाकर्षकाः

श्वापदाः=सिंह-व्याघ्र-भुजङ्गादयः, चौराः=प्रतीताः, प्रत्यपायभयम्=अनर्थभयम्, 'जहिं' ति यत्र, संयतीनाम्, तत्र क्षेत्रे=स्थाने, विहारो वीरवारितः=चरमतीर्थकरनिषिद्धः ॥१०९॥

कीदृशिक्षेत्रे विहारं कारयेत् ?-

आगंतुगाइभत्तम्मि सज्जाए संजमे हिए ।
साहुणीणं विहाणेणं, विहारं तत्थ कारण ॥११०॥

आगन्तुकादिभक्ते=प्राघूर्णकादिभक्ते आदिशब्दात् सैद्धान्तिकोद्यतविहारादिग्रहः,
स्वाध्याये=पञ्चप्रकारे, संयमे=सप्तदशविधे, हिते=तद्गुणकारके क्षेत्र इति गम्यते, साध्वीनां
(विधानेन)विहारं तत्र कारयेदिति ॥ तत्राऽपि कीदृग्वसतिविधेया ?-

सम्मं समंतओ गुत्ता गुत्तदारा सुसंवुया ।

सेज्जा अज्जाण दिज्जा हि कुज्जा तत्थ जहोचियं ॥१११॥

सम्यग् यथा भवत्येवम्, समन्ततः=सर्वदिक्षु, गुप्ता=वृत्तिवरण्डकाद्यावृता, गुप्तद्वारा
=कपाटदिभिः, सुसंवृता=न विस्तीर्णा, शय्या=वसतिः, 'अज्जाण दिज्जाहि' त्ति आर्याणां
दद्यात् । ततः कुर्यात् तत्र यथोचितमिति श्लोकत्रयार्थः ॥१०९-१११॥

सम्प्रति यादृक् शय्यातरो विधेयस्तदाह-

गंभीरे सत्तवंते य भीयसहे तहेव य ।

मद्दविए कुलउत्ते अज्जासिज्जाथरे विऊ ॥११२॥

गम्भीरः=अलब्धमध्यः, सत्त्वान्=सत्त्वाधिकः, भीतसभः=भीतपर्षत्, 'तथैव च' इति
पूरणार्थः, मार्दविकः=निगृहीतमानः, कुलपुत्रः=प्रधानकुलोत्पन्नः, आर्याशय्यातरः
=साध्वीवसतिदाता, विदुः=विद्वानिति श्लोकार्थः ॥११२॥

किमित्येवं शय्यातरो वर्ण्यते यतस्तस्याऽपि सारणादावधिकारोऽत आह-

सारणा वारणा चैव चोयणा पडिचोयणा ।

कायव्वा सावएणावि, साहुणीणं सुहासया ॥११३॥

स्मारणा वारणा 'चोयणा पडिचोयण'त्ति प्रेरणा प्रतिप्रेरणा चैव, पूर्वस्माच्चैवशब्दोऽत्र
सम्बध्यते, कर्तव्या=विधेया, श्रावकेणाऽपि साध्वीनां शुभाशयात्=शुद्धाशयादिति
श्लोकार्थः ॥११३॥

स्मारणादिस्वरूपप्रतिपादनायाऽऽह-

पम्हुट्टे सारणा वुत्ता, अणायारस्स वारणा ।

चुक्काणं चोयणा भुज्जो, निदुरं पडिचोयणा ॥११४॥

'पम्हुट्टे' त्ति प्रमृष्टे=विस्मृते स्मारणा व्युक्ता, अनाचाराद् वारणा=निषेधनम्,
'चुक्काणं' स्वलितानां 'चोयण' त्ति प्रेरणा, 'भुज्जो' त्ति भूयः प्रवर्तमानानां निष्ठुरं
प्रतिप्रेरणा='ज्ञास्यथ यद्येवं न करिष्यथ ?' इति श्लोकार्थः ॥११४॥

समस्तकृत्यसङ्ग्रहमाह-

एमाङ्गुणवंतीणं समणीणं जहाविहिं ।

सक्कार-सेवणाईयं किच्चं कुज्जा विभागओ ॥११५॥

एवमादि=पूर्वोक्तादि गुणवतीनां=गुणयुक्तानाम्, श्रमणीनां=संयतीनाम्, यथाविधि= यथाविधानम्, सक्कार-सेवनादि आस्तां पूर्वोक्तम्, तत्र सक्कारः=वस्त्रादिभिः पूजनम्, सेवना=पर्युपासना, सक्कारश्च सेवना च सक्कारसेवने ते आदिर्यस्य ग्लानप्रतिचरणादेस्तत्तथा, 'किच्चं' ति कृत्यम्, कुर्यात्=विदध्यात्, विभागतः=स्वकीयस्थानानुल्लङ्घनेनेति श्लोकार्थः ॥११५॥

अत्राऽन्तरे पराभिप्रायसूचकं सूरिः श्लोकमाह-

एत्थमण्णे उ मण्णंति, इत्थीभावे कओ गुणा? ।

तुच्छाइदोसदुट्ठाओ, अज्जाओ जं जिणागमे ॥११६॥

'एत्थं' ति अत्र=प्रस्तुतव्यापारे 'अत्रे उ' ति अन्ये=अपरे, तुशब्दः पुनरर्थः, मन्यन्ते=प्रतिपद्यन्ते, स्त्रीभावे=स्त्रीत्वे, 'कओ' ति कुतः, गुणाः=ज्ञानादयः, तुच्छादिदोषदुष्टा आर्या यदजिनागमे=अर्हत्प्रवचने । उक्तं च-

तुच्छा गारवबहुला चलिंदिया दुब्बलाय धीईए ।

तो अइसेसियगंथा दिट्ठीवाओ य नो थीणं ॥३॥ (विशे० गा० ५५५)

इति श्लोकार्थः ॥११६॥

आगमोक्तमेव सूत्रकृत् स्वयमेव प्रतिपादयति-

तुच्छा इत्थी सहावेणं, इट्ठीगारवदूसिया ।

चंचला इंदियेहिं च, धीईए दुब्बला सढा ॥११७॥

तुच्छा=गाम्भीर्यरहिता, 'इत्थि' ति स्त्री, स्वभावतः=प्रकृत्या, तथा च-

जइ नाम कहवि गंभीरिमा वि नारीण हुंतया सहया ।

तुच्छत्तणं वरायं निरासयं कत्थ निवसंतं ? ॥३२१॥

ऋद्धिगौरवदूषिता=विभूत्यभिमानकलङ्किता, तथा च-

संपाविऊण रिद्धि अहियं गव्वं करेइ महिलयणो ।

जाईय पच्चएणं थीरयणं जह तु चक्किस्स ॥३३०॥

'चंचला इंदियेहिं च' चञ्चला=चपला, इन्द्रियैः=करणैः, चकारोऽग्रे योज्यः ।

तथा च-

जं किञ्चि विददूषणं आसण्णं भयइ महिलिया पुरिसं ।
लोलाइं जओ तीए सविसेसं भोगकरणाइं ॥३३१॥

धृत्या दुर्बला=दाढ्यरहिता, तथा च-

जाण सरीरे निवसइ कायरभावस्स कारणं कामौ ।
रमणीण ताण हियए दढत्तणं कत्थ संभवइ ? ॥३३२॥

शठा च=मायाशीला, तथा च-

वामसहावेणं चिय अंगं कामेण निम्मियं जाण ।
का भामिणीण ताणं मायासीलत्तणे पुच्छ ? ॥३३३॥

इति पराभिप्राय इति श्लोकार्थः ॥११७॥ उत्तरमाह-

भण्णए लहुकम्मत्ता इत्थीभावे वि भावओ ।
अज्जाओ गुणवंताओ सीलवंता बहुस्सुया ॥११८॥

भण्यते=प्रतिपाद्यते प्रत्युत्तरमिति शेषः, लघुकर्मत्वात् स्त्रीभावेऽपि भावतः= परमार्थतः, आर्यागुणवत्यः शीलवत्यो/बहुश्रुताश्च, चकारो गम्यत इति श्लोकार्थः ॥११८॥

यद्येवं तर्हि सिद्धान्तोक्तदोषजालं विरुध्यते । अत आह-

पुव्वुत्तं दोसजालं तु बहुमुंडाउ दूसमा ।
सिद्धं सिद्धंतवक्काओ विसेसविसयं तहा ॥११९॥

पूर्वोक्तं दोषजालं तु=दोषसङ्घातम्, बहुमुण्डा तु दुःषमा इत्येतस्मात् सिद्धं= प्रतिष्ठितम्, सिद्धान्तवाक्यात्=तदुक्तवचनात्, तथा च सिद्धान्तवाक्यम्-

कलहकरा डमरकरा असमाहिकरा अनिव्वुइकरा य ।
होहिंति भरहवासे बहुमुंडे अप्पसमणे य ॥३३४॥

कलहकरा डमरकरा असमाहिकरा अनिव्वुइकरा य ।
पाएण दूसमाए निद्धम्मा निहया कूरा ॥३३५॥

‘विसेसविसयं तह’ त्ति विशेषविषयं तथा बाहुल्यगोचरमिति भाव इति ॥११९॥

किञ्च-

कसायाण चउत्थाणं सामत्थेणं व कत्थई ।

निगंथीणं पि जे दोसा न ते मूलखयंकरा ॥१२०॥

कषायाणां चतुर्थानां=संज्वलनाभिधानानाम्, 'सामत्थेणं' ति सामर्थ्यात्, वाशब्दः पक्षान्तरद्योतकः, निर्ग्रन्थीनामपि ये दोषा भवन्तीति गम्यते न ते मूलक्षयकराः=न चारित्रविनाशकाः, यत उक्तम् -

सव्वे वि य अइयास संजलणाणं तु उदयओ हुंति ।

मूलच्छेज्जं पुण होइ बारसण्हं कसायाणं ॥३३६॥ (आव० नि० गा० ११२)

इति श्लोकार्थः ॥१२०॥

पूर्वोक्तार्थस्य निगमनार्थं श्लोकपञ्चकमाह-

तम्हा गंभीरधीराणं, गुत्ताणं समियाण य ।

सुगुत्तबंभयारीणं, निच्चं गुत्तिदियाण य ॥१२१॥

तस्माद्गम्भीरधीराणां=गम्भीराश्च ताः=अलब्धमध्या धीराश्च=अक्षोभ्या गम्भीर-धीरास्तासाम्, गुप्तानां गुप्तिभिः, समितानां समितिभिः, सुगुप्तब्रह्मचारिणीनाम् ।

वसहिकहनिसिर्ज्जिदियकुडुंतरपुव्वकीलियपणीए ।

अइमायाहारविभूसणा य नव बंभगुत्तीओ ॥३३७॥

इति नवब्रह्मचर्यगुप्तिसनाथब्रह्मचर्यधारिणीनाम्, यद्वा सुगुप्ताश्च ताः=वस्त्राद्यावृतशरीरा ब्रह्मचारिण्यश्च ताः । तथा नित्यं=सदा, गुप्तेन्द्रियाणां च तद्विषयेष्टप्रवर्तनादिति श्लोकार्थः ॥१२१॥

अट्टारससहस्साणं सीलंगाणं महाभरं ।

जावज्जीवं अविस्सामं वहंतीणं सुदुव्वहं ॥१२२॥

अष्टादशसहस्राणां शीलाङ्गानां महाभरं तत्स्थापना-या स्थकल्पत्वात्, तथा चोक्तम्-जोए करणे सन्ना, इंदियभोमाइ समणधम्मयेय ।

सीलंगसहस्साणं अट्टारसगस्स निप्पत्ती ॥३३८॥ (दश० नि० गा० १७७)

दो दो तिण्णिण गुरुज्जुया तिण्णिण य अंसो गुरू य नव मत्ता ।

जोयाईसुं छसु पंतियासु तो पुज्जए गाहा ॥३३९॥

जो जह भंगो, जायइ चारणियाए कमेण तं घेतुं ।

उच्चरियव्वा सव्वा मुच्चइ एक्केक्कयं च पयं ॥३४०॥

अट्टारस उ सहस्सा सीलंगाणं तहेव गाहाणं ।

रहठवणाए जायंति जेण तेणेस महभारो ॥३४१॥

१. ला. °णं व कत्थई निगंथीणं निर्ग्रन्थीनामपि ॥ २. ला. विना महभरं ॥ ३. ला. विना °मा य स ॥ ४. ला. विना °याईसुं तह पं ॥

यावज्जीवम्=आप्राणधारणम्, अविश्रामं=विश्रामरहितम्, वहन्तीनां सुदुर्वहं=कष्टवहमिति श्लोकार्थः ॥१२२॥

कायराणं दुरालोयं हियउक्कंपकारयं ।

बंभव्वयं महाघोरं धरंतीणं सुदुद्धरं ॥१२३॥

कातराणां=भीरूणाम्, दुरालोकं=कष्टदर्शनीयम्, आलोकितं च सद् हृदयोत्कम्प-कारकं=चित्तत्रासकारकम्, ब्रह्मव्रतं=मैथुननियमनम्, महाघोरम्=अतिरौद्रम्, 'धरंतीणं' ति बिभ्रतीनाम्, सुदुर्धरकम्=अतिदुःखधारणीयं स्थूलभद्रमहामुनिमत्सरवद्यतिदृष्टान्तेन, कथानकं च ब्रह्मचर्यदुर्धरताप्रतिपादनार्थमाख्यायते -

[३५. स्थूलभद्रकथानकम्]

अत्थि इह भरहवासे गिरि-सर-वणसंडमंडिउद्देसे ।

वित्थिण्णविविहदेसे नर-तिरिगणसंकुलपएसे ॥१॥

वरपायारसुगुत्तं कयबहुरक्खाविहाणसुपयत्तं ।

देवउलभवणजुत्तं बहुकण-धणसंपयापत्तं ॥२॥

गुणगणधरणसुवत्तं निच्चं पि य ऊसवेहिं अविउत्तं ।

परचक्क-ईइचत्तं वरनयरं पाडलीपुत्तं ॥३॥

तत्थ निहयारिर्विदो नियरिद्धिभरेण तुलियतियसिंदो ।

जणमणजणियाणंदो, निक्कंदियदुद्धतरुकंदो ॥४॥

कंतीए विजियचंदो वरचरियनरिदवंदपरिवंदो ।

निच्चं पि य निहंदो अत्थि महानरवई नंदो ॥५॥

तस्स गयभूरिदोसा निहोसा तियसनारिसंकासा ।

नरवइचित्तावासा अत्थि पिया नाम ससिहासा ॥६॥

रिउपक्खक्खयकालो निययमहीरक्खणिक्कवरसालो ।

अट्टमिससिसमभालो नियमइमाहप्पसोहालो ॥७॥

तोसियनियगोवालो मिच्छत्त महंतकंदकुद्दालो ।

वज्जियकुस्सुइजालो दोसतरुप्पाडणावालो ॥८॥

१. ला. कष्टवहं ॥ २. ला. 'सरि-व' ॥ ३. ला. उक्कंदियं ॥ ४. ला. विना वरविरियं ॥ ५. ला. कोइलो ॥ ६. ला. 'डकरवालो ॥

नियवंसजलयनालो दीणाऽणाहाण कप्पतरुडालो ।
 तस्सऽत्थि गुणविसालो मंती नामेण सगडालो ॥१॥
 तस्स वि य थूलभद्दो पुत्तो संजायपयडगुरुसद्दो ।
 आगामियवरभद्दो नित्थिन्नकलागमसमुद्दो ॥१०॥
 रूवेणं कंदप्पो गयदप्पो तिजगपयडमाहप्पो ।
 चउविहबुद्धिअणप्पो बहुगुणसस्सोहवरवप्पो ॥११॥
 तत्थेव अत्थि वेसा उब्भडसिंगारफारकयवेसा ।
 विण्णायदेसभासा कामुयंजणजणियबहुहासा ॥१२॥
 मिउकसिणकुडिलकेसा परिमुणियसमत्थरइगुणविसेसा ।
 वेसियसत्थावासा नामेणं अत्थि उवकोसा ॥१३॥
 तीए समं पसत्तो सयडालमहामइस्स वरपुत्तो ।
 भुंजइ भोग अतित्तो बारसवरिसाणि निच्चित्तो ॥१४॥
 अण्णो वि अत्थि तणओ सगडालमहामइस्स कयविणओ ।
 सुयसयलजुओ पणओ रायाईतोससंजणओ ॥१५॥
 सिरिओ नाम सुदक्खो अणहऽक्खो निहयसत्तुपडिवक्खो ।
 नंदनिवदेहरक्खो गयऽणक्खो भाविसिवसोक्खो ॥१६॥
 एत्तो य दियवरिद्धो वररुइनामेण अत्थि पत्तद्धो ।
 परि(डि)वाइजिणणपट्ठो तत्थ पुरे सिट्ठकयचिद्धो ॥१७॥
 सो ओलगगइ रायं असेससामंतजणियअणुरायं ।
 नवकयवरविन्नाणं अट्ठसंएणऽपुणरुत्ताणं ॥१८॥
 मिच्छासुयं ति काउं सोऽमच्चो जाव नो पसंसेइ ।
 तुट्ठो वि हु नंदनिवो न देइ से तुट्ठिवरदाणं ॥१९॥
 तं नाउं वररुइणा मंतिस्सोलगिया वरा भज्जा ।
 तुट्ठाए तीए भणिओ 'भण भट्ट ? पओयणं किं पि' ॥२०॥
 तेण वि सा पडिभणिया 'भदे ! तह भणसु निययभत्तारं ।
 जह अम्ह चाडुयाइं, पसंसए राइणो पुरओ' ॥२१॥

तीए वि तयं पडिवज्जिऊण भणिओ रहम्मि नियनाहो ।
 'किं चाडुयकव्वाइं न पसंससि तस्स विउसस्स ?' ॥२२॥
 तो भणइ तयं मंती 'कहं पसंसामि मिच्छसुयमेयं ?' ।
 तीए वि आगहेणं ता भणिओ जाव पडिवण्णं ॥२३॥
 तीए य आगहं जाणिरूण पडिवज्जिउं तओ मंती ।
 रायपुरओ पर्यपइ वररुइणा चाडुए पट्टिए ॥२४॥
 'अहह सुभासियमेयं' तं सोउं पत्थिवो तओ तस्स ।
 तुट्ठो दीणारसयं अट्ठहिं अहियं पयच्छेइ ॥२५॥
 एवं दिणे दिणे जावदेइ ता चितए पुणो मंती ।
 'कह एस करो जाओ उवरोहगयाण अम्हाण ?' ॥२६॥
 तो विण्णवेइ रायं 'दिवसे दिवसे किमित्थियं देह ।
 एयस्स बहु सुवण्णं ?' 'पसंसिओ जं तुमे, तेण' ॥२७॥
 तो भणइ 'न मे एसो पसंसिओ, किंतु लोयकव्वाइं ।
 पडिउं अविणट्ठाइं कह रायं पत्तियावेइ ?' ॥२८॥
 'किं सच्चमिणं ?' भणियम्मि राइणा भणइ 'डिभयाइं पि ।
 एयारिसं पढंती कल्ले तुम्हाण दाइस्सं' ॥२९॥
 दुहियाओ तस्स सत्त उ मंतिस्स इमाओ अत्थि पयडाओ ।
 बहुगुणगणकलियाओ तेलुक्कब्भहियरूयाओ ॥३०॥
 जक्खा य जक्खदिण्णा भूया तह होइ भूयदिण्णा य ।
 सेणा वेणा रेणा भगिणीओ थूलभइस्स ॥३१॥
 तो ताओ बीयदिवसे रायसमीवम्मि जवणियापुरओ ।
 ठावेइ ताण पढमा गिण्हइ एक्काए वाराए ॥३२॥
 बीया य दोहिं तइया तिहि लेइ चउत्थिया पुणो चउर्हि ।
 पंचमिया पंचेहिं छट्ठी छहिं सत्तहिं चरिमा ॥३३॥
 तो वररुइणा पट्टिए पभणइ 'जक्खे ! तुमं पि पढसु' ति ।
 पढियं च तीए एक्कसि सुयं च, एवं च सव्वाहिं ॥३४॥

पढिए गया रुटो निवारए वररुइस्स घरदारं ।
 सो वि जणरंजणत्थं गंगाए नीरमज्झम्मि ॥३५॥
 ठविऊण जंतमज्झे दीणारणं सयं तु अट्टहियं ।
 पविरलजणसंझाए पसरम्मी थुणइ गंगनइं ॥३६॥
 पाएणं जा चंपइ ता चडइ करम्मि झ त्ति पोट्टलिया ।
 तं दट्टुं बहुलोगो आउट्टो जंपई एवं ॥३७॥
 'जइ वि इमो परिभूओ रण्णा तह वि हु इमस्स परितुट्ठा ।
 दीणारणऽट्टसयं सिरिगंगा देवया देइ ॥३८॥
 अहह न जुत्तं रण्णा कयं जओ एरिसं महापत्तं ।
 परिभूयं' तं सोउं, गया जोएइ मंतिमुहं ॥३९॥
 मंती वि भणइ 'सच्चं एयं जइ तुम्ह अम्ह पच्चक्खं ।
 देइ' तओ भणइ निवो 'पसरम्मि पलोयइस्सामो' ॥४०॥
 'एवं' ति भणिय पुरिसं निययं संझाए तत्थ पट्टवइ ।
 सिक्खविय थवइ जं सो तं घेत्तुमलक्खिओ एहि' ॥४१॥
 पुरिसो वि तत्थ ठणे सुरप्प वं पविसिऊण ताव ठिओ ।
 जा गोविय पोट्टलियं नियगेहं पत्थिओ भट्टो ॥४२॥
 ततो घेत्तूण तयं नेउं मंतिस्स सो समप्पेइ ।
 मंती वि गुज्झय्यम्मि पक्खिविय पहायकालम्मि ॥४३॥
 गंतूण निवसमीवे पभणइ 'वच्चामु देव ! पेच्छामो ।
 कह तस्स देइ तुट्ठा गंगा दीणारअट्टसयं ?' ॥४४॥
 तो तुट्टो नरनाहो समत्थसामंत-मंतिपरिगरिओ ।
 पत्तो तत्थ प्रएसे जत्थ ठिओ सो थुणइ गंगं ॥४५॥
 दट्टूण नंदरायं समागयं सयललोयपरिगरियं ।
 उक्करिसियो वररुई गंगं थोउं समाढत्तो ॥४६॥
 थोऊणं पज्जंते चंपइ पाएण तं नियं जंतं ।
 न य उट्टइ पोट्टलिया हत्थेहिं विमग्गए ताहे ॥४७॥

जा नवि पेच्छइ दव्वं पस्सेयजलाविलो तओ जाओ ।
तं दट्टुणं मंती पभणइ 'किं देइ नो गंगा ?' ॥४८॥
कड्डित्तु गुज्झयाओ पोट्टिलियं तो इमं पुणो भणइ ।
'देवेस कूडचरिओ इह ठविय वियालवेलाए ॥४९॥
गिण्हइ पभायकाले मुद्ध जणं एव विप्पयारेइ' ।
खिसिय बहुप्पयारं सव्वे निययं गया ठाणं ॥५०॥
सो वि य गओ पओसं चितइ 'कह धरिसिओ अहमणेणं ? ।
ता कायव्वं किंचि वि इमस्स वेरस्स निज्जवणं' ॥५१॥
तो दासचेडियाओ उवचरिउं पुच्छियाओ 'किं अज्ज ।
वट्टइ मंतिस्स घरे ?' ताहिं वि कहियं जहा भट्ट ॥५२॥
सज्जिज्जइ आओगो मंतिघरे संपयं पहरणाई ।
सिरिययविवाहदिवसे दायव्वो जो नरिदस्स ॥५३॥
तं छिदं लहिऊणं वररुइणा पाढियाणि डिंभाणि ।
भत्तुल्लागइ दाउं एवंविहगीययं बहुहा ॥५४॥
'एहु राउ न वियाणइ जं सगडालु करिस्सए ।
नंदुराउ मारेविणु सिरियउ रज्जि ठविस्सए' ॥५५॥
तं तिय-चउक्क-चच्चरउणेसु पढंति डिंभरूवाइं ।
सिट्ठं च तयं गंतुं निवस्स केणाऽवि डिंभगयं ॥५६॥
तं सौउं नरनाहो चितइ 'नणु हंत सच्चयं एयं ।
जम्हा हु सत्थयारा पढंति एयारिसिसिलोगं ॥५७॥
बालया जं च भासंति जं च भासंति इत्थिओ ।
जा य उप्पाइया भासा न सा भवइ अन्नहा' ॥५८॥
पेसेइ पच्चयत्थं मंतिगिहे पत्थिवो निययपुरिसं ।
तेण वि जह दिट्ठम्मी सिट्ठे मंतिस्स सो कुविओ ॥५९॥
जा निवडइ चलणेसुं सगडालो ताव उप्परहुत्तो ।
ठाइ सहस ति राया मंती वि हु मुणिय तब्भावं ॥६०॥

१. ला. जणं देव ? वि° ॥ २. ला. विना निज्जमणं ॥ ३. ला. विना भइ ! ॥ ४. ला. रायनंदु मा° ॥

५. ला. सोऊणं नर° ॥

उट्टितु गओ गेहं बोल्लावइ सिरिययं जहा 'वच्छ ! ।
 पिसुणपवेसो एसो संजाओ दुत्तरे अम्ह ॥६१॥
 होही कुलक्खओ णे, ता मह आणं करेहि जइ तं सि ।
 ता होइ धुवं रक्खा' सिरिओ वि यं भणइ आइसह ॥६२॥
 'जइ एवं तो जइया निवस्स निवडामहं पयग्गेसुं ।
 तइया खग्गेण तुमं मह सीसं ज्जत्ति छिदिज्जा' ॥६३॥
 तो ठइय करेहि इमो सवणे जंपेइ 'संतयं पावं ।
 जम्हा हु गुरू जणओ गोरव्वो देवया तं सि' ॥६४॥
 तो जंपइ सगडालो 'एवमकज्जंतए कुलस्संतो ।
 जायइ, रिउवग्गस्स य न विप्पियं तीरण काउं ॥६५॥
 तोऽहं तालपुडविसं जीहाए करिय रायचलणेसुं ।
 निवडिस्सामि तुमं पुण मयस्स मे छिदिहिसि सीसं' ॥६६॥
 तो जुत्तिजुत्तयमिणं नाउं पडिवज्जियं सिरियएण ।
 तह चैवऽणुट्टियम्मि राया सहस त्ति संभंतो ॥६७॥
 'किं पुत्त ? कयमकज्जं ?' एसो वि भणइ 'वेरिओ तुम्ह ।
 निहओ मणुस्ससामिय ! पिउणा वि न तेण मे कज्जं' ॥६८॥
 तो 'निब्बिच्चो एसो' त्ति भाविउं कुणइ मयगकिच्चाइं ।
 सोगतो, ताणंते सिरियस्स पणामए मुद्दं ॥६९॥
 तेणोत्तं 'मे भाया महल्लओ थूलभद्दनामो त्ति ।
 वेसाघरम्मि चिट्ठइ बारसमं वट्टए वरिसं ॥७०॥
 सो वाहिप्पउ जेणं अहिगारी एत्थ जणयतुल्लो' त्ति ।
 ततो निवेण सिग्घं वाहित्तो आगओ एसो ॥७१॥
 कहिरुण जणयमरणं समप्पिया राइणा तओ मुद्दा ।
 जंपेइ थूलभद्दो 'आलोच्चिय देव ! गिण्हामि' ॥७२॥
 रण्णा भणियं 'एत्थं असोगवणियाए गच्छ चित्तेहि' ।
 सो तत्थगओ चित्तइ 'नणु भोगा केरिसा एत्थ' ॥७३॥

निवकज्जवावडाणं ? पुणो वि रज्जं करेतु संसारे ।
 भमियव्वं ता तेणं पज्जत्तं होउ नणु मज्झ ॥७४॥
 गिण्हामि समणदिक्खं मुणिगणसंसेवियं ति चित्तेउं ।
 पंचहिं मुट्ठीहिं दढं सहसा उप्पाडए केसे ॥७५॥
 कंबलरयणं पाउणिय छिदिउं तस्स पंतदसियाहिं ।
 कारुण य रयहरणं समागओ रायपासम्मि ॥७६॥
 पभणइ 'निव ! आलोच्चियमेयं तुह होउ धम्मलाभो' त्ति ।
 इय वोत्तुं नीसरिओ गुहाओ सीहो व्व सो भयवं ॥७७॥
 जंपइ राया 'पेच्छह कवडं कारुण जाइ वेसहरं ।
 अप्पच्चयाओ चडिओ सयमेव गवक्खगं गंतुं ॥७८॥
 जा पेच्छइ वच्चंतं मयकुहियकडेवरण मज्झम्मि ।
 नासं पि अढंकंतं तं दट्ठुं जंपए राया ॥७९॥
 'एसो हु वीयरगो जाओ भयवं ति तो अलं इमिणा' ।
 उववेसइ मंतिपए सिरियं महया विभूर्इए ॥८०॥
 सिरिओ वि जाइ तीसे उवकोसाए गिहम्मि अणुदियहं ।
 भाउज्जाइ त्ति सिणेहमोहिओ सा वि तं दट्ठुं ॥८१॥
 रुवइ सदुक्खं सिरिथूलभद्दविरहानलेण संतत्ता ।
 संठवइ सिरियओ तं एवं वयणाइं जंपंतो ॥८२॥
 'भाउज्जे ! किं कुणिमो ? अम्हं जणओ विणासिओ णेणं ।
 पावेणं वररुइणा तुम्ह य विरहो पिएण कओ ॥८३॥
 ता एसो कोसाए तुह भगिणीएऽणुरत्तओ गाढं ।
 ता तह भणाहि भगिणिं, जह मज्जं पायए एयं' ॥८४॥
 भणिया य तीइ भगिणी 'भदे ! तुम्हाण केरिसं पेम्मं ।
 मत्ता तुमं, अमत्तो एसो, ता भणसु जह पियइ ॥८५॥
 अण्णं च तुमं मत्ता भणिहिसि एयं असंगयं तेण ।
 तुज्झ विरच्चि(च्ची)हि इमो ता कुणसु जहा सुरं पियइ' ॥८६॥

भणिओ य तीए एसो तहा तहा पेसलेहिं वयणेहिं ।
 जह पियइ चंदहासं नाम सुरं खीरसंकासं ॥८७॥
 लोयाणं पच्चक्खं तीए वि य साहियं तयं सव्वं ।
 नियभगिणीए तीय वि सिट्ठमसेसं सिरिययस्स ॥८८॥
 सो, वि य वररुइभट्टो, पविसरइ पुणो वि नंदरायस्स ।
 अत्थाणे गोरव्वो य दीसए सव्वलोएण ॥८९॥
 अह अण्णया नरिंदो सुमरंतो मंतिणो गुणगणोहं ।
 जंपइ 'पुत्त ! कहं ते पिया विणा कारणेण मओ ? ॥९०॥
 अम्हाण आसि भत्तो असेसविण्णाणबुद्धिसंजुत्तो ।
 एक्कपइ च्चिय विगओ अम्हं कम्माणुभावेण' ॥९१॥
 तो सोयं तं दट्ठुं रायं पत्थावजाणओ सिरिओ ।
 'किं कुणिमो देव ? कयं सव्वमिणं मत्तवालेण ॥९२॥
 एएणं वररुइणा' तं सोउं जंपए नरवरिंदो ।
 'किं सव्वं पियइ इमो ?' 'कल्लं दंसेमि'सो भणइ ॥९३॥
 बीयम्मि दिणे तो सिरियाएण सिक्खाविओ निओ पुरिसो ।
 'सव्वाण वि एक्केक्कं वरपउमं देहि आणेउं ॥९४॥
 एयस्स पुणो डोडुस्स देहि मयणहलभावियं पउमं ।
 पुज्जंति जेण अम्हं मणोरहा अज्ज संपुण्णा' ॥९५॥
 तेण वि य तयं सव्वं, अणुट्ठियं मंतिवयणमवियारं ।
 रायाईहिं य पउमाइं ताइं ठवियाइं नासग्गे ॥९६॥
 वररुइणा वि हु पउमं जा धरियं नासियाइ अग्गम्मि ।
 ता भिंगारमुहेण व नीसरिया चंदहाससुरा ॥९७॥
 तं दट्ठुं लोणेणं सव्वेण वि खिसिओ इमो तत्तो ।
 पायच्छित्तस्सऽट्ठा उवट्ठिओ चाउवेज्जस्स ॥९८॥
 तेण वि य 'तत्ततउयं तंबं पियसु त्ति तुज्झ पच्छित्तं ।
 सो वियतं कारुणं पंचत्तं पाविओ सहसा ॥९९॥

भयवं पि थूलभद्दो गंतूण गुरूण पायमूलम्मि ।
 गुरुसक्खियं विहेउं पव्वज्जं पालए उग्गं ॥१००॥
 अह अण्णया कयाई जलहरधारनिवायदाणोहो ।
 विज्जुलयकणयमालो गलगज्जियगरुयसद्दालो ॥१०१॥
 उग्गयसिलिंधदंतो बहुविहपसरंतवेल्लिकरपसरो ।
 इंदोवयसिंदूरो समागओ पाउसगइंदो ॥१०२॥
 तो अज्जविजयसंभूयसूरिसीसा कमेण गिण्हंति ।
 नाणाविहे अभिग्गहविसेसए ताण मज्झम्मि ॥१०३॥
 एक्कोत्थ भणइ साहू 'सीहगुहादारसंठिओ अहयं ।
 चाउम्मासुववासो चिट्ठिस्सामी वयं मज्झ' ॥१०४॥
 अण्णो 'दिट्ठीविसविसहरस्स बिलदारविहिय-उरसग्गो ।
 कयभत्तपरिच्चाओ चाउम्मासं गमिस्सामि' ॥१०५॥
 अवरो 'कूययमंडुक्कआसणे विहियतणुविउस्सग्गो ।
 उववासेण गमिस्सं पाउसकालं च नियमो मे' ॥१०६॥
 'जोग्ग त्ति परिकलेउं गुरुणा जा तेऽणुमण्णिया ताव ।
 उट्ठित्तु थूलभद्दो साहू वि पयंपए एवं ॥१०७॥
 'जा पुव्वपरिचिया मे उवकोसा तीए चित्तसालाए ।
 निच्चं पि य भुंजंतो छरसजुयं भोयणं विविहं ॥१०८॥
 परिचत्तवविसेसो चाउम्मासं तर्हि गमिस्सामि ।
 तुम्हाणं पयमूले अभिग्गहो एस मे होउ' ॥१०९॥
 तं सोऊणं सूरी सुयउवओगं विसेसओ दाउं ।
 'निव्वहइ त्ति' मुणेउं अणुमण्णइं तं महासत्तं ॥११०॥
 सव्वे वि णिग्गया ते नियनियठणेसु संठिया तिन्नि ।
 भयवं पि थूलभद्दो उवकोसघरम्मि संपत्तो ॥१११॥
 तमइंतं दट्टूणं समुट्ठिया हरिसनिब्भरंगी सा ।
 नूणं चलचित्तेसो समागओ वयपराभग्गो ॥११२॥

१. ला. अण्णो वि य दिट्ठीविसहरस्स ॥ २. ला. 'पई एवं ॥

'आइसह' ति भणंती जोडियकरसंपुडा ठिया पुरओ ।
 भयवं पि भणइ 'दिज्जउ मह वसही चित्तसालाए' ॥११३॥
 'एह ति इमा पगुणा तो उत्तरिओ इमो तर्हि गंतुं ।
 गिण्हइ य तीइ गेहे सव्वरसोवेयमाहारं ॥११४॥
 तो भुत्तुत्तरसमए विसेसओ विहियफारसिगारा ।
 उक्किट्टवण्ण-लावण्ण-रूयवरसंपयाकलिया ॥११५॥
 गंतूण मुणिसमीवे विलास-बिब्बोय-हावभावेहिं ।
 सा खोभिउं पयत्ता संभारियपुव्वरयकीला ॥११६॥
 मेरु व्व निप्पकंपो इमो वि तिलतुसतिभागमेत्तं पि ।
 न य चइओ चालेउं विसेसओ निच्चलो ज्ञाणे ॥११७॥
 एवं दिणे दिणे सा मयणुक्कोयणकरहिं चिट्ठाहिं ।
 खोभेइ तहा जह दवइ नूण अयमइय पुरिसो वि ॥११८॥
 भयवं पि थूलभद्दो जह जह खोभेइ सा तह तहेव ।
 ज्ञाणम्मि निच्चलयरो संजायइ सिद्धखेत्तं व ॥११९॥
 तो निप्पकंपयं पासिऊण तह धम्मसवणओ चेव ।
 उवसंता उवकोसा संजाया साविया पवरा ॥१२०॥
 सामन्ने थिरचित्ता बारसवयधरणनिच्चला धणियं ।
 संवेगरंगपत्ता अभिगहं गिण्हए एवं ॥१२१॥
 'जइ कहवि देइ राया कस्स वि पुरिसस्स मं तयं मोत्तुं ।
 सेसपुरिसाण भयवं ? मह नियमो एत्थ जम्मम्मि' ॥१२२॥
 अह पाउसम्मि वित्ते निव्वाहियनियपइण्णगुरुभारा ।
 सव्वे वि हु संपत्ता कमसो नियसूरिपयमूले ॥१२३॥
 अह सीहगुहासाहुं इंतं अब्भुट्ठिऊण ईसिं ति ।
 'दुक्करगारय ! तुब्भं सागय' मिइ जंपियं गुरुणा ॥१२४॥
 इयरदुगं पि हु एवं गुरुहिं सम्माणियं अह कमेण ।
 इंतम्मि थूलभद्दे सहसा अब्भुट्ठिओ सूरी ॥१२५॥

भणइ य 'दुक्करदुक्करकारय ! तुह सागयं महासत्त !' ।
 दट्टूण तयं इयरे घयसित्तसिहि व्व पज्जलिया ॥१२६॥
 चिंतंति 'पिच्छ गुरुणो, अणुणयं कह कुणंति मंतिसुए ।
 सव्वरसड्ढं भुंजंतयस्स किं दुक्करमिमस्स ? ॥१२७॥
 अण्णम्मि य वरिसम्मि जाणिस्सामो इमं ति चिंतंता ।
 चिट्ठंति संजमरया कमेण पुण पाउसो पत्तो ॥१२८॥
 तो सीहगुहाऽऽइ तो आपुच्छइ नियगुरुं जहा 'जामि ।
 उवकोसाए घरम्मि सव्वरसोवेयमाहारं ॥१२९॥
 भुंजंतो निच्चं पि य चाउम्मासं तर्हि गमिस्सामि' ।
 तो 'थूलभद्दमुणिमच्छरि' त्ति नाऊण उवउत्ता ॥१३०॥
 गुरुणो भणंति 'मा कुणसु आगहं वच्छ ! एत्थ अत्थम्मि ।
 मोत्तूण थूलभद्दं न चयइ अन्नो तर्हि ठाउं' ॥१३१॥
 साहू वि भणइ 'एवं कायव्वमिणं किमित्थ दुक्करयं ?' ।
 जंपइ गुरू 'विणासं पाविहसि न एत्थ संदेहो' ॥१३२॥
 तं गुरुवयणं अवगन्निऊण पत्तो खणेण सो तत्थ ।
 तं दट्टुं सा चिंतइ 'किमेस आगच्छए साहू ?' ॥१३३॥
 हुं नायमिणं सिरिथूलभद्दमच्छवसेण नणु एइ ।
 ता बोहेमि पडंतं संसारे समणगं एयं' ॥१३४॥
 अब्भुट्टिऊण वंदइ पभणइ 'आइसह जं मए कज्जं ।
 साहू वि भणइ 'वसर्हि देहि महं चित्तसालाए' ॥१३५॥
 दाऊण तर्हि वसर्हि भुंजावित्ता मणुण्णमाहारं ।
 मज्झण्हे य परिक्खण्हेउं दंसेइ थीभावं ॥१३६॥
 दट्टूण तीए रूवं चलयमणो तक्खणेण पत्थेइ ।
 जंपइ सा वि 'भयवं ! न वयं दव्वं विणा होमो' ॥१३७॥
 सो भणइ 'कओ दव्वं, अम्हाणं ?' सा वि 'सहउ कट्टं' ति ।
 चिंतिय जंपइ 'नेपालयम्मि अप्पुव्वसाहुस्स ॥१३८॥

देइ निवो वरकंबलरयणं आणेहि तं तर्हि गंतुं ।
 रागरसविनडियंगो साहू वि य पट्टिओ तुरियं ॥१३९॥
 अगर्णितो जल-कद्दम-तसाइसंसत्तयं महीवीढं ।
 पत्तो कमेण, राया वि देइ से कंबलीरयणं ॥१४०॥
 तं घेत्तूणं वलिओ आगच्छइ जाव अंतरालम्मि ।
 बद्धो चोरेर्हि पहे, लवियं तो ताण सउणेण ॥१४१॥
 जह 'आगच्छइ लक्खो' पुच्छइ तो चोरनायगो पुरिसं ।
 रुक्खारूढं 'किं भद्द ? पेच्छसे किं पि आवंतं ?' ॥१४२॥
 सो भणइ 'मोतु समणगमेगं न हु किं पि तारिसंअण्णं' ।
 पत्तो य तत्थ साहू निरूवियं किं पि न य दिट्ठं ॥१४३॥
 मुक्को य तेर्हि 'वच्चसु' साहू वि पयट्टओ तओ सउणो ।
 वाहरइ 'गओ लक्खो' पभणइ सेणावई 'भयवं ? ॥१४४॥
 किं अत्थि तुज्झ पासे किंचि वि ? सच्चं कहेहि जेणेसो ।
 सउणो एवं जंपइ' साहू वि ? य भणइ 'अत्थि' त्ति ॥१४५॥
 कंबलरयणं एकं इमस्स वंसस्स मज्झयारम्मि ।
 छूढं वेसाए कए मुक्को तो चोरनाहेण ॥१४६॥
 आगंतूण य दिण्णं, तं उवकोसाए तेण हत्थम्मि ।
 चित्तेइ सा वि 'पेच्छह न दुक्करं किं पि रायस्स ॥१४७॥
 ता संबोहेमि इमं' ति भाविउं छुहइ ओघसरमज्झे ।
 दट्टूण तयं जंपइ 'महमोल्लं किं विणासेहि ?' ॥१४८॥
 सा भणइ 'सोयसि इमं मूढ ! न सोएसि अप्पयं कीस
 सीलंगरयणपुण्णं विणासियं दुट्टचित्तेण ?' ॥१४९॥
 तं सोउं संविगगो जंपइ 'इच्छामि सम्ममणुसट्ठिं ।
 निवडंतो संसारे तुमए हं रक्खिओ अज्ज ॥१५०॥
 वच्चामि गुरुसमीवं संपइ तुह होउ धम्मलाभो त्ति ।
 आलोइयपडिकंतो करेमि तव-संजमं जेण ॥१५१॥

उवकोसाए भणियं 'भयवं ! मिच्छ मि दुक्कडं जमिह ।
 कयबंभवयाए वि हु कयत्थिओ कज्जमासज्ज ॥१५२॥
 किंतु तुह बोहणत्थं एवमुवाओ इमो मए रइओ ।
 ता खमिऊणं सव्वं गुरुजणवयणुज्जमं कुणसु' ॥१५३॥
 'इच्छं' ति भाणिऊणं संपत्तो सूरिणो समीवम्मि ।
 धणियं खरंटिऊणं तेहिं वि आलोयणा दिण्णा ॥१५४॥
 आलोइयपडिकंतो पुणो वि तव-संजमं मुणी कुणइ ।
 उवकोसा वि हु दिण्णा रण्णा तुट्टेण रहियस्स ॥१५५॥
 जा न वि विसिट्ठरागं तस्सुवरिं कुणइ ताव एसो वि ।
 तीए मणरंजणत्थं नियय दंसेइ विण्णाणं ॥१५६॥
 गंतुं असोगवणियं पल्लंक्त्यो धणुं परामुसइ ।
 आरोविय बाणेणं विंधइ अंबाण वरलुंबी ॥१५७॥
 तस्स य सरस्स पुंखे, विंधइ अण्णेणं तिक्खबाणेणं ।
 अवरण तस्स वि, तओ कमेण जा हत्थपप्पं ति ॥१५८॥
 ताहे खुरुप्पबाणं खिविउं छिंदित्तु सुत्तओ चेव ।
 गिण्हइ उवकोसाए दावित्तो निययविण्णाणं ॥१५९॥
 तो तब्भावं नाउं उवकोसा भणइ 'पेच्छ मह इन्हि ।
 विण्णाणं' इइ वोत्तुं सरिसवरांसि करावेइ ॥१६०॥
 नच्चित्तु तीए उवरिं पुणो वि सूईओ खोविउं तत्थ ।
 अंतरिय पुप्फपत्तेहिं ताओ पुण नच्चिया एसा ॥१६१॥
 एवं नच्चंतीए न खोविओ सरिसवाण सो रसी ।
 न य विद्धा चलणेहिं, दट्टुं रहिओ समाउट्टो ॥१६२॥
 पभणइ 'मग्गेहिवरं जेण पयच्छमि जं ममायत्तं ।
 जम्हा हु रंजिओ हं, दुक्करकरणेण तुह इमिणा' ॥१६३॥
 सा भणइ 'दुक्करं किं मए कयं जेण रंजिओ एवं ।
 सव्वाण दुक्करतरं विहियं नणु थूलभहेण ॥१६४॥

जओ भणियं-

न दुक्करं तोडिय अंबलुंबिया न दुक्करं नच्चिउ सिक्खियाए ।
 तं दुक्करं तं च महाणुभावं जं सो मुणी पमयवणम्मि वुत्थो ॥१६५॥
 अण्णं च तस्स नमिमो पयकमलं मुणिवरस्स भावेण ।
 अइदुक्करदुक्करकारयस्स गुणरयणजलनिहिणो ॥१६६॥
 भयवं पि थूलभद्दो तिक्खे चंकम्मिओ नउण विद्धो ।
 अगिसिहाए वुत्थो चाउम्मासं न वि य दड्ढो ॥१६७॥

अवि य-

जो सव्वरससमगं मणोज्जभोज्जं सया वि भुंजंतो ।
 मह पासे वि न खुहिओ, तस्स नमो थूलभद्दस्स ॥१६८॥
 जो पुव्वकीलियाइं सुमराविय पत्थिओ मए अहियं ।
 न य संजमाओ खुभिओ तस्स नमो थूलभद्दस्स ॥१६९॥
 जो हावभावासिगारजणियचेट्ठाहिं मह अणेगाहिं ।
 न य खुभिओ चित्तेणं तस्स नमो थूलभद्दस्स ॥१७०॥
 २ जो अच्चुब्भऽलावणवण्णपुन्नेसु मज्झ अंगेसु ।
 दिट्ठेसु वि न वि खुहिओ तस्स नमो थूलभद्दस्स ॥१७१॥
 जो मह कडक्खविक्खेवतिक्खसरधोरणीए विद्धो वि ।
 सव्वंगं ण य खुभिओ तस्स नमो थूलभद्दस्स ॥१७२॥
 जो मह मंजुलदेसीवियड्ढुभणिईहिं चित्तरूवाहिं ।
 मणयं पि हु न य खुभिओ तस्स नमो थूलभद्दस्स ॥१७३॥
 अखलियमरट्टकंदप्पमद्दणे लद्धजयपडायस्स ।
 तिक्कालं पि य इणमो, नमो नमो थूलभद्दस्स' ॥१७४॥
 जा एवं तीए वसंसिऊण भत्तीए संभुओ भयवं ।
 ता विम्हइओ रहिओ पुच्छइ 'को थूलभद्दमुणी ?' ॥१७५॥
 तो पभणइ सा निसुणसु 'नंदनरिदस्स पुव्ववंसम्मि ।
 आसि महाबुद्धिजुओ वरमंती कप्पओ नाम ॥१७६॥

तस्स य वंसे जाओ सगडालमहामई सुविक्खाओ ।
 तस्सेस थूलभद्दो पुत्तो' इच्चाइयं सव्वं ॥१७७॥
 कहियं जा निययथुई तं सोऊणं इमो वि संभंतो ।
 जंपइ जोडियहत्थो भत्तिब्भरनिब्भरो धणियं ॥१७८॥
 सो धण्णो तस्स नमो दासो हं तस्स संजमधरस्स ।
 अद्धच्छिऽपिच्छीओ जस्स न हियए खुडक्कंति ॥१७९॥
 एत्थंतरम्मि तीए संविग्गं जाणिऊण तह विहिया ।
 धम्मकहा जह एसो पडिबुद्धो सुद्धजिणधम्मे ॥१८०॥
 तं पडिबुद्धं नाउं कहिओ सव्वो वि निययवुत्तंतो ।
 नियमग्गहणाईओ तं सोउं सो वि पडिभणइ ॥१८१॥
 'उद्धरिओ हं तुमए भदे ? भवसायरम्मि निवडंतो ।
 गिण्हामि अहं दिक्खं तुमं पि पालेहि नियनियमं' ॥१८२॥
 गंतूण गुरुसमीवे पव्वज्जं गिण्हऊण अइदुसहं ।
 विहरइ गुरूहि समयं इयर वि य कुणइ जिणधम्मं ॥१८३॥
 भयवं पि थूलभद्दो पालइ जा निक्कलंकसामण्णं ।
 ता अण्णया कयाई संजाओ गरुयदुक्कालो ॥१८४॥
 बारहवरिसपमाणो तत्थ य गंतूण उयहितीरम्मि ।
 सव्वे वि ठिया समणा, पुणरवि वित्ते इहं पत्ता ॥१८५॥
 वीसरियं सव्वसुयं अगुणिज्जंतं तर्हि दुकालम्मि ।
 पुणरवि संघेण कओ समवाओ कुसुमनयरम्मि ॥१८६॥
 अंगं अज्झयणं वा उद्देशो जस्स किं पि जं असि ।
 तं घेत्तूणं संघो मेलइ इक्कारसंगां ॥१८७॥
 नत्थि त्ति दिट्ठिवाओ परिभावेत्तेर्हि तस्स कज्जम्मि ।
 नाओ य भद्दबाहू चोद्दसपुव्वी समत्थि त्ति ॥१८८॥
 तो तस्साऽऽणयणत्थं पत्तो संघाडगो तर्हि पहिओ ।
 वंदित्ता विण्णवई 'संघो आणवइ पत्तो त्ति ॥१८९॥

सो भणइ 'महापाणं आढत्तं दुत्तरं महाझाणं ।
 एएण कारणेणं न वट्टए मज्झ आगमणं ॥१९०॥
 साहू वि य तव्वयणं गंतुं सव्वं कर्हिंति संघस्स ।
 संघो वि पुणो पेसइ अण्णं संघाडयं तत्थ ॥१९१॥
 सिक्खविऊणं एवं जहा 'भणिज्जाह सूरिणो तुब्भे ।
 जह 'संघस्साऽऽएसं जो न कुणइ तस्स को दंडो ॥१९२॥
 'कीरइ य संघबज्झो' भणिए सूरीहिं तो भणिज्जाह ।
 'तो खाइं तुब्भे वि हु एवंविहदंडपत्त'त्ति ॥१९३॥
 गंतूण साहुणो वि हु संघाएसं कहंति सूरिस्स ।
 तं सोउं आउट्टो पभणइ 'मा कुणह एवं ति ॥१९४॥
 जह संघस्स वि कज्जं सिज्झइ मज्झं पि तह पसाएण ।
 किज्जउ, पेसेह लहुं सिस्सा मेहाविणो इहइं ॥१९५॥
 दाहामि सत्त पुच्छ भिक्खायरियाए आगओ एक्कं ।
 कालयवेलाइ पुणो बहिभूमीआगओ तह य ॥१९६॥
 वेयालियाइ अण्णं, तिण्णि य आवस्सए दाहं ५-७' ।
 साहूहिं सूरिवयणे, कहिए संघो वि मण्णेउं ॥१९७॥
 पेसेइ थूलभद्दाइयाण मेहावियाण साहूणं ।
 पंचसयाइं संघो, सूरी वि हु वायए ताणि ॥१९८॥
 अइथोववायणाए सव्वे उब्भज्जिऊण नियत्तणं ।
 संपत्ता एक्कं चिय मोत्तूणं थूलभहं ति ॥१९९॥
 पुच्छइ य गुरू 'किं तं उब्भज्जसि नेय ?' सो वि पडिभणइ ।
 'उब्भज्जामि नाऽहं किंतु महं वायणा थोवा' ॥२००॥
 भणियं च तओ गुरुणा, 'पुण्णप्पायं इमं महाझाणं ।
 चिट्ठाहि थोवदिवसे एत्थ जहिच्छाए दाहामि' ॥२०१॥

१. ला. संघसमाएसं ॥ २. ला. 'लाए तओ २, बा' ॥ ३. सं.वा.सु. 'ए अहं दाहं ॥ ४. ला. 'ए ते सव्वे उज्जिऊण ॥ ५. ला. 'इ गुरू वि कि' ॥ ६. ला. 'प्पायं महं इमं झाणं ॥

पडिपुण्णम्मि य झाणे देइ जहिच्छए वायणं सूरी ।
 एवं कमेण पढिया जा पुव्वा दस दुवत्थूणा ॥२०२॥
 एत्थंतरम्मि तहियं वंदणहेउं कमेण पत्ताओ ।
 निययविहारकमेणं भगिणीओ थूलभइस्स ॥२०३॥
 गहियसमणत्तणाओ वंदित्ता तो गुरुं पउच्छंति ।
 'कत्थऽच्छइ जेठज्जो ? 'एत्थोवरए' भणइ सूरी ॥२०४॥
 तो तस्स वंदणत्थं ताओ चलियाओ सो वि इतीओ ।
 दट्टूण गारवेणं विउरुव्वइ केसरिसरूवं ॥२०५॥
 दाढाविर्गिचियमुहं पिंसडं दित्तनयणजुयलिल्लं ।
 दट्टूणं भीयाओ ताओ सूरिस्स साहंति ॥२०६॥
 जह 'जेट्टज्जो खइओ होहीसीहेण जेण तहिं सीहो ।
 चिट्ठइ जिंभायंतो' तो सूरी देइ उवओगं ॥२०७॥
 पभणइ य 'जाह वंदह जेट्टज्जो चेव सो न सीहो' त्ति ।
 तो पुणरवि य गयाओ पेच्छंति सहावरूवेणं ॥२०८॥
 तुट्ठाओ वंदित्ता उवविट्ठाओ कर्हिंति नियवत्तं ।
 जह "सिरिओ पव्वइओ अम्हेहिं समं तया आसि ॥२०९॥
 किंतु छुहालू अहियं न चयंतो काउमेगभत्तं पि ।
 पत्ते पज्जोसवणे भणिओ य मए जहा 'अज्जो ॥२१०॥
 अज्जं पज्जोसवणा ता पच्चक्खाहि पोरिसी ताव' ।
 तेण वि पच्चक्खाया पुण्णाए ताए पुण भणिओ ॥२११॥
 'चिट्ठसु जा पुरिमड्डं संपइ वंदाहि ताव जिणभवणे' ।
 तं पि हु उवरोहेणं जा पुण्णं ता पुणो भणिओ ॥२१२॥
 'चिट्ठ अवड्डमियाणि' तत्थ वि पुण्णे भणंति 'पच्चक्ख ।
 अब्भत्तट्टमियाणि रयणी सुत्तस्स वौलेही' ॥२१३॥
 तेण वि य तदुवरोहाओ तह कए रयणिमज्झसमयम्मि ।
 सरमाणो देव-गुरू छुहाए मरिउं सुरोजाओ ॥२१४॥

१. ला. पपुच्छंति ॥ २. ला. दाढाविर्गिचि' ॥ ३. सं. वा. सु. बोलिहइ ॥

तो मे अधिई जाया 'रिसिघाओ किल महंतओ जाओ' ।
 सिरिसमणसंघपुरओ उवट्टिया पायछित्तेणं ॥२१५॥
 संघो वि य पच्छित्तं न देइ, जंपइ य 'सुद्धया तं सि' ।
 भणियं च मए 'जायइ न मज्झ चित्तस्स निव्वाणं' ॥२१६॥
 जइ पर सयमेव जिणो अक्खइ तो जायए दिही मज्झ' ।
 इय नाउं संघो वि हु काउस्सग्गे ठिओ सव्वो ॥२१७॥
 तत्तो पवयणदेवी संघपभावेण आगया झत्ति ।
 'आइसउ मज्झ कज्जं संघो साहेमि जेण तयं' ॥२१८॥
 संघेण वि सा भाणया 'ने हि इमं संजइं जिणसगासे' ।
 सा भणइ 'मह कएणं एमेव य ठह खणमेकं ॥२१९॥
 जेण न पंता का वि हु संघपभावेण कुणइ मह विग्घं' ।
 पडिक्खणे संघेणं मं घेतुं जाइ जिणपासे ॥२२०॥
 तो वंदिओ जिणिंदो जाव मए ताव विमिहो लो गो ।
 भयवं पि कहइ सव्वं 'भरहाओ इमाऽऽगया अज्जा ॥२२१॥
 निदोस' ति य भणित्तं छिण्णो मे संसओ जिणिंदेण ।
 वागरियाओ दोण्णि य चूलाओ मह निमित्तेणं ॥२२२॥
 ताओ अह घेतूणं समागया, मण्णिगया य संघेण' ।
 एमाइ कहेऊणं अज्जाओ गया नियं वसहिं ॥२२३॥
 साहू वि थूलभद्दो वायणहेउं उवट्टिओ जाव ।
 बीयदिणे ताव गुरू न दिंति से वायणं कह वि ॥२२४॥
 विण्णवइ 'किं निमित्तं न देह ?' जंपइ गुरू वि 'जमजोग्गो' ।
 तो चित्तइ अवरहो पव्वज्जदिणाओ आरब्भ ॥२२५॥
 जा न सुमेइ किंचि वि ता भणइ न सामि ? किंपि सुमेमि ।
 गुरूणा वि य पडिभणिओ 'बीयमजोगत्तणं एयं ॥२२६॥
 जं काऊण न सुमरसि' एवं भणिओ सरित्तु अवरहं ।
 चलणजुयलम्मि लग्गो खामइ परमेण विणएण ॥२२७॥

भणइ य पुणो न काहं 'एवं' सूरी वि भणइ 'न हु तुमयं ।
 काहिसि कार्हितऽण्णे अओ न ते वायणं देमि' ॥२२८॥
 नाऊण गुरुं कुवियं तओ भणावेइ सयलसंघेण ।
 संघं पि भणइ सूरी 'एसो वि करेइ जइ एवं ॥२२९॥
 अण्णे उ मंदसत्ता विसेसओ एरिसाइं कार्हिति ।
 ता चिट्ठंतु इमाइं उवरिमपुव्वाइं मह पासे' ॥२३०॥
 संघो वि आगहेणं जा लग्गो ताव देइ उवओगं ।
 जाणइ जह 'वोच्छेओ न ममाओ किंतु एयाओ' ॥२३१॥
 एयाणि तओ निब्बंधिऊण अण्णस्स नेय देयाणि ।
 वाएइ थूलभद्दं जा निम्माओ तर्हि जाओ ॥२३२॥
 ता ठविओ सूरिपए पडिबोहिताण भव्वसंघायं ।
 संपत्तो दियलोए भयवं सिरिथूलभद्दो त्ति ॥२३३॥
 तम्मि गए दियलयं वत्थुदुगेणाहियाइं पुव्वाइं ।
 चउरो वोच्छिण्णाइं सेसं अणुसज्जियं पच्छ ॥२३४॥
 एयं पसंगओ च्चिय कहियं कज्जं तु एत्थ जह तस्स ।
 सीहगुहाइत्तस्स उ दुक्करतवसोसियस्सावि ॥२३५॥
 सीहोवसामगस्स वि महसत्तस्स वि गुणायरस्साऽवि ।
 दुद्धरमेयं जायं तं कह अण्णस्स मा होउ ? ॥२३६॥
 इति श्लोकार्थः ॥१२३॥
 स्थूलभद्रमहामुनि-मत्सरवदृषिकथानकं समाप्तम् ॥३५॥

ततश्च-

देवा य दाणवा जक्खा गंधव्वाकिन्नरा नरा ।
 कं कं तं जं न कुव्वंति जे धरंति इमं वयं ॥१२४॥

देवाः=वैमानिकाः, दानवाः=भवनपतयः, यक्ष-गन्धर्व-किन्नराः=व्यन्तरविशेषाः
 नराश्च=मनुष्याः, चकारो 'देवा य' इत्येतस्मादिह योजनीयस्तेन विद्याधरा अपि गम्यन्ते,
 किं किं तद् यद् न कुर्वन्ति=नाऽस्त्येव तद् यद् न विदधति, ये धरन्ति=बिभ्रति, 'इमं'

ति एतत् 'वयं' ति व्रतं=ब्रह्मचर्यमिति श्लोकार्थः ॥१२४॥

किमेतदेव ब्रह्मचर्यं दुर्धरत्वाद्गुणकारणमुताऽन्यदपि ? अत आह-

मोक्खावहं अणुद्वाणं सव्वं सव्वणुदंसियं ।

भिक्षुणीणं कुणंतीणं संभवन्ति धुवं गुणा ॥१२५॥

मोक्खावहं=शिवकारि, अनुष्ठानं=क्रियाकलापरूपम्, सर्वं=समस्तम्, सर्वज्ञदर्शितं=तीर्थकरप्रतिपादितम्, भिक्षुणीनां=संयतीनाम्, 'कुणंतीणं' कुर्वतीनाम्, सम्भवन्ति=सम्भाव्यन्ते, धुवं=निश्चितम्, गुणाः=ज्ञानादय इति श्लोकार्थः ॥१२५॥

यदि गुणाः सम्भवन्ति ततः किम्-

गुणाणं किलहीलाए एगाहारगयाण वि ।

सन्नाण-चरणाईणं सव्वे सव्वत्थ हीलिया ॥१२६॥

गुणानां=ज्ञानादीनाम्, 'कील'इत्याप्तवादसंसूचकः हीलिया=निन्दया, एकाधारगतानामपि आस्तां प्रभूताधारगतानाम्, सज्ज्ञान-चरणादीनां=मतिज्ञानादि-चारित्रप्रभृतीनाम्; आदिशब्दाद् दर्शन-तपः-संयमप्रभृतयो गृह्यन्ते, सर्वे=समस्ताः, सर्वत्र=मर्त्यलोके, हीलिताः=अपमानिताः, भवन्तीत्यध्याहार इति श्लोकार्थः ॥१२६॥

तद्हीलनादौ च को दोषः ? इत्याशङ्कयामाह-

इहेव हीलिया हाणि हसिया रेवियव्वए ।

अक्कोसिया वहं बंधं, मरणं दिंति ताडिया ॥१२७॥

इहैव=अत्रैव जन्मनि, हीलिताः=अगौरव्यताविषयीकृताः, हानीम्=अर्थनाशादिकाम्, ददतीति श्लोकान्ते क्रिया । हसिताः=हास्यविषयं प्रापिताः, रोदनाय=आक्रन्दनाय, जायन्त इत्यध्याहारः । आक्कोशिताः=आक्रुष्टा; वंधं=लकुटदिघातम्; बन्धं=रज्ज्वादिसंयमनं ददति । मरणं=प्राणत्यागलक्षणम्; ददति=प्रयच्छन्ति; ताडिताः=लताघातादिभिरिति श्लोकार्थः ॥१२७॥

हीलनादिभिश्च तेषामाशातना कृता भवति, तस्याश्चाऽनन्तसंसारकारणत्वादित्यत आह-

तत्तो आसायणाए उ, दीहो बहुदुहावहो ।

गोसाल-संगमाणं व, दुरंतो भवसायरो ॥१२८॥

ततः=तस्मात्, आशातनया=आयः=लाभस्तस्य शातना आशातना तया, दीर्घः=

प्रलम्बः, बहुदुःखावहः=अनेकाशर्मकृत, गोशाल-सङ्गमकयोरिव=भगवच्छिष्याऽऽभास-
महोपसर्गकृतपुरयोरिव, दुरन्तः=दुष्टान्तः, भवसागरः=संसारसमुद्रो जायत इति श्लोकाक्षरार्थः
॥१२८॥

भावार्थस्तु कथानकाभ्यामवसेयस्ते चेमे—

[३६ गोशालकाख्यानकम्]

अत्थि इहेव जंबुद्वीवे दीवे भारहे वासे सावत्थी नाम नयरी । तीसे य उत्तरपुरत्थिमे
दिसीभागे कोट्टुए नाम उज्जाणे पन्नत्ते । तत्थ य सावत्थीए अत्थि हालाहला नाम कुंभयारी,
पभूयधणधणसमिद्धिसमद्धासिया । तीसे य कुंभकारावर्णसि गोशाले नामं मंखलिपुत्ते
आजीवियसंघपरिवुडे चउवीसवासपरियाए आजीवियसमएणं अप्पाणं भावेमाणे विहरइ ।

अण्णया य कयाइ छ दिसाचरा अंतियं पाउब्भवित्था, तं जहा-सोणे, कणंदे, कणियारे
अच्छिद्धे, अग्गिवेसायणे, अज्जुणे, गोयमपुत्ते । ते य अट्टविहमहानिमित्त जाणया, तद्यथा-

अङ्गं स्वप्नं स्वरं भौमं व्यञ्जनं लक्षणं तथा ।

उत्पातमन्तरीक्षं च निमित्तं त्वष्टधा स्मृतम् ॥३४२॥

सो य गोशालगो तेसिं निमित्तबलेणं सव्वजीवाणं इमाइं वागरणाइं वागेरेइ, तं जहा-
लाभं अलाभं सुहं दुक्खं गमणमागमणं जीवियं मरणं ।

तए णं से गोशालगे मंखलिपुत्ते आजीविए अट्टंगमहानिमित्तस्स उल्लेयमेत्त- विण्णाणेणं
सावत्थीए नयरीए अजिणे जिणप्पलावी, अकेवली केवलिप्पलावी, अप्पणो जिणसइं पयासेमाणे
विहरइ । तओ सावत्थीजणो सिंघाडग-तिग-चउक्क-चच्चर-चउ-मुह-महापह-पहेसु
अण्णोण्णमेवमाइक्खइ, अवि य -

‘धण्णा कयपुण्णा मो गोसालो जेण मंखलीपुत्तो ।

अरिहा जिणे महप्पा विहरइ एत्थेव नयरीए ॥१॥

ता तस्स वंदणेणं पूयप्पायं करेमु अप्पाणं ।

जम्हा जिणिदवंदणमसंखदुक्खक्खयं कुणइ ॥२॥

ता तूरह भो ! तुरियं जेणं वच्चामु तस्स पासम्मि ।

तम्महुनिहित्तनयणा सुणेमु तब्भासियं धम्मं ॥३॥

१. ला. *कार्थः ॥ २. ला. सेणे, कुणं दे ॥ ३. सं.वा.सु. गोमपुत्ते ॥ ४. सं.वा.सु. निमित्तमाष्टकं स्मृ* ॥
५. सं.वा.सु. गमणाग* ॥ ६. ला. गोसाले ॥ ७. सं.वा.सु. *त्ते अट्टं* ॥

एत्थंतरम्मि य सुराऽसुर-किन्नरोग-विज्जाहर-विसरवंदिज्जमाणचरणारविदजुयलो चोद्दसमहासमणसहस्ससंपरिवुडो समोसढो भयवं वद्धमाणसामी तित्थयरो, तओ तस्स वंदणत्थं निग्गया राईसर-तलवर-माडंबिय-कोडंबिय-सेट्टि-सत्थवाह-गणग-दोवारिग-मंति-महामंतिपमुहा समत्थपरिसा । धम्मकहावसाणे य जहागयं पडिगया ।

भगवओ य जेट्ठे अंतेवासी इंदभूर्इनामं अणगारे छट्टुक्खमणपारणाए समणं भगवं महावीरं वंदित्ता एवं वयासी-‘इच्छामि णं भंते ! तुब्भेहिं अब्भणुण्णाए समाणे सावत्थीए भिक्खायरियं गमित्तए’ । ‘अहासुहं देवाणुप्पिय’ त्ति भगवया अब्भणुण्णाए सावत्थि पविसइ । तत्थ य उच्च-नीय-मज्झिमकुलेसु समुयाणं हिंडमाणे बहुजणसदं निसामेइ जहा णं ‘देवाणुप्पिया ! गोसाले जिणे अरिहा केवली’ । तं च सोऊणं भगवं गोयमे समणस्स भगवओ महावीरस्स अंतियं समागंतूण भत्त-पाणयमालोएइ पारेइ य । पुणो चरिमपोरिसीवक्खाणम्मि सुस्सूसमाणे निसम्ममाणे पुच्छइ-‘इच्छामि णं भंते ? गोसालगस्स उप्पत्तिं निसामित्तए’ । तए णं समणे भगवं महावीरं गोयमाइपरिसाए गोसालस्स उप्पत्तिं कहेइ, अवि य-

“जंबुद्दीवे इहं चेव भारहऽद्धम्मि गोयमा ? ।

अण्णचउवीसियाए उ आइतित्थंकरे जया ॥४॥

विहीए निव्वुडे तम्मि महिमत्थं सुराऽसुरे ।

आवंते उप्पयंते य दट्टुं पच्चंतवासिओ ॥५॥

अहो ? अच्छेरयं अज्जं मच्चलोयम्मि दीसई ।

इंदयालमिवाऽपुव्वं न दिट्ठं कत्थई पुणो ॥६॥

इईहापोहजुत्तो उ पुव्वजोइं सरित्तु य ।

मोहं गंतुं खणेणं तो मारुयाऽऽसासिओ तओ ॥७॥

छिण्णपत्तं व कंपंतो निदिउं गरहिउं चिरं ।

अत्ताणं गोयमा ? धीरो सामण्णं घेत्तुमुज्जओ ॥८॥

सो पंचमुट्ठियं लोयं जावाऽऽढवइ महायसो ।

भतीए देवया तस्स ताव वेसं समप्पई ॥९॥

उगं तवं तवंतस्स तस्स दट्ठूण ईसरो ।

लोयं पूयं करेमाणं उवगंतूण पुच्छइ ॥१०॥

'केणं तं दिक्खओ ? कत्थ उप्पणो ? किं कुलंतं ? ।
 सुत्तत्थं कस्सपामूले विसिट्ठं ते समज्जियं ?' ॥११॥
 तो सो पत्तेगबुद्धो उ सव्वं तस्स वियागरे ।
 दिक्खं जाइं कुलं सुत्तं अत्थं वा जत्थ अज्जियं ॥१२॥
 तो सोऊणं अहन्नो सो इमं चित्तेइ गोयमा ? ।
 'नूणं अणारिओ एसो लोणं डंभेण भक्खइ ॥१३॥
 ता मण्णे जारिसं एँस तारिसं सो जिणो वि हु ।
 जंपिस्सइ त्ति नो तम्हा, वियारो एत्थ जुज्जई ॥१४॥
 अहवा वि जिणो नेवं भासई मोहवज्जिओ ।
 जम्हा तम्हा किमेएण जामि तत्थ जिणंतिए ॥१५॥
 अभिनंदामि पव्वज्जं सव्वदुक्खविमोक्खणिं' ।
 चित्तिउं जाइ जा तत्थ ता जिणं तत्थ निक्खइ ॥१६॥
 तहा विगणहरस्संते पव्वज्जं गिण्हई इमो ।
 ईसरो नाम कोडुंबी संविग्गो मंदबुद्धिओ ॥१७॥
 निव्वुयम्मि जिणिंदम्मि तेलोक्केक्कल्लबंधवे ।
 भव्वाणं बोहणट्टाए देव-दाणवमज्झगे ॥१८॥
 जिणाभिहियसुत्तत्थं जा वण्णेइ गणाहिवो ।
 तावेसाऽऽलावगो तत्थ वक्खाणम्मि समागओ ॥१९॥
 'पुढवीजीवमेगं पि जो विणासेइ सो धुवं ।
 अस्संजओ समक्खाओ वीयरगण सासणे' ॥२०॥
 तो ईसरो वि चित्तेइ 'सुहुमे पुढविकाइए ।
 सव्वत्थ उद्विज्जंति को ताइं रक्खिउं तरे ? ॥२१॥
 लहुत्तं कुणई एस्स महप्पा एत्थ अप्पणो ।
 वक्खाणंतो असद्धेयं सव्वलोयसमक्खयं ॥२२॥
 अच्चंतदुक्करं एवं वक्खाणंतस्स वी फुडं ।
 कंठसोसो परं होइ एरिसं कोऽणुचिट्ठई ? ॥२३॥

ता एयं विप्पमोत्तूण सामण्णं किञ्चि मज्झिमं ।
 वक्खाणिज्जा जई एसो तओ लोगोऽणुरंजई ॥२४॥
 हा हाऽहवा अहं मूढो पावकम्मो नराहमो ।
 सयं जो नाऽणुचेट्टामि अण्णोऽणुच्चिट्ठई जणो ॥२५॥
 जम्हा एयं जिणिदेहिं सव्वण्णूहिं पवेइयं ।
 जो एयं अण्णहा वाए तस्स अट्ठो विरुज्जई ॥२६॥
 ताऽहमेयस्स पच्छित्तं चरे घोरं सुदुक्करं ।
 लहं सिग्घं सिग्घयरं जाव मच्चू न मे भवे ॥२७॥
 आसायणाकयं पावं लहं जेण विहुव्वई' ।
 दिव्वं वाससयं जाव तप्पच्छित्तमिमो चरे ॥२८॥
 तं तारिस्सं महाघोरं पायच्छित्तं सयंमई ।
 काउं पत्तेयबुद्धस्स सयासम्मी पुणो गओ ॥२९॥
 सुणेइ तत्थ वक्खाणं जाव ताव समागयं ।
 'पुढवाईणं समारंभं साहू तिविहेण वज्जए' ॥३०॥
 हुं(?मि)च्छत्ताओ दढं मूढो मुक्कचिधं स ईसरो ।
 एवं विचितए 'लोए को न ताईं समारभे ॥३१॥
 चिट्ठई ताव एसेव पुढवीए निसण्णओ ।
 अग्गीए रद्धयं खाइ जीवियं नो जलं विणा ॥३२॥
 ता किं पि तं समक्खाइ जमेयस्सेव मत्थए ।
 पडई, नो तमण्णो उ सद्दहेज्जा सयण्णओ ॥३३॥
 ताठाउ ताव एसेत्थं वरं सो हु गणाहिवो ।
 अहवा सो व एसोव नमे भणिययं करे ॥३४॥
 किं वाऽहवा ममेएहिं सयं धम्मं कहेमहं ।
 सुहंसुहेण जं लोओ सव्वो वि अणुचिट्ठइ ॥३५॥
 न कालो निट्ठुरस्सऽज्ज धम्मस्सिइ जाव चितइ ।
 ताव भीमेण सदेण विज्जू तस्स सिरोवरिं ॥३६॥

पडिया तो खयं तीए नीओ सो मुखसेहरो ।
 मरिता सत्तमीए उ महीए उववण्णओ ॥३७॥
 सम्मत्त-सुयनाणाणं सासणस्स तहेव य ।
 पडिणीयाइदोसेणं तथा सो गोयमीसरो ॥३८॥
 तत्थ तं दारुणं दुक्खं भुजित्ता सो निरंतरं ।
 इहागओ समुद्धम्मि महामच्छे भवेत्तु णं ॥३९॥
 पुणो वि सत्तमाए उ तेत्तीसंसागरोवमे ।
 दुस्सहं दारुणं दुक्खं भोत्तूणेह समागओ ॥४०॥
 पक्खिजाईए संजाओ कागत्ताए सुकुच्छिओ ।
 तओ वि पढमं गंतुं उव्वट्टित्ता समागओ ॥४१॥
 दुट्टसाणो भवित्ता णं पत्तो पढमियं पुणो ।
 उव्वट्टित्ता तओ एत्थं खरो होउं पुणो मओ ॥४२॥
 संजाओ रासहत्ताए छब्भवे य निरंतरं ।
 ताहे माणुस्सजाईए समुप्पण्णो पुणो मओ ॥४३॥
 पुणो माणुस्सजाईए जाओ वणचरो इमो ।
 तओ विमरिउं जाओ मज्जारो अइकूरओ ॥४४॥
 तओ वि नरयं गंतुं उप्पण्णो त्रक्कियत्तणे ।
 तत्तो कुट्ठी भवेऊणं बहुदुक्खऽदिओ मओ ॥४५॥
 किमीहिं खज्जमाणस्स पंचासं वरिसाणित्ता ।
 जाऽकामनिज्जरा जाया तीए देवत्तणं गओ ॥४६॥
 तओ इहं नरीसत्तं लद्धूणं सत्तमिगओ ।
 तिरिक्ख-नरएसेवं कुनरेसुं च गोयमा ॥४७॥
 बहुं कालं भमित्ताणं एस स च्चेव ईसरो ।
 संपइ गोसालगो जाओ अओ उडुं कहेमहं ॥४८॥

अत्थि इहेव जंबुद्दीवे दीवे भारहे वासे सरवणे नाम सन्निवेसे, अवि य -

१. ला. 'णीयत्तदो' ॥ २. ला. 'प्पण्णो तओ मओ ॥

धण-धण्ण-रिद्धिपउरो गो-महिसिसमाउलो परमरम्मो ।
उच्छु-जव-सालिकलिओ सर-वावी-कूव-सरिजुतो ॥४९॥

तत्थ णं गोबहुले णामं माहणे परिवसइ, जो य-

रिद्धीए वेसमणो गोहणबाहुल्लयाएं कुचियण्णो ।
धण्णेण तिलयसेट्ठी सव्वत्थ वि सो अपरिपूओ ॥५०॥

वेयचउक्कविहण्णू सडंगवी धम्मसत्थपारगओ ।
मीमंस-नायवित्थर-पुराणमाईसु सुवियङ्गो ॥५१॥

तेणं गोबहुलेणं बंभणेणं तत्थ सरवणे सन्निवेसे एगा अइमहंती गोसाला कारिया,
अवि य-

थंभसयसन्निविट्ठा समत्थजण-गोरुयाण आवासा ।
जत्थ निवसंति ताई सीया-ऽऽयवभयविमुक्काई ॥५२॥

एत्तो य अत्थि नियसिप्पकलाकुसलो मंखली नाम मंखो,
जो य-

दंसेइ सयललोयाण निययवावांरवावडमणाण ।
चित्तं कम्मविवागं लोभेणं अत्थलाभस्स ॥५३॥

तस्स य मंखलिस्स मंखस्स अत्थि भद्दा नामं भारिया, जा य-
सुकुमालपाणि-पाया लक्खण-वंजणगुणेहिं संपण्णा ।
लावण्ण-रूव-जोव्वणपगरिसकलिया पियाऽऽलावा ॥५४॥

सा य अण्णया कयाई तेणं नियपइणा सह विसयसुह-मणुहवंती जाया
आवण्णसत्ता, अवि य-

गब्भभरनीसहंगी आपंडुकवोलसामथणवट्ठा ।
परियत्तियलावण्णा कमसो अन्न व्व सा जाया ॥५५॥

सो य तीए सह गांमाओ गामं नगरओ नगरं मंखफलयहत्थगओ परिभमंतो
समागओ तं सरवणं सन्निवेसं कओ य तेण तीए गोसालाए एगत्थपएसे भंडनिक्खेवो
मग्गिओ य तेण सव्वत्थ वि सन्निवेसे वरिसायालपाउगो उवस्सओ । जाव य न लद्धो
ताव तत्थेव ठिओ । तत्थ य सा भद्दा नवण्हं मासाणं बहुपडिपुण्णाणं अद्धट्टुमाण राइंदियाणं

वीडकंताणं पसूया दारयं, अवि य -

सुपसत्थलक्खणधरं माणुम्माणप्पमाणपडिपुण्णं ।
 ससिसरिसकंतिकलियं पसवइ सा दारयं रुइरं ॥५६॥
 वत्ते पसूइकम्मे बारसमदिणम्मि तस्स तुट्टेहिं ।
 अम्मा-पिईहिं विहियं गुणनिप्पण्णं इमं नामं ॥५७॥
 जम्हा गोसालाए जाओ अम्हाण दारओ ऐसो ।
 गोसालगा त्ति तम्हा नामं एयस्स होउ त्ति ॥५८॥
 परिवडुंतो कमसो जाओ एसो य अट्टवारिसिओ ।
 सिक्खाविओ य पिउणा साइसयं निययसिप्पं तं ॥५९॥
 उम्मुक्कबालभावो संपत्तो जोव्वणम्मि नियफलयं ।
 पडिचक्कं कारुणं गामं गामेण परिभमइ ॥६०॥

एतो य अहयं गोयमा ? तीसं वासाइं गिहवासे वसित्ता अम्मा-पिईहिं देवलोगं गएहिं लोगतियदेवेहिं पडिबोहिओ गहियतित्थयरल्लिगो पव्वइओ । तओऽहं पढमं वासं अद्धमासं अद्धमासेणं खममाणो तावसासमे पढमपक्खखमणं कारुण अट्टियगामं गओ । दोच्चे य वासे मासं मासेण खममाणो रायगिहनगरनालंदाबाहरिया तंतुवायसालाए ठिओ । तओ तत्थ अहं मासाओ मासाओ पारणयं करेमि ।

इओ य सो गोसालगो मंखफलगहत्थगओ गामाणुगामं अडमाणो तत्थेव रायगिहे नगरे समागओ । तत्थेव नालंदाए तहिं चेव तंतुवायसालाए भंडनिक्खेवं करेइ । अण्णत्थ वरिसाकालपाउग्गमुवस्सयमलभमाणो तत्थेव तंतुवायसालेगमदेसम्मिथक्को ।

एतो य अहं पढममासक्खमणपारणए, पविट्टो रायगिहं । तत्थ वि उच्च-नीय-मज्झिमकुलेसु परिभमंतो पत्तो विजयस्स गाहावइस्स गिहं । सो वि ममं दट्टूण भत्तिब्भरनिब्भरो अब्भुट्टिओ, अवि य -

दट्टूण ममं इंतं भत्तिवसुल्लसियबहलरोमंचो ।
 सहस च्चिय अब्भुट्टइ मुयइ तओ पाउयाजुयलं ॥६१॥
 अणुगच्छिऊण सत्तट्टपयकमे तिप्पयक्खिणं काउं ।
 भत्तीए वंदित्ता जाइ तओ रसवईगेहे ॥६२॥

तो सव्वकामगुणियं ततो धेत्तूण विविहआहारं ।
 पडिलाभइ परितुट्ठो फासुय-एसणियदाणेणं ॥६३॥
 ततो गाहग-दायगदव्वविसुद्धेण तेण दाणेणं ।
 विजयस्स गिहे सहसा पाउब्भूयाइं दिव्वाइं ॥६४॥
 पहयाओ दुंदुहीओ आगासतलम्मि गहिरघोसाओ ।
 घुट्टं च महादाणं चेलुक्खेवो कओ तुरियं ॥६५॥
 गंधोदयं पवुट्टं आगासाओ सुरेहिं पक्खित्ता ।
 बहुकणय-रयणकलिया वसुहारा किरणचिचइया ॥६६॥

एयं च एवंविहं सोऊण समागओ सव्वो वि नयरलोगो, जंपइ य परोप्परं
 विम्हउप्फुल्ललयणो, अवि य-

धण्णे णं कयपुण्णे सुलद्धजम्मे य सहलजीए य ।
 गाहावइ विजए णं जेणं पाराविओ भयवं ॥६७॥
 जस्सऽणुभावेण गिहे पाउब्भूयाइं पंच दिव्वाइं ।
 तं सोउं गोसालो कोरुहलपूरिओ एइ ॥६८॥
 पेच्छइ य तं तह च्चिय, निगंछंतं च तग्गिहाओ ममं ।
 दट्टूण हट्टुट्ठो वंदइ तिपयाहिणं काउं ॥६९॥
 भणइ य 'तुब्भे मज्झं धम्मायरिया अहं तु तुम्हाणं ।
 अंतेवासी भयवं !' सुणेमि नो तस्स वयणमहं ॥७०॥

तओऽहं गोयमा ! तीए चेव तंतुवायसालाए बीयं मासखमणं पडिवज्जामि पारणए य
 रायगिहे चेव आणंदस्स गाहावइस्स गिहं अणुप्पविट्ठो तेण वि जहा विजएणं तहा
 सव्वकामगुणिएणं पाराविए । एवं तइए वि मासखमणपारणगे सुनंदेणं गाहावइणा
 खज्जगविहीए पाराविए । तओ चउत्थे मासखमणे कत्तियपुण्णिमाए तंतुवायसालाओ
 पडिनिक्खमामि । रायगिहनयरपच्चासण्णे कोल्लगसन्निवेसे गच्छामि । तत्थ य बहुलस्स
 माहणस्स गिहं अणुपविट्ठे, तेण वि जहा विजएणं तहा महु-घयसंजुत्तेणं परमन्नेणं
 पाराविए, तहेव पंचदिव्वाइया सव्वा विभूई जाया ।

इओ य से गोसालगे मंखलिपुत्ते ममं तंतुवायसालाए अपिच्छमाणे तं सव्वं
 नियभंडोवगरणं माहणाणं दाऊण सिंरं मुंडावित्ता ममं गवेसमाणे कोल्लगसन्निवेसं समागए ।

तहेव जणवायं सोऊण चित्तेइ जहा-‘न एयारिसा अन्नस्स इड्ढीता भवियव्वमित्थ मम धम्मापरिणं’ ति । गवेसमाणे जेणेव ममं [?अंतिए] तेणेव समागए, ममं पासित्ता हट्टुट्टे तिपयाहिणं काऊणं वंदइ, वंदित्ता य भणइ-‘तुब्भे णं भयवं ! मम धम्मायरिया, अहं तुब्भंतेवासी’ । तं च सोऊण अहं मोणेण चैव संठिओ । तओऽहं गोसालेण सद्धिं पणियभूमीए छ व्वासाइं सुह-दुक्खं लाभमलाभं सक्कारमसक्कारं पच्चणुब्भवमाणे अणिच्चजागरियं विहरित्था ।

अण्णया य सरयकालसमयंसि अप्पवुट्टिकायंसि गोसालेणं सद्धिं सिद्धत्थगामाओ नगराओ कुम्मगामं नगरं संपट्टिए तस्स णं सिद्धत्थगामनगरस्स कुम्मगामनगरस्स य अंतराएणं तिलथंबं पुप्फियं गोसाले पासित्ता ममं वंदइ, वंदित्ता य पुच्छइ - ‘भयवं ! किमेस तिलथंबे निप्फज्जिस्सइ किं वा नो इमे य कुसुमजीवे मरिऊणं कर्हि उववज्जिस्संति ?’ । तओ मए भणियं-‘निप्फज्जिस्सइ, इमे य सत्त कुसुमजीवा मरिउं एत्थेव एगाए तिलसंगलियाए सत्त तिला भविस्संति’ । तओ गोसालगो एयं सोच्चा पडिवज्जइ, न सहइ । असहमाणो ममं अंतियाओ सणियं सणियं ओसरइ, ओसरित्ता तिलथंबगस्स अंतियं समागंतूण ‘एस भयवं मिच्छवाइ भवउ’ ति चिंतंतो तं तिलथंबगं सलिट्ठुं उप्पाडित्ता मग्गस्स बीयपासेणं पक्खविऊणं मम समीवमागओ । तत्थ दिव्वे अब्भवह्लए संजाए, तक्खणं चैव वरिसिए । तेण य उदएणं से तिलथंबे भूमीए पयट्टिए निबद्धमूले जाए । तओ गोयमा अहं गोसालगेणं सद्धिं कुम्मगामं नगरं गओ । तस्स नगरस्स बहिया वेसियायणो नाम बालतवस्सी आयावणं आयावेइ । तस्स य महाजडाभाराओ उण्हेणं ताविज्जमाणीओ जूयाओ भूमीए निवडंति । अवि य -

खरतरणिक्करणसंतावियाओ सलवलिय तस्स सीसाओ ।

निवडंति भूमिवट्ठे जूयाओ तो इमो ताओ ॥७१॥

उद्धरिय दयाजुत्तो पुणो वि पक्खवइ निययसीसम्मि ।

तं दट्ठुं गोसालो गंतूणं तस्समीवम्मि ॥७२॥

जंपइ ‘किं तं सि मुणी उयाहु सेज्जायरो सि जूयाणं ? ।

एवं भणिओ वि इमो न तस्स पच्चुत्तरं देइ ॥७३॥

तो गोसालो पुणरवि तं चैव पयंपई, ण य इमो वि ।

आढाइ तस्स वयणं अच्छइ तुण्हकओ चैव ॥७४॥

गोसालो वि हु वंकत्तणेण तं चेव भासइ पुणो वि ।
तस्स रिसिस्स पभावं अमुणंतो कोवसंजणियं ॥७५॥

तओ तइयवारं पि जाव न विरमइ गोसालगो ताव फुरुफुरायमाणाहरो
तिवलीतरंगभंगुरभालयलो कयगुंजद्धसरिससुरत्तलोयणजुयलो कुविओ सो वैसियायणरिसी, अवि
य-

रोसवसविप्फुरंतो दंडाहयदिट्टिगरलभुयगो व्व ।
सत्तट्टपयाइं समोसरित्तु गोसालगवहत्थं ॥७६॥
सो मुयइ तेयलेसं फुरंतजालाकलावदुप्पिच्छं ।
धूमंधयारबहलं तं दट्टुमहं विचित्तेमि ॥७७॥
करुणाए जह 'एसो मा डज्जउ तां मुयामि नियतेयं' ।
इय चित्तिउं विमुक्को हिमनियरसमो निओ तेओ ॥७८॥
तेण वि सो पडिहणिओ न चयइ गोसालगस्स देहम्मि ।
जावाऽऽबाहं काउं ता चित्तिइ सो रिसी एवं ॥७९॥
'हंत अपुव्वं एयं जं मम तेओ वि निप्फलो जाओ' ।
इय चित्तंतेण अहं दिट्ठो तो जाणए एवं ॥८०॥
जह 'एस को वि होही इमस्स देवज्जयस्स तणओ त्ति ।
तेण इमो पडिहणिओ मह तेओ' चित्तिउं एवं ॥८१॥
संहरिउं नियतेयं परेण विणएण खामइ ममं ति ।
'संगयमेयं भंते ! गयगयमेयं भणिरुणं ॥८३॥

तओ तम्मि खामित्ता गए गोसालगो पुच्छइ-'भयवं ! किमेस जूयासेज्जायरो जंपइ ?'
मए भणियं जहा-'तुमं एएण दड्ढे आसि, परं मए सीयतेयलेसाए रक्खिओ, तं च खामित्ता इमो
गओ' । तओ गोसालगो वंदित्ता पुच्छइ-'भयवं ! कहं संखित्तविउलतेयलेसा समुप्पज्जइ ?'
मए भणियं जहा-'जो छट्ठंछट्ठेणं तवोकम्मेणं पारणए एगाए सनहाए कुम्मासपिडियाए एणेणं
नीरचुलुएणं उड्डं बाहार्हि आयावेमाणे सो संखित्तविउलतेयलेसो भवइ । तओ गोसालगो एयमट्टं
'तह'त्ति पडिसुणेइ ।

अण्णदियहम्मि य अहं गोसालगेण सद्धि कुम्मगामाओ नगरओ सिद्धत्थगामं

नगरं संपट्टिओ । जाव य तं पएसं पत्तो जत्थ सो तिलथंबो ताव भणियं गोसालएणं 'तुब्भे णं भंत ! तया मए पुच्छिया एवं वयह जहा-निप्फज्जिस्सइ एस तिलथंबए-तं णं भंते ! मिच्छ जायं, जओ न दीसइ सो तिलथंबओ' । मया भणियं 'न मिच्छ किंतु जेया तुमए उप्पाडित्ता सलेट्टु हो मग्गस्स दुइयपासे पक्खित्तो तया चेव वासे निवडिए, तेण य सो निबद्धमूलो जाओ, तं पेच्छ एस णं सो तिलथंबओ, इमे य ते सत्त कुसुमजीवा एग्गए तिलसंगलियाए सत्त तिला संजाया' सो वि तत्थ गंतुं तं तिले करयलंसि पप्फोडेइ । तओ तस्स गोसालगस्स तिले गणेमाणस्स चित्तम्मि ठियं जहा- 'सव्वजीवा मरिउं तत्थेव तत्थेव उप्पज्जित्ता पउट्टपरिहारं परिहरंति जहा इमे तिलजीवा ! एस णं गोयमा गोसालगस्स मंखलिपुत्तस्स पउट्टपरिहारे नाम कुग्गहे समुप्पण्णे । एत्तो अणंतरं च मम पासाओ अइक्कंते, जहाभणियविहाणेण य तं तेउलेसं साहेइ ।

अण्णया य तस्स गोसालगस्स छद्दिसाचरा अंतियं समागया जहा पुव्वं तथा जिणसदं पगासमाणो विहरइ । तं नो खलु गोयमा ? गोसाले मंखलिपुत्ते जिणे, किंतु अजिणे मम सीसाभासे' ।

तं च सोऊण सव्वो वि सावत्थीजणो परोप्परमेवं पयंपइ 'नो खलु देवाणुप्पिया ! गोसाले जिणे, किंतु मंखलिपुत्ते भगवओ सीसाभासे' । तं च बहुजणजंपियं सोऊण कुविओ फुरफुरंतदसणच्छओ आयावणभूमीओ उत्तरित्ता हालाहलाए कुंभकारीए कुंभकारावणंसि आजीवियसंघपरिवुडो महामरिसवसपरिगओ जाव चिट्ठइ ताव भगवओ महावीरस्स अंतेवासी आणंदे नाम तवस्सी छट्टक्खमणपारणगंसि भगवंतंअणुजाणाविरुण सावत्थीए नगरीए भिक्खट्ठा अणुप्पविट्ठे तस्स कुंभकारावणस्स अदूरसामंतेण गच्छइ । तं च गोसालगो दट्टूण भणई- 'एहिइओ अहो आणंदा ! मममेगमक्खाणयं सुणेहि' । तओ आणंदो गोसालगसमीवं गओ । तओ गोसालगो कहाणं कहिउमाढत्तो, जहा-

'एगम्मि नयरे बहवे वाणियगा अत्थत्थिणो परिवसंति । ते य अण्णया कयाइ सव्वेसि मिलिरुण सगडीसागडेणं दिसायत्तं पट्टिया ।

तत्थ य अंतराले एगा महाडवी निरोदगा बहुपच्चवाया । तत्थ य पविसंतेहिं गहियं उदयं । तं च अडवीए अद्धमगे गयाणं खीणं । तओ तेहिं सव्वओ उदगस्स गवेसणं कुणमाणेहिं दिट्ठमेगं वणसंडं, अवि य-

अइकसिणनिद्धबहुरुक्खसंकुलं भरियमेहसमवणं ।

पवणुव्वेह्लिरपल्लवकरेहिं हक्कारइ व्व दढं ॥८३॥

१. ला. तए ॥ २. ला. 'वसगओ ॥ ३. ला. सगडीसग' ॥ ४. सं.वा.सु. एगाडडवी ॥ ५. ला. 'संतेहिं पभूयमुदगं गहियं । तं ॥

अइपक्कसाउफलभरनमंतसीसेहिं पायवगणेहिं ।
 आवेंताणं ताणं कुणइ पणामं व सविसेसं ॥८४॥
 पवणवसचलिरकोमलसरललताबाहुदंडजुयलेहिं ।
 आर्लिगइ व्व दूराओ आगए वणियसंघाए ॥८५॥
 सागयवयणं पिव कुणइ ताण कलविहगविहसदेहिं ।
 तह अघं व पयच्छइ पडंतपक्कप्फलभरेहिं ॥८६॥
 इय एवमाइबहुविहसुयणसहावं तयं समल्लीणा ।
 नीरऽत्थी ते वणिणो कुणंति नीरस्स अन्निसणं ॥८७॥
 तो तेहिं भमंतेहिं बहुमज्जे तस्स वणनिगुंजस्स ।
 वम्मियसिहरं एक्कं दिट्ठं पडिसिहरपरिकलियं ॥८८॥

तओ ताण तमवलोइंताणं समुप्पण्णो एरिसो वियप्पो जहा-‘वम्मियसिहरे नीरं संभवइ, ता एयस्स वम्मियस्स पुव्विल्लं सिहरं भिंदामो, मा कयाइ उदगं समासाएमो !’ तओ एगवक्कयाए तं पुव्विल्लं सिहरं ते भिदिउं पयत्ता । तओ खणंतरेणं तेहिं तत्थ उदगं समासाइयं, अवि य-

अच्छं पच्छं विमलं सुसीयलं साउ फलिहसमवण्णं ।
 अइतणुयं तत्थ इमेहिं पावियं उदगवररयणं ॥८९॥

तओ हट्टुट्टा पाणियं पियंति, पवहणाइं पर्ज्जति, भायणाइं भरंति । एवं च ताणं सत्थीभूयाणं जाओ संलावो जहा-भो ! एयस्स वम्मियस्स पुव्विल्ले सिहरे भिण्णे उदगरयणं समासाइयं ता सेयमम्हाणं एयस्स बीयं सिहरं भिदित्तए, मा एत्थ अण्णं किं पि सोहणं पावेमो !’ । तहेव एगवक्कयाए बीयं सिहरं भिदंति । तत्थ य तेहिं दिट्ठं सुवण्णं, अवि य-

अट्टगुणसंपउत्तं कंतिल्लं पवरवण्णपरिकलियं ।
 पत्तं सुवण्णरयणं अण्णसरिसं तहिं तेहिं ॥९०॥

तं च दट्टूण हरिसभरनिब्भरंगेहिं तं पुव्विल्लं भंडं परिचइऊणं भरियाइं पवहणाइं सुवण्णस्स । तओ पुणो वि तइयवारं पि चित्तिउं पयत्ता जहा-‘पढमे नीरं, बीए सुवण्णं, ता तइयं सिहरं भिंदामो, मा कयाइ एत्थ रयणाइं पावेमो !’ । इइ परिभाविऊणं भिदियं तइयं पि सिहरं तेहिं । दिट्ठो य तत्थ पहाणरयणनियरो, अवि य-

१. सं.वा.सु. पइच्छइ ॥ २. सं.वा.सु. मज्जं ॥ ३. सं.वा.सु. सावियं ॥ ४. सं.वा.सु. पिच्छं ॥
 ५. सं.वा.सु. समाइयं ॥

पसरंतनिययकिरणावलीर्हि पडिखलियसूरकरपसरो ।
बहुवण्णो तेर्हि तर्हि पत्तो रयणाण संघाओ ॥९१॥

तओ बहुसुवण्णयं परिचइऊण भरियं रयणाणं सगडीसागडं । समासत्था चउत्थयं पि भणिउमाढत्ता-‘जहा य पढमे नीरं, बीए सुवण्णं, तइए रयणाइं उवलद्धाइं ता चउत्थयं पि सिहरं भिदामो, मा कयाइ इत्थ वैज्जाइयं उवलभामो !’ । तओ ताणं मज्झाओ एगेणं बुद्धिकलिएणं परिणयवएणं भणियं वाणियगेणं जहा- ‘भो भद्दा ! तइएणं चेव तुम्हाणं सव्वं पज्जत्तं, मा भिदह एयं चउत्थसिहरं पाएणं सपच्चवायं भवइ’ । तेर्हि भणियं-‘अरे मुरुक्ख ! किमित्थियं पि न याणसि जत्थ तिसु एवंविहाओ वत्थूओ लद्धाओ तत्थ चउत्थे अण्णं किंपि पहाणयरं भविस्सइ, भंतिओ तुमं बुद्धीए’ । तेण भणियं-‘जइ एवं पि ओरालवत्थूसु लद्धासु न तिप्पह, मम वयणं हियं पि न पडिवज्जह, तो नाऽहं तुम्हाणं मज्जे’ । ओसरिऊण निविट्ठो नियसगडीए । इयरे वि तव्वयणमवगन्निऊण भिदिउं पवत्ता चउत्थयं सिहरं । जाव खणमेक्कं भिदंति ताव खणित्तेणं दिट्ठीविसं सप्पं संघट्ठिति, अवि य -

अंजणनियरसरिच्छं रत्तच्छं चवलजमलजीहालं ।

फुडवियडकुडिलउक्कडअइभीमफडाकडप्पिल्लं ॥९३॥

उगविसं चंडविसं लोहागरधम्ममाणसमघोसं ।

अइदीहमहाकायं विसपूरियदसणनयणजुयं ॥९४॥

धरिणित्थिवेणिभूयं कुडिलगंइं नियसुहासणासीणं ।

दिट्ठीविसं भुयंगं झत्ति खणित्तेण घट्ठंति ॥९५॥

तओ सो तेर्हि घट्ठिओ समाणो कोवं गिण्हइ, सरसरसरस्स वम्मियसिहरमारुहइ, सूरमंडलं निज्जाएइ । तओ ते वाणियए पलोएइ । तो तेणं पलोइया समाणा ससगडा सबइल्ला सभंडमत्तोवगरणा भासरासी जाया । सो य एगो वाणियगो जो तेर्सि हिओव-एसदायगो सो देवयाए अणुकंपाए सभंडमत्तोवगरणो नियनयरं खिप्पं संपाविओ ।

ता भो आणंदा ! जहा ते वाणिया लद्धेसु वि ओरालेसु भोगसाहणेसु तह वि अतिप्पमाणा चउत्थसिहरभिदणपरा खयं गया तथा तुज्झ वि धम्मायरिओ लद्धाए वि ओरालाए अणणसरिसाए रिद्धीए सदेव-मणुयाऽसुराए परिसाए न तिप्पइ किंतु मम सम्मुह ‘गोसालं मंखलिपुत्तं मम सीसाभासं’ ति भणइ । ता जइ न ठाहिइ तओ अहं

१. सं.वा.सु. पडिफलिं ॥ २. ला. भणिउं समा ॥ ३. ला. वज्जाइं पावेमो ! ॥ ४. सं.वा.सु. *णं प* ॥

५. सं.वा.सु. *सु न ॥ ६. सं.वा.सु. *गयं ॥

नियतवोतेएणं सपरियणं भासरासिं करिस्सामि । ता गच्छहि तुमं, कहेहि निययधम्मायरियस्स-
 तुमं एगं रक्खिस्सामि हियभासग ति काउं, जहा सो वाणिओ तीए देवयाए रक्खिओ” । तओ
 आणंदो गोसालगस्सं ति एयमट्ठं सुच्चा भीओ गोसालगस्संतियाओ पडिनिक्खमिक्खा जेणेव
 समणे भगवं महावीरे तेणेव उवागच्छइ । समणं भयवं महावीरं तिपयाहिणीकारुण वंदइ,
 वंदित्ता य एवं वयासी-“जहा णं भंते ! अहं तुम्हेहिं अब्भणुण्णाए सावत्थीए नयरीए
 भिक्खट्ठाए पविसामि, गोसालगस्स अदूरसामंतेणं वच्चामि, तए णं गोसालगो ममं सद्दाविरुणं
 एवं वयासी जहा-आणंदा ! निसुणाहि ममं एगं अक्खाणयं इच्चाइ जाव भासरासिं करिस्सामि
 ! ता किं पहु भंते ? गोसालगो भासरासिं करित्तए हंताऽपभू ?” [भगवया भणियं-“पभू]परं
 णो चेव णं अरहंते भगवंते, आणंदा ! जारिसिया णं गोसालगस्स तेउलेसा तारिसिया णं
 अणंतगुणा समणाणं निग्गंथाणं; परं खंतिक्खमा समणा भगवंतो, जारिसिया णं समणाणं
 निग्गंथाणं तेउलेसा भवइ । तारिसिया णं अणंतगुणा थेरणं भगवंताणं तेउलेसा भवइ; परं
 खंतिक्खमा थेर भगवंतो, जारिसिया णं थेरणं भगवंताणं तेउलेसा भवइ तारिसिया णं अणंतगुणा
 अरहंताणं भगवंताणं तेउलेसा भवइ; परं खंतिक्खमा अरहंता भगवंतो भवंति, ता गच्छ तुमं
 आणंदा गोयमाईए निग्गंथे निग्गंथीओ य भणाहि जहा-गोसालगो समणाणं निग्गंथाणं मिच्छं
 विप्पडिवण्णो, ता मा कोइ धम्मियाए वि चोयणाए चोएउ, मा भासरासीकिज्जिही” । तओ
 आणंदो तह ति विणएणं पडिसुणित्ता गोयमाईणं समीवं गओ, वंदित्ता य भणइ जहा-‘अहं
 भगवया अब्भणुण्णाओ सावत्थिं भिक्खट्ठा अणुप्पविसामि इच्चाइ जाव मा कोइ धम्मियाए
 वि चोयणाए चोएउ, मा भासरासीकिज्जिही’ । एवं च आणंदो जाव गोयमाईणं कहेइ ताव
 गोसालगो समोसरणं पविट्ठो, अवि य-

रोसवसफुरफुरंतो आजीवियसयलसंघपरियरिओ ।

पविसरइ समोसरणे दीसंतो सयलपरिसाए ॥९५॥

ठारुणं जिणपुरओ पच्चक्खो नाइ सेलथंभो व्व ।

जंपइ निट्ठुरवयणं निल्लज्जो धिट्ठिमाकलिओ ॥९६॥

“सुट्ठु णं तुमं कासवा ? ममं एवं वयासी जं णं गोसाले मंखलिपुत्ते मम
 अंतेवासी, जो णं गोसालगो तव सीसो सो णं सोक्खे सुक्काभिजाई भवित्ता परिनिव्वुडो,
 अहं च णं तस्स गोसालगस्स सरीरं अणुपविट्ठो, जओ कासवा ! जो अम्हं दंसणे
 सिज्झइ सो सत्तपउट्टपरिहारे परिहरित्ता तओ सिज्झइ, तत्थणं अहं कासवा ! देवलोगाओ

चइऊणं गोयमस्स भारियाए कुच्छिसि गब्भत्ताए वक्कंतो, तओ नवहिं मासेहिं अद्धट्टमेहि
य दिवसेहिं जाओ अईवरूवसंपण्णो, अवि य-

कुसकुंडलचड्डुलओ सव्वजणाणंदकारओ सुहओ ।
कंदप्पसरिसरूवो उदाइनामेण संजाओ ॥९७॥
कोमारयपव्वज्जं गहियं संखाणयं पढेऊणं ।
बावीसं वरिसाइं पालित्ता तव्वयं ततो ॥९८॥
रायगिहनगरबाहिं उज्जाणे मंडिकुच्छिनामम्मि ।
तमुदाइस्स सरीरं चइउं एणिज्जगसरीरं ॥९९॥
पविसामि नियसमाहीए संजुओ सयललक्खणसमग्गो ।
सिद्धिकमपालणत्थं पढमम्मि पउट्टपरिहारे ॥१००॥
बीयम्मि य परिहारे उद्धंडपुरस्स बाहि रमणिज्जे ।
चंदोय्यरउज्जाणे मुयामि एणिज्जयसरीरं ॥१०१॥
पविसामि वरसरीरे मल्लारामस्स संतिए ततो ।
पालित्तु एक्कवीसं वरिसाइं वयविसेसेणं ॥१०२॥
मल्लारामस्स तणू चइऊणं अंगमंदिरुज्जाणे ।
चंपापुरीए बाहिं पविसामि मंडियसरीरे ॥१०३॥
तइए पउट्टपरिहारगम्मि पालित्तु वीसवासाइं ।
मंडियदेहं पि तओ चयामि वाणारसिपुरीए ॥१०४॥
काममहावणनामम्मि चेइए घेतु राहदेहं तु ।
इगुवीसं वासाइं पालेतु चउत्थपरिहारे ॥१०५॥
राहस्स वि तं देहं, आलभिया पुरवरीए बाहिम्मि ।
मुंचामि पत्तकालयवणम्मि नियसमयविहिणा उ ॥१०६॥
गिण्हामि रोहगुत्तस्स संतियं दढसरीरयं कमसो ।
अट्टारसवासेहिं पंचमयपउट्टपरिहारे ॥१०७॥
वेसालीनगरीए उज्जाणे कंडियायणे रम्मे ।
मुंचामि भारदाइस्स विग्गहं रोहगुत्तस्स ॥१०८॥

अज्जुणगस्स सरीरं, अणुपविसारिं कमेण विहिपुव्वं ।

सतरसहिं वासेहिं छट्ठमि पउट्टपरिहारे ॥१०९॥

सावत्थीनयरीए हालाहलकुंभकारिनामाए ।

कुंभारावणमज्जे मुयामि अज्जुणगदेहं तु ॥११०॥

गोसालगस्स देहं थिरं देहं सीय-वाय-उसिणसहं ।

उवसग्ग-खुहा-तण्हा-दंसाइखमं ति कारुणं ॥१११॥

तं सोलसवासाइं सत्तमयमि पउट्टपरिहारे ।

तेत्तीसयवाससए उ होंति सव्वे विमे सत्त ॥११२॥

तं सुट्ठु णं कासवा ! तुमं ममं एवं वयासि सो हु णं गोसालो मंखलिपुत्तो मम अंतेवासी” । तओ भगवं महावीरो गोसालगं भणइ-“गोसाला ! जहा कोइ चोरो गामेल्लएहिं परब्भमाणो कंचि निलुक्कणजोगं ठाणमपस्संतो उण्णालोमं वा कप्पासपोम्हं वा तणसूयं वा अंतरा दाऊण निलुक्कइ । तओ अत्ताणं अणावरियं पि आवरियं ति मण्णइ एवमेव तुमं पि गोसाला । अण्णेसंते अप्पाणं अण्णमिइ भणसि, तं न तुज्झ एयारिसं वोत्तुं जुत्तं जओ सो चेव तुमं नो अण्णो” । तओ गोसालो भगवया एवं भणिओ आसुरुत्तो समणं भगवं महावीरं उच्चावयाहिं आउसणाहिं आउसइ, उच्चावयाहिं उद्धंसणाहिं उद्धंसेइ, निब्भच्छणाहिं निब्भच्छेइ, तज्जणाहिं तज्जेइ, तज्जेत्ता य भणइ, अवि य-

हं भो न होसि अज्जं कासवया ! नट्टओ विणट्ठोऽसि ।

मह कोवजलणजालावलीहिं खयमेसि सलहो व्व ॥११३॥

संपइ न दीससि च्चिय होसि खणद्धेण भासरसि ति ।

न तुमं मुणसि विसेसं जेण महं अप्पणो तह य ॥११४॥

इय जंपंतं दट्ठुं कोवमहाजलणभासुरसरीरं ।

सव्वाणुभूइसाहू गुरुपरिभवमसहमाणो उ ॥११५॥

उट्ठित्ता गोसालग-सामीणं अंतरमि ठाऊणं ।

जंपइ फुडक्खरोहिं जह डियं एरिसं वयणं ॥११६॥

‘हं भो गोसालगा ! जो जस्स अंतिए किंचि अक्खरं वा पयं वा सिक्खइ सो तं देवयं पिव वंदइ नमंसइ पज्जुवासइ, तुमं पुण भगवया चेव मुंडाविए, भगवया चेव पव्वाविए, भगवओ चेव पसाएण इत्तियाए रिद्धीए भायणं जाओ, संपयं भगवओ चेव

मिच्छं संपडिवन्नो ! ता तुज्झ न जुज्जए एयारिसं वोत्तुं' । सो वि तं तारिसं हियमवि सव्वाणुभूइभणियं सोच्चा महु-घयपक्खेवेणं व हुयवहो गाढयरं पज्जलिओ तं सव्वाणुभूइं अणगारं नियतवोतेएण भासरसिं करेइ । पुणो तं चेव भणमाणो भयवंतं हीलेइ ।

एत्थंतरम्मि य दट्टूण वि नियसरीरावायं उट्टिओ परिसामज्झाओ नियगुरुभत्ति-परावसीकयमाणसो सुनक्खत्तो नाम महरिसी । तहेव सो विभणइ । तओ पुणो वि आसुरुत्तेणं सो वि नियतवोतेएणं अच्चत्थं परिताविओ, तेण य परिताविज्जमाणो समणं भगवं महावीरं वंदइ नमंसइ सयमेव पंच महव्वयाइं उच्चारेइ, गोयमाईए समणे समणीओ य खामित्ता कालं गओ ।

तम्मि य कालगए पुणो वि गोसालगो तहेव भगवंतं हीलितं पयत्तो । तओ भगवया सयमेव भणिओ जहा-गोसालग ! मए चेव पव्वाविओ, मए चेव मुंडाविओ, इच्चाइ सव्वं सयमेव भणइ जाव ममं मिच्छं पडिवन्नो । तओ भगवया जाव सयमेव भणिओ ताव रूसिरुण तेयासमुग्घाएणं समोहणइ भगवओ वहाय तेयं निसिरइ । तओ जीए णं तेएण मंगाणं वंगाणं मगहाणं कर्लिगाणं मालवगाणं अच्छणं कच्छणं पोढाणं लोढाणं वज्जीणं मालीणं कोसलाणं अवहाणं सुभुत्तराणं भासरसीकरणाए सा तेउलेसा महागिरिवरस्स व घाउक्खलिया भगवओ सपक्खं पडिदिसिं परियंचइ । तओ सा तेउलेसा भगवओ सरिरे । अपहुप्पंती आयाहिणं पयाहिणं करेत्ता तमेव गोसालगसरीरं निद्वहेमाणी अंतो अमुप्पविट्ठ । तओ सो गोसालगो तीए नियतेउलेसाए डज्झमाणो भणइ-‘हं भो कासवा ! तुमं मम तेएणं अन्नाइट्ठो समाणो अंतो छण्हं मासाणं छउमत्थो चेव कालं काहिसिं’ । भगवया भणियं-‘अहं णं एत्तो अन्नाइं सोलसवासाइं जिणो सुहत्थी केवलपरियागेण विहरिस्सामि, तुमं पुण एएणं चेव नियतेएणं डज्झमाणो अंतो सत्तरत्तस्स छउमत्थो चेव कालं काहिसिं’ । तओ भगवं महावीरो गोयमाई समणे आमंतेत्ता एवं वयइ, अवि य-

‘जह किल भो तुसरसी भुसरसी तह य तिणगरसी य ।

निद्वड्ढा जलणेणं नि किं पि कज्जं पसाहेइ ॥११७॥

तह एसो वि असारो गोसालो न य चएइ काउं जे ।

उवसग्गं, ता तुब्भे पडिचोयह धम्मवयणेहिं’ ॥११८॥

तो समणेहिं एसो पुच्छहिं निरुत्तरो कओ तह य ।

पडिचोइओ यं सम्मं जहवट्ठियरूवकहणेण ॥११९॥

‘हा हा अणज्ज निग्घण ! नियगुरुपडणीय ! धम्मपब्भट्ट ।
 भमिहिसि भवे अपारे जिणस्स आसायणं विहिउं ॥१२०॥
 जं च हया गुणनिहिणो सुसाहुणो हियपलाविणो तुज्झ ।
 तं मण्णे जिणबोही दूरं दूरेण तुह नट्ठा’ ॥१२१॥
 एवं भणिओ कुविओ बाहं साहूण काउमचयंतो ।
 रोसेण धंगधर्गितो चिट्ठइ जह गयविसो सप्पो ॥१२२॥

ते य आजीविगा समणा गोसालं तह निरुत्तरं कज्जमाणं दट्टुणं केवि भगवंतं
 उवसंपज्जंति, केवि गोसालं चेवं पडिवज्जंति ।

तओ गोसालगो जस्सट्टाए हव्वमागओ तमत्थं असाहेमाणो दीहुन्हे नीसासे
 नीससमाणो दाढियालोमाइं लुंचमाणो अंवालयं कंडुयमाणो दो । वि करयले पप्फोडित्ता
 धुणमाणो दाहिणपाएण भूमि कुट्टेमाणो ‘हहा अहो हओऽह’मिति भणमाणो समणस्स
 भगवओ महावीरस्स अंतियाओ पडिनिक्खमिक्खा जेणेव सावत्थी नयरी जेणेव हालाहलाए
 कुंभकारावणे तेणेव उंवागच्छइ । तओ सावत्थीए बहुजणो अण्णमण्णस्स एवमाइक्खइ
 “एत्थणं संपयं सावत्थीए कोट्टुए उज्जाणे दो जिणा परोप्परमुल्लवंति-‘एगे वयइ तुमं पुव्वं
 कालं काहिसि अण्णे वयइ तुमं पुव्वं कालं काहिसि’ तत्थ के सम्मावाई के
 मिच्छावाई?” तत्थ जो पहाणो सो भगवंतं सम्मवाई वयइ गोसालं मिच्छावाई वयइ ।
 तत्थ य कुंभकारावणंसि गोसालगो किं काउमारद्धो, अवि य-

अंबउणगहत्थगओ पियमाणो मज्जपाणगं विविहं ।

गायंतो नच्चंतो वारंवारं अभिरमेइ ॥१२३॥

तीए य कुंभकारीए(?करिए) पुणो पुणो अंजलिं पकुव्वंतो ।

सीयलयमट्टियापाणएण गायाइं सिंचंतो ॥१२४॥

एवं सो दाहऽत्तो डज्जंतो निययतेउलेसाए ।

एवंविहचेट्टाओ कुणमाणो चिट्टुए जाव ॥१२५॥

ताव य अयंपुलो नाम आजीविओवासगो रयणीए संजायसंसओ समागओ
 नियधम्मायरियसगासं । तं च तहाविहचिट्टापरायणं दट्टुण लज्जिओ सणियं सणियं
 पच्चोसक्कइ । तं च पच्चोसक्कमाणं आजीविया थेरा एवं वयंति-आगच्छ इओ अयं-
 पुला ! गओ य अयंपुलो ताण सगासं । भणिओ य तेहि-भद्द ! तुह रयणीए एयारिसो

संसओ समुप्पण्णो 'किं संठिया णं हल्ला ?' भद् ! किं सच्चमेयं हंताऽसच्चं ?" [अयंपुलेण भणियं-'सच्चं'] तओ तेहिं भणियं-जइ एवं तो पुच्छ नियधम्मायरियं गोसालगं गंतुं, जओ तुह धम्मायरिओ सिञ्जिउकामो अपच्छिमं किरियं पयंसेमाणो चिट्ठइ । तओ सो अयंपुलो हट्टुट्ठो गोसालगसमीवं गओ । तिपयाहिणपुरस्सरं गोसालगं वंदित्ता निसन्नो । तओ गोसालगेणं भणिओ-"हं भो अयंपुला ! अज्ज तव पुव्वरत्ता-वस्तकालसमयंसि कुडुंबजागरियं जागरमाणस्स एयसंसओ समुप्पण्णो जहा 'केरिसियाणं हल्ला भवइ ?' तओ उप्पण्णसंसओ मम समीवं हव्वमागओ, तं भद् ! सच्चमेयं ?" अयंपुलेण भणियं-'हंता सच्चं' । जइ एवं तो वसीमूलसंठियाहल्ला भवइ । एवं च छिण्णसंसओ हट्टुट्ठो गिहं गओ । गोसालगो वि आजीवियथेरे सद्दाविरुण भणइ, अवि य-

"हं भो ! मं कालगयं जाणित्ता सुरहिसीयलजलेण ।
 ण्हाविज्जह लिपेज्जह गोसीसेणं सुगंधेणं ॥१२६॥
 आहरणेहिं विविहेहिं आहरेज्जाह तह नियंसेह ।
 वरहंसलक्खणं साडगं च कुसुमेहिं पूएह ॥१२७॥
 सावत्थीनयरीए मज्झंमज्जेण एव भणमाणा ।
 जह 'एसो हु जिणिंदो चउवीसाए जिणिंदाणं ॥१२८॥
 चउवीसमो महप्पा केवलनाणेण भवियसंधायं ।
 पडिबोहिरुण संपइ संपत्तो सासयं ठाणं' ॥१२९॥

एवं च महारिद्धीए महनीहरणं करेज्जह" । ते वि आजीवियथेरा तव्वयणं आणाए विणएणं पडिस्सुणंति तओ तस्स गोसालगस्स सत्तमदिवसे परिणममाणे चिंता समुप्पण्णा, अवि य-

'अजिणो जिणप्पलावी पावोऽहं पावकम्मकारी य ।
 रिसिघायगो जिणस्स उ अवण्णवाई य पडणीओ ॥१३०॥
 ता दुट्ठु मए विहियं जिणस्स आसायणा कया जं तु ।
 तं नूणं संसारे भमियव्वमणोरपारम्मि' ॥१३१॥
 इय चिंतिरुण तत्तो पुणरवि हक्कारिरुण ते थेरे ।
 विविहेहिं सवहेहिं सावित्ता तो इमं भणइ ॥१३२॥

“भो भो ? मं कालगयं जाणेऊणं मुहम्मि तिक्खुतो ।
 पाएण आहणेत्ता तत्तो वामम्मि पायम्मि ॥१३३॥
 सुंबेणं बंधित्ता कसिणबइल्लेहिं नयरिमज्झम्मि ।
 भामित्तु तिय-चउक्काइएहिं जंपिज्जह इमं तु ॥१३४॥
 जह ‘एसो गोसालो मंखलिपुत्तो न चेव य जिण्णिदो ।
 न य केवली य अलियं जिणसदं अप्पणो काउं ॥१३५॥
 जिणनाहपच्चणीओ पावो रिसिघायगो मओ इण्हि ।
 छउमत्थो चेव’ इमं भणित्तं छंडिज्जह सरीरं” ॥१३६॥
 एव भणंतो तो सो कालगओ ते वि तं वियाणेउं ।
 कुंभारियावणाओ झडत्ति दाराइं ढक्कंति ॥१३७॥
 खडियाए आलिहिउं सावत्थि तिय-चउक्कठणेसु ।
 भामिंति मट्टियामयकसिणबेल्लेहिं भणमाणा ॥१३८॥
 ‘एसो मंखलिपुत्तो’ इच्चाई सवहमोयणं काउं ।
 सणियं सणियं तत्तो महाविभूर्इए नीणंति ॥१३९॥

इओ य भगवं महावीरो सावत्थीओ निगंतूण मिढियगामं नाम नगरं गओ । तत्थ सालकोट्टुगे उज्जाणे समोसढो । तर्हि च भगवओ महारोगायंका पाउब्भूया अवि य-

रुहारेणं अइसारो दाहो पित्तज्जरो य दुव्विसहो ।
 समकालं चेव इमे उप्पण्णा भयवओ देहे ॥१४०॥

तं च दट्टुं पभूयलोगो भणित्तमाढत्तो - एवं खलु भगवं महावीरो गोसालगस्स तेउलेसाए अभिभूओ समाणो दाहवक्कंतीए छउमत्थो चेव कालं करिस्सइ ।

इओ य तत्थनगरे सालकोट्टुगस्स नाऽइदूरे अत्थि मालुयाकच्छओ नाम कच्छओ, जो य-

बहुगुच्छगुम्मवल्लीसंकिण्णो विविहतरुवरसणाहो ।
 फल्ल-पुप्फप्रत्तजुत्तो अइकसिणो मेहखंडं व ॥१४१॥

तस्स य मालुयाकच्छयस्स पच्चासण्णे सीहो नाम भगवओ अणगारो आयावणं आयावेइ, अवि य-

१. ला. “बइल्लेहिं ॥ २. ला. दट्टुणं प” ॥ ३. सं.वा.सु. “भूयो दाह” ॥ ४. ला. “ल-फुल्ल-प” ॥ ५. ला.

तवसोसिर्यललियंगो सूरभिमुहो य उडुबाहार्हि ।

छट्टंछट्टेण तवोकम्मेण निरंतरकएण ॥१४२॥

धम्मज्झाणोवगओ निच्चलकयलोयणो निरासंसो ।

आयावेइ महप्पा गुत्तो मण-वयण-काएहि ॥१४३॥

तस्स य ज्ञाणंतरियाए वट्टमाणस्स चिंता समुप्पणा-“एवं खलु मम धम्मायसियस्स समणस्स भगवओ महावीरस्स सरीरांसि महारोगायंका पाउब्भूया, तं जइ कहंचि कालं करिस्सइ तो भणिस्संति अण्णतित्थिया-जहा गोसालगेण भणियं तहा छउमत्थो चेव कालगओ’ । इमेण य एयारूवेण’ माणसिएणं महादुक्खेणं अभिभूओ समाणो आयावणभूमीओ पच्चोरुहिता मालुयाकच्छमणुपविसित्ता महया सदेणं कुहुकुहस्स परुण्णो । तओ भगवया भणिया नियसाहुणो जहा-‘भो सीहो अणगारो इमेणं एयारूवेणं दुक्खेणं अभिभूओ मालुयाकच्छयस्संतो रुयइ, ता लहुं सद्देह’ । ते वि ‘तह ति भणिऊण तत्थ गच्छंति, सीहं अणगारं एवं वयंति-‘सीहा । समणो भगवं सद्देवेइ’ । सो वि ‘इच्छं’ ति भणिऊण समागओ, भगवंतं वंदित्ता निसण्णो । तओ भगवया भणिओ-‘सीहा ! तुमं मा अधिइं करेहि, नो खलु अहं गोसालगस्स तवोतेएणं अभिभूओ अंतो छण्हं मासाणं कालं करिस्सामि । अहं णं इओ अद्धसोलसवासाणि विहरिस्सामि । तं गच्छ णं तुमं सीहा ! मिंढियगामं नगरं रेवईए गाहावइणीए गिहं । तत्थ तीए दुवे उसहकुडगा पक्का । एगो बिज्जउरोहिं मम निमित्तं, न तेण पओयणं । बीओ सट्टाए कुंभंडेहिं, तेण पओयणं । तं मग्गेहि’ । तओ सो सीहो हट्टुट्टो तत्थ गओ । दिट्टो य रेवईए आगच्छंतो । दट्टूणय हट्टुट्टा उट्टिया अणुगच्छित्ता य तिपयाहिणं काउं वंदइ, भणइ य-‘आइसह किमागमणपओयणं ?’ सीहेण जंपियं-देवाणुप्पिए । जे तए वेज्जोवएसेण दुवे उसहकुडगा पक्का, ताणं जो भगवओ निमित्तं कओ सो अच्छउ, जो य अप्पणो अट्टाए निव्वत्तिओ तं चेव देहि’ । रेवईए भणियं-‘सीह ! को एस नाणी जेणेयं मम रहस्सं तुह कहियं ?’ । सीहेण भणियं-‘भदे ! पेसिओऽहं भयवया तेलुकुबंधुणा, तेण चेव एयं रहस्सं मम कहियं’ । तओ रेवई हट्टुट्टा तमाणेउं सीहस्स पत्तंगंसि निसिरइ । तेण य पत्त-चित्त-वित्तसुद्धेणं दाणेणं रेवईए संसारो परिक्कीओ, देवाउयं च निबद्धं । तओ सो सीहो तमोसहं गहाय भयवओ समीवं समागंतूणं तं सव्वमोसहं भयवओ करयलंसि निसरइ । भगवं पि अमुच्छिओ तमाहारेइ । तेण भगवओ ते रोगायंका झ ति उवसामिया । पुणणवसरीरं च भयवंतं दट्टूण किं संजायं, अवि य-

तद्वा समणा सञ्चे, समणीओ हरिसनिब्भरा जाया ।

अइवियसिया य सङ्गा, हट्ठाओ सावियाओ वि ॥१४४॥

परिओसगया देवा, पमोइयाओ य सयलदेवीओ ।

आणंदियं असेसं पि तिहुयणं, किं च बहुणा उ ? ॥१४५॥

सच्छसरीरं भयवंतं नाऊणं पुच्छियं भगवया गोयमेणं-‘भगवं ! जो तुम्हाणं अंतेवासी सव्वाणुभूर्इ अणगारे गोसालेणं तवोतेएणं दङ्गे सो मरिऊणं कर्हि समुप्पण्णो ?’ । भगवया भणियं-‘गोयमा ? सहस्सारे कप्पे अट्टारससागरोवमाऊ दिव्वकंतिधरे तियसो समुप्पण्णो, ततो य चविऊण महाविदेहे सिद्धि पाविस्सइ’ । पुणो वि पुच्छियं गोयमेणं-‘जइ एवं तो सुनक्खत्तमहरिसी कर्हि गओ ?’ । भगवया भणियं-‘गोयमा ! अच्चुए कप्पे बावीससागरोवमठिई देवो समुप्पण्णो, सो वि तहेव महाविदेहे सिज्झिही’ । पुणो वि पुच्छियं गोयमसामिणा ‘सो तुम्हाणं कुसिस्सो गोसालगो मंखलिपुत्तो नियंतवोतेएणं निदङ्गे कालं काऊण कर्हिगओ ?’ । भगवया भणियं-‘गोयमा ! अरहंतपडणीओ समणघायगो बहुं असुहकम्मं निकाइऊणं आउनिबंधकाले पच्छयावपरद्धो अच्चुए कप्पे बावीससागरोवमठिई किब्बिसियदेवो समुप्पण्णो । सो वि ताओ देवलोगाओ आउक्खएणं चुओ समाणो इहेव जंबुद्वीवे दीवे भारहे वासे विंझगिरिपायमूले पुंडेसु जणवएसु सयदुवारे नगरे सम्मुइस्स रण्णो भद्दाए भारियाए कुच्छिसि पुत्ताए समुप्पज्जिही । साय नवणहं मासाणं बहुपडिपुण्णाणं दारणं पसविस्सइ । तस्स य दारगस्स जम्मराईए सयदुवारे नगरे सन्निभतरबाहिरे भारगसो कुंभगसो य पउमवासं रयणवासं च वासिही । तओ तस्स दारगस्स मायापियरो निव्वत्तबारसाहस्स महापउमु त्ति गुणनिप्पण्णं नामधेज्जं करिस्संति । तओ तं महापउमं कुमारं साइरेगऽट्टवासजायं जाणित्ता सम्मुई रया महारज्जाभिसेएणं रज्जम्मि अभिसिचिस्सइ । तओ सो पणमंतमहासामंतमउलिमालामिलंतचलणकमलजुयलो फुरमाणपयावप्पसाहियपुहविमंडलो महानरवई भविस्सइ । अण्णया तस्स महापउमस्स रण्णो माणिभद्द-पुण्णभद्दनामाणो दो देवा सेणाहिवत्तं पडिवज्जिस्संति । तं च दट्टण राईसर-तलवर-भाडंबियकोडुंबियसेट्टि-सत्थवाह-गणकदोवारिग-मंति-महामंतिप्पमुहा देवसेणो त्ति दोच्चं गुणनिप्पन्नं नामं करिस्संति तओ पुणो वि तस्स देवसेणस्स रण्णो अण्णया पहाणो हत्थिराया समुप्पज्जिस्सइ, अवि य-

संरवउलविमलवण्णो चउदसणो मयभमंतभमरउलो ।

लक्खणसत्थ पसत्थो उप्पज्जिस्सइ महाहत्थी ॥१४६॥

परितुट्ठा रायाई नामं तच्चं पि से करिस्संति ।

सिरिविमलवाहणनिवो होउ इमो गोण्णनामेणं ॥१४७॥

एवं च विसिद्धरज्जमणुपालयंतस्स तं गोसालगभवनिव्वत्तियं उइज्जिस्सइ असुहकम्मं ।
तओ भविस्सइ समणाण पच्चणीओ, अवि य-

अक्कोसेहि केवि हु उवहसिही केवि, केवि निछुभिहिई ।

निब्भच्छेहिइ केविहु केविहु बंधेहिं बंधिहिई ॥१४८॥

निच्छेडेहिइ केविहु, केविहु रंभिहिइ, केवि छिदिहिइ ।

मारिहिइ केवि, केवि हु उद्विहिइ घोरपरिणामो ॥१४९॥

केसिंचि वत्थपत्तं पडिग्गहं कंबलं च रयहरणं ।

छिदिहिई भिदिहिई अवहरिही सो तया पावो ॥१५०॥

केसिंचि भत्तपाणं निवारिहिइ, तहय के वि निव्विस्सए ।

आइसिहिइ सो पावो उब्बद्धो दुट्टकम्मेणं ॥१५१॥

एवंविहं च तं नरनाहं दट्ठूण सयदुवारनगर वत्थव्वगरयाइणो चित्तिस्संति-‘जहा णं एस
विमलवाहणे नरनाहे समणाणं निग्गंथाणं उवह्वे वट्टइ तमेयं नो अम्हाणं, नो नरवइणो, नो
रज्जस्स, नो रुट्टस्स, नो बलस्स, नो वाहणस्स, नो पुरस्स, नो अंतेउरस्स हियं भविस्सइ; तं
विण्णवेमो विमलवाहणनरिंद’ एवं च चित्तिरूण विण्णविस्संति जहा-

‘नो एयं देव ! हियं होही अम्हाण, नेय तुम्हाणं ।

नो अंतेउर-पुर-जणवयाण सव्वेसिं, किं बहुणा ? ॥१५२॥ [ग्रंथाग्रं ८०००]

जं समणे निग्गंथे एवं पीडेहि विविह पीडाहिं ।

तं एत्थेव य जम्मे उप्पायं मण्णिमो एयं ॥१५३॥

परलोगे य दुहाइं होहिंति नरिंद ! नत्थि संदेहो ।

ता परिहरसु नराहिव ! उवरोहेणाऽवि अम्हाणं ॥१५४॥

एवं भणिओ एसो ताणुवरोहेण मन्निही सव्वं ।

नियभावविप्पहूणो जाहिंति इमे वि सट्ठाणं ॥१५५॥

इओ य भविस्सइ तम्मि नयरे उत्तरपुरत्थिमे दिसीभागे सुभूमिभागे नाम उज्जाणे । तस्स य अदूरसामंते विमलस्स अरहओ पउप्पए सुमंगलो नाम अणगारे छट्ठंछट्ठेणं तवोकम्मेणं आयावणमायावेहिइ । इत्थंतरम्मि सो विमलवाहणो राया रहचरियाए निग्गच्छिस्सइ । तओ तं सुमंगलं अणगारं पेच्छिस्सइ । तं च दट्टूण कोवमुवगच्छिस्सइ । तओ रहचरियाए कीलमाणो सुमंगलमणगारं रहसिरेण नोल्लाविस्सइ । सुमंगलो वि रह सिरेण नोल्लाविओ सणियं उट्टेहिई, पुणो वि आयावणमायावेहिइ । तओ सो विमलवाहणो राया तहेव तमायावितं दट्टुं पुणो वि रहसिरेण नोल्लाविस्सइ । तओ सो सुमंगलो दोच्चं पि रहसिरेण नोल्लाविओ समाणो सणियं सणियं उट्टिता विमलवाहणस्स रण्णो अईयं कालमाभोगेहिइ । आभोगिरुण य विमलवाहणं रायाणं एवं वइस्सइ, अवि य -

‘नो तं सि विमलवाहणराया, नो होसि देवसेणो तं ।
 नो होसि महापउमो नरनाहो, किंतु तं भद ! ॥१५६॥
 होसि तुमं गोसालो जो एत्तो तइयए भवग्गहणे ।
 मंखलिपुत्तो होउं जाओ जिणनाहपडणीओ ॥१५७॥
 रिसिघायगोऽसि जेणं दड्ढा ते गुणनिही महामुणिणो ।
 आसाइयो य भयवं जिणनाहो वद्धमाणो त्ति ॥१५८॥
 तो जइ समत्थएण वि खमियं सव्वाणुभूइणा तुज्झ ।
 तह य सुनक्खत्तेण वि मुणिणा अच्चुग्गतेएणं ॥१५९॥
 तेलुक्कब्भहियविसिट्टुसत्तवविरियसाहसेणाऽवि ।
 नर-विज्जाहर-सुरपहुसमूहपरिवंदिएणाऽवि ॥१६०॥
 जइ तइया ते खमियं पहुणा वि हु भगवया जिणिंदेणं ।
 न तहा अहं खमिस्सं जइ न वि एत्तो वि चिट्ठिहिसि ॥१६१॥
 रह-सारहि-तुरएहिं समयं चिय निययतेउलेसाए ।
 काहामि भासरसिं, किमित्थ बहुणा पलत्तेण ?’ ॥१६२॥

तओ सो विमलवाहणो राया सुमंगलेण एवं वुत्तो समाणो आसुरुत्तो तइयं पि वारं सुमंगलं अणगारं रहतुंडेणं पेल्लाविस्सइ । तओ सो सुमंगलो रहतुंडेणं पेल्लाविओ समाणो कोववसमुवगओ आयावणभूमीओ पच्चोरुहिस्सइ, तेयगसमुग्घाएणं समोहण्णिहिइ, सत्तट्टुपयाइं पच्चोसक्किहिइ, विमलवाहणं रायं सरहं सहयं ससारहिं नियतवोतेएणं भासरसिं

करेहिइ” ।

सुमंगले णं भंते ! अणगारे विमलवाहणं रायं भासरासिं करित्ता कर्हि उववज्जि-
स्सइ ? । “गोयमा ! बहुर्हि चउत्थ-छट्ट-ऽट्टम-दसम-दुवालसाइएर्हि तवोकम्मेर्हि अप्पाणं
भावित्ता बहूणि वासाणि सामणं पालित्ता मासियाए संलेहणाए कालं करित्ता सव्वट्टिसिद्धे
महाविमाणे अजहण्णुक्कोसेणं तेत्तीससागरोवमट्टिई देवो समुप्पज्जिस्सइ । तओ अणंतरं
चइत्ता महाविदेहे वासे सिज्झिहिइ” ।

विमलवाहणे णं भंते ! राया सुमंगलेणं भासरासीकए समाणे कर्हि
उववज्जिस्सइ ? “गोयमा ! अहेसत्तामाए पुढवीए उक्कोसट्टिइयंसि नरगंसि नो रइयत्ताए
उववज्जिस्सइ । ततो उवट्टित्ता मच्छो भविस्सइ । तत्थ सत्थवज्झो दाहवक्कंतीए कालं
किच्चा दोच्चं पि अहे सत्तामाए उक्कोसट्टिई नारगो उववज्जिस्सइ ।

ततो उवट्टित्ता दुच्चं पि य मच्छओ भवेऊणं ।
सत्थहओछट्टाए तमाए पुढवीए गच्छिहिइ ॥१६२॥
छट्टाओ पुढवीओ उव्वट्टित्ताण इत्थिया होहिइ ।
तत्थ वि य सत्थवज्झो गच्छिस्सइ छट्टियं पुण वि ॥१६४॥
उव्वट्टिऊण ततो होउं दोच्चं पि इत्थियत्तेण ।
पंचमधूमपभाए होहिइ पुढवीए नेरइओ ॥१६५॥
ततो आगतूणं उरगोसुववज्जिही महाविसेसु ।
तत्थ वि य सत्थवज्झो दोच्चं पि य पंचमं जाहिइ ॥१६६॥
पुण उरगो होऊणं उववज्जिस्सइ चउत्थपुढवीए ।
ततो सीहो होउं चउत्थियं पुण वि वच्चिहिइ ॥१६७॥
उव्वट्टित्ता य तओ दोच्चं सीहो भवित्तु तच्चाए ।
गच्छिस्सइ पुढवीए होहिइ पक्खी तओ आओ ॥१६८॥
तत्थ वि सत्थेण हओ दोच्चं पि वि तच्चियाए गच्छिहिइ ।
दुइयं पि भविय पक्खी गच्छिस्सइ दोच्च पुढवीए ॥१६९॥
ततो सरीसिवेसुं उववज्जिय पुण वि दोच्चयं जाहिइ ।
दुइयं सरीसिवेसुं होउं पढमाए गच्छिहिइ ॥१७०॥

ततो उव्वट्टिता सप्पो होऊण मरिय अस(स्स)ण्णी ।
 होउं पुणो वि पढमं रयणप्पहपुढवियं जाहिइ ॥१७१॥
 पढमाओ उव्वट्टिय समुगपक्खीसु लोमपक्खीसु ।
 चम्मयपक्खीसु य विययपक्खिमाई खहयरेसुं ॥१७२॥
 मरिऊणं मरिऊणं उववज्जिस्सइ तर्हि तर्हि चेव ।
 सत्थहओ दाहेणं अणेगसो पावकम्मेणं ॥१७३॥
 भुयपरिसप्पेसु तओ गोहा-गोहेर-नउलमाईसु ।
 उरपरिसप्पेसु तओ अहि-अजगरमाइचित्तेसु ॥१७४॥
 ततो चउप्पएसुं एगक्खुर-दुखुर-गंडिपाएसु ।
 सणफयमाईसु तहा मरिऊण अणेगसो होही ॥१७५॥
 ततो य जलयरेसुं मच्छेसुं कच्छभेसुमयरेसुं ।
 गाहेसु सुंसुमारेसु नक्कचक्काइएसुं च ॥१७६॥
 चउरिंदिएसु ततो अणेगरूवेसु सो भवेऊणं ।
 तेइंदिएसु ततो [ततो] बेइंदिएसुं च ॥१७७॥
 एयाणं सव्वाणं जाईसु अणेगसो मओ जाओ ।
 सव्वत्थ सत्थवज्झो मरिही दाहेण डज्झंतो ॥१७८॥
 ततो वणस्सईसुं पाएणं कडुयरुक्खमाईसु ।
 ततो य वाउकाइयभेएसु अणेगरूवेसु ॥१७९॥
 पुण तेउकाइएसुं इंगालाईसु णेगभंगेसुं ।
 पुण आउकाइएसुं उस्सण्णं खार-कडुएसुं ॥१८०॥
 तो पुढविकाइएसुं पाएणं खरविहाणठाएसुं ।
 सत्थहओ सव्वत्थ वि मरिऊण पुणो पुणो होहिइ ॥१८१॥
 ततो रयगिहपुरे बाहिं खरिया भवितु अइया वा ।
 सत्थहया तत्थेव य खरिया अब्भंतरे होहिइ ॥१८२॥
 ततो जंबुद्दीवे दीवे भरहम्मि विंझगिरिमूले ।
 विंभेलसण्णिवेसे भट्टकुले दारिया होहिइ ॥१८३॥

पत्ता य जोव्वणम्मी पडिरूववएण माहणेण समं ।
 तीसे अम्मा-पियरो पाणिं गिण्हावइस्संति ॥१८४॥
 सा नियपइणो इट्ठा पाणेहिंतो वि होहिई बाला ।
 गुव्विणिया कुलगेहं निज्जंती डज्झिहि दवेणं ॥१८५॥
 अगिगकुमारसुरेसुं उववज्जिस्सइ, तओ वि चविऊणं ।
 मणुएसुवज्जिता बुज्झिस्सइ केवलं बोहिं ॥१८६॥
 सामण्णं लद्धूणं विराहिऊणं च दाहिणिल्लेसुं ।
 असुरेसुववज्जिता तओ चुओ माणुसो होइ ॥१८७॥
 मरिउं पुव्वकमेणं नागकुमारेसु दाहिणिल्लेसु ।
 एवं मणुयंतरिओ दाहिणअसुरेसु सव्वेसु ॥१८८॥
 अगिगकुमारविरहिओ उववज्जिस्सइ विराहियवओ य ।
 नियविहियकम्मपरिणइवसेण गोसालगस्स जिओ ॥१८९॥
 ततो मणुओ होउं सामण्णं पालिऊण पढमम्मि ।
 कप्पम्मि सुरे होही ततो वि चुओ पुणो मणुओ ॥१९०॥
 अविराहियसामण्णो होही देवो सणंकुमारम्मि ।
 एएणेव कमेणं गच्छिस्सइ बंभलोगम्मि ॥१९१॥
 एवं चेव य सुक्के तह आणय-आरणेसु कप्पेसु ।
 ततो मणुओ होउं जाहिइ सव्वट्टिसिद्धिम्मि ॥१९२॥
 ततो वि य चविऊणं महाविदेहम्मि नाम वासम्मि ।
 उत्तमकुलम्मि होही कुमारओ देवसमरूवो ॥१९३॥
 नामेण दढपइण्णो संपत्तो जोव्वणम्मि विसएसुं ।
 अरमंतो गुरुमूले होही समणो समियपावो ॥१९४॥
 अप्पुव्वखवगसेढीकमेण पाविहिइ केवलं नाणं ।
 ततो दढप्पइण्णो नामेण केवली होही ॥१९५॥
 अह केवलनाणेणं तीयऽद्धं अप्पणो वियाणित्ता ।
 मेलित्तु समणसंघं भणिही एवं जहा 'भो भो ! ॥१९६॥

एत्तो अईयकाले आसि अहं ईसरो अणंतम्मि ।
 अग्गीयत्थो समणो तत्थ य आसायणं विहिउं ॥१९७॥
 जिण-गणहरतहपत्तेयबुद्धमाईण णंतसंसारं ।
 भमिउं मंखलिपुत्तो अहयं गोसालगो जाओ ॥१९८॥
 तत्थ य पमायवसगो पडणीयत्तं जिणस्स काऊण ।
 हंतूणं तह समणे भमिओ संसारकंतारं ॥१९९॥
 ता[इय ?] आयरियाणं होहिह तुब्भे वि मा हु पडणीया ।
 मा गुणिगुणहीलाए भमिहह भीमे भवारण्णे' ॥२००॥
 इय एवं सोऊणं परिसा संवेगमागया धणियं ।
 'इच्छं' ति भाणिऊणं संजाया धम्मकम्मरया ॥२०१॥
 भयवं पि दढपइण्णो अणसणविहिणा चइत्तु तं देहं ।
 सासयमउलमणंतं गच्छिस्सइ सिवपयं परमं ॥२०२॥
 गोसालगपुव्वभवा महानिसीहाणुसारओ कहिया ।
 भगवइअणुसारणं सेसा उ भवा समक्खाया ॥२०३॥
 एसो सो गोसालो तुम्हाण समासओ समक्खाओ ।
 जो णंतं संसारं गुणहीलाए परिब्भमिओ ॥२०४॥
 एवं गुणहीलाए नाऊणं दारुणं दुहविवागं ।
 वज्जेह भव्वसत्ता गुणाण हीलं पयत्तेणं ॥२०५॥

॥ गोसालकाख्यानकं समाप्तम् ॥३६॥

इदानीं सङ्गमकाख्यानकं व्याख्यायते—

[३७. सङ्गमकाख्यानकम्]

अत्थि गिक्वाणपहाणविमाणबत्तीससयसहस्ससंकुलो इह कट्ठाणुट्टेयदुवालसविहतवो-
 विहाणजिणवंदण-ऽच्चण-ण्हवणाइविविहसक्किरियाकलावकरणो वज्जियपंचप्पयाराऽर्णि-
 दियविसयसुहसागरोवभोगो रूव-जोव्वण-लावण-वण्ण संपण्णसगंगणासणाहतियसगणसं-
 सेविओ समुज्जलंतलोयणदुरालोयफुर्लिगाउलकरालजालाकलावकवलियवइरिनिवहवज्जा-
 उहपहुसमाहिट्टिओ वर्ज्जिदनील-महानील-कक्केयण-पुस्सरायपउमरायमरगयाईसोलस-
 विहरयणरासिपसरंतकिरणनियरपणासियबहलंधयारपसरो सोहम्मो नाम कप्पो । तत्थ य

अणेगजोयणसयसहस्साऽऽयाम-वित्थरसोहम्मवडिसयमहाविमाणमज्झभागसंठियसुवियड-
सुहम्म सभागब्भनिवेसियसक्कसीहासणसिरोवविट्ठो पणमंतसयलसामाणियतार्यत्तिसाऽऽयर-
क्खपारिसयलोगपालाणीयाणीयाहिवई पणयाभियोगकिब्बिसियकिरीडकोडिवियलंतपारियाय-
मालोमालियचलणवीढसहाविहाओ विमलाऽवहिणाणावलोइयदाहिणलोयद्धो सोहम्माहिवई
जाव चिट्ठइ ताव दिट्ठो सिरिसिद्धत्थरायकुलविमलनहयलाभोयपयासणनिम्मलमयलंछणो देव-
दाणव-नरिद्विदवंदिज्जमाणचरणारविददंदो धरियदुद्धरसव्वविरइमहाभारो पुव्वदुक्कयकम्मोवत्त-
दुस्सहपरीसहसहणपरायणो एगरइपडिमट्ठिओ निवेसिय-अंबखुज्जयसरीरो ईसिं पंभारागय-
रुक्खपोग्गलावलगनिच्चलीकयलोयणो भयवं बद्धमाणसामी । तं च दट्ठुण भत्तिब्भरु-
च्छलंतसंभमवससमुग्गयबहलरोमंचकंचुओ समुट्ठिओ सीहासणाओ सुरिंदो । फुरमाण-
किरणजालावबद्धइंदधणुघाओमुयणाणंतरं सत्तट्ठुपयाइं तित्थगराभिमुहाणुगमणं विहेऊण
विहिपुव्वयसक्कत्थयभणणाणंतरकयपंचंगयपणिवाओ थोउमाढत्तो, अवि य-

अमन्दानन्दनिष्यन्दबिन्दुसन्दोहदायक ! ।

भवाब्धिनिपतज्जन्तुहस्तालम्ब ! नमोऽस्तु ते ॥१॥

दुर्वाराभ्यन्तररातिदूराभ्यरणाजिरे ।

जयश्रिया परीताङ्ग ! जिननाथ ! नमोऽस्तु ते ॥२॥

प्रोत्सर्पद्दीप्रकन्दर्पसर्पदर्पप्रणाशने ।

सदधिष्ठायकोपेतमन्त्र ! नित्यं नमोऽस्तु ते ॥३॥

मदान्धद्वेषमातङ्गकुम्भस्थलविदारणे ।

दीप्रांशुदंष्ट्रायुक्ताऽऽस्यकण्ठीरव ! नमोऽस्तु ते ॥४॥

अजात्यदुष्टदुर्दान्तदूषीकाश्वविमर्दने ।

धैर्य-वीर्यसमायुक्तहयमर्द ! नमोऽस्तु ते ॥५॥

महामोहदुमस्कन्धनिर्मूलोन्मूलनक्रमः ।

[हे]प्रौढोन्मत्तमातङ्गसमप्रभ ! नमोऽस्तु ते ॥६॥

अज्ञानान्धजगज्जन्तुदृष्टिनिर्मलताविधौ ।

सत्सामग्रीयुतात्यर्थं महावैद्य ! नमोऽस्तु ते ॥७॥

१. सं.वा.सु. "तसामा" ॥ २. ला. "लविञ्जल" ॥ ३. ला. "पम्भारपयरुक्ख" ॥ ४. ला. "णाशिने ॥

कर्मवृक्षमहाकच्छक्षारत्वोत्पादनक्रमे ।
 लसज्ज्वालाकुलाकीर्णदावानल ! नमोऽस्तु ते ॥८॥
 अपारासारसंसारदुर्गकान्तागोचरे ।
 भ्रमतां प्राणिनां चारुसार्थवाह ! नमोऽस्तु ते ॥९॥
 भव्यसंसारिसन्तानपद्मखण्डप्रबोधने ।
 प्रचण्डाखण्डमार्तण्डमण्डलाभ ! नमोऽस्तु ते ॥१०॥
 रोग-शोकमहामेघवृन्दनिर्नाशमारुत ।
 दुःखदारिद्र्यदुर्गाद्रिवज्रपात ! नमोऽस्तु ते ! ॥११॥
 अक्रोधाऽमान ! निर्माय लोभाभिष्वङ्गवर्जित ! ।
 श्वभ्र-तिर्यग्गतिद्वारकपाटभ ! नमोऽस्तु ते ॥१२॥
 सिद्धाधिवाससत्सौधस्कन्धमध्याधिरोहणे ।
 समसोपानसत्पङ्क्ते ! महावीर्य ! नमोऽस्तु ते ॥१३॥
 अनन्ताबाधसत्सौख्यचक्रवालविधायके ।
 सत्सिद्धिललनोत्सङ्गे बद्धाबन्ध ! नमोऽस्तु ते ॥१४॥
 सजलाम्भोधिसंशब्दगम्भीरनिभृतध्वने ।
 फुल्लोत्पलसमश्वासं नाथ ! नित्यं नमोऽस्तु ते ॥१५॥
 निःशेषभावसद्भावभासिज्ञानसुदर्शन ! ।
 चारुचारित्रसम्पूर्णकाययष्टे ! नमोऽस्तु ते ॥१६॥
 नम्राखण्डलसन्मौलिगलन्मालार्चितक्रम ! ।
 नर-विद्याधराधीशैरभिष्टुत ! नमोऽस्तु ते ॥१७॥
 कस्ते शक्तो गुणान् स्तोतुं बह्वयुरपि मानवः ।
 जिह्वशतसमेतोऽपि जडधीः किमु मादृशः ॥१८॥
 तथापि ह्रीं परित्यज्य संस्तुतस्त्वं मया जिन ! ।
 विधेहि मुक्तिसौख्यं मे कृत्वा कारुण्यमुत्तमम् ॥१९॥

एवं थोरुण समुट्टिओ, निविट्टो नियसिहासणे । तओ भयवओ गुणगणा-
 वल्लोयणुप्पन्नभत्तिवसपरव्वसो भणिउमाढत्तो, अवि य-

'अहह अहो ! अच्छरियं पेच्छह तियसा ! जिणो महावीरो ।
 जं एगराइयाए चिट्ठइ अइनिच्चलो ज्ञाणे ॥२०॥
 जइ लग्गंति सुरिंदा असेससुरं सेन्नपरिखुडा कहवि ।
 तिलतुसमित्तं पि जिणो चालिज्जइ नेय ज्ञाणाओ ॥२१॥
 जइ वा वि हु असुरवई नर-विज्जाहरपहू वि जइ कहवि ।
 चालंति तह वि न चलइ भयवं सद्धम्मज्ञाणाओ ॥२२॥
 अहवा जइ तेलुक्कं सव्वं मिलिऊण कहवि चालेइ ।
 तह वि हु न चलइ भयवं निक्कंपो सिद्धिखेत्तं व' ॥२३॥
 तं सुरवइणो वयणं सोऊणं भत्तिनिब्भरंगस्स ।
 इंदसमाणयरिद्धी संगमयऽक्खो सुरो तत्थ ॥२४॥
 मिच्छत्तमोहियमणो पावो अइघोररोद्दपरिणामो ।
 चिंतेइ पडिनिविट्ठो 'इंदो रागेण उल्लवइ ॥२५॥
 किं माणुसमेत्तं पि हु तियसा वि न खोभिउं समत्थ त्ति ।
 ता सच्चं जं पहुणो नियइच्छाए पर्यंपंति' ॥२६॥
 इय चिंतिऊण एसो जंपइ तियसाण मज्झयारम्मि ।
 'भो भो पेच्छह इंदो अघडंतं भणइ रागाओ ॥२७॥
 तेलुक्कं असमत्थं ति पेहए जस्स चालणं काउं ।
 अज्जेव पासह इमं मम वसगं भट्टजोगतवं' ॥२८॥
 इय भणिऊणं एसो समागओ भयवओ समीवम्मि ।
 तारिसजोगसमगं दट्टुं वीरं तओ कुविओ ॥२९॥
 मुंचइ धूलीवरिसं तेणं आनासियं समोहट्ठो ।
 'खुभिओ न व ?' त्ति जोयइ विभंगनाणेण सो दुट्ठो ॥३०॥
 पासइ छज्जीवहियं ज्ञायंतं जिणवरं तओ रुट्ठो ।
 मुंचइ पिवीलियाओ सुतिक्खतुंडाओ घोराओ ॥३१॥
 ताहिं वि सिरिवीरजिणो चालणिसरिसो तओ विणिम्मविओ ।
 जा न वि खुभिओ तत्तो उहंसे सो विउव्वेइ ॥३२॥

उण्होलाओ ततो च वज्जतुंडाओ सो पकप्पेइ ।
 ताहिं वि अक्खुहियमणं नाऊणं विच्छुए मुयइ ॥३३॥
 ततो अच्चुग्गविसे विउव्वई दीहरे महाभुयगे ।
 दढनागपासबद्धं काऊण डसंति ते देहं ॥३४॥
 अवहंरिय ते वि ततो नउले अइतिक्खदंसणे कुणइ ।
 ततो य मूसए पुण विउरुव्वइ अट्टमे एसो ॥३५॥
 खंडाइं तोडित्ता खयाइ सिंचंति निययमुत्तेणं ।
 तेहिं वि जा न वि चलिओ विउरुव्वइ करिवरं ततो ॥३६॥
 सुंडादंडेणेसो घेतुं उव्विहइ दूरमागासं ।
 दसणेहिं पुण पडिच्छइ लोलइ धरणीए पाएहिं ॥३७॥
 एवं हत्थिणिया वि हु चूरइ सा सुंडएहिं दंतेहिं ।
 तत्थ वि अक्खुहियमणं दट्टु पिसायं विउव्वेइ ॥३८॥
 चलणंगुलिसुप्पनहं लोढयसमसरिसव्वअंगुलियं ।
 नीसाहतुल्लचलणं अइदीहरतालजंघालं ॥३९॥
 वित्थिण्णवंकयकडिं उट्टियकप्परसमाणगुरुपोट्टं ।
 कूवयखंभयबाहं महवम्मसमाणकरजुयलं ॥४०॥
 घाणयलट्टिकरंगुलिसुप्पनहं वियडभुग्गवच्छयलं ।
 अइदीहफालदंतं लंबोट्टं चिबिडनासगं ॥४१॥
 रसलोलवयणनिग्गयदीहरलंबंतजुयलजीहालं ।
 आऊसियगंडयलं रत्तच्छं दीहदाढिययं ॥४२॥
 गुडुहयभुंभल (य)सिरं घाडुब्भडविसमतुंडभालयलं ।
 आयारमेत्तसबलं हुयवहजालावलीकेसं ॥४३॥
 जलभरियमेहवण्णं करयलपरिकलियकत्तियकरालं ।
 नवउक्कत्तियसरुहिरगलंतगयकत्तिपरिहाणं ॥४४॥

१. ला. "हरिया ते वि तओ न" ॥ २. सं.वा.सु. उव्वहइ ॥ ३. ला. "यमणं दुट्टुपि" ॥ ४. ला. "सचरणअं" ॥ ५. ला. "रुपेट्टं" ॥ ६. सं.वा.सु. महवम्म" ॥ ७. ला. "डभग्ग" ॥ ८. ला. "नासायं" ॥ ९. सं.वा.सु. "कारिय" ॥

नयण-मुह-पुच्छसंजुयअइभीसणवग्घचम्मउवरिल्लं ।
 नरस्मिर-नउल-सिरीसवमालाकयउत्तरासंगं ॥४५॥
 अट्टट्टहासंभीसणमुहकुहरविणितसिहिफुलिगोहं ।
 अप्फोडितं सहसा विउरुव्वइ भीमवेयालं ॥४६॥
 तेण वि जा न वि भीओ ताव विउव्वेइ घोरवग्घं तु ।
 सो तिक्खनक्ख-दाढाहिं फाडए सामिणो देहं ॥४७॥
 तं संहरित्तु तत्तो सिद्धत्थनरिंदसंतियं रूवं ।
 विउरुव्विउं पयंपइ अइकलुणपलावसदेहिं ॥४८॥
 'हा पुत्त ! कहमणाहो अहयं तुडुत्तणम्मि ते मुक्को ! ।
 होहामि अओ पुत्तय ! पालेहि य जाव जीवामि ॥४९॥
 तुह भाउणा विनिक्कालिऊण अहयं गिहाओ परिमुक्को ।
 ता काउं पिइभत्ति पच्छ उगं तवं कुणसु' ॥५०॥
 एवं चेव पयंपइ तिसलारूवेण सो सुरो कलुणं ।
 मायापवंचनिउणो खोभत्थं कूरपरिणामो ॥५१॥
 भयवं पि देवमायं जाणंतो न वि कहंपि विचलेइ ।
 अविचलियम्मि जिणिंदे संहरई ते तओ पावो ॥५२॥
 विउरुव्वइ तो सिण्णं नरनाहसमणियं अपरिमेयं ।
 आवासइ चउसुं पि वि दिसासु तं भगवओ पासे ॥५३॥
 तत्तो नरवइसूओ मंगाले जाव कहवि नो लहइ ।
 ताव चडावइ चरुयं परमेसरपायउवरिम्मि ॥५४॥
 पज्जालइ सो जलणं जहा उ डज्झंति सामिणो पाया ।
 तेण वि अक्खुभियस्सा विउरुव्वइ पक्कणसरूवं ॥५५॥
 सो पक्खिपंजराइं ओलयइ जिणिंदकण्णबाहासु ।
 ते वज्जतुंडपक्खी तोडंति सरीरखंडाइं ॥५६॥
 सिंचंति काइयाए तयं पि संहरिय मुयइ खरवायं ।
 सक्कर-वेक्करपउरं तत्तो वि कलंकलीवायं ॥५७॥

१. ला. 'सिरीसिव' ॥ २. ला. 'सभीमं मुह' ॥ ३. सं.वा.सु. 'रुव्वियं प' ॥ ४. ला. 'यमूलम्मि ॥ ५. ला.

पाडेइ मंदरं पि हु जो सहसा तेण तो जिणो वीरो ।
 चक्काऽऽइद्धो व्व खणं भमाडिओ, तं पि संहरिउं ॥५८॥
 जा न वि चलइ कर्हिपि वि ता कुद्धो वहविणिच्छियमईओ ।
 ता पेयलोहभारेर्हि निम्मियं मुयइ गुरुचक्रं ॥५९॥
 चूरेइ मंदरं पि हु जं तं पडियं जिणिदसीसम्मि ।
 थाणु व्व तेण खुत्तो जाणुपमाणं धरणिवट्टे ॥६०॥
 तेणाऽवि य जा न मओ अणुकूलं ता करेइ उवसगं ।
 विउरुव्वइ छप्पि उऊ समकालं तत्थ अवयरिए ॥६१॥
 आणेवि देविनिवहं सिंगारागारचारुवेसधरं ।
 पंचप्पयारविसयाण साहणं कुणइ सव्वं पि ॥६२॥
 ताव य सुरविलयार्हि विलासगुणघडणनिग्गया सहसा ।
 जयगुरुणो कुसुमसर व्व पेसिया दिट्ठिविच्छेहा ॥६३॥
 काए वि छेडिओ कुसुमसत्तभमरोलिमुहलधम्मिल्ले ।
 कुणइ व्व भुवणगुरुणो संगमसुहपत्थणाऽवणइं ॥६४॥
 दढबंधं पि हु छेडेविकावि संजमइ पुणरवि कडिल्लं ।
 सरलंगुलिविल्लहले विहुणइ करपल्लवे कावि ॥६५॥
 कोमलमुणालवेल्लहलविब्भमिल्लर्हि बाहुलइयार्हि ।
 मयणरसनिब्भरंगी काविहु मोट्टाइयं कुणइ ॥६६॥
 ल्हसिओउवरिल्लअंसुयसंठवणमिसेण कावि दंसेइ ।
 उत्तुंगनिबिडचकलमणोहरं थोरथणवट्टं ॥६७॥
 कावि वियंभइ कावि हु पुलइज्जइ कावि वेवइ सयण्हं ।
 दीहुणहमुक्कनीसासनिब्भरं कावि नीससइ ॥६८॥
 इय एवमाइबहुविहवियाखसनिब्भराओ देवीओ ।
 अक्खुभियं दट्टुणं एवं जंपंति जिणइंदं ॥६९॥
 'सामिय ! कुण कारुण्णं दीणाणम्हाण कामतवियाइं ।
 अंगाइं निययसंगमअभयरसेणं समोल्हवसु ॥७०॥

किंवा वि हु अणुकंपं न कुणसि रमियव्वपरिचएणऽम्हु ।
 मयणाउरण निक्खिव ! मुणसि च्चिय झूरियव्वाइं ॥७१॥
 को लहइ सुहय ! सुरसुंदरीण तेलोक्कदुल्लहं सुरयं ।
 तत्थ वि किं निखेक्खो अम्ह अपुण्णेहिं संजाओ ? ॥७२॥
 अच्छउ ता विविहविलासहासरसभावनिब्भरं पेम्मं ।
 सामण्णाए दिट्ठीए सुहय ! किं नो पलोएसि ? ॥७३॥
 जे तुह मणम्मि मउए वि सायया मयरकेउणो भग्गो ।
 ते चेय माणकट्ठिणऽम्ह कहणु भिंदंति सुहय ! मणं ? ॥७४॥
 अहवा अण्णसुहासंगरायरसिए जणम्मि अणुराओ ।
 जं कीरइ तं जायइ अरण्णरुइयस्स सारिच्छे' ॥७५॥
 इय जगगुरुणो मयणाउरण सुरसुंदरीण भणियाइं ।
 सिद्धिसुहसंगमुस्सुयमणस्स चित्तं न रमिति ॥७६॥
 एवं च तासिं गीएण नेय, न य महुरतंसिहेण ।
 करणंगहाररुइरेण मणहरेणं, न नट्टेणं ॥७७॥
 न य हावभावविब्भमविलासबिब्बोयविविहचेट्ठाहिं ।
 न य निउणजंपिएहिं य खुहियं जगबंधुणो चित्तं ॥७८॥
 तं नाऊणं तियसो दंसेऊणं समुग्गयं सूरं ।
 हिंडंतं च जणवयं जंपइ देवज्जय ! तुमं पि ॥७९॥
 किं अज्ज वि इह चिट्ठसि ? हिंडइ सव्वो वि जणवओ जेण
 भयवं पि य सुरमायं जाणंतो चिट्ठइ तहेव ॥८०॥
 इय अणुकूलुवसग्गो वीसइमो एस तेण निम्मविओ ।
 एवं रयणी कया घोरा वीसं च उवसग्गा ॥८१॥
 तह वि हु छज्जीवहियं ज्ञायइ भयवं जिणेसरो वीरो ।
 ओहीए तं नाउं पओसमहियं सुरे वहइ ॥८२॥
 चितइ य पडिनिविट्ठो कल्लं काहामि कुणइ तह चेव ।
 एवं जा छम्मासा निरंतरं कुणइ उवसग्गे ॥८३॥

तत्थ यं छम्मासतवो उक्किट्ठो जिणवरस्स संजाओ ।
 पज्जंते वि य संतो निव्विण्णो जंपए एवं ॥८४॥
 'तुब्भे सच्चपइण्णा भट्टपइण्णो अहं पुणो जाओ ।
 ता देमि सग्ग-मोक्खे अण्णं वा भणह जंरुइयं ॥८५॥
 जेण पयच्छामि तयं' तह वि न जंपेइ जिणवरो वीरो ।
 'वच्चह हिंडह न करेमि किंपि' पुण भणइ सो तियसो ॥८६॥
 भयवं पि भणइ 'इत्थं नाहं कस्साऽवि हंत वत्तव्वो' ।
 एवं भणिओ देवो सविलक्खो गयमुहच्छओ ॥८७॥
 उप्पइओ गयणतलं तमालदलसामलं खणद्धेण ।
 वच्चंतो य कमेणं पत्तो सोहम्मकप्पम्मि ॥८८॥
 एत्तो य तत्थ देवा उवरयनाडय-मुयंग-गीयरवा ।
 छम्मासं जाव ठिया अइदारुणदुक्खसंतत्ता ॥८९॥
 एवं दुक्खासणसंठियाण देवाण देविसहियाणं ।
 सो संगमओ देवो संपत्तो सुरवइसहाए ॥९०॥
 दट्टूण तयं इंतं परम्महो ठाइ इत्ति सुरनाहो ।
 जंपइ भो भो देवा ! निसुणह मह अवहिया वयणं ॥९१॥
 'एएणं पावेणं न कया अम्हाण चित्तरक्खा वि ।
 तुम्ह वि न कया लज्जा धम्मो दूरेण पम्मुक्को ॥९२॥
 भयवं तेलोक्कगुरू इमेण आसाइओ अणज्जेण ।
 ता अम्हाण इमेणं तिलतुसमेत्तं पि नो कज्जं' ॥९३॥
 इय वोत्तूणं इंदो हुंकारं मुयइ तेण तो तस्स ।
 खडहडिय वरविमाणं पत्तं मेरुस्स चूलाए ॥९४॥
 तं उत्तरवेउव्वियविमाणमह मंदरस्स चूलाए ।
 ठाहिइ अयरं इक्कं जं सेसं आउयं तत्थ ॥९५॥
 तप्परिवारो वि समं वच्चंतो तेण तो सुरिदिणं ।
 देवीओ मोत्तूणं सेसो पडिसेहिओ सव्वो ॥९६॥

तत्थ य सागरमेगं अवसेसं भुंजिऊण सो तत्तो ।
 भमिही चुओसमाणो अणोरपारे भवे भीमे ॥१७॥
 जं तित्थयरगुणाणं तेण अभव्वेण हीलणा विहिया ।
 तेण अणंताणंतं अणुभविही दारुणं दुक्खं ॥१८॥
 सुयिरेण वि कालेणं न य सो पाविहिइ सिद्धिवरसोक्खं ।
 जेण अभव्वो पावो पावमई घोरपरिणामो ॥१९॥
 संसारियं पि सोक्खं जवमेत्तं पि हु न तस्स किर होही ।
 कालमणंतं जाव उ कया जिणासायणा जम्हा ॥२०॥
 इय एसो संगमओ कहिओ तुब्भं गुणाण हीलाए ।
 जो भमिही संसारं, तम्हा गुणहीलणं चयह ॥२०१॥

॥ सङ्गमकाख्यानकं समाप्तम् ॥३७॥

पूर्वोक्तमेवाऽर्थं निगमयन् कृत्यशेषमाह-
 गुणवंतीण तो हीलं निर्दंखिसं च वज्जए ।
 निवारिज्ज जहाथामं दुस्सीला पावकारिणो ॥१२९॥

गुणवतीनां पूर्वोक्तप्रकारेण गुणयुक्तानाम्, तस्मात् हीलाम्=अवज्ञारूपाम्, निन्दां= 'धिगेताः शौचादिवर्जिताः' इत्येवम्प्रकाराम्, खिसां='धिग् मुण्डिताः' इत्येवम्भणन-स्वभावाम्, वर्जयेत्=परिहरेत् । ततश्च निवारयेत्=निषेधयेत् [यथास्थामं=यथाशक्ति ?], दुःशीलाः=दुःस्वभावा द्यूतकरादयः, पापकारिणः=शीलभङ्गादिपातकविधायिन इति श्लोकार्थः ॥१२९॥

इदानीं समस्तप्रकरणोपसंहारमुपदेशसर्वस्वं च वृत्तेनाऽऽह-
 महव्वया मूलगुणाविसुद्धा, पिण्डव्विसोहीपभिई विहाणं ।
 कालोचियं दुक्करकारियाणं, अज्जाण कुज्जावरनिज्जरं तिं ॥१३०॥

महाव्रतानि=प्राणातिपातविरमणादीनि रात्रिभोजनविरमणपर्यवसानानि, मूलगुणानि मूलगुणत्वेन प्रसिद्धानि, विशुद्धानि=कलङ्करहितत्वान्निर्मलानि । प्राकृतत्वात् पुलिङ्गनिर्देशः । तथा पिण्डविशुद्धिप्रभृति=पिण्डविशुद्ध्यादि, तत्र पिण्डविशुद्धिर्द्विचत्वारिंशदोषविशुद्धिपिण्डा-दिग्रहस्तत्प्रभृति तदादि,

१. ता. ति ॥ १३०॥ संजईणं ति पंचमं ॥

पिंडविसोही समिई, भावण पडिमा य इंदियनिरोहो ।

पडिलेहण गुत्तीओ अभिग्गहा चेव करणं तु ॥३४३॥ (ओघ. नि. भागा. ३)

इत्येवंरूपं विधानं कुर्वतीनामिति शेषः, कालोचितं=दुःष्माकालयोग्यं कृत्यमिति भावः, दुष्करकारिकाणां=जघन्यकालेऽप्येवंविधदुष्करसदनुष्ठानकारिकाणाम्, आर्याणां=साध्वीनां कुर्यात्=विदध्यात्, वरनिज्जरं=प्रधानं निर्जराहेतुः, इतिः=प्रकरणपरिसमाप्ताविति वृत्तार्थः ॥१३०॥

श्रीदेवचन्द्राचार्यविरचिते मूलशुद्धिविवरणे साध्वीस्थानकं पञ्चमं समाप्तम् ।

[श्रावककृत्याख्यं षष्ठस्थानकम्]

व्याख्यातं पञ्चमं स्थानकम् । तदनन्तरं षष्ठमारभ्यते । अस्य च पूर्वेण सहाऽयमभिसम्बन्धः-पूर्वत्र साध्वीकृत्यमुक्तम् तत्र सङ्घमध्ये साध्वीनामनन्तरं श्रावका उक्ताः, अतस्तत्स्थानकम्, तस्य चाऽऽदिसूत्रमिदम्-

तित्थेसरणं बहुमाण-भती सत्तीए सत्ताण दया विरागो ।

समाणधम्माण य वच्छलत्तं जिणागमे सारमुदाहरंति ॥१३१॥

तीर्थेश्वराणां=तीर्थाधिपतीनाम्; तत्र तीर्थेऽनेन संसारसागर इति तीर्थं चतुर्विध-श्रीश्रमणसङ्घरूपं प्रथमगणधररूपं वा, उक्तं च-

‘तित्थं चाउवण्णो समणसंघो पढमगणहरो वा’

अतस्तेषाम् ‘बहुमाणभत्ति’ति बहुमान-भक्ती=आन्तरप्रीति-बाह्यक्रियारूपे, ‘सत्तीए’ति शक्त्या, सत्त्वानां=प्राणिनाम्, दया=रक्षणबुद्धिः, विरागः=निरभिष्वङ्गता, चकारस्य व्यवहितसम्बन्धात् समानधर्मवात्सल्यं च=सार्धमिकवत्सलता च, जिणागमे=अर्हत्सिद्धान्ते, सारं=प्रधानम्; एतदेव पूर्वोदितं सर्वधर्मानुष्ठानसारमिति भावः, उदाहरन्ति=कथयन्तीति वृत्तार्थः ॥१३१॥

यस्मादेवं तस्मात् सार्धमिकप्रीतौ यतितव्यमिति, अत आह-

जिणाणं मण्णमाणेणमुदारमणसा तओ ।

साहम्मियाण वच्छल्लं कायव्वं पीतिनिब्भरं ॥१३२॥

जिनाज्ञां=तीर्थकरादेशम्, मन्यमानेन=एवमेतदिति प्रतिपद्यमानेन, उदारमनसा=विस्तीर्णचित्तेन, ततः=तस्मात्, सार्धमिकाणां=समानधर्मिकाणाम्, वात्सल्यं=भोजनादिदानप्रतिपत्तिः कर्तव्यं=विधेयम्, प्रीतिनिर्भरम्=आन्तरबहुमानसंयुक्तमिति श्लोकार्थः ॥१३२॥

यः कश्चिदेतेष्वपि मन्दस्नेहो लक्ष्यते स कथम्भूतो ज्ञेयः ? इत्यत आह-

किमर्णणेण सो अंधो ? किं मोहविसघारिओ ? ।

किं सम्मत्ते वि संदेहो, मंदनेहो इमेसु जौ ॥१३३॥

‘किम्’ इति प्रश्ने, अज्ञानेन=अज्ञतया, ‘स’इति यो मन्दस्नेहः, अन्धः=चक्षुर्विकलः, किंमोहविषयघारितः=मोहनीयगरलव्याप्तः, किं सम्यक्त्वेऽपि सन्देहः=दर्शनेऽपि सन्दिग्धता, यत उक्तम्-

साहम्मिइ घरि आइ यइ, जासु न वट्टइ नेहु ।

तसु जाणेज्जसु नीसुइणि, सम्मत्ति वि संदेहु ॥३४४॥

यः किं ? यो मन्दस्नेहः=अल्पप्रीतिः, इमेषु=एतेषु साधर्मिकेष्विति सम्बध्यत इति श्लोकार्थः ॥१३३॥

किमित्यतिगौरवं तेषु प्रतिपाद्यते ? इत्यत आह-

गत्तं पुत्ताय मित्ता य बंधवा बंधणं धणं ।

दारा वि दोग्गइं देति, संधारो धम्मबंधवा ॥१३४॥

‘गत्तं’ ति गर्तः=अवटः, प्राकृतत्वान्निङ्गव्यत्ययः, पुत्राश्च=सुताः, मित्राणि च=सुहृदः, चकारस्य व्यवहितसम्बन्धाद्, बान्धवाश्च=सहोदराः, प्रथम चकारश्च शेषस्वजनसंसूचनार्थः, बन्धनं=संयमनं, धनं=द्रव्यम् । यद्वा गात्रं=शरीरं बन्धनमित्यत्र सम्बध्यते । दारा अपि=कलत्राण्यपि, दुर्गतिं=कुगतिम् ददति=प्रयच्छन्ति, अतः संधारः=सन्धीरणं धर्मबान्धवाः=साधार्मिका इति श्लोकार्थः ॥१३४॥

कस्माद्धर्मबान्धवाः सन्धीरणं भवन्ति ? इत्यत आह-

धम्मबंधूण सुद्धाणं संबंधेणं तु जे गुणा ।

दुग्गईओ निरुंभंति, धुवं ते दिंति सुग्गइं ॥१३५॥

धर्मबन्धूनां=धर्मभ्रातृणाम्, शुद्धानां=निरवद्यानाम्, सम्बन्धेन=सम्पर्केण, तु-शब्दादनुमोदनकरणादिपरिग्रहः, ये गुणाः=ज्ञानादयः, दुर्गतीः=नरक-तिर्यक्-कुमानुष-कुदेवत्वरूपाः, निरुम्भन्ति=निरुन्धन्ति, ध्रुवं=निश्चितम्, ते=पूर्वोक्ताः, ददति सुगतिं=सुमानुषत्व-सुदेवत्व-सिद्धिरूपामिति श्लोकार्थः ॥१३५॥

यस्मादेवं तस्मात्-

विद्धि-वद्धावणाईसु संभरे नेहनिब्भरं ।

सम्माणेज्जा जहाजोगं, वत्थं तंबोलमाइणा ॥१३६॥

वृद्धि-वर्धनादिषु तत्र वृद्धिः=विवाहादिका, वर्धनं=पुत्रप्रसवादिकम् आदिशब्दात् शेषोत्सवपरिग्रहः, 'संभरे' त्ति स्मरेत्, स्नेहनिर्भरं=बन्धुप्रीत्या, स्मृत्वा च सन्मानयेत् =पूजयेत्, यथायोग्यं=यथार्हम्, वस्त्र-ताम्बूलादिना; मकारोऽलाक्षणिक इति श्लोकार्थः ॥१३६॥

द्रव्यकृत्यकरणमभिधाय साम्प्रतं भावकृत्यकरणमाह-

सुत्तं सम्मं पढंताणं विहाणेण य वायणा ।

सुत्तऽत्थाणं पयत्थाणं, धम्मकज्जाण पुच्छणा ॥१३७॥

सूत्रं=प्रकरणादिकम्, सम्यक्=भावप्रधानतया, पठताम्=अधीयानानाम्, विधानेन च वाचना=परिपाटीदानम् चः=पूरणे, सूत्राऽर्थयोः=वाच्य-वाचकयोः, पदार्थानां=जीवा-ऽजीवादीनाम् धर्मकार्याणां=धर्मप्रयोजनानां चैत्यवन्दनादीनाम्, प्रच्छना=पृच्छ 'कीदृशमिदं सूत्रम् ? कीदृशोऽस्याऽर्थः ? कीदृशोऽयं पदार्थः ? किं निर्वहतीदं धर्मप्रयोजनम् ? इत्येवं साधर्मिकः जिज्ञासापरीक्षानिर्वाहणार्थं प्रष्टव्य इति श्लोकार्थः ॥१३७॥ तथा -

परियट्टणा-ऽणुपेहाओ जहासत्तीए कारए ।

तहा धम्मकहा कुज्जा संवेगाई जहा जणे ॥१३८॥

परावर्तनानुप्रेक्षे=गुणनिका-चिन्तनिके, यथाशक्ति(क्त्या)=यथासामर्थ्येन, कारयेत्=विधापयेत् । तथा धर्मकथाः कुर्यात् यथा संवेगादयो जन्यन्ते=उत्पाद्यन्ते, शक्तौ सत्यामिति श्लोकार्थः ॥१३८॥ किञ्च-

भावणाए पहाणाए धम्मट्टाणं वियारए ।

बहुस्सुयसयासाओ विसए संपहारए ॥१३९॥

भावनया=अन्तर्वासनया, प्रधानया=सर्वोत्कृष्टया, धर्मस्थानं=धर्मप्रयोजनम्, विचारयेत्='किमेतदेवमन्यथा वा ? इति, विचारयतां च यदि सन्देहो भवति ततो बहुश्रुतसकाशात्=विशिष्टागमवेदिपाशर्वात्, विषये=स्थाने, सम्प्रधारयेद्=व्यवस्थापयेदिति श्लोकार्थः ॥१३९॥

अन्यच्च-

पावयणम्मि निगंथे तहा सम्मं थिरावए ।

जहा सक्का न खोभेउं देवेहिं दाणवेहिं वा ॥१४०॥

प्रवचने=शासने, नैर्ग्रन्थे=अर्हत्सम्बन्धिनि, तथा=तेनैव प्रकारेण, सम्यग्
=यथावस्थिततया 'एसणं देवाणुप्पिया ! निगंथे पावयणे अट्टे अयं परमट्टे, सेसे अणट्टे'
इत्यादि भगवतीप्रभृतिसिद्धान्तवाक्यस्मारणतः स्थिरीकुर्यात् । कथं यथा न शक्यते=न
पार्यते, क्षोभयितुं देवैः=वैमानिकैः, दानवैश्च=भवनपतिभिः, चकाराच्छेषदेवैर्विद्याधरा-
दिभिश्चेति श्लोकार्थः ॥१४०॥

तथा-

पियाणमणुकूलाणमब्भत्थाणं भवे भवे ।

लोगागमविरुद्धाणं सेवणाए निवारणा ॥१४१॥

प्रियाणाम्=अभीष्टानाम्, अनुकूलानां=मनोभिरुचितानाम्, अभ्यस्तानां=भूयो
भूयोऽनुष्ठितानाम्, भवे भवे=जन्मनि जन्मनि, लोकागमविरुद्धानां=जनप्रवाहसिद्धान्त-
दूषितानाम्, सेवनायाः=अभ्यासस्य, निवारणं=निषेधनं यथा-इदमिदं च लोकसिद्धान्तगर्हितं
तस्मान्मा कार्षीः, इति श्लोकार्थः ॥१४१॥

अन्यच्च-

धम्माणुट्ठाणमग्गम्मि हिए लोयाण दोण्ह वि ।

पमायकम्मदोसेणं सीयंताणं तु चोयणा ॥१४२॥

धर्मानुष्ठानमार्गे=धर्मकृत्यपथि, हिते=अनुकूले, लोकयोर्द्वयोः=इहलोक-
परलोकयोः, प्रमादकर्मदोषेण=धर्मशैथिल्यजनितमलदुष्टतया, सीदतां=शिथिलभाव-
मनुभवताम्, चोदना=प्रेरणा, कर्तव्येति शेषः, सार्धर्मिकाणामिति सर्वत्र योजनीयमिति
श्लोकार्थः ॥१४२॥

प्रमादस्वरूपं प्रेरणां च श्लोकद्वादशकेन सूत्रकृत् प्रतिपादयति-

पमाओ य मुणिदेहिं भणिओ अट्टभेयओ ।

अण्णाणं संसओ चेव मिच्छानाणं तहेव य ॥१४३॥

रगोदोसोसईभंसो धम्मम्मि य अणायरो ।

जोगाणं दुप्पणीहाणं अट्टहा वज्जियव्वओ ॥१४४॥

प्रमादश्च मुनीन्द्रैः=तीर्थकृद्गणधरैः, भणितः=प्रतिपादितः, अष्टभेदः=अष्टप्रकारः,
तद्यथा - अज्ञानम्=अज्ञता; समस्तदोषनिधानं चैतद्, उक्तं च-

अज्ञानं खलु कष्टं क्रोधादिभ्योऽपि सर्वदोषेभ्यः ।
 अर्थं हितमहितं वा न वेत्ति येनाऽऽहतो लोकः ॥३४५॥
 अण्णाणंधो जीवो जत्थ भयं तत्थ मग्गए ठाणं ।
 अर्णिगि कीड-पयंगा पडंति अण्णाणदोसेण ॥३४६॥

‘संसओ’ सन्देहः किमेतदेवमन्यथा वा ? इति संशीतिः, एषोऽप्यनर्थकृत्, यतः-

संदेहाओ अणिच्छियमइणो नो किंचि सिज्झए कज्जं ।
 संसयमिच्छत्तं चिय जायइ, तम्हा न कायव्वो ॥३४७॥

चेवशब्दः सूक्ष्म-बादरसंशयभेद सूचनार्थः, मिथ्याज्ञानं=विपरीतज्ञानम्, तथैव
 च=तेनैव प्रकारेणैतदपि न भव्यम्, तथाहि-

विवरीयं नाणाओ पयट्टमाणो उ पावएऽणत्थं ।
 जह मरुमरीइयाए नीरत्थं धावमाणो उ ॥३४८॥ ॥१४३॥

रागः=अभिष्वङ्गः द्वेषः=अप्रीतिलक्षणः, संसारप्रधानहेतू चेमौ, तथाऽऽह-

राग-द्वोसेहिं जिओ हिंडइ संसारसायरमपारं ।
 दूरंदूरेण तओ परिहरियव्वा सुहऽत्थीहिं ॥३४९॥

स्मृतिभ्रंशः=विस्मरणशीलता; दोषाय चाऽसौ, यतः-

वीसरइ जस्स कहियं धम्मं कम्मं नरस्य सो कह णु ।
 साहिस्सइ परमत्थं विसिट्टमइवज्जिओऽहन्नो ? ॥३५०॥

धर्मे चाऽनादरः=अनुद्यमः, सोऽपि न भद्रकः, यतः-

इहलोइयं पि कज्जं न होइ फलयं अणायरकयं तु ।
 नो कायव्वो तम्हा विसेसओऽणायरो धम्मे ॥३५१॥

योगानां=मनो-वाक्-कायानाम्, दुःप्रणिधानं=दुष्टताकरणम्; तदपि न विधेयम्,
 यतः-

मण-वय-कायाणं पुण दुप्पणिहाणं करेइ जो मूढो ।
 सो निवडइ संसारे सुधम्मकम्माफलत्ताओ ॥३५२॥

अष्टधा=अष्टविधानेन च, मिथ्यात्वा-ऽविरति-प्रमाद-कषाय-दुष्टयोगाः कर्मबन्ध-
 हेतवः प्रत्युक्तास्तथा चाऽज्ञान-संशय-मिथ्याज्ञानैर्मिथ्यात्वम्, रागेणाऽविरतिः, द्वेषेण कषायाः,
 स्मृतिभ्रंश-धर्मानादराभ्यां प्रमादः, योगदुःप्रणिधानेन दुष्टयोगाः तस्माद्द्वर्ज्यः=विवर्जनीय इति

श्लोकार्थः ॥१४४॥

तथा च-

वरं हालाहलं पीयं, वरं भुक्तं महाविसं ।

वरं तालउडं खड्गं, वरं अग्गीपवेसणं ॥१४५॥

सुगमश्चाऽयम्, केवलं हालाहलं द्रवविषम्, महाविषं तु कवलखाद्यम्, तालपुटं तु यत् तिलतुषत्रिभागमात्रमपि तालादानमात्रकालेनाऽपि जिह्वाग्रे दत्तं प्राणानपहरति ॥१४५॥

तथा -

वरं सत्तूहिं संवासो, वरं सप्पेहिं कीलियं ।

खणं पि न खमं काउं, पमाओ भवचारए ॥१४६॥

सुगमम्, परं क्षणमपि=अल्पकालमपि, न क्षमं=न युक्तं प्रमादः कर्तुम्, भवचारके=भवगुप्तिगृहे ॥१४६॥

एक्कम्मिं चैव जम्मम्मिं मारयं ति विसाइणो ।

पमाएणं अणंताणि दुक्खाणि मरणाणि य ॥१४७॥

स्पष्टः ॥१४७॥

पमाएणं महाघोरं पायालं जाव सत्तमं ।

पडंति विसयाऽऽसत्ता बंभदत्ताइणो जहा ॥१४८॥

व्यक्तः, किन्तु महाघोरं=महारोद्रम्, यत् उक्तम्-

“निच्चंधयारतमसा ववगयगहनक्खत्तचंदतारगा महाघोरंधयारा पूय-वसा-मंस-मेयकद्दमचिलिच्चिला विरसा दुब्धिगंधा उतासणाय” इत्यादि ।

पातालं सप्तमं=सप्तमनरकपृथ्वीम्, ब्रह्मदत्तादयः=द्वादशमचक्रवर्तिप्रभृतयः आदिशब्दात् चण्डपुत्रप्रभृतयो गृह्यन्ते, यथा=यद्वदित्यक्षरार्थः ॥१४८॥

भावार्थस्तु कथानकगम्यः । तत्र ब्रह्मदत्तचरितं तावदाख्यायते -

[३८. ब्रह्मदत्ताख्यानकम्]

अत्थि गयणगलग्गदेवकुलभवणतोरणमालालंकियं अलंकियासेसनर-नारीजणसंघायं संघायट्टियगो-महिसिपसुसमाउलं समाउल देसंतरागयवणियजणसमाणियविविहपणियं सागेयं नाम नयरं ति ।

तत्थ उदिण्णसमाउलसेणो सेणाखंडियरिउभडमाणो ।

माणावज्जियगुरुयणचरणो चरणवसीकयदुज्जयकरणो ॥१॥

करणसमागयनाणयसारो सारसुदंसणकयसुहवारो ।

वारतेउरमुहजियचंदो चंदवडिंसय नाम नरिंदो ॥२॥

तस्स य सयलगुणगणसमाउत्तगतो मुणिचंदो नाम पुत्तो । सो य उवरए पियरम्मि रज्जं परिपालिऊण निक्खंतो सुगुरुसमीवे । अण्णया य गुरूहिं सह वच्चंतो देसंतरं भिक्खट्ठा पविट्ठो एगत्थ गामे । गहिय पाण-भत्तो य जाव निग्गच्छइ ताव भोलिओ सत्थस्स पविट्ठो महाडविं । तत्थ य संजायचउव्विहाहारतिरत्तोववासेणं लंधिया अडवी । तओ निरसणो त्ति पहपरिखीणो त्ति सूरावयवपरिकिलामिओ त्ति निवडिओ एगत्थ तरुच्छायाए निवडंतो य दिट्ठो चउहिं गोवेहिं, 'अव्वो ! माणुसं किंपि निवडियं' ति करुणाए धाविऊण समासासिओ पाओगिय[द]हितक्क-वाणिणं, नीओ य नियगोउलं । भुत्तावसाणे य भयवया काऊणं धम्मदेसणा चत्तारि वि पव्वाविया । ताण मज्झाओ दुवे 'अहो ! सोहणो धम्मो परं मलमलिणसरीरत्तणओ असुइ' त्ति दुगुंछं काऊण गया देवलोगं ।

तओ चुया समाणा दसण्णे जणवए वसंतपुरे संडिक्कस्स माहणस्स जसमईए दासीए तेणेव माहणेणं पुत्ता जाया । ते य अण्णया कयाइ परिवडियसरीर गया नियखेत्तरक्खणत्थं । रयणीए तत्थेव वडपायवस्स हेट्ठओ पसुत्ता । रयणीए य वडकोट्टरविणिग्गएण डक्को एक्को भुयंगमेण बीओ य भुयंगमोवलंभनिमित्तमिओ तओ परिब्भमतो डक्को तेणेवाऽहिणा । अकयपडियारा य मरिऊण उप्पण्णा कालिंजरनगे एगाए मिगीए उयरम्मि जमलत्ताए । जाया कालक्कमेण । जोव्वणत्था य पीईए एगत्थ रममाणा एगेणं वाहजुवाणएणं एक्कसरप्पहारेण विणिवाइया समाणा मया गंगातीराए एगाए रायहंसीए उयरम्मि हंसत्ताए उववण्णा । तत्थ वि एगत्थं चेव पीईए रममाणा पासिया एगेणं जालिणं गहिऊण, कंधरं वलिऊण विणिवाइयासमाणा वाणारसीए महानयरीए महाधणसमिद्धस्स भूयदिण्णाहिहाणस्स पाणाहिवइणो भारियाए कुच्छिसि पुत्तत्ताए उववण्णा ।

जाया कालक्कमेणं । चित्त-संभूय त्ति पइट्टियाइं नामाइं वडुंति रूयाइगुणेहिं ।

एतो य संखराया नामेणं अत्थि तीए नयरीए ।

तस्स वि बुद्धिपहाणो मंती नामेण नमु इत्ति ॥३॥

सो अण्णया कयाइं चुक्को अंतेउरम्मि रायस्स ।

तो पच्छण्णो वज्झो समप्पिओ भूयदिण्णस्स ॥४॥

पाणेण वि सो भणिओ 'जइ मे पाढेसि पुत्तगे दो वि ।
 भूमिगिहे पच्छणं जीयं रक्खेमि तो तुज्झ' ॥५॥
 मंती वि जीवियट्ठी पडिवज्जिय तस्स तं तहा वयणं ।
 पाढेइ दो वि पुत्ते जाव कलापारगा जाया ॥६॥
 अह तम्मि ताण माया अणुरत्ता भुंजए पइदिणं सो ।
 तं कहवि भूयदिण्णो जाणित्ता चितए एवं ॥७॥
 'सिद्धं ता मह कज्जं जेण कुमार कलासु निम्माया ।
 पावो उ इमो दुट्ठो चुक्को मह भुंजए भज्जं ॥८॥
 ता संपइ मारेमी रयाएसो विहोइ जेण कओ' ।
 तव्वहकयपरिणामो चिट्ठइ समयं निरूवेतो ॥९॥
 तं कुमरा नाऊणं 'एसो अम्हाण किल उवज्झाओ' ।
 इय चित्तिय एगंते ठियस्स सार्हित्तं से कज्जं ॥१०॥
 मंती वि मरणभीओ पच्छणं चेव ताण समएणं ।
 निग्गतूण पलाणो संपत्तो हत्थिणायपुरं ॥११॥

तर्हि च पणमंतबत्तीसमउलिबद्धसामंतसहस्ससिरोमालोमालियचलणजुयलो
 छक्खंडभरहाहिवो सणंकुमारचक्की परिवसइ तेण य नमुइबुद्धिमाहप्परंजिएणं ठाविओ
 मंतिपए ।

इओ य ते चित्त-संभूया मायंगदारया उक्किट्ठरूय-जोव्वण-कलाकोसल्लयाइगुणेर्हि
 पत्ता परं पसिद्धि ।

अण्णया य समागओ सयलनर-नारीजणकामुक्कोयकारओ विविहसिगार-
 पयारफारतरुणजणकीलारसविसेसुवज्झाओ वसंतमासो । तत्थ य कीलिउं पयत्तो समत्थ-
 तरुणसत्थो, अवि य-

चूयपरायरत्तकलकोइलकलयलरावरम्मए,
 कयकंदप्पदप्पवसकामिणिकामुयरमणनम्मए ।
 वियसियकुसुमलुद्धफुल्लंधयकयझंकारताणए,
 सुरहिसुगंधसीयमलयानिलदीवियपंचबाणए ॥१२॥

१. ला. तओ ॥ २. ला. 'हपरिणामो सो त्ति' ॥ ३. सं.वा.सु. 'ति नियकज्जं ॥

इय एरिसए वसंतए पत्तयम्मि विरहीयणगहियवसंतए ।
कीलणत्थनिर्गओ नयरीलोयओ निययरिद्धिभरभारिओ धम्मविलोइउ ॥१३॥
निग्गच्छंति य नयरीजणाण तरुणाण चच्चरिसयाइं ।
अंदोलयकीलाओ तह य पयट्टंति तरुणीओ ॥१४॥
गाइज्जइ सुइसुहयं तंती-तल-वेणुसइसंवलियं ।
मुरवाईसहेण य नच्चिज्जइ चच्चरी रम्मा ॥१५॥
नच्चइ चित्तो गायइ, संभूओ कामिणीक उक्कंटं ।
कइया वि हु संभूओ, नच्चइ गाएइ पुण चित्तो ॥१६॥
एवं ते नच्चंता संपत्ता नयरमज्झयारम्मि ।
भग्गाओ य खणेणं सव्वाओ नयरिपेच्छओ ॥१७॥
ताणं च गीय-वाइय-नच्चियरंणेण सव्वनयरिजणो ।
पाएणं अक्खित्तो चित्तइ तो चौउवेयजणो ॥१८॥
जह सव्व च्चिय नयरी एएहिं विणासिया अणज्जेहिं ।
तो विण्णविउं रायं नयरिपवेसो अह निसिद्धो ॥१९॥

तओ विमणटुम्मणा गया नियगेहं । अण्णया य समागए कोमुइमहूसवे पयट्टे
निब्भरे कीलारसे गेहे चिट्ठिउमचयंता अगणिरुण रायसासणं अपरिभाविऊण लोगविरुद्धं
अचिंतिऊण नियनीयत्तणं पविट्ठा नयरमज्जे । तत्थ य ताणं विविहकीलाओ पेच्छंताणं
कोल्हुयाणं व अवरकोल्हुयरिसियं समायण्णिऊण वयणं भंजिऊण निग्गयं गेयं । तओ
एगत्थ पएसे वत्थावगुंडियवयणा गाइउं पयत्ता । तं च सोऊण विम्हिओ लोगो चित्तिउं
पयत्तो,

किं एएते तुंबुरु-हाहा-हूहूण के वि अण्णयेरे ? ।
अहवा वि किन्नरा किं समागया इह सयं चेव ? ॥२०॥
अहवा वि के वि अण्णे तियसा एत्थं समागया नूणं ।
इय कोउगेण लोगो उग्घाडइ ताण वयणाइं ॥२१॥

तओ ते चेव पाणे दट्टुण रुट्टेण सव्वलोगेण जट्ठि-मुट्ठि जाणु-कोप्पर-लउड-
पत्थरप्पहारेहिं पराभविऊण निद्धाडिया नयरीओ, चित्तिउं च पयत्ता-

१. ला. निग्गच्छइ नथ ॥ २. ला. भाविओ ॥ ३. ला. वाइयस ॥ ४. ला. नयरये ॥ ५. सं.वा.सु.
चाउविज्जमिणं ॥ ६. ला. नयरिम ॥

“विज्जा विण्णाणं जोव्वणं च सव्वं कलासु कोसल्लं ।
अकयत्थं चिय जायं जह रण्णे मालईकुसुमं ॥२२॥

ता किमेएण सयलपरिभवकारएण विण्णाणाइसएण ? न सक्केमो इमं पराभवं विसहिउं, ता केणइ उवाएण पाणे परिच्चयामो ।” इय सामत्थिऊण निग्गया गेहाओ । पट्टिया एगं दिसं गहाय जाव पुरओ पेच्छंति एगं महंतं गिरिवरं । पडणकयनिच्छएहिं य दिट्ठो तत्थ एगो साहू, अवि य-

तवसोसियतणुयंगो दुद्धखयभरयधरणमहधवलो ।
तं दट्टुं विणएणं चलणेसुं तस्स पणमंति ॥२३॥

तओ तेण साहुणा काउस्सग्गमुस्सारिऊण पुच्छिया आगमणपओयणं । तेहि वि सव्वं सवित्थरं साहियं । तओ भणियं साहुणा-भद्द ! जम्मंतरनिव्वत्तियासुहकम्मं न एवमवणेइ, किंतु तवेणं खोडिज्जइ जओ भणियमाग्गमे-

‘पुव्वि दुच्चिण्णाणं कडाण कम्माणं दुप्पडिक्कंताणं वेयइत्ता मोक्खो, नत्थि अवेयइत्ता, तवसा वा झोसयित्ता ।’

तओ एयमायण्णिऊण भणियं तेहिं मायंगदारएहिं जहा-भयवं ! जइ जोग्गा अम्हे कस्सइ तवोणुट्टाणस्स ता देहि अम्हाणं किंचि वयविसेसं । मुणी ‘अइसयनाणि’ त्ति कलिऊण देइ ताण सव्वविरइं । ते वि संवेगाइसयाओ करंति उगं तवोणुट्टाणं पत्ता परं पसिद्धि ।

अण्णया य विहरमाणा गया हत्थिणाउरं । तत्थ य भिक्खट्टा पविट्ठो संभूओ नयरब्भंतरं । तत्थ वि कम्मधम्मसंजोएण नमुड्डमंतिणो गेहं गओ । दिट्ठो य तेण मंतिणा उवरिमतलमत्ताबलंबट्टिएण । दट्टूण य चितियं - अहो ! सो एस मायंगदारओ, जइ मं कस्सइ साहिस्सइ ता अवस्सं मज्झ छायाभंसो भविस्सइ, ता तहा करेमि जहा एस चेव इओ निग्गच्छइ । एवं चितिऊण आइट्टा नियपुरिसा जहा - एयं कयत्थिऊण इओ निव्वासेह । तेहिं वि कट्टु-लेट्टु-मुट्टिपभिइप्पहारेहिं तहा निहयं ताडिओ जहा कोवमुवगओ चित्तिउं पवत्तो-अहो ! एए अणज्जा निग्गच्छमाणं पि ममं न मुंचंति, न य एए लोणा निवारित्ति, ता दंसेमि एयस्स एयाणं च अत्तणो माहप्पंति । चितयं तस्स विणिग्गओ मुहकुहरओ धूमुप्पीलो, अंधारियं च तेण पलयकालजलहरेण विय तमालदलसामलं गयणपलं, विज्जुलाउ व्व वियंभियाओ हुयवहजालाओ । तं च तारिसं दट्टूण पुच्छियं सणंकुमारचक्कवट्टिणा जहा-भो ! किमेयमेवमपुव्वकरणं पिव दीसइ ? तओ साहियं केणावि जहा-देव एस केणावि तवस्सी कोविओ सो सव्वं नयरं दहेउमाढत्तो तं च सोऊण

सणंकुमारचक्रवट्टी ससंभमो सहस त्ति समागओ साहुपासं । वंदिऊण य विणएण
पायविलगो खामेउमाढतो, अवि य-

खमसु महायस ! इण्हि जं अवरद्धं अयाणमाणेहिं ।
पणिवइयवच्छल च्चिय हवंति तुम्हारिसा जेण ॥२४॥
तं दट्टुं चित्तो वि हु समागओ तत्थ तुरियपयखेवं ।
उवसामइ तं साहुं आगमवयणेहिं महुरेहिं ॥२५॥
तो लोय-रय-साहूण वयणमायण्णिऊण सो साहू ।
उवसंतो य खणेणं पुण संजाओ सहावत्थो ॥२६॥
तं वंदिऊण लोगो खामेऊणं गओ नियं ठणं ।
साहू वि चित्तमुणिणा पुणरवि नीओ तमुज्जाणं ॥२७॥
चित्तंति तओ दोन्नि वि धिसि धिसि आहारमित्तकज्जेणं ।
पविसिज्जइ नयरमिमं तत्थ वि पाविज्जए वसणं ॥२८॥
ता पज्जत्तं तेणं आहारेणं इमं विचित्तेउं ।
गिण्हंति चउविहस्स वि संविग्गा अणसणं ताहे ॥२९॥
पुच्छइ सणंकुमारो वि केण साहू चडाविओ कोवे ।
जाणिय परमत्थेणं केणाऽवि हु अक्खियं सव्वं ॥३०॥
तं सोऊणं रया जाओ तिवलीतरंगभंगिल्लो ।
जंपइ रे रे ? आणह बंधेउं तं महापावं ॥३१॥
वयणाणंतरमेव य बंधित्ता आणिओ अह भडेहिं ।
रया वि तयं घेतुं जाइ तओ मुणिसमीवम्मि ॥३२॥
पभणइ य एस पावो भयवं ! जेणं कयत्थिया तुब्भे ।
ता लेमि अज्ज सीसं एयस्स अहं सहत्थेणं ॥३३॥
तो करुणाए साहूहिं मोइओ जेण पावयस्साऽवि ।
न कुणंति मुणी पावं सव्वस्स अपावपरिणामा ॥३४॥
तो रण्णा सो भणिओ मुक्को रे पाव साहुवयणेणं ।
तम्हा गच्छसुतुरियं नामं पि न जत्थ निसुणेमि ॥३५॥

एवतो तत्थ सुनंदा सवत्तिचउसट्टिसहसपरिवाश ।
 मुणिपयमूले पत्ता थीरयणं चक्कवट्टिस्स ॥३६॥
 सा जाव आयरेणं संभूयरिसिस्स पणमए पाए ।
 ता तीए अगकेसाण फंसणं वेइयं तेण ॥३७॥
 तो तेणं फासेणं साहू संजायरायपरिणामो ।
 विगयम्मि नरवरिंदे नियाणमेवंविहं कुणइ ॥३८॥
 जइ अत्थि इमस्स फलं तवस्स अइदुक्करस्स चिण्णस्स ।
 तो इत्थीरयणवइ होज्जा ऽहं आगमिस्साए ॥३९॥
 तं सोउं चित्तमुणी जंपइ मा कुणसु एरिसं भइ ! ।
 किसिकरणि व्व पलालं मोक्खत्थी लहइ विसयसुहं ॥४०॥
 जह कागिणीए हेउं कोडिं नासेइ मंदबुद्धीओ ।
 तह तं पि सिद्धिसोक्खं मा नाससु विसयकज्जम्मि ॥४१॥
 एवं पि तेण वुत्तो न चयइ सो जाव आगहं निययं ।
 ता दुगुणियसंवेगो चित्तो लग्गो सकज्जम्मि ॥४२॥
 इय काऊण अणसणं मरिउं अह सुंदरे विमाणम्मि ।
 जाया दोण्णि वि तियसा भासुरवरुंदिसंजुत्ता ॥४३॥

एतो य अत्थि इहेव जंबुद्धीवे दीवे सयलजणवयसमिद्धिबंधुरो पंचालो नाम
 जणवओ । तत्थ य विणिज्जयतियसपुरिसोहासमुदयं कं पिच्छं नाम महानयरं । जत्थ य
 सुजणमेत्तीओ व्व दीहराओ रत्थाओ, सुपुरिसहिययमणोरहो व्व वित्थिण्णो हट्टमग्गो,
 माणधणनरिंदाभिप्पाय व्व तुंगाई भवण-देवउलाई, महामुणिचरियाई पिव निम्मलाई
 सरोवराई, अवि य-

सूरो सरलो सुहओ चाई य पियंवओ कयणू य ।
 पढमाभासी दक्खो वसति जहिं पुरिसवग्गो त्ति ॥४४॥
 लज्जालुओ विणीओ गुरुयणभत्तो पियम्मि अणुरत्तो ।
 सीलकलिओ गुणड्ढो वसहि तहिं इत्थिवग्गो त्ति ॥४५॥
 तं एयारिसनयरं तियसाणं पुरवरं महीवट्टे ।
 अवयरियं व गणिज्जइ तं पालइ नरवई बंभो ॥४६॥

जो य दिक्खागुरू पडिवक्खकामिणीयणवेहव्ववयपडिवत्तीए, पलयानिलो
रिवुसेणाबहलजलयपडलाणं, मयलंछणो नियजणवयजणकुमुयागराणं जलयागमो पणइयण-
सिहंदिनिवहाण अवि य-

रूवेण जो अणंगो कण्णो चाएण गयवइ गईए ।
सोंडीरयाइ सीहो कलाहिं जो पुण्णिमाइंदो ॥४७॥
तस्सऽत्थि पिया चुलणी रूवेण रई विणिज्जिया जीए ।
सो तीए समं भुंजइ विसयसुहं जणियआणंदं ॥४८॥
अह तीए गम्भम्मि देवो चइऊण देवलोगाओ ।
संभूयसाहुजीवो नियकम्मवसेण उप्पण्णो ॥४९॥
तो चोदस सुमिणाइं पेच्छइ देवी अणण्णसरिसाइं ।
साहेइ निययपइणो सो वि पयंपेइ तुट्टमणो ॥५०॥
देवि ! तुह पणयनरवइकिरीडमणिमसिणिओरुकमवीढो ।
सयलधराविलयाए नाहो होही वरो पुत्तो ॥५१॥
'एवमिणं देवाणं गुरूण पाएहिं सुप्पसण्णेहिं ।
तुमं च पभावेणं होज्जा' अभिणंदए देवी ॥५२॥
अह जायम्मि पभाए राया सहित्तु सुविणुवज्जायं ।
पुच्छइ सुविणाण फलं सो वि हु तुट्टो परिकहेइ ॥५३॥
देव ! सुओ देवीए होही तिसमुद्दमेहलाए उ ।
पुहइविलयाए नाहो चक्कहरो पणयसामंतो ॥५४॥

एवं च कमेण संपत्ते पसवसमए पसूया देवी सव्वंगसुंदराभिरामं तियसकुमारसरिसं
दारयं । तओ ससंभमखलमाणगइप्पसराहिं निवडंतु त्तरिज्जाहिं कं पंतगुरुपओ
हरभारसमुप्पण्णखेयवससासावूरिज्जमाणदासचेडीहिं वद्धाविओ नरवई । तासिं च दाऊण
मउडवज्जंगलगाभरणसणाहपिईदाणपुव्वयं मत्थए धोविऊण समाइसइ वद्धावणयमहूसवं,
अवि य-

वज्जंत महारवमद्दलयं, नच्चंतविलासिणिगुंदलयं ।
घुमंतमणोहरवामणयं कीरंतमहल्लयहासणयं ॥५५॥
तुट्टंतसुतारयहारलयं सुव्वंतसुईसुहगेयलयं ।
दिज्जंतकरिंद-रहोह-हयं उब्भितसजूतवयचक्कघयं ॥५६॥

अच्वुब्मडवेसभडाउलयं गिज्जंतनियंविणिमंगलयं ।
कारवियमाणपवट्टणयं मुच्चंतअसेसयबंदिणयं ॥५७॥

इय दंडकुदंडविवज्जियए परितोसियसव्वजणुज्जियए ।
विणिवारियचारभडाविणए सयलम्मि वि वित्तइ वद्धएण ॥५८॥

एवं च कमेण पत्ते बारसमे दिणे महाविभूईए कयं दारयस्स नामं बंभदत्तो त्ति वड्डए देहोवचएणं कलाकलावेण य । इओ य तस्स बंभस्स रइणो अच्चंतुत्तमवंससंभवा महारायाणो आसि चत्तारि मित्ता, तं जहा-कासीजणवयालंकारवाणारसीपुराहिवई कडओ १ गयअवई कणेरुदत्तो २ कोसलानयरसामी दीहो ३ चंपाहिवई पुप्फचूलो त्ति ४ एए य अच्चंतपियत्तणओ साहीणविहवत्तणओ य समुइया चेव सरज्जेसुं संवच्छर-मेक्केक्कमणिवारियप्पसरमकयप्पडिहाराइजंतणं 'मा परोप्परं विओगो होउ' त्ति कलिरुण विविहकयकीलाविसेसेहिं चिट्ठंति, भणियं च-

किं ताए सुंदराए वि सिरीए जा होइ सयणपरिहीणा ।
मित्तेहिं समं जा नेय जं च सत्तू न पेच्छंति ॥५९॥

एवं च परोप्परबहुनेहनिभरण वच्चए कालो । एवं च जाए बारसमे संवच्छरे बंभदत्तकुमारस्स अणिच्चया कवलिओ सिरोरोगेणं कालगओ बंभराया । कारुण य मयकिच्चाइयं कडयाइणो वयंसया भणिउमाढता-जाव बंभदत्तकुमारो सारीरबलोववेओ भवइ ताव परिवाडीए अम्हाण एक्केक्को इमं रज्जं परिवालउ' त्ति मंतिरुणं सव्व सम्मएणं दीहो ठविओ रज्जे । अण्णे पुण सरज्जाइं गया । गएसु य तेसु सो दीहो राया परिपालए सयलसामगियं रज्जं । पुव्वपरिचिय त्तणओ समुप्पण्णपहुत्तणाभिमाणओ य पडियग्गए रह-तुरय-गइंदाइयं, पलोयए भंडारं, नियच्छए सयलट्टाणाणि, पविसइ अंतेउरं, मंतेइ समं चुलणीए । तओ दुण्णिवारयाए इंदियाणं, बलवत्तणओ मयरकेउणो, दुद्धरत्तणओ मोहपसरस्स, रमणीयत्तणओ जोव्वणविलासाणं, अगणिरुणं बंभराइणो सुकयाणि, अवगणिरुण वयणीययं, उज्झिरुण चारित्तं, अवलंबिरुण निल्लज्जयं, मइलिरुण नियकुलक्कमं, बहुमणिरुण नियकुलकलंकवायं, खंडिरुण निम्मलसीलप्पसरं, संपलग्गो समं चुलणीए, अहवा सयलाववायकारणं चेव महिलासंममो, भणियं च-

एस च्चिय नेहगई किं कीरउ जं कुलुग्गयाणं पि ।
महिलासंगो मइलेइ साडयं तेल्लघडओ व्व ॥६०॥

तिलसंबद्धत्तणकयसिणेहपसरा खलत्तपरिणामा ।
 महिला चक्कियसाल व्व कस्स नो मइलणं जणइ ॥६१॥
 परपेरिया सलोहा अगणियनिययाववायसंदोहा ।
 तेक्कियकुसि व्व महिला खलस्स वयणं पणामेइ ॥६२॥
 इय अगणियनिययकुलक्कमाण पम्मक्कलज्जियव्वाण ।
 खलमहिलाणं न हु नवरि कुवुरिसाणं पि अहमग्गो ॥६३॥

एवं च पवड्डमाणसिणेहपसरंतविसयसुहरसाणं वच्चंति वासरा । एयं च समाचरणं बंभस्स राइणो बीयहिययभूएणं धणुनामेणं मंतिणा सव्वमेवमवितहं वियाणिऊण चितियं जहा-“अविवेयबहुलयाए महिलयाणं घडउ नाम एयं, जं पुण पडिवण्णयं पि अंगीकरेऊण अयसमसिमुहमक्खणं कयं दीहेण तंमत्थि चोज्जं । अहवा दुण्णिवारयाए महामोहविलसियस्स न किंचि चोज्जं । ता जो एवंविहं पि अकज्जमायइ तस्स किमण्णमकज्जमत्थि” ति । चित्तिऊण वरधणू नाम निययसुओ बंभदत्तस्स अईवसिणेहाणुरतो एगंते निवेसिऊण भणिओ जहा-वच्छ ! कुमारे बालसहावो न मुणइ पयइकुडिलाण महिलाण विलसियाइं ता एयस्स जणणीसरूवं जाणावेहि । तओ जाणावियमेगंते वरधणुणा । कुमारे वि जहा । वत्थियं परिकिखऊण दढबद्धपरहुत्तपक्खपेरंतं घेतूण परहुयाहिद्वियमरिद्धमंतेउरमज्जेणं वच्चंतो ताण पच्चक्खं रायउत्ततरलत्तणलीलाए भणइ, अवि य -

निसुणंतु असुयपुव्वा जह एसा उत्तमा वि परपुट्टा ।
 एएण निगिट्टेणं बलिपुट्टेणं समं वसइ ॥६४॥
 इय वण्णसंकरे न हु राईणोवेक्खिऊण खलु जुत्तो ।
 तेणैयाणं एवं मए कओ निग्गहो घोरो ॥६५॥
 अण्णो वि को वि एवं जो काहिइ सो वि नणु मए नियमा ।
 निग्गहियव्वो एवं निग्गच्छइ एव कीलंतो ॥६६॥

तं च दट्टूण भणियं दीहेणं-पिए ! न सोहणो कुमारस्सुल्लवो जओ तुमं कोइला अहं काओ । तीए जंपियं-बालत्तणेणं कुमारे विचित्तकीलार्हि रममाणो जं वा तं वा उल्लवइ, कओ एयस्स एवंविहो वियप्पो ? । तओ बीयदियहे भद्दकरणिं संकिण्णगएण सह बंधिऊण जंपइ, अवि य-

भद्रकरणं वि होतं संकिण्णगणं जा समं रमइ ।

सा एव निग्गहेज्जइ सुणंतु सव्वे वि वयणमिणं ॥६७॥

तं च सोतं भणियं दीहेण - पिए ! न बालविलसियमेयं, किंतु साभिप्पायं । तीए भणियं-जइ वि एवं तहावि किमेइणा ? । पुणो तइयदिवसे रायहंसि बगेण सह बंधिता समाणिऊण जंपिउं पवत्तो, अवि य-

कलहंसिया वि एसा छिच्छइया असरिसे जओ रता ।

तेण न सहामि एयं सुणंतु अण्णे वि किं बहुणा ? ॥६८॥

एयं च समायणिऊण पुणो वि जंपियं दीहेण पिए ! कुमारो वड्डमाणो निच्छएण रइविग्घकारी भविस्सइ, ता मारिज्जउ । तीए भणियं कहां रज्जधरं नियपुत्तं विणासेमि ? तेण जंपियं मम्मि साहीणे अण्णे तुह सुया भविस्संति, अहवा जे मह पुत्ता ते तव पुत्ता चेव, जओ दोसु विरज्जेसु तुमं चिय सामिणी । तओ रइनेहपरव्वसत्तणओ एरिसं पि हियएणावि अचित्तीयं पडिस्सुयमिमीए भणियं च-

हिययाइं नेहरसियाण कमलदलकोमलाइं महिलाण ।

ताइं चेव विरत्ताण होंति करवत्तकढिणाइं ॥६९॥

भणियं च तीए-जइ कहवि तेणोवाएण मारिज्जइ जहा जणाववायदोसो रक्खिज्जइ 'को उण सो उवाओ ?' ति चिरं चित्तिऊण, 'हुं मुणियं कुमारस्स विवाहधम्मं करेमि, तओ वासभवणं तन्निमित्तं पवरजालऽद्धयंदनिज्जुहयसणाहं अणेगवायायणमत्तवारणविभूसियं गूढनिग्गमपवेसं करेमु जउहरं, तत्थ य सुहपसुत्तस्स जलणं दाहामो' ति मंतिऊण वरिया चुलणीए नियभाउणो पुप्फचूलाहिहाणस्स धूया । पारद्धा सयलसामग्गी । तओ मइपरिसत्तणओ सव्वं तव्विलसियं लक्खिऊण अमच्चधणुणा विण्णत्तो दीहरया-देव ! एस मह पुत्तो वरधणू सयलकलाकुसलो रज्जमहाभरुव्वहणधुरधवलपरिपालणक्खमो, अहं पुण वयपरिणयत्तणओ न सक्केमि काउं खडप्फडं, ता तुमए अणुण्णाओ इच्छामि नियहियाणुट्ठाणं काउं तओ एयमायणिऊण दीहराइणा चित्तियं-एस महामई मायामंतप्पओगकुसलो बहिं निग्गओ नियमा अणत्थाय भविस्सइ ति । चित्तिऊण कइयवोवयारविइयसामपुव्वयं भणिओ - तुमए विणा किमम्हाण रज्जेण पओयणं ?, का वा हिययनिव्वुई ? ता अलं कत्थइ पउत्थेणं, किंतु इह द्विओ चेव असणप्पयाणाइणा धम्ममावज्जसु । इमं चाऽऽयणिऊण धणुणा गंगानईतीरे महंतं सत्तमंडवं काराविऊण पंथिय-परिवायगईण दवावियं पगाममण्णपाणं । दाणमाणोवयारसंगहियपच्चइयपुरिसेहिं य खणाविया दुगाउयप्पमाणा जउहरं जाव सुरंगा । पच्छन्नलेहपेसणेण य जाणाविओ एस

वइयोरो पुष्फचूलस्स । तेण वि गहियपरमत्थेण न पेसिया नियधूया, किंतु अण्णा दासचेडि त्ति इयोरेहिं वि पवेसिया महाविभूर्इए । पत्तं च वारिज्जयदिणं । तओ नच्चंत नड-नट्ट-जल्ल-मल्ल-मुट्टिय-वेलंबय-कहग-पवग-लासग-आइंखग-लंखमंख-तुंबवीणिय-तालायर-संवाहबहलं गिज्जंतमहुरमंगलालावमुहलं निवैसिज्जमाणदूरागयजणं अविरय-पडंतलाय-कुसुमपयरच्चियभूमिभागं देवण्णुग्घुट्टसुव्वंतपुण्णाहसई वत्तं पाणिग्गहणं । विवाहाणंतरं च विसज्जिए सयलम्मि जणसमूहे पवेसिओ कुमारो वासभवणपरियप्पणाए सवहूओ जउहरं । तओ तत्थ पासनिसन्नस्स नववधूसमन्नियस्स नाइदूरोवविट्टवरधणु-सहायस्स विसज्जियासेसपरियणस्स वेसंभनिब्भरं वरधणुणा समं मंतयंतस्स समहिगय-मद्धजामिणीए ताव य चियानलेण दुवारदेसाओ समारब्भ पलीवियं वासभवणं । उच्छलिओ हाहारवो, कूइयं पुरजणवएणं, संवलगं तओ जउ भवणं, अवि य-

अइबहलकसिणनवजलयसरिसधूमम्मि पसरमाणाहिं ।

विज्जुलयाहिं व जालाहिं सव्वओ तं समुप्पुण्णं ॥७७॥

चुंपालयजालगवक्खविवरपविसंतसिहिसिहोहेहिं ।

समवत्तिणो करेहि व तं नज्जइ पूरियं सव्वं ॥७८॥

जमजीहासमपसरियउब्भडजालाकलावदुप्पिच्छं ।

डज्जइ तं सव्व तो, तडयडरावं विमुंचंतं ॥७९॥

तं च तारिसं दट्टूण किंकायव्वविमुहियमाणसेण 'किमेयं ? ति पुच्छिओ वरधणू । तेणाऽवि साहियं संखेवेण । बंभयत्तेण भणियं-कहमेयं तुब्भे वियाणह ? तेण जंपियं - देव ! तुम्ह कज्जोव उताण किमण्णमम्हाण पओयणं ? बंभयत्तेण भणियं-जइ एवं ता किमित्थ कायव्वं ? वरधणुणा भणियं-कयं चेव सव्वमक्खूणमेत्थ मह जणएण, जओ पुव्वमेव भणिओ अहं 'जइ किंचिवि एत्थ पविट्टाणं तुम्हाणं विसमं समावडइ तो कुमारं अमुगत्य पएसम्मि पणिहप्पहारं दावेज्जसु जेण पयडीहोइ सुरंगामुहं ति, ता देह एत्थ प्पएसे पणिहप्पहारं । तओ कुमारेण तहेव कए पयडीहूया सुरंगा । तीए य जाव निग्गच्छंति ताव मंतिणा समप्पिया दोण्णि जच्चतुरंगमा । तेहिं य समारुहिऊण पणट्टा गया पण्णासं जोयणाणि । सासाऽऽवूरियहियया य मया तुरंगमा । तओ पाएहिं चेव गच्छंता पत्ता कोट्टगाभिहाणं गामं । एत्थंतरम्मि य तण्हाछुहाकिलितेणं भणिओ वरधणू कुमारेण-मित्त ! दढं छुहाभिभूओऽम्हि । तेणाऽवि चितियं 'अहो ! सच्चं केणाऽवि भणियं, जहा-

नत्थि पंथखेयाउ परा वय परिणई, नेय रुंददारिद्दसमो वि हु परिभवो ।

मरणयाहि न वि जायइ अण्णभयं परं, वेयणा वि न छुहाए समा किर जंतुणो ॥८०॥

जोव्वणसिरिसोहग्गयअहिमाणपरक्कमोरुसत्ताइं ।

लज्जं बलावलेवउ खणेण एक्का छुहा पणासेइ ॥८१॥'

चित्तिरुण पविट्ठो कुमारं तत्थेव मोत्तूण गामे । समागओ य लहुं कासवयं घेतूण । सिहामेत्तं च मोत्तूण मुंडावियं सीसं कुमारस्स । परिहाविओ थोरकसायवत्थाणि, पच्छइयं वच्छत्थलं सिरिवच्छचिधं चउरंगुलपमाणपट्टएणं, पक्खित्तं कंठे जण्णोवइयं । अप्पणा वि परिवत्तिरुण वेसं पविट्ठा गामब्भंतरं । ताव य एक्कदियवरगेहाओ निग्गंतूण दासचेडएहिं भणिया-एह भुंजह ति । तओ गया तत्थ । भुत्ता रयाणुरूवपडिवतीए । भोयणावसाणम्मि य समागया अमलियविसट्टकोरिटकुसुमच्छविं दीहरदारोणयनिबिडंगुलिकरयलप्प-माणलोयणजुयलं बंधुमइकयाभिहाणं कण्णयं गहाय एक्का मज्झिमवया नारी । कुमारुत्तमंगम्मि अक्खए दाऊण कुसुमसणाहं सियवत्थजुयलं च दाऊण भणियमणाए एस इमाए कण्णयाए वरो ति । एयं चाऽऽयण्णिऊण भणियं मंतिसुएण-भो ! किमेयस्स अणहियवेयवयणस्स मुखबडुयस्स जणियायरेण अप्पाणं खेयह । घरसामिएण भणियं-“सामि ! सुव्वउ, अत्थि किंचि विण्णवियव्वं जहा पुव्वमहेहिं पुच्छिएण नेमित्तिएण साहियं जहा ‘इमाए बालियाए सयलपुहइमंडलाहिवई भत्ता भविस्सइ’ । ‘कहमहेहिं सो नायव्वो ?’ ति पुच्छिएण तेण भणियं—जो समित्तो पट्टोच्छइयवच्छो तुम्ह गेहे भुंजिस्सइ, जं च दट्टूण इमीए बहलपुलउब्भओ बाहजलाविलंबं च नयणजुयलं भविस्सइ सो इमीए भत्तै’त्ति भणंतेण पणामियं करदाणसलिलं कुमारस्स । वरधणुणा भणियं-भो ! एस जम्मदारिद्धोडोडो, कुओ पुहइमंडलाहिव त्ताणमिमस्स ? घरवइणा भणियं-जो होउ सो होउ पणामिया मए इमा इमस्स । तओ तम्मि चेवदियहे कयं पाणिग्गहणं । तं निसं तर्हि चेव वसिया पहायाए रयणीए भणियं वरधणुणा-भो सहयर ? किं सुहासीणो चिट्ठसि ? किं विसुमरियं दूरंगंतव्वं ? ति वाहित्तेण कुमारेण बंधुमईए सिट्ठो सब्भावो, ता पिए ? न कस्सइ साहेयव्वं वीसत्थाए य चिट्ठियव्वं जावाऽहमागच्छामि । तं च समायण्णिऊण अविरलगतंत-बाहजलकलुसियकवोलमंडलाए पणमिरुण भणियमिमीए, अवि य-

नियकुलनहयलमंडणमयलंछण ! सुणसु मज्झ विण्णत्ति ।

अम्हारिसदीणजणं खणं पि मा पम्हुसेज्जासु ॥८२॥

तइ समयमिमं वच्चइ मह हिययमसरण यं ममं मोत्तुं ।

सोक्खं च सोक्खदायग ! इमाण तर्त्ति वहेज्जासु ॥८३॥

रइया य तुज्ज पुरओ वेणी तह कज्जलाइयं मुक्कं ।
इय नाउं नाह ! दयं काउं लहु संगमं देज्ज ॥८४॥

तओ तं नेह कायरं संठवेऊण निग्गया वियडपयक्खेवं वच्चंता पत्ता
अंतिमग्गामनामगामं । तत्थ य सलिलपाणनिमित्तमइगओ वरधणू । लहुं चाऽऽगतूणं
भणियं-कुमार ! गामसहासु जंपिज्जए जहा-किर अईयदिणे बंभदत्त-वरधणुणो पलाणा,
दड्ढे जउहरम्मि य पलोयंतेहिं न दिट्ठाइं अट्ठियाइं, दिट्ठा य सुरंगा, तओ दीहरइणा बंधाविया
सयलरायमग्गा । ता एह उम्मगेण वच्चामो त्ति पयट्ठा विसमदुग्गदेसेण । पडिया य
महाडईए, अवि य-

भीसणसावयसयसंकुलाए बहुविडविगहणगुविलाए ।
बहु जाइ पक्खिसहुद्धुयाए अइदूरपाराए ॥८५॥ जाय
मंभीसइ व्व कत्थइ, पवणपहल्लंतपल्लवकरेहिं ।
कत्थइ निवडिरपक्कप्फ लेहिं पूयइ व पहिययणे ॥८६॥
कत्थइ तरुवरसंरुद्धरविकर हरइ सत्तसंतावं ।
दवदद्धयाइ कत्थइ, मइलइ संग्गाउ कुडल व्व ॥८७॥
इय बहुविहवुत्तंताए ताए वच्चंति ताव ते दो वि ।
ता सु सियकंठउट्ठो तिसाए परिपीडिओ कुमरो ॥८८॥

तओ तं तारिसं कुमारं दट्ठूण वरधणू बहलदलनग्गोहच्छयाए मोत्तूण कुमारं गओ
सयं जलऽण्णे सणत्थं ।

ताव य दिणावसाणसमयम्मि दिट्ठो अण्णेण दूरदेसत्थो जमभडेहिं व दीहरायपुरिसेहिं
हम्मंतो तयलक्खं लहु पलायसु त्ति सण्णं च कुणमाणो वरधणू । तं चाऽवगच्छिऊण
पलाणो कुमरो । पलायंतो य पडिओ दुग्गमं कंतारं, तं च केरिसं -

वियडगिरिकूडसंकडतडनियडपडंतनिबिडविडवोहं ।
अइभीसणसावयगरुयमुक्कबुक्काररवपउरं ॥८९॥
मयर्भिभलमयगलकुलभज्जंतमहंततरुदुसंचारं ।
गुरुवंसघस्सणुट्ठियदवग्गिडज्जंतकंतारं ॥९०॥
अइपसरियवीरीसइभीसणं बंभयत्तवरकुमरो ।
नियकम्मपरिणइं पिव भमइ महाघोरकंतारं ॥९१॥

तत्थ य अरस-विरसफलाइकयाऽऽहारो तइयदिवसम्मि पेच्छइ तावसमेगं । तं च

ददूण पुच्छियं कुमारेण-भयवं ! कथं तुम्हाऽऽसमपयं ? तेण विनीओ आसम पयं । दिट्टो कुलवई । वंदिओ धरणिलुलंतकुं तलकलावभालयलेणं । आसीवायदाणपुव्वयं च भणियमणेण-वच्छ ! सुकुमालसरीरे तुमं दीससि, अइदुग्गभीसणं चाऽरण्णं, ता कहमिह तुहाऽऽगमणं ? तेण वि गुरू त्ति सव्वं जहावत्तं साहियं । तव्वयणाणंतं च सागयं सागयं त्ति भणमाणेण परिरद्धो कुलवइणा, भणियं जहाऽहं तुह पिउणो बंभराइणो चुल्लभाइ त्ति, तो जहासुहं चिट्ठसु, तुह संतियं चेवाऽऽसमपयं त्ति तत्थ चिट्ठमाणस्स समागओ पाउसो । तत्थ सो तेणऽज्जएण सयलकलाओ महत्थविज्जाओ य गुणाविओ । अण्णया य गलियजलहरधवलियदियंतरालम्मि कुवलयदलसामलोवलक्खिज्जमाणनहयलम्मि समागए सरयकाले फलाइनिमित्तं पट्टिएसु तावसेसु सह निरुज्झमाणो वि कुलवइणा गओ सोऽरण्णं । तओ च- ऋखुलोलत्तणओ इओ तओ पलोयंतेण तेण दिट्ठं तक्खणविमुक्कं गयवरमुत्तपुरीसं । तओ 'पच्चासण्णो एत्थकरी भविस्सइ' त्ति भणंतो तरलत्तणओ कुमारत्तणसहावस्स निवारिज्जंतो वि तावसेहिं लग्गो गयाणुमग्गओ 'इमो गच्छइ इमो गच्छइ' त्ति परायत्तमाणसो गओ पंच जोयणाणि दिट्टो सो करी, अवि य-

गलमाणगंडणीरं अग्गपएसम्मि उन्नयसुदंतं ।

उप्पायपव्वयं पिव चलमाणं नियइ गयनाहं ॥१२॥

तओ अप्पाणयं च परिवारविरहियं ददूण कोउगेण कयं गलगज्जियं । तयायण्णणाओ य तड्ढुवियकण्णजुयलो करविमुक्कसुंकारनियरो गलगज्जियविणिज्जिय-सजलजलहरो पत्तो कुमारस्संतियं करी । जाव य पसारियकरो किर कुमारं न गिण्हइ ताव कुमारेण संविळ्ळिऊण खित्तं से पुरओ उत्तरीयं । तेणाऽवि अमरिसवसेण खित्तमंबरतले निवडमाणं च तक्कलणाए जाव दसणेहिं पडिच्छइ ताव परिवंचिऊणाऽणेण गहिओ वालग्गहाए । सतुरियं चलंतस्स य चलणंतरविनीहरिण्ण छित्तो करेण चलणकरेसुं । तओ तस्स रोसवसविइण्णसुण्णवेज्जस्स करजुयलसमुक्खयपक्खित्तपंसुपिहियलियणपसरस्स विलग्गो कंठपएसे जाव य करग्गेण परामुसइ ताव य ह च्छत्तणओ एक्ककरकलियवालहि-डंडो झत्ति समागओ धरणियत्तं । एत्थंतरम्मि य पसरंतनिब्भरासारथोरजलधारा-निरुद्धलियणवहं पवत्तं वरसिउं । तओ सो करी दढं परिस्संतो वासेण य परब्भाहओ विरसमारसिऊण पलाणो । कुमारे वि जाव चलिओ पिट्ठओ ताव जलपूरालक्खिज्ज-माणनिन्नुन्नयविहाओ दिसामूढो समोइण्णो जलपुण्णमेक्कं सरियं । तीए य वुज्झमाणो समुत्तिण्णो बीयदिणम्मि तडिट्ठियं एक्कमुव्वसियपुराणपुरवरं, अवि य -

उतुंगगरुयगोउरनिवडणपडिरुद्धनिग्गमपवेसं ।
 संभग्गसुरालयतुं गसिहरदरदिद्धगम्भहरं ॥९३॥
 घरभित्तिसमुग्गयवियडविडविखडहडियतुंगधवलहरं ।
 वणकरिविसाणपेळ्ळणभज्जंत कवाडसंपुडयं ॥९४॥
 वणमहिसत्तिकखसिग्गग्गभिन्ननिवडंतवलहियावयवं ।
 कोलउलुक्खयभूमीदीसंतनिहाणकंठग्गं ॥९५॥
 इय एवंहिनयरं कोउयरसपसरपूरिओ कुमरो ।
 जा वियरइ ता पेच्छइ वंसकुडंगं महाकायं ॥९६॥

तीए य पासट्टियं वसुनंदयं मंडलगं पच्छिऊण अइसोहणं ति कोऊहलेण घेतूण
 वाहियं तम्मि वंसकुडंगे खग्गं, एक्कप्पहारेण चैव पाडिया वंसाण सट्ठी । तदंतरालट्टियं च
 दरफुरंतोड्डुडं निवडियं एक्कं मणोहरयारं सिरकमलं । तं च दट्टूण संकंतेण निरूवियं
 वंसकुडंगं । दिट्ठं च उद्धनिबद्धचलणं धूमपियणलालसं कबंधं । 'अहो ? विज्जासाह-
 णुज्जओ को वि एस महाणुभावो मए विणासिओ' ति भावें-

तेण बहुसो निदियमत्तणो बाहुबलं । तओ खणंतरेण जाव अग्गओहुत्तं पट्टिओ ताव
 पेच्छइ नंदणवणसंकासं महंतमुज्जाणं तदंसणकोउयरसपसरपसारियनयणजुयलो
 नाणातरुनिक्खत्तदिट्ठिच्छोहो जाव पविसइ ताव पेच्छइ सुरविमाणकरिसुव्वहमाणमेगं
 सत्तभूमिगं महापासायं । तं च दट्टूण कोउगेण समारूढो सत्तमभूमिगाए । तत्थ य
 सिचयपइच्छाइयमणिमयपल्लंकोवरिट्ठिया, निविट्ठं पिव नियं वत्थले, समुग्गयं पिव-
 गंभीरनाहिमंडलाओ, वित्थरियं पिव भुयालयासु, किसलइयं पिव करपल्लवेसु, कुसुमियं पिव नह
 किरणनियरेसु, फलियं पिव थोरथणेसु, जोव्वणमुव्वहंती सुकसिणसुसिणिद्धकुंतल-
 कलावोवसोहियवयणमंडलादिट्ठा एक्का पवरवालिया, अवि य-

दंडाहयकसिणभुयंगभंगसमसरिसविहियवेणीया ।
 एक्ककरट्टियमंगलवलया गयसेसआहरणा ॥९७॥
 नियवामपाणिपल्लवपल्लहत्थि यवयणपंकयाभोया ।
 तुहिणकरुक्केरेलुग्गपंकया सिसिरनलिणि व्व ॥९८॥
 अणवरयसोगसंगलियबाहजलकलुसियोभयकवोला ।
 दिट्ठा वारिपरिच्छूढवे विरा सा करेणु व्व ॥९९॥

तओ गलियविज्ज व्व विज्जाहरसुंदरी चितानिरुद्धतणुप्पयारा उवसप्पिरुण पुच्छिया कुमारेण-सुंदरि ? काऽसि तुमं ? को वा इमो पएसो ? किं वा एगागिणी ? किं वा सोयकारणं ? । तओ सज्झसपरव्वसाए जंपियं तीए-महाभाय ? महंतो मह वइयरो, ता तुमं चेव पसायं कारुण साहसु, को तुमं ? कर्हि वा पयट्ठो ? किं वा पओयणं ? । तीए य करकलियवल्लईकोमलारावरंजिएण भणियमणेण-सुंदरि ? अहं खु पंचालाहिवइणो बंभराइणो तणओ बंभयत्तो नाम । जाव एत्तियं भणियं कुमारेण ताव सा आणंदवाहसलिलावूरियनयणजुयला समुब्भज्जंतरोमंचकंचुया सहस च्चिय समब्भुट्टिया, निवडिऊण य कुमारचलणेसु भणिउं पवत्ता, अवि य-

मह लोयणवियसा वय ! अमयमयाणंददायग ! कुमार ? ।

मह असरणाए सुंदर ! सुंदरमिह आगओ जं सि ॥१००॥

करचरणसमुत्थेर्हि सव्वुत्तमलक्खणेर्हि मह जइ वि ।

सिरिवच्छलंछणो वामबाहुफुरणाइ सिट्ठोऽसि ॥१०१॥

तह विहु संदेहविणासणत्थमिह पुच्छिओऽसि गुणनिलय ।

ता कुमर ! सागयं तुह भणमाणी रेविउं लगा ॥१०२॥

तओ कुमारेणाऽवि 'मा रुव्वउ'त्ति भणतेण उन्नामिऊण सिरकमलं पुणो पुच्छिया-का तुमं ? किं वा रुवणकारणं ? ति । तओ पप्फुसियलोयणा जंपिउं पयत्ता-कुमार ? अहं खु तुह माउलगस्स पुप्फचूलेस्स धूया पुप्फवई नाम कण्णया तुह चेव दिण्णा विवाहदिणं पडिच्छमाणी नियघरुज्जाणदीहियापुलिणपरिसरे रमंती दुट्ठविज्जाहरेण नट्टुम्म तयाभिहाणेण इहाऽऽणीया, जणयाइबंधुवियोगजलणजालावलीकरालियकलेवरा नियभागधेयाइं उवालभमाणी जाव चिट्ठामि ताव अतक्कियरयणवुट्ठि व्व तुमं समागओ, ता होसु संपयं मह असरणाए सरणं । तओ कुमारेण भणियं-सुंदरि ? कत्थ पुण संपयं सो महवेरी जेण परिक्खामि से बलं । तीए जंपियं - सो हु मे दिट्ठिमसहमाणो विज्जासाहणत्थं एगत्थ वंसकुडंगम्मि उद्धबद्धचलणजुयलो धूमपाणपरायणो विज्जं साहइ सिद्धविज्जो य किर मं परिणिस्सइ, अज्जं च किर तस्स विज्जासिद्धी भविस्सइ । तओ कुमारेण सिट्ठो तीए तन्नि-हणणवइयरो । तं च सोऊण हरिसुप्फुल्ललोयणाए जंपियं-अज्जउत्त ? सोहणं कयं जं सो दुरायरो निहओ, ता संपयं पूरेहि चिरचितिए मह मणोरहे । कुमारेण वि परिणीया सा गंधव्वविवाहेण । निवसिओ य समं तीए तत्थ, रयणीए अहिणवरयनिब्भरणं च निव्वत्तं तं जं सयलजणाणं रमणीयं पि तह विलज्जणीयं, सुपसिद्धं पि एगंतसमहिगम्मं, दिण्णगरुया-

णुरायपसरं पि जणियविरायत्तणं, उब्भडजणियांसिगारं पि कयविसयासयं ति । पसुत्तो य सुहेणं । पहायसमयम्मि य निसुओ दिव्वविलयाणुकारी मणहरलावो । पुच्छियं च तेण- कस्स पुण सद्दो ? भणियं च तीए ससंभंताए-अज्जउत्त ! एयाओ खु तस्स तुह वेरिणो नट्टुम्मत्तस्स भइणीओ खंड-विसाहाना माओ विज्जाहरकुमारीओ तन्निमित्तं विवाहोवगरणं घेतूण समागयाओ, ता तुम्हे ताव ओसक्कह लहुं जावाऽहं तुहमुणसंकहावइयरेण भावमेयासिमुव लहामि, जइ एयांसि तुम्होवरि गुणाणुरओ भविस्सइ तओऽहं पासायस्सुवरि रत्तंसुयपडायं समुब्भिस्सामि, अण्णहा सियपडायं ति, तं च मुणिरुण गंतव्वं तुमए । भणिया य सा तेण- सुंदरि ! अलमलं संभमेण, किं मह इमाओ काहिंति ? । तीए भणियं-न भणामि एयाहिंतो भयं, किंतु जो एयांसि संबद्धो सहोयराइओ नहंगणयारी भडसमूहो मा सो तुम्हाणुवरि विरुज्झिही । तओ सो तच्चित्ताणुवित्ति कुणमाणो संठिओ विवित्तप्पएसे । गया पुप्फवई । दिट्ठा य नाइचिरवेलाए मंदं मंदं दोलमाणा धवलपडया । कलिरुण संकेयाभिप्पायं सणियं सणियमवक्कंतो तप्पएसाओ । पयत्तो वियडवणंतशलमाहिंडिउं । अइखेयनिस्सहो य दिणावसाण समयम्मि समुत्तिण्णो कंतारंतरओ । दिट्ठं च पुरओ वियडसिलासंघायनिबद्धवित्थिण्ण- थोरपालिपैरंतं उत्तुंगपालिपरूढनाणादुमसंडमंडियाभिरामं लयाहरब्भंतरसरसकिसल- यसेज्जासुहपसुत्तवणयराइ-मिहुणं निवडियसुरहिकुसुमवासवासिज्ज- माणसिसिरजलविसेसं एकं महासरवरं । तओ अभिवाइज्जमाणो व्व कलभमरविरुएहिं, वाहिप्पमाणो व्व महुरकोइलालावेहिं, अग्घिज्जमाणो व्व पक्खित्तकुसुमोवयारलयावहूहिं, वंदिज्जमाणो व्व फलभरोणमंत-सिहरिसिहरेहिं, परिरब्भमाणो व्व सलिलसंगसीयलेण सुरहिपवणेण पत्तो ततीरप्पएसं । तं च विविहफणिफणामंडलेहिं पिव कमलकुवलउप्पलेहिं विराइज्जमाणं दट्टूण कयमज्जण-जलकीलो नाणाविहनेवत्थविरइयविविहवेसायण- गोट्टीनिविट्टमणुयमंडलीओ नियच्छंतो संपत्तो उत्तरपच्छिं तीरलेहं ।

दिट्ठा य तत्थ अइमणहररूवजोव्वणावूरिज्जमाणसरीयवया कुसुमियपियंगुकुसुम- सरिसदेहच्छवी सव्वालंकारमणहर उन्नामिए क्क भुयलया पयासियपवरबाहुमूला कुसुमावचयं कुणमाणी एक्का पवरकण्णया चितियं चाऽणेण-अहो ! इमम्मि चेव जम्मे जायं मह दिव्वरूवविलयादंसणं, अहो ! मे पुण्णपरिणई, अहो ! पयावइणो विण्णाणपयरिसो जेणेसा रूवगुणनिहाणमुप्पाइया । तओ सा वि सिणेहाणुरायरसनिब्भरं बंभयत्तं पलोयंती नियदासचेडीए य समं किंपि मंतयंती पत्थिया तप्पएसाओ । सो वि तं चेव निरिक्खंतो पत्थिओ अण्णओहुत्तं जाव गहियवत्थालंकारतंबोलासमागया इक्का दासचेडी । तीए य

वत्था इयं समप्पिऊण भणिओ-“महाभाग ! एसा जा तुम्हेहिं दिट्ठा तीए पेसियमिणं, भणिया य अहं जहा ‘हला ! वणकिसलइए ! एयं महाणुभावं अम्ह तायमंतिणो मंदिरे सयणीयट्ठिं कारवेसु, जहावट्ठियं च से साहेज्जसु” त्ति । भणंतीए अलंकियविभूसिओ समुवणीओ नागदेवामच्चस्स । साहियं च जहा-‘एस महाणुभावो रयधूयाए सिरिकंताए वासयनिमित्तं तुम्ह घरे पेसिओ, ता सगउरवं उवचरियव्वो त्ति, भणिऊण गया सा मंतिणा वि नियसामिसरिसपडिवतीए वासिओ । पभाए य अलंकियविभूसिओ कज्जदिसं दरिसयंतेण नीओ नरवइसमीवं । नरवइणा वि समब्भुट्ठिऊण सायरमवयासिओ, दुवावियं च अत्तणो समीवम्मि आसणं । उवविट्ठो य पढममुवविट्ठे कुमारे । जंपियं च जहा-“महाभाग ? सोहणं कयं जं नियपायपंकएहिं अलंकियं अम्ह गेहंगणं, जओ भणियं-

नाऽपुण्णभाइणो मंदिरम्मि निहलियदरियदालिद्ध ।

बहुवण्णवि विहमणिकिरणसंवलिआ पडइ ॥१०३॥

वसुहास्र संपाडियसयलसमीहियत्थवित्थारवड्डियाणंदं ।

कस्स व पुण्णेहिं विणा पवरनिहाणं घरमईइ ॥१०४॥

अहिजाई-सयलकलाकलावकलियं हिओवएसरयं ।

संपडइ मंदभायाण नो सुमित्तं कलत्तं च ॥१०५॥

इच्चाइसमालावेहिं चिट्ठमाणण समागओ मज्झण्हसमओ । भोयणावसाणे य भणिओ कुमारे राइणा जहा-महाभाग ! अम्हारिसेहिं तुम्हारिसाण महाणुभावाण अण्णं विसिट्ठयरं न किंपि कज्जं काउं तीरइ ता पडिच्छह अम्हाण धूयं सिरिकंताभिहाणं कण्णयंति । भणिऊण विसिट्ठमुहुत्ते कारिओ कुमारे पाणिग्गहणं । तओ तीए सह विसयसुहमणुहवंतेण अण्णया कयाइ पुच्छिया सा कुमारेण-पिए ! किं पुण कारणं मह एगागिणो तुमं ताएण दिण्णा ? तीए भणियं-नाह ! निसामेहि, एस मह जणओ वसंतपुराहिवइणो वयरसेणरायस्स पुत्तो रज्जे पइट्ठिओ । तओ महाबलपरक्कमदाइय पेळ्ळिओ किंपि कारणमुद्दिसिऊण तत्थ विसमारण्णगिरिमज्झयारे सबलवाहणो पळ्ळि निवेसिऊण ट्ठिओ । उवणया य सव्वभिल्ल । तओ अनिच्चहंतो गामघायाइणा नियपरियणं पोसेइ । संजाया य अहमेयस्स सिरिमईए देवीए चउण्हपुत्ताणमुवरिमेगा कण्णया । अईववल्लहा जणणि-जणयाणं । अण्णया य दरारूढजोव्वणा गया पिउणो पायवंदणत्थं । तेणाऽवि दट्ठूण

१. ला. तुम्ह पासे पे ॥

भणियाऽहं पुत्ति ! विरुद्धा मह सव्वरायाणो, ता तुमं एत्थ पल्लीए सयंवरा, जं किंचि निययाभिरुइयं पुरिसं समागयं पेच्छसि तं मह साहिज्जसु । तेओऽहं तप्पभिइं सरवतीरट्टिया पइदिणं समागयपुरिसे पलोएमि, जाव मह भागधेएहि संपत्तो तुमं ति । ता एयमित्थ कारणं ।” एवं च सुहेण चिट्ठमाणस्स तत्थ कुमारस्स गओ सो पल्लिनाहो गामघायत्थं । कुमारोऽविगओ सह तेण । तओ लूडिज्जंते गामे कमलसरसमीवट्टियस्स कुमारस्स वियडवणंतरलाओ निगंतूण पच्चभियाणिऊण य विलगो कंठे वरधणू । विमुक्ककंठं च रोवमाणो संठविओ कुमारेण । उवविट्ठा य एगत्थ छायाए । पुच्छियं च वरधणुणा जहा-कुमार ! तया मए पलायणसण्णाए कयाए किं तुमे पावियं अवत्थंतरं ? ति पसाएण साहिज्जउ । कुमारेण वि सव्वं साहेऊण भणिओ एसो-साहसु संपयं तुमं पि नियवुत्तं । वरधणू वि ‘जहाऽऽणवेइ’ ति भणिऊण कहिउं समाढत्तो जहा-“कुमार ! अत्थि ताव तुम्भे वडच्छयाए मोत्तूण गओऽहं जलन्नेसणत्थं थोवंतरे य दिट्ठं मए महासरवरं, अवि य-

कारंडव-सारस-हंस-चक्रमाइहि सउणिनिवहेहि ।

सेविज्जंतं सययं महासमुद्धं व वित्थिण्णं ॥१०६॥

तं च दट्टूण ‘जीविओ मि’ ति मण्णंतो तुम्ह निमित्तं भरिऊण सलिलस्स दोण्णि नलिनीदलपुडए ‘अप्पणा किर पियामि’ ति समुप्पाडिओ करयलंजली ताव य सुमरियं तुम्हाण, चितियं च मए-

धिद्धी दुरंतवसणायडम्मि पडियम्मि निययसामिम्मि ।

तण्हण्हाभिहय्यमी सत्तुपरद्धे असरणम्मि ॥१०७॥

रे रे जीव ! कयघोऽसि जं सि वीसारिऊण पहुसुकयं ।

इच्छसि तेणेव विणा वि जीविउं सलिलपाणेण ॥१०८॥

इय एवं परियट्टियचित्तासंजणियत्तिव्वसंतावो ।

मोत्तूण सलिलपाणं विणिग्गओ सरवरहितो ॥१०९॥

जाव य तुह समीवं गंतुं पयत्तो ताव य सहस च्चिय संनद्धबद्धपरिकरायारेहि कयंतदूए हिं व ताडिओ दीहरायभडेहि, बद्धो य

निद्वयं, ‘रे रे वरधणु ! कहिं बंभयत्तो ?’ ति पुणरुत्तं भणमाणेहि नीओ नियसामिणो सयासं । सो य मं दट्टूण अब्भुट्टिऊण सरहसं जयउ भट्टिदारओ’ ति जयकारो कओ छोडिऊण य बंधे भणिउं पयत्तो जहा-महाभाग ! अहीयं मया तुह जणयसयासे,

भाया तुमं, अहं च ओलग्गिउं पयतो कोसलाहिवइं ता साहिज्जउ कत्थ कुमारे ? मया भणियं न याणामि, तओ तेण वारिज्जमाणेहिं पि दढयरं तेहिं ताडिओ । पीडिज्जमाणेण य भणियं जहा-जइ अवस्सं तुम्हाण निब्बंधो ता कुमारे खइओ वग्घेण तेहिं संलत्तं-दंसेहि तं पएसं । तओ असमं जसनिहित्तपयनिकखेवो समागओ तुह दंसणगोयरं । 'पलायसु' त्ति काऊण तुम्ह सण्णं, पक्खित्ता परिव्वायगदिण्णा मए वयणम्मि गुलिया । तप्पभावेण य पणट्टुचेट्टो मओ व्व संजाओ । तओ ते 'मओ' त्ति कलिऊण गया । अहं पि चिरागएस्स तेसु उट्टिऊण तुह गवेसणं काउमाढत्तो । अपेच्छमाणो उ दढमहं परितप्पिउं पयत्तो, अवि य-

कह होही ? कं भणिही ? को दाही तस्स भणियमेत्तेण ।

कत्थ व वसिही ? कत्थ(स्स) व नियच्छिही वयणयं मुद्धो ? ॥११०॥

एस कुमारे एसो मह सद्दं कुणइ सुन्नयं चव ।

पासाइं पलोएर्मि मुहा पयच्छामि पडिवयणं ॥१११॥

सुक्कतरुपत्तरावं सोउं तत्तो वलेइ मह दिट्ठी ।

को वा वत्तं कहिही सयं च दच्छामि कह कुमरं ॥११२॥

एवं च तुह. वियोगपसरियदीहरनीसासायाससोसियसरीरो पत्तो कहकहवि किलेसेण एक्कं गामं । तत्थ मया दिट्ठो एक्को परिव्वायगो । कयं च से अभिवायणं । तेण भणियं-वरधणू विवलक्खिज्जसि मया भणियं-भयवं ! कीस मूढोऽसि ? तओ तेण मह सवहे कुणमाणेण सिट्ठं जहाऽहं तुह तायस्स पियमित्तो वसुभागो नाम, वीसत्थो होऊण साहसु 'कुमारो कत्थ वट्टइ ?' त्ति मया वितस्स सव्वमवितहं साहियं । तओ सो विसायसामलियमुहमंडलो मह साहिउंपयत्तो जहा-पलाणो अमच्चधणू, तुह जणणी य कोसलाहिवइणा पाणवाडए पक्खित्ता । एवं चाहमसणिपडणाइरित्तं तस्स वयणं सोऊण वित्तयंदूसवे व इंदद्धओ धसत्ति वसुहायलम्मि निवडिओ समासत्थस्स य तुह विरहजलणजालाकरालियंगस्स महाखए खारो व्व, मालनिवडियस्स पयप्पहारो व्व, समरंगणे सुद्धस्स ऊसास व्व वियंभिओ जणणि-जणयावमाणणुब्भवो सोयपयरिसो । भणिओ अहं वसुभागेण-वरधणु ? अलं परिदेविएण, न कायव्वो खेओ, न परियप्पियव्वं तुमए, कस्स वा विसमदसापरिणामो न होइ ? । मया भणियं किं ममं परियप्पिएण कीरिही, जओ भणियं-

जस्स परिओस-रोसा वि निप्फला जंति जंतुणो भुवणे ।

उच्छुपसूणस्स वि निप्फलेण किं तस्स जम्मेणं ? ॥११३॥

तओ कारुणं महहेऊदाहरणाईहि समासासणं, दाऊण बहुविहे गुलियाजोगे, तुम्हाणमन्नेसणत्थं पेसिओऽम्हि ति । अहं पुण परिव्वायगवेसं कारुण कंपिल्लपुरमइगओ । तत्थ य मए सव्वलोयस्स अहिगमणीयं अवलंबियं कावालियत्तणं, केरिसं च ?

नरसिरकवालमालट्टिभूसणं गहिस्नेउरखड्डं ।

बहुविहगपिच्छविरइयआमेलं च लणयसणाहं ॥११४॥

उदामसद्दमरुयअणवरयारावभीसणाडोवं ।

बहुजणजणियचमकं विणिम्मियं तं मए रूवं ॥११५॥

परिब्भमंतो य पत्तो पाणवाडयं । तत्थ वि घराघरिं वियरंतो 'भयवं किमेयं ?' ति पुच्छिओ य साहामि एस मायंगीए विज्जाए कप्पो ति एवं च वियरमाणस्स जाया आरक्खियमयहरेण सह मेत्ती । अण्णदियहम्मि य भणिओ सो जहा-मह वयणेण भणिज्जसु अमच्चभज्जं तुह पुत्तमित्तेण कुंडिण्णमहावइणेण तुज्झऽभियायणं पेसियं ति बीयदिणे य गुलिगासगब्भं विज्जपूरयं सयं चैव गंतूण दिण्णं भक्खिए य तम्मि जाया निच्चेयणा सा । विण्णत्तं चमयहरेण रइणो जहा-देव ! अमच्चभज्जा परलोगंगया, रइणा वि पेसिया नियपुरिसा जहा-सक्कारं करेह । तओ ते जाव तत्थ गया ताव भणिया मए-जइ एयम्मि अवसरे एईए सक्कारं करेह तो तुम्हाणं रइणो य महंतो अणत्थो । तओ ते एयमायण्णिऊण गया सट्टाणे मए वि समागयाए वियालवेलाए भणिओ मयहरो-जइ तुमं सहाओ होहि तो अहं इमीए सव्वलक्खणसंपुण्णाए अमच्चीए सरीरेण साहेमि एगं महामंतं । तेण वि 'तह' ति पडिवन्ने गया तं गहाय दूरदेसट्टियं महामसाणं । तओ कवडेण विरइऊण मंडलाइयं सपरिवारो पेसिओ मयहरो नगरदेवयाणं बलिदाणनिमित्तं । गए य तम्मि अण्णगुलियापयाणेण निद्दाखय्ये व्व वियंभमाणा उट्टुविया नियजणी । निवडिऊण य चलणेसु जाणावियमप्पाणं । सा वि मं ओलक्खिऊण रेविउं पयत्ता । 'न कालो रेवियव्वस्स' ति संठविऊण नीया उत्तरदिसाए जोयणमित्तसंठियं कच्छाभिहाणं गामं । तत्थ य मह पिउमित्तो देवसम्मो नाम बंभणो । तस्स य गेहम्मि ठविऊण समासत्थाए सिट्ठो कुमार ? तुह संतिओ वइयरो सोऊण य मए निरुब्भमाणा वि बहलंसुसलिल- पडिरुद्धलोयणप्पसरा पलावबहुलं च परिदेविउं पयत्ता, अवि य-

कमलदलदीहलोयण ! लायण्णामयरसोल्ल सव्वंग ! ।
 वरियालुद्धय ! मुद्धय कुमार ! कइया णु दट्ठव्वो ॥११६॥
 जणणी वि वच्छ ! कह ते एवंविहदुक्खकारणं जाया ।
 कह सोच्छिसि कढिण कुमार ! संकुले महियलाभोए ॥११७॥
 तण्हाए पीडिओ कं वरधणुविरहम्मि वच्छ ! पत्थिहसि ।
 तुह सुमरणेण हिययं, न फुट्टई तं सिलमयं व ॥११८॥
 चंडालकुलनिवासो न तहा मह दहइ जह तुहाऽवत्था ।
 वरधणु ! तह वि न सुकयं जमिहं पत्तो पहुंच मोत्तुं ॥११॥
 ता पुत्त ! वच्च सिग्घं अण्णिससु पहुंच ति एव जंपंती ।
 संठविउं नमिऊण य इहाऽऽगओ तुम्ह मिलिओ य ॥२॥

एवं च वीसंभनिब्भरं मंतयंताण अइक्कंता काइ वेला ताव य समागओ एक्को गामेहितो मणुस्सो, भणिउं च पयत्तो-महाभाय ? न कत्थइ हिंडियव्वं तुम्हेहिं जेण तुम्ह समाणरूवविसे सं पडिमु ल्लिहिरूण पुरिसजुयलमाणीयं कोसलाहिवइणो निउत्तपुरिसेहिं, दंसिऊण य भणियं तेहिं-एवंविहरूविणो न एत्थ दोन्नि पुरिसा समागय ? त्ति, एवं च पेच्छिऊण समागओ तयंतियाओ अहं, दिट्ठा य तव्विह रूवोवलक्खिया तुम्हे, संपयं जं वो अभिमयं तं कुणह त्ति भणिऊण विगए तम्मि दोण्णि वि ते वणगहणंतरालेण वि पलायमाणा समागया कोसंबि । तत्थ य नगरबाहिरुज्जाणम्मि दिट्ठं दोण्हं सिट्ठिसुयाणं सागरदत्त-बुद्धिलनामाणं पणीकाऊण सयसहस्सं संपलग्गं कुक्कुडजुज्झं । पहओ सागरदत्तकुक्कुडेण बुद्धिलकुक्कुडो । पुणो बुद्धिलकुक्कुडेण सागरदत्तकुक्कुडो पहओ, भग्गो य परहुत्तं सागरदत्तकुक्कुडो, तयाभिमुहं कीरमाणो वि न समहिलसइ जुज्झिउं । तं च निप्पडिमुहं दट्ठूण भणिओ वरधणुणा सागरदत्तो - भो ! कीस एसो सुजाई वि भग्गो कुक्कुडो ? तो पेच्छामि णं जइ न कुप्पह तुब्भे । तओ सागरदत्तेण भणियं-भो महाभाग ! पेच्छ, न य मह एत्थ दव्वलोभो किंतु अहिमाणमेत्थावरज्झइ । एत्थाऽवसरम्मि य पलोइओ वरधणुणा बुद्धिलकुक्कुडो । दिट्ठा य चलणेसु निबद्धा लोहसूई । लक्खियं च बुद्धिलेण निहुयं चैव पडिवण्णं वरधणुणो अद्धलक्खं अणुवलक्खं व । साहिओ एस वइयरो कुमारस्स वरधणुणा । कुमारेण वि बुद्धिलकुक्कुडस्स कड्डिऊण सूई भेडिओ सागरदत्तकुक्कुडस्स । पराजिओ य तेण । परितुट्ठो सागरदत्तो पप्फुल्लवयणपंकओ य 'एहि अम्ह गेहं गच्छामो' त्ति भणिऊण ते वि लइऊण संदणम्मि गओ सागरदत्तो नियगेहं ।

तत्थ य ताण तेण गोरेवेज्जमाणाणं बोलीणा कइवि वासरा । अण्णया य बुद्धिलपेसिओ दासचेडो समुट्टुविरुण वरधणुं वि वित्तम्मि किंपि भणेऊण गओ । तम्मि य गए वरधणुणा कुमारस्स साहियं जहा-जं तं मह बुद्धिलेण अद्धलक्खं पडिवन्नं तप्पवेसणत्थं चत्तालाससहस्सीओ हारो एयस्स हत्थे पेसिओ, दंसिओ उग्घाडेऊण करंडयं । पलोइओ कुमारेण पलोयंतेण य तत्थ दिट्ठो सनामंकिओ लेहो । तं च दट्ठूण 'कस्सेसो लेहो ?' ति पुच्छियमणेण । वरधणुणा भणियं-को जाणइ बहवे खलु बंभयत्तनामोवलक्खिया पुरिसा भवंति किमित्थ चोज्जं ? । एवं च जाव परोप्परमालावो वट्ठइ ताव तिपुंडमंडियतणु समागया वच्छा नाम परिव्वायगा । अक्खयकुसुमाइयं च पक्खिविरुण ताण उत्तमंगम्मि 'पुत्त ! वाससयसहस्सं जीवह' ति भणंतीए एकंतम्मि वाहित्तो वरधणू । तेण य समं मंतिऊण किंपि पडिगयाए पुच्छिओ वरधणू कुमारेण जहा-किमेसा जंपइ ? ति । वरधणुणा भणियं-“एयाए इमं संलत्तं जहा-जो तुम्हाण बुद्धिलेण रयणकरंडयम्मि हारो पेसिओ तेण सह लेहो समागओ तस्स पडिलेहं समप्पह । मए भणियं-एसो खु बंभयत्तनामंकिओ दीसइ ता साहह तं अणुवरोहेण 'को एस बंभयत्तो ?' ति । तीए भणियं 'वच्छ सुव्वउ, किंतु न तए कस्सइ साहियव्वं, अत्थि इहेव नयरीए सेट्ठिधूया मयणघरणि व्व रूवाइगणम्मग्गा रयणवई नाम कण्णया । सा य आबालभावओ च्चिय चेव मया समं जणियव्वं भसम्भावनिम्भरा रहस्सकहापरायणा चिट्ठइ ति अण्णया य नाइपभूयदिणगयाए दिट्ठो सा मए पवरपल्लंकगया पल्हत्थतणुलया अणम्मिसोवलक्खिज्ज-माणनयणजुयला पुरओ संकप्पलिहियं पिव पेच्छमाणा किंपि हिययगयत्थं ज्ञायमाणी आलेक्खलिहिय व्व संठिया । तं च तहाविहं अणणुहूयमवत्थंतरं तीसे दट्ठूण पकंपमाणहियव(हिय?)या गयाऽहं तीए समीवं, भणिया य मए-पुत्ति ! रयणवइ ! किं विचित्तेसि ? ति न किंचि जंपइ । पुणो पुच्छिया । पुणो न किंचि जंपइ । तओ सासंकाए 'किमेयं ?' ति पुच्छिओ परियणो । भणियं च तीए बीयहिययभूयाए नियछायाइ व्व सया पासाणुव्वत्तिणीए पियंगुलइयाभिहाणाए जहा-अज्जे ! अज्जप्पभिइमणाए नियभायबुद्धिलसिट्ठिसागरदत्तसिट्ठीणं सयसाहस्सियपणेणं पवत्ते कुक्कुडयवारे कोउगत्थं गयाए दिट्ठो मयणो व्व पच्चक्खो रूवसंपयाए, पडिपुण्णससि व्व सयलकलासंजुओ अमयमयदंसणीओ समित्तो कोइ जुवाणओ, तप्पभिइमेसा न पूएइ देव ए नाऽऽराहए गुरुयणं, नाभासए सहियणं, न कीलए विचित्तकीलाए, न पडि[य]गए सुयसारिगाईणि, तग्गय-हियया तक्कहाखित्तमाणसा एवं चिट्ठइ ।' तओ 'कामवियारो एसो अओ लज्जाए न जंपइ' ति जाणिऊण मए तहा तहा भणिया जहा जंपियमणाए-भयवइ ! तुमं मम जणणी सही गुरुदेवया, तं नत्थि किंचि जं तुह पुरओ न साहिज्जइ, परं जो

एयाए पियंगुलइयाए कहिओ सो जइ मह भत्ता न भवइ तो निच्छएणं मरणं सरणं ति । एयमायण्णिऊण मए भणियं-पुत्ति ! धीरा होहि तहा तहा करिस्सामि जहा तुह तेण सह थोवदिणेहिं चैव संजोगो भवइ । तओ सा पढमजलहरबिंदुसित्त व्व मेइणी निव्वुया जाया । अईयदिणम्मि य साहियं मए तीए जहा-पुत्ति ! दिट्ठो सो मए तुह हिययानंदणो बंभयत्तकुमारो । तीए जंपियं-भयवइ ! तुह चलणप्पसाएणं सव्वं सोहणं भविस्सइ, परं तच्चित्तवियाणणत्थं एयं हारं रयणकरंडए काऊण बंभयत्त नामंकियं लेहं च पेसेहि । अणुट्ठियं च तं मए कल्लं ।' ता कुमार ! एसो लेहवइयरो । मए वि समप्पिओ तीए पडिलेहो ।" एवं च वरधणुणा साहियं निसामिऊण अदिट्ठाए वि रयणवईए पवड्ढिओ कुमारस्स तदुवरि दंसणाभिलासो, वियंभिओ मयणसंतावो तदंसणसमागमोवायमण्णि-समाणाण गयाणि कइवि वासराणि । अण्णदियहम्मि य संभंतेण बाहिराओ समागंतूण साहियं कुमारस्स वरधणुणा जहा-कुमार ! इह नयरिसामिणोणा कोसलाहिवेण अम्हाण गवेसणत्थं पेसिया पच्चइया पुरिसा, पारद्धो इमिणा उवक्कमो, पयत्तो नयरीए हलहलारवो । सुण्णिऊण एयं वइयरं सागरदत्तेण गोविया भूमिहरयम्मि समागयाए वरयणीए भणिओ अणेहिं सागरदत्तो जहा-अम्हे इओ अवक्कमामो तहा करेहि । तेण वि सण्णद्धबद्धकवएणं संदणमारोविऊण नीया थोवं भूमिभागं । तओ अणिच्छमाणं पि तं नियत्तिऊण जाव अग्गओ वच्चंति ताव उज्जाणजक्खालयसमीवे नाणाविहपहरण पडिपुण्णरयणमयरहवरारूढा दिट्ठा तियसविलयाणुकारिणी समारूढन-वजोव्वणा एगा कण्णया । तओ तीए सायरमभ्भुट्ठिऊण भणियं-किमेत्तियाओ वेलाओ तुम्हे समागय ? त्ति । तमायण्णिऊण कुमारेण जंपियं-सुंदरि ? के पुण अम्हे ? तीए भणियं-सामि ? तुम्हे खु बंभयत्त-वरधणुणो । तेण भणियं-कहमेयं तए नायं ? तीए भणियं "जइ एवं ता अवहिएण सोयव्वं, आसि इहेव नयरीए महा धणो धणप्पवरो नाम सिट्ठी । तस्स रयणसंचया नाम पणइणी । जाया य तीसे अट्टण्ह पुत्ताणमुवरिं अहं वल्लहा जणणि-जणयणाणं । अइक्कंता उ बालत्तणाओ अण्णया य विब्भमेक्ककुलहरे सयलजणा-भिलसणीयंम्मि संपत्ते जोव्वणे अपरितुस्समाणा य सामण्णवरेसुं सव्वुत्तमवरपावणत्थं समाढत्ता एयं जक्खमाराहिउं । असाहारणभत्तितुट्ठेण पच्चक्खमेव भणिया अहं जक्खेण-पुत्ति ! तिसमुद्दपज्जंतपुहइनाहो मह वयणप्पसाएण बंभयत्तो ते भत्ता भविस्सइ । मए भणियं-कहं पुण सो मए नायव्वो ? जक्खेण भणियं-पवत्ते बुद्धिल-सागरदत्तसेट्ठिकुक्कुडयजुज्जे अण्णसरिसागिई सयल-लक्खणसमग्गो सिरिवच्छलंछिओ पहाणेक्कसहाओ जो समागमिस्सइ सो नियभत्त त्ति मंतव्वो, मह भवणपासट्ठियाए य तेण सह पढमो मीलगो भविस्सइ त्ति ।

ता सामि ? लक्खणेहिं जक्खाएसाओ तह य तं नाओ ।

तुञ्ज पउत्तिवियाणणभएण सिद्धं न अण्णस्स ॥१२१॥

तेण सयं चिय भण्णसि पहुत्तलज्जाउ परिहरेऊण ।

तुह विरहजलणतवियं मं संगजलेण निव्ववसु ॥१२२॥

एवं च तव्वयणमायण्णिऊण वियंभियाणुरायपसरमब्भुवगयमणेण । समारूढो तीए रहवरं पुच्छिया य सा कुओहुत्तं गंतव्वं ? रयणवईए भणियं-अत्थि मगहापुरम्मि मह पिउणो कणिट्टभाया धणावहो नाम सिद्धी, सो उ तुम्हाण मुणियवइयो अवस्समागमणं बहुभण्णिस्सइ, ता ताव तत्थ गमणं कीरउ, उत्तरकालम्मि पुणो जहिच्छ तुम्हाणं तओ रयणवइवयणेण पयट्टा ततोमि मुहं । ठिओ सारहिते वरधणू । गामाणुगामं गच्छमाणा निग्गया कोसंबिजणवयाओ, पत्ता य निबिडगिरिकूडसंकडिल्लं महाडइं । तत्थ य कंटय-सुकंटयाभिहाणा दुवे चोरसेणावइणो । ते य दट्टुण रयणनियरोवभूसियं रहवरं अप्पपरिवारा य वरजुवइसमण्णिणा ते 'हेला सज्ज' ति कलिऊण पयत्ता अभिद्विउं, कहं ?

दट्टोद्धीमफुडभिउडिभंगभंगुरियभालभंगिल्ला ।

हण हण हण ति गदब्भसइपम्मुककहकरवा ॥१२३॥

आयण्णकड्ढिओमु ककडिणगुणघायघडियटंकारा ।

विन्थगियपउरनारायभल्लवावल्लसंघाया ॥१२४॥

हेलाइ च्चिय अह कुमरमुक्कबहुसत्थपहरविद्विया ।

सूरकरहयतिमिरं व ज्जत्ति चोर अह पणट्टा ॥१२५॥

भग्गेषु य तेषु भणियं वरधणुणा जह- कुमार ? दढं परिस्सं ता तुम्हे मुहुत्तंतरं निद्दासुहमिहेव रहवरट्टिया सेवह ति । पडिवज्जिऊण य णुवण्णो समं रयणवईए । ताव य पहायाए रयणीए गिरिनइं संपाविऊण थक्का तुरंगमा । पडिबुद्धो य एसो उट्टिओ वियंभमाणो । पलोइ याइं पासाइं न दिट्टो वरधणू । पाणियनिमित्तमोइण्णो ति वाहित्तो ससंभमं । पडिवयणमलहमाणेण य पलोइयं रहधुरगं, दिट्टुं च तं बहललोहियालिद्धं 'वा वाइओ वरधणु' ति कलिऊण गरुयवियंभमाणसोगप्पसरो 'हा ! हओ मि' ति भणमाणो निवडिओ रहुच्छंगे । लद्धचेयणो य 'हा ! भाय ! वरधणु' ति भणमाणो पलावे काउमाढत्तो । तओ भणिओ रयणवईए-सामि ! न सो सोयणिज्जो, जओ भणियं-

ते पहु ! मया वि न मया, अहवा ते च्चेव नवर जीयंति ।

मरणेण जाण निव्वहइ सामि-सुहि-मित्तकज्जोहा ॥१२६॥

मरणं पि ताण छज्जइ जयम्मि असमं महाणुभावाणं ।
कुंदिदुकासविसओ जाण जसो भमइ भुवणम्मि ॥१२७॥
तस्सेय नवर सहलं जयम्मि मरणं महाणुभावस्स ।
जस्स पहू जणियगुणाणुरायसोयं समुव्वहइ ॥१२८॥
इय सव्वस्स वि मरणे साहीणे किं न तस्स पज्जत्तं ।
जस्स पहु-मित्तं कज्जुज्जयस्स संपडइ मरियव्वं ॥१२९॥

एवं च भणमाणीए मोत्तूण सोगप्पसरं भणियाऽणेण रयणवई जहा-सुंदरि ! न नज्जइ फुडं मओ किं वा जीवइ त्ति, ता अहं मग्गओहुत्तं वच्चामि अण्णेसिउं । तीए भणियं-अज्जउत्त ! न एस अवसरो पच्छाभिमुहं गच्छियव्वस्स, कुओ ? जेणाऽऽहमेगागिणी, चोर-सावयाइण्णं च भीसणमरण्णं, कलत्ताभिभवणं च परिभवट्ठणं माणिणो, इह नियडवत्तिणा य वसिमेण भवियव्वं जेण परिमलियकुसकंटया दीसइ वणत्थली । पडिवज्जिऊण य तं सो पयट्ठो । पत्तो य मग्गहाविसयसंधिसंठियं एक्कं गामं । तत्थ पविसमाणो दिट्ठो सभामज्झट्टिएण गामठक्कुरेण, 'न एसो सामण्णो' त्ति भावितेण नीओ य सगिहं । दिण्णमावासट्ठणं । उवविट्ठो य पुच्छिओ ठक्कुरेण-महाणुभाव ! ससोगो विय लक्खिज्जसि ? बंभयत्तेण भणियं-एवमेयं, जओ मह भाया चौरैहिं सह जुज्जंतो न नज्जइ किंपि पाविओ, ता मए तयन्नेसणनिमित्तं तत्थ गंतव्वं ति । ठक्कुरेण भणियं - अलं खेएण जइ इहांडवीए भविस्सइ तो अहं लभिस्सामि त्ति । भणिऊण पेसिया नियपुरिसा । गयपभुच्चा गएहिं य सिट्ठं तेहिं जहा-न अम्हेहिं कोइ कर्हिचि सच्चविओ, केवलं पहारनिवडिओ एस बाणो पाविओ त्ति । तव्वयणायण्णणाओ य 'नूणं विणिवाइओ' त्ति परियप्पिऊण गुरुसोगाउलिज्जंतमाणसस्स समोत्थरिया सव्वरी । निवसिओ दइयाए समं । ताव य एक्कजामसेसजामिणीए सहसा तम्मि गामम्मि निवडिया चोरधाडी । साय कुमारपहारकदुयाविया भग्गा परम्मुहा अभिणंदिओ य सयलगामाहिट्टिएणं गामपहुणा । गोसम्मि आउच्छिऊण गामठक्कुरं तत्तणयसहाओ पत्थिओ रायगिहं । पत्तो जहाणुक्कमेणं । तत्थ य नयरबाहिरियाए एक्कम्मि परिव्वायगासमेठविऊण रयणवई जाव तत्थ पविसइ ताव पेच्छइ एक्कम्मि महापासाए तवियतवणिज्जपुंजुज्जलदेहाओ णवजोव्वणुद्धुराओ कयफारसिगाराओ दोण्णि नारीओ भणियं च तार्हि-जुत्तं नाम भत्ताणुरत्तं जणं मोत्तुं एवं परिब्भमिउं ? कुमारेण भणियं-को अणुरत्तभत्तो ? कर्हि वा चत्तो ? कोवा अहं ? ति । तार्हि भणियं-आगच्छह ताव वीसमहं मुहुत्तं । तओ पविट्ठो सो । कयण्हाणभोयणा-

१. ला. नज्जए फुडं किं वा मओ ॥ २. ला. कहं ॥

इसयलवावारस्स सुहासीणस्स साहि उं पवत्ताओ-महाभाग ! सुव्वंउ जमेत्थ भणियव्वं-

अत्थि रयणमयतुंगसिहरग्गसंठियजिणाययणभूसिओ सुरसिद्धमिहुणरमणट्टाणं सयलविज्जाहरनिवासो रूप्पमओ वेयङ्को नाम पव्वओ । तस्स य द्दहिणसेठीए सिवमंदिंरं नाम नयरं । तम्मि य पणमंतमहंतविज्जाहररायमउलिमालोमालियचलणजुयलो जलणसिहो नाम राया । तस्स य अच्चं तहिययदइयाए विज्जुसिहाए देवीए नट्टुम्मत्ताभिहाण-पुत्ताणुजायाओ अम्हे दुवे धूयाओ । पत्ताओ य जोव्वणं । अण्णया य अम्ह जणओ पवरपासायतलम्मि अग्गिवाय-अग्गिसिहाभिहाणेहिं खयरमित्तेहिं अम्हाहि य समयं विविहसंकहाहिं चिट्ठइ । ताव य पेच्छइ नियनियदेहप्पहाजालुज्जोवियनहंगणा भोयं विविहजाण विमाणारूढं सुरसमूहं अट्टावयाभिमुहं संपट्टियं । तं च दट्टुण 'अम्हे वि चेइयवंदणत्थं वच्चामो' ति भणमाणो अम्हेहिं खयरमित्तेहिं य सह विमलकरवालनिम्मलं समुप्पइओ गयणयलं । तओ पत्ताणि य अट्टावयं । दिट्ठं च विविहरयण-मणि-सिलासंघायनिम्मियं सिद्धाययणं । वंदियाओ तत्थ भयवंतपडिमाओ निव्व ते य मज्जण-पूयण-पेक्खणाइए सुरेहिं दट्टुण तं थोउं पयत्ताणि, कहं -

दुद्धरपंचबाणबाणावलिविहडणवज्जफलहयं,
निरुदुलंघभवसायरनिवडियजणसंताणफलहयं ।

अइपइंड[दंड]महमोहनरेसरमाणमलणयं ,
नमिमो जिणवराण पयपंकयमहतरुगहणजलणयं ॥१३०॥

एवं च थोऊण निग्गंतूण सिद्धाययणाओ जाव एगत्थ किर उवविसामो ताव रत्तकंकेल्लिबहलदलच्छायातलोवविट्ठं विगयरइरागप्पसरं कोह-मय-माण-मायामहणं निरवज्जसंजमुज्जोयसज्जियमइं दुट्ठिदियदलियउद्दामदप्पसरं दुट्ठकम्मनिट्टुरनिट्टुवणकयचे-ट्टियं संसारवोच्छेयजणियमच्छरुच्छाहनिच्छयं दिट्ठं चारणसमणजुयलं उवसप्पिऊण य भावसारं उवविट्टाणि तदंतिगे । पत्थुया ताण मज्झाओ एक्केण धम्मदेसणा जहा-“खणभंगुरं सरिं, सरयभविभमं जीवियं, तडिविलसियाणुयारि जोव्वणं, किंपाकफलोवमा भोया, संझारायसमं विसयसोक्खं, कुसग्गजललवचवला लच्छी, सुलहं दुक्खं, दुलहं सुहं अणिवारियप्पसरो मच्चु ति एवं ववत्थिए छडिज्जउ मोहप्पसरो, रुंभिज्जउ सर्याल्लिदियत्थो भाविज्जउ संसारसरूवं, कीरउ जिणवरभणिए धम्मे मणो ति ।’ तओ एयमायण्णिऊण महियलमिलंतभालवट्टेण पणमिऊण मुणिवरे ‘भयवं ? एवमेयं’ ति भणिऊण मुणि गुणाणुक्कित्तणपरायणा जहागयं पडिगया सुरगणा । लद्धावसरेण य भणियं अम्हाण पिउमित्तेण जहा-भयवं ! एयाणं पुण बालियाणं को भत्ता भविस्सइ ? तेहिं भणियं-

एयाओ भाइवहयस्स पणइणीओ भविस्संति । तओ एयमायण्णिऊण चिंतावससामलिय-
मुहमंडलो राया अहोमुहं संठिओ । एत्थावसरम्मि य भणियं अम्हेहिं जहा-ताय ? संपयं चेव
साहियं मुणिवरेहिं संसारसरूवं, सिद्धा विसयपरिणई, ता अलमम्हाण एवंविहविवायावसाणेण
विसयसुहेणं । पडिवन्नं च तं ताएण । एवं च वल्लहयाए भाउणो सिद्धिलियनियसरीरसुहप्पसराओ
तस्स चेव मज्जण-भोयणाईयं सरीरद्विइं चितयंतीओ चिट्टुम्ह जावऽण्णदिणम्मि तेण अम्ह भाउणा
भमंतेण पुहइमंडलं दिद्धा तुम्ह माउलगस्स धूया पुप्फवई नाम कण्णया ।
तत्तणयरूवाइसयसोहग्गऽक्खित्त माणसो तं अवहरिऊणाऽऽगओ । तद्धिट्ठिमसहमाणो य विज्जं
साहिउं गओ तम्मि गिरिनिउंजे जत्थ तं तुम्हेहिं निवाडियं वंसेहिं सद्धिं सिरं । अओ उवरि तुम्हे
मुणियवुत्तंता । ता हो महाभाग ! तम्मि अवसरे तुम्ह सयासाओ समागंतूण पुप्फवईए भणियाओ
अम्हे सामपुव्वयं साहिओ भाउणो वुत्तंतो । तमायण्णिऊण य वियंभिऊब्भडसोगपसराओ
बहलंसुसलिलमइ- लियकवोलमंडलाओ रोइउं पयत्ताओ । पुणो कह कहवि विणिवारियाओ
तीए, भणियाओ य-‘हला ! एरिसो चेव एस संसारो जओ भणियं-

संसारदुग्गममहाडई भमिरस्स जंतुहरिणस्स ।

कस्स न जायइ भीसणकयंतबाहाओ मरियव्वं ? ॥१३१॥

कस्स व समग्गसयलिंदियत्थसंजणियसयलसोक्खाइं ।

जायंति निययकम्माणुभावओ नेय मणुयस्स ? ॥१३२॥

अच्चंतनेहनिब्भरपरव्वसाऽऽसंघजणियपसरस्स ।

इट्टवियोगाजायंति दिव्ववसओ न कस्सेह ॥१३३॥

इय सुंदरीओ कलिउं असारसंसारकारणभियाणिं ।

सिद्धिलिज्जउ सोगो सुलहमेरिसं सव्वसत्ताण ॥१३४॥

ता परिचइऊण सोगं, सुमरिऊण य जं तुब्भे चेव मह सिद्धं मुणिवयणं
पडिवज्जिज्जउ अज्जउत्तो’ त्ति । तमायण्णिऊण य पत्ताऽणुरायपसराहिं पडिवण्णे अम्हेहिं
अइरहसपरवसाए अण्णा चेव संकेयपडाया चालिया तीए । तप्पभिइं अणेगठाणेसु वि तुमं
गविट्ठो न य दिट्ठो । अज्ज पुण अप्पतक्कियहिरण्णवुट्ठि व्व जायं तए सह दंसणं । ता
महाभाग ? सुमरिऊण पुप्फवइवइयरं कीरउ अम्हाण पाणिग्गहणेण पसाओ । तओ
गंधव्वविवाहेण विवाहिऊण तं रयणिं तत्थेव ताहिं समं पसुत्तो । गोससमयम्मि य भणियाओ
तेण एवं-गच्छह ताव तुब्भे पुप्फवइसमीवं, तीए समं ताव अच्छियव्वं जाव मे

रज्जलंभो होइ त्ति । 'एवं चेव कीरइ' त्ति भणिरुण गयाओ ताओ । गयासु य तासुं जाव पलोएइ पासाइं ताव न तं धवलहरं नेय सो परियणो । चितियं च तेण - एसासा विज्जाहरीमाया, अण्णहा कहमेयं इंदयालविब्भमं ? ताण विलसियं । तओ सुमरियं रयणवईए, तयन्नेसणनिमित्तं च गओ आसमाभिमुहं जाव न तत्थ रयणवई नेय अण्णो कोइ त्ति । तओ 'कं पुच्छमि ?' त्ति कलिरुण पलोइयाइं पासाइं, न य को वि सच्चविओ एत्थाऽवसरम्मि य वियंभिओ सोगप्पसरो, पवड्ढिओ रणरणओ, पसरिया अरई । 'अहो ! महं विसमदसावत्थानिवडियस्स तहा रयणवईविओयदुक्खं बाहइ जहा वरधणुमरणं ति, भणियं च -

दइयाविओयदुक्खं पुहईलंभो य नेय नासेइ ।

ववगयरज्जदुहं पुण सुमित्तलंभो पणासेइ ॥१३५॥

एवं च चितंतस्स समागओ एक्को कल्लाणागिई नाइवयपरिणओ पुरिसो, पुच्छिओ य सो तेण-महाभाग, एवंविहरूव-नेवत्थविसेसा अईयदिणम्मि अज्ज वा न दिट्ठा एत्थ एक्का पवरमहिलला ? तेण भणियं पुत्तय ! किं सो तुमं रयणवईए भत्ता ? तेण भणियं-आमं । इयरेण जंपियं-"कल्लं अवरण्हेवेलाए विमुक्ककलुणदीहनीसणं रुव्वमाणी निसुया मए, अवि य-

हा ! सामिय ! कत्थगओ ऽसि उज्झिउं मं अणाहियं एक्कं ।

सयणजणविप्पहूणं पिययम ! विण कारणा रुइरिं ? ॥१३६॥

तुज्झ विओए पिययम ! अहियं उत्थरइ जणियभयपसरो ।

छिहं दट्ठुं नरनाह ? दुसहसोओ पिसाओ व्व ॥१३७॥

तुज्झ कयम्मि सहियणो सयणो तह परियणो कुलं सीलं ।

पिइ-माइ-भाइवग्गो तणं व कलिरुण मुक्काइं ॥१३८॥

एहि पसायं कारुण कीस कुविओऽसि मह अउण्णाए ।

जइ वि मए अवरद्धं तहवि तु तुम्हेहिं खमियव्वं ॥१३९॥

एवं च रुवमाणी दट्ठुण पुच्छिया मए पुत्त ? का तुमं ? किंवा रोवसि ? कर्हि वा गंतव्वं ? । तओ तीए दरभणियम्मि चेव पच्चभियाणिरुण मए भणिया (ग्रन्थाग्रं ९०००) जहा-तुमं मह च्चिय नतुई होसि । तक्कहणमुणियवुत्तंतेण यमए सिट्ठं तीसे चुल्लपिउणो गंतूण । तेणाऽवि जणियविसेसायरं पवेसिया नियमंदिरं । अण्णेसिया य तुब्भे नेय कर्हि वि

उवलद्धा । ता संपयं पि सोहणं कयं जमागय' त्ति भणिऊण नीओ तस्स गेहं । कयसव्वायरोवयारं च रयणवईए सह वत्तं पाणिग्गहणं । ठिओ तीए सह विसयसुहमणुहवंतो । अण्णया य वरधणुणो 'मयकिच्चं' ति कलिऊण पयप्पियं भोयणं बंभणाणं भुंजति बंभणा जाव सयं चेव वरधणू जणियबंभणवेसो भोयणनिमित्तमागओ भणिउं च पयत्तो जहा-साहिज्जउ तस्स भोज्जकारिणो 'जइ मज्झ भोयणं पयच्छह ता तस्स परलोगवत्तिणो सयं चेव वयणोयरम्मि उवणमइ' ति । सिट्ठं च तेहिं तमागंतूण बंभयत्तस्स । विणिग्गओ सरहसं । पच्चभियाणिऊण पहरिसविसट्टुपुलयमवयासिओ । पविट्ठा मंदिरं । असइहणीयमवत्थंतरमणुहवमाणा ठिया मुहुत्तंतरं ति । निव्वत्तमज्जण-भोयणावसरम्मि य पुच्छिओ वरधणू कुमारेण निययपउत्तिं साहिउं पयत्तो जहा-“तीए रयणीए निदावसमुवगयाणं तुम्हाणं अभिउत्तो ऽहं चोरेहिं कुडंगंतरट्टियतणुणा समाहओऽहमेक्केण बाणेण । पहारवेयणापरायत्तत्तणओ निवडिओ महियलम्मि । अवायभीयत्तणओ न साहियं तुम्ह । वोलीणो रहवरो तमंतरालं । अहमवि परिनिबिडतरुवरंतरालमग्गेण सणियसणियमवक्कममाणो कहकहवि संपत्तो तं गामं जत्थ तुम्हे निवसियाइं साहिया तग्गामाहिवइणा तुम्ह पउत्ती । समुप्पण्णहिययाणंदो य संपत्तो इहइं । पउणो पहारो । भोयणवत्थणावएसेण य समागओ इहइं जाव दिट्ठा तुम्हे' ति । एवं अच्चंताणुरत्ताणं जंति दियहा । अण्णदियहम्मि य समालोचियं तेहिं जहा-कित्तियं पुण कालं पमुक्कपुरिसायारेहिं अच्छियव्वं, भणियं च-

आवइपडियस्स वि सुपुरिसस्स उव्वहइ तहवि ववसाओ ।

विहडियववसायं पुण लच्छी वि न महइ अहिलसिउं ॥१४०॥

एवं च चितयंताणं निग्गमणोवा य ऊसुयमणाणं पत्तो य सयलजणजणियउम्माहओ वसंतसमओ । तत्थ वि वट्टंते मयणमहूसवे पवत्ते निब्भरकीलारसे अयंडम्मि चेव नियकरयलगलत्थल्लियनिवाडियाऽहोमुहाऽऽहोरणो दढविणिदलियरुंदंऽदुयसंखलवलंतचलणो मयपरव्वसत्तणओ भंजिऊणाऽऽलाणखंभं वियरिओ रायहत्थी विणिग्गओ रायंगणाओ । तओ समुच्छलिओ हलाहलारवो, विरसमुक्कययंतो भंजिऊण कीलागोट्टीओ दिसोदिंसिं पलाणो जणवओ । एत्थंतरम्मि य तवणिज्जपुंज्जुज्जलच्छविनियदेहसोहाविणिज्जियामरसुंदरी भयभरुक्कंपिरोरुपरिगलिय गइप्पयारा संभमुब्भंततारतरललोयणजुयला 'कतो सरणं ?' ति मग्गमाणी पडिया करिणो दिट्ठिगोयरम्मि एक्का उत्तमजोव्वणा कन्ना धाविओ तम्मुहं करी । दरगहियाऽणेण सा । तओ उक्कइयं परियणेणं, पयत्तो हाहारवो । एत्थंतरम्मि य हक्किओ करी

कुमारेण । तं मुत्तूण कन्नयं चलिओ तम्महं । तओ हत्थिसिक्खापओगेहिं समाहणिरुण विलगो कंधराभोए निबद्धमासणं कुं भयले करप्फालणंकुसताडणाईहिं वसमाणीओ रायहत्थी । एत्थावसरम्मि य समुच्छलिओ साहुवाओ 'जयइ कुमारे' ति पयट्टो बंदिसदो । कुमारेण विनीओ आलाणखंभे करी । समप्पिओ पीलुवइणो । ताव य समागओ तमुद्देसं नरवई । दट्टूण सयललक्खणलंछियंगं कुमारं अणणसमचेट्टिउप्पण्णविम्हएणं भणियं-को पुण एसो महाणुभावो ? तओ भणियं वरधणुणा-

साहंति असिट्ठं पि हु चरियाइं कुलं महाणुभावाणं ।

किं कहइ केयई निययपरिमलं भमरनिलयाणं ? ॥१४१॥

एत्थाऽवसरम्मि य साहिओ रयणवईए चुल्लपिउणा सव्वो वइयरो । तओ तुट्टेण राइणा भणियं को सीहकिसोरयं मोत्तूण अण्णो मत्तगए निवारेइ ?, ता सोहेणमणुट्टियं जमिहाऽऽगओऽसि, नियनिहेलणं चेव तुह एयं ति । भणिरुण महाविच्छड्डेण परिणाविओ नियधूयं । सुहेण य अच्छंताण तत्थ अण्णदिणम्मि समागया एक्का परिणयवया नारी, भणियं च तीए-'कुमार ? अत्थि एत्थ वेसमणसत्थवाहधूया सिरिकंता नाम जा य तुमे हत्थिसंभमाओ मोइया । सा य मए बालभावाओ आरब्भ पालिया । तीए य हत्थिभ-ओम्मुक्काए 'पाणदायगो' ति कलिरुण पलोइओ तुमं सव्वंगं । तओ तप्पभिइं चेव विमुक्कसयल्लिदियवावारा पवरजोयिणि व्व निच्चलनिप्पंदा मोणमालंबिरुण थक्क, आलत्ता वि सहियणेणं न किंचि जंपइ । तओ मए अणेगवयणविण्णासेहिं भणिया । तहा वि न जंपइ । तओ मए भणियं-जइ तुमं एरिसी असब्भाविणी तो किं तुह पासे ठियाणं ? ति भणमाणी उट्टिया । तीए सविलक्खहसियं कारुण भणियं-नत्थि किंचि तुज्झ अकहणीयं, परं लज्जा एत्थाऽवरज्झइ, जं पुण सव्वं(?) जेणाऽहं हत्थिसंभमाओ मोइया सो जइ मह भत्ता न भवइ ता निच्छएण न समत्था पाणे धारिउं ति । तं च मए सिट्ठं तज्जणयस्स । तेणाऽवि पेसियाऽहं तुम्ह समीवे । ता देहं तीए सरणं ति । कुमारेण वि पडिवज्जिरुण तव्वयणं परिणीया महाविभूईए सा । वरधणुणो वि सुसेणा मच्चेण नियधूयं दाऊण कयं वीवाहमंगलं तओ तत्थ विचित्तकीलापरायणाणं उच्छलिया सव्वत्थ पसिद्धी । पेसिओ दीहराइणा मगहाहिवइणो दूओ जहा-अप्पिज्जंतु बंभयत्त-वरधणुणो । पडिवण्णं च तं तेण तस्स पुरओ, पुण तेहिं समं मंतिउं पयत्तो-भो ? किमित्थ करणीयं ? ति । तओ कुमारेण भणियं-किमित्थियाए चिंताए ?, अम्हे वाणारसिं कडगराइणो समीवे गच्छि-

१. सं.वा.सु. 'यलफालण' ॥ २. सं.वा.सु. 'एयाव' ॥ ३. ला. एत्थंतरम्मि ॥ ४. ला. तुज्झ ॥ ५. अत्रस्थाने सव्वं तथा सज्झं इति पाठभेदौ लभ्येते ॥ ६. ला. देहि ॥ ७. सं.वा.सु. 'रसिं पवेसेह । तहा । कारुण, पविसि' ॥

स्सामो त्ति । भणिऊण गया वाणारसिं । पविसिऊण य वरधणुणा साहिया सव्वा पउत्ती । तं च सोऊण सरहसं निगंतूण सम्मुहं महाविभूर्इए कडगराइणा पवेसिओ कुमारास । दिण्णा य चउरंगसेणासमणिया कडगवई नाम नियधूया । दूयजाणाविया य समागया पुप्फचूल-कणेरुदत्तरयाणो सह महामच्चधणुणा, अण्णो य चंदसीह-भगदत्त-तुडिदत्त-सीहरायप्पमुहा रयाणो । अहिसित्तो वरधणू सेणा हिवई, पेसिओ दीहराइणो उवरि, पच्चासण्णीहूओ य अणवरयपयाणएहिं । तं च नाऊण पेसिओ दीहराइणा कडगराइणो दूओ, पत्तो य भणिउं पयत्तो जहा-

एक्कगामपवुत्थं पि सज्जणा बंधवं व मण्णंति ।
किं पुण सहजायाईचउविहमितीए जं मित्तं ॥१४२॥
तं पुण नियजाईए दोसेणं सरिसरमिय-जिमियाईं ।
वीसारिऊण सहसा कह संपइ वेरिओ जाओ ? ॥१४३॥

एयमायण्णिऊण जंपियं कडगराइणा जहा-

“सच्चमिणं जं मित्ता अम्हे चउरो वि बंभनिवसहिया ।
सह जाया सह वड्डिय सह रमिया सह समुव्वूढा ॥१४४॥
परलोगगए बंभे तुज्झ पहूं दूय ! जोग्गकलणाए ।
बंभनराहिवतणयं बालं परिवालित्तं मुक्को ॥१४५॥
नवरि न तं चिय एक्कं रज्जं अंतेउरं पुरवरं च ।
तुह पहुणा पालंतेण दूसियं दूय ! नियगोत्तं ॥१४६॥

ता भो दूय ? परमहिला सामण्णा वि ताव वज्जणिज्जा किं पुण मित्तभज्जा ? तेण पुण सव्वं पि नियचिट्ठियमगणिऊण अम्हे चेव उवलद्धा ?, तो किमेइणा ?, कुणह संपयं जं नियचित्ताभिरुइयं ति । भणिऊण विसज्जिओ दूओ । सयं च सव्वसामग्गीए पत्तो वरधणुसयासं । दीहो वि दूयवयणमायण्णिऊण । ‘न अण्णो उवाओ’ त्ति भावंतो विणिग्गओ सवडम्मुहो, पवत्तमाओहणं, अवि य-

तिकखरखरक्खुरउक्खयखमायलेणं तुरंगसेण्णेणं ।
गल्लगज्जियरवबहिरियनहेण मायंगनिवहेण ॥१४७॥
वरसत्थनियरपूरियधयवडधुव्वंतरहसमूहेण ।
लल्लक्कहक्कबुक्कारपउरपाइक्कचक्केण ॥१४८॥

आवरियं सव्वतो पसरियखयकालजलहिसरिसेण ।
 सिरिबंभयत्तसेणं दीहनरिंदस्स सेण्णेण ॥१४९॥
 अह खणमित्तेण तओ अभग्गचित्तं पि गरुयपहरहयं ।
 भग्गं कुमारसेणं बलेण सिरिदीहनरवइणो ॥१५०॥
 भज्जंतं दट्टुणं कुमरो रणरहसपुलइयसरीरो ।
 आसासिय निययबलं वरिसइ सरनियरधारहिं ॥१५१॥
 तस्स सरनियरधारसमाहयं बहलरेणुपडलं व ।
 जलधारनिहयं पिव नट्टं अह दीहसेणं ति ॥१५२॥

तं च तारिसं नीसाहारं निययबलं भग्गंतं दट्टुणं 'रे रे मह पुरओ ठाहि' ति भणंतो ठिओ सवडम्मुहो दीहरया । तं च दट्टुणं चिरसंचियवियंभियकोवानलेण वि भणियं बंभयत्तेण, अवि य-

जं अम्हाण परोक्खे मह पिउरज्जं इमं तए भुत्तं ।
 तं, इरिंह मोत्तूणं वच्चसु मुक्को मए राय ॥१५३॥

तओ भणियं दीहरइणा-

वणि-बंधणाण वित्ती कमागया न उण रायतणयाण ।
 विक्रमभोज्जा पुहई सामेणं मुच्चइ कहण्णु ? ॥१५४॥

एयं चाऽऽयण्णिऊण कोवानलजालाकरालियवयणमंडलेण छाइओ दीहो बंभयत्तेण सरवरिसेण । तेण वि तमद्धयंदेहिं निवारिऊण विमुक्कं दुगुणतरमियरस्स । कुमारेण वि तमद्ध वहे चेव छिण्णं । एवं च परोप्परसत्थनिवारणेण जुज्जंताणमंतरं लहिऊणं कुमारेण सहओ ससारही विद्धो सोलसाहिं बाणेहिं दीहरया । तओ तेण रूसिऊण सेल्ल-वावल्ल-भल्ल-सब्बलाइयं विमुक्कमपरिमेयं सत्थनियरं । तं च दट्टुणं बंभयत्तऽहिद्वयायगसुरेहिं 'न एयमण्णपहरणसज्जं' ति कलिऊण समप्पियं करयले चक्कं, अवि य-

उल्लसियजलणजालाकलावकवलियनहंतरालिल्लं ।

दीहनिवस्स वहट्ठा तं मुक्कं बंभयत्तेण ॥१५५॥

तेण वि य तस्स सीसं छिण्णं विणिवारिऊण सत्थो हं ।

बारसमो जयइ इमो चक्की सिरिबंभयत्तो ति ॥१५६॥

तओ पविट्टो महाविभूर्इए कंपिल्लपुरे । साहियं पुव्वचक्कवट्टिकमेण छक्खंडं पि भरहं । निव्वत्तिओ दुवालससंवच्छरिओ रज्जाभिसेओ । तओ चउसट्टिसहस्संतेउरमज्झगओ पुव्वनियानोवलद्ध थीरयणो उदारे चक्कवट्टिभोगे भुंजितं पवत्तो ।

अण्णया कयाइ पवत्ते निब्भरे पिच्छणयकीलारसे उग्घाडिऊण करंडयं एगाए दासचेडीए अणेगसुय-मयणसालिगा-कोइलाइभत्तिचित्तो समप्पिओ एगो राइणो पुप्फदामगंडूसओ तं च दट्टुण चित्तितं पवत्तो राया कहिं मण्णे एरिसओ मए दिट्टुपुव्वो त्ति । ईहापोहमग्गणगवेसणं करेमाणो संजायपुव्विल्लपंचर्जाईसरणो देवलोगे मए एरिसो दिट्टुपुव्वो' त्ति समुप्पण्णहिययसंघट्टो मुच्छावसेण निवडिओ सीहासणाओ वाउदाणाइणा समासासिओ परियणेण सत्थो चित्तितं पवत्तो-अहो ! किमेयाए महरिद्धीए जइ सो मे सहोयरो न मिलइ ? ता तस्स वियाणणत्थमुवायं चित्तेमि त्ति । भावितेण ओलंबियं इमं सिलोगद्धं, अपि च-
अश्व-दासौ मृगौ हंसौ, मातङ्गावमरौ तथा ॥१५७॥ । पू० ।

भणियं च जो इमं सिलोगैस्स अद्धं पूरेइ तस्साऽहं रज्जस्स अद्धं देमि । तेण य लोभेण सव्वो वि लोगो पढिउमाढत्तो ।

इओ य सो चित्तजीवो देवलोगाओ चविऊण पुरिमतालपुरे समुप्पण्णो महेब्भस्स पुत्तो । जोव्वणत्थो य सूरिसयासे देवलोगवण्णणं धम्मदेसणं समायण्णिऊण समुप्पण्ण-जाइस्सरणो संजायचरणपरिणामो पव्वइओ । विहरमाणो य एगल्लविहारपडिमा पडिवण्णो समागओ तत्थ । ठिओ य उज्जाणे काउस्सरगेण । सोऊण य उज्जाणपालयारघट्टिएण पढिज्जमाणं तं सिलोगद्धं 'किमेयं पढसि ?' त्ति पुच्छियं । साहियं चाऽणेण जहावट्टियं । साहुणा भणियं-जइ एवं तो एयं पढसु रण्णो सयासे गंतूणं, अपि च-

एषा नौ षष्ठिका जातिरन्योन्याभ्यां वियुक्तयोः ॥१५७॥ । उ० ।

पढियं च तेण गंतूणं । राइणा भणियं -भइ ! फुडं साहिज्जसु, किमेयं तए पूरियं ? तेण भणियं-देव ! न मए किंतु मह उज्जाणत्थेण साहुणा । तओ दाऊण किंचि तस्स उचियं गओ नरवई साहुवंदणत्थं । वंदिऊण य भावसारं निसण्णो तयंतिए । तओ आसीसादाणपुव्वयं भणियं साहुणा-

नाऊणं संसारं असारयं नरवरिद ! कुण धम्मं ।

नीसेसपमायं वज्जिऊण दुहनिवहसंजणयं ॥१५८॥

धम्मम्मि जो पमायं महमोहविमोहिओ नरो कुणइ ।

सो राय ! भमइ नूणं संसारे दुहसयावत्ते ॥१५९॥

१. सं.वा.सु. "जाइस्स दे" ॥ २. ला. "ण भणियं इमं ॥ ३. ला. "गद्धं पू" ॥

आभोगा इव नागाण दुहकरा निव ! जओ इमे भोगा ।
 ता उज्झिऊण एए पडिवज्ज नरिद ! चारित्तं ॥१६०॥
 ता भणइ निवो भयवं ! दियलोयसमा इमे मए भोगा ।
 पत्ता अणणसरिसा धम्मस्स वि नणु फलं एयं ॥१६१॥
 तो मोत्तूणं बंधव ! अइघोरमिमं वयं समणुहोहि ।
 मह पुण्णसमुवलद्धे अणणसरिसे इमे भोगे ॥१६२॥
 तुह चेव जाणणत्थं एसो नणु लंबिओ मए पाओ ।
 ता मह पसायबुद्धि काउं भुंजाहि रज्जमिणं ॥१६३॥
 इय भणिओ सो साहू पुणो पयंपेइ नरवइ ? ममं पि ।
 आसि महंता रिद्धी किंतु मए देसणं सोउं ॥१६४॥
 परिचइउं सव्वं पि हु भवभयभीएण मोक्खसुहहेउं ।
 सुगुरुसमीवे गहिया पव्वज्जा दुक्करा एसा ॥१६५॥
 ता जइ सुमरसि नरवर जं गोवत्तम्मि आसि दुहकलिया ।
 परकम्मकरा दीणा ता गिण्ह वयं मुय पमायं ॥१६६॥
 जइ सुमरसि दासत्ते खइया सप्पेण जंगया निहणं ।
 सरणविहीणा खित्ते ता गिण्ह वयं चय पमायं ॥१६७॥
 जइ तं सुमरसि कार्लिजरम्मि हरिणा वणम्मि वाहेणं ।
 वहिया एक्कसरेणं तागिण्ह वयं चय पमायं ॥१६८॥
 जइ तं सुमरसि गंगानईए तीरम्मि हंसभावम्मि ।
 गहिउं जालेण हया ता गिण्ह वयं चय पमायं ॥१६९॥
 जइ तं सुमरसि वाणारसीए जं अंतयाण गेहम्मि ।
 जाया दुगंछणिज्जा ता गिण्ह वयं चय पमायं ॥१७०॥
 इय एवं सुमरंतो पमायलेसं पवज्जिउं राय ।
 गिण्हसु जिणपण्णत्तं पव्वज्जं मुणिगणाइण्णं ॥१७१॥
 एव भणिओ वि राया पभणइ भयवं ? मुणेमि सव्वं पि ।
 किंतु न सत्तो मोत्तुं भोए संसारसुहजणए ॥१७२॥

तो पभणइ चित्तमुणी नियाणमसुहं कयं तथा तुमए ।
जं तस्स इमो नरवर !, संजाओ फलविवागो त्ति ॥१७३॥
ता गच्छामि इयारिणि मोहाओ पलवियं मए एवं ।
इय भणिय निग्गओ सो उग्गविहारेण विहरेत्ता ॥१७४॥
संलेहणाए देहं खविऊणं धुणियसयलकम्मंसो ।
केवलमुप्पाडेउं संपत्तो सासयं ठाणं ॥१७५॥

सो वि बंभयत्तराया पमायवसगओ रज्जसुहमणुभवइ जाव सत्त वाससयाणि ।
पज्जंतसमए य पणइओ एगेणं बंभणेणं जहा-मह देहि निय परमण्णभोयणं । राइणा भणियं
- भद्द ? मं मह थीरयणं च मोत्तूण न अण्णो तं परिणामिउं सत्तो, जओ तम्मि परिणमंते
महंतो कामुम्माओ भवइ । बंभणेण भणियं - चक्की वि होऊण गासमित्तदाणे वि
क्किविणत्तणेण एत्तियं वियारं करेसि ? तओ राइणा रुट्टेण जहिच्छं भुंजाविऊण महाथालं च
भरिऊण समप्पियं कुडुंबजोगं । भुत्तं च तं कुडुंबेण । राईए परिणमंते तम्मि अगणियमाइ-
भगिणी-सुण्हाइविभागं सव्वमसमंजसं चिट्ठिऊण विगुत्तं । परिणए य तम्मि पभाए चित्तियं
माहणेण-हंत ? कहमहं विडंबिओ एएण अकारणवेरिणा निवेण ता करेमि किंचि
एयस्साऽवयारं ति । चित्तिऊण निग्गओ नयराओ । दिट्ठो य एगो वडच्छयाए सुत्तो
अयापालगो । सो य पसुत्तो लिंडियाहिं जहाभिरुइयं वडपत्ताणि कार्णितो । तारिसं च दट्टूण
बंभणेण उवयरिऊण भणिओ जहा-जो हट्टमज्जेणं हत्थिखंधारूढो एवंविहरिद्धीए समागच्छइ
तस्स गोलियाजुयपक्खेवेण दो वि अच्छीणि फोडेहि । तेण वि तहा कयं । हम्मंतेण य
भणियं जहा-ऽहं बंभणेण कारिओ । तओ रण्णा रूसिऊण उप्पाडावियाओ बंभणाणं
अच्छीओ । भरविऊण य थालं हत्थेहिं मलइ, मलंतो य सुहं लहइ । एवं दिणे दिणे जाव
कारवेइ ताव मंतीहिं करुणाए गुंदयफलाणं थालं भरिउं सम प्पियं । तं पि तव्वासणाए
मलेइ । एवं च रुद्धपरिणामो मरिऊण समुप्पण्णो अहेसत्तमाए नरयपुढवीए त्ति ।

॥ ब्रह्मदत्ताख्यानकं समाप्तम् ॥३८॥

साम्प्रतमादिशब्दोपात्तं चण्डपुत्राख्यानकमाख्यायते

[३९. चण्डपुत्राख्यानकम्]

अत्थि इहेव जंबुद्वीवे दीवे भारहे वासे लच्छिमंदिरं नाम नयरं । जत्थ य तुंगाई देवकुलाई कुलपुत्तयकुलाई च, विमलाई धवलहराई सप्पुरिसचरियाई च, सिणेहसाराओ वीहीओ सज्जणपीईओ य, सहावगंभीरोओ बाहिं वावीओ, घरे परिहाओ घरिणीओ य; रयणरेहिराओ पायारगोउरभित्तीओ विलासिणीओ य त्ति ।

अवि य-

निज्जियरइरूवाओ नारीओ जत्थ पुरिसवग्गो वि ।
जियमयणरूवसोहो किं बहुणा एत्थ भणिएण ? ॥१॥
जं जं चिय रमणीयं तं तं सव्वं पि तत्थ संभवइ ।
नीसेसनयरसोहासमुदयसारेण घडियं व ॥२॥
तत्थ य रया दरियारिकुंभिकुंभयडदारणमयारी ।
सयलकलापत्तट्टो नामेणं अत्थि हु जियारी ॥३॥
सयलं तेउरसारा तारा नामेण पणइणी तस्स ।
तीसे य अत्थि पुत्तो नामेणं चंडपुत्ते त्ति ॥४॥

सो य सहावेणं चेव चंडो निदओ निद्विखन्तो परावयारी पभूयसत्तसंताण-
विणासणबद्धचित्तगतो, अवि य-

नीसेसदोसनिलओ समत्थसत्ताण मारणसयण्हो ।
विसपायवो व्व वड्डइ सो कुमरो चंडपुत्तो त्ति ॥५॥

परिणाविओ य समाणरूव-जोव्वण-लावण-गुणसमण्णियं चंडसिरिं नाम
दारियं । सा य भत्तुणोऽणुरूवगुणा, अवि य-

कूरा पर्यंडचित्ता जियवहनिरया य भीसणसहावा ।
महु-मज्ज-मंसलोला सिक्खियबहुसाइणीमंता ॥६॥

ताणं च एगसहावत्तणओ परोप्परमणुरत्तचित्ताणं कालो परिगलइ । अण्णया य
नियआउक्खएण पंचत्तमुवगओ रया । तओ मंति-महामंति-सामंताइएहिं सो चेवाऽभिसित्तो
रज्जे । जाओ पर्यंडसासणो नरवई । तओ रज्जसिरिं परिवालेमाणो रमेइ आहेडयं, जंपए
अलियं, गिण्हए अदत्तं, सेवए परकलत्तं, करेइ अपरिमियपरिगहं, भुंजए रयणीए, देइ य

पइदियहं एकेकं णियगोत्तदेवयाए चामुंडाए पसुं, तप्पेइ मज्जेणं, पियइ सयं पि अणवरयं । एवं च तस्स राइणो तीए देवीए सह भोए भुंजमाणस्स समुप्पण्णा एगा धूया । तीए य गब्भत्थाए उवसामिया मारि त्ति अओ पइट्ठावियं से नामं संतिमइ त्ति । सा य पवड्डुमाणा जाया सव्वगुणनिहाणं, अवि य-

लज्जालुया विणीया पसंतचित्ता सुरूवसंपन्ना ।
दढसीलसत्तजुत्ता पियंवया गव्वपम्मुक्का ॥७॥
दक्खा मायारहिया सुसोहिया सव्वसोयसंजुत्ता ।
सोहग्गभग्गकलिया किं बहुणा ? सव्वगुणनिलया ॥८॥

इओ य अत्थि तम्मि चेव नयरे धणवई नाम सेट्ठी । सो य मिच्छत्तमोहियमई, अवि य-

मिच्छत्तमोहियमई सो पावो घोररुद्धपरिणामो ।
अण्णो वि तत्थ सेट्ठी जिणपालो नाम विक्खाओ ॥९॥

अवि य-

सम्मत्तनाणकलिओ पंचाणुव्वय-गुणव्वयसमग्गो ।
जिणसाहुपायपंकयभसलो दीणाइदाणरओ ॥१०॥
साहम्मियपडिवतीपडिहत्थो सच्छचित्तयाजुत्तो ।
जीवाइपयत्थविऊ किं बहुणा ? सव्वगुणठाणं ॥११॥
तस्स य जसमइनामा भज्जा तीए य सगुणकलिया ।
चत्तारि सुया जाया इमेहिं नामेहिं सुपसिद्धा ॥१२॥
जिणदेवो जिणचंदो जिणेसरो तहय होइ जिणदत्तो ।
सव्वकलागमकुसला सव्वो वि जिणिदधम्मरया ॥१३॥
अह सो वि चंडपुत्तो जिणवरधम्मस्स सुट्ठु पडणीओ ।
न सहइ जत्ताईयं कीरंतं जिणवरघरेसु ॥१४॥
एवं सव्वो वि जणो पडणीओ मज्ज-मंसकयलोलो ।
सच्चमिणं आहाणं जह राया तह पया होइ ॥१५॥

तओ तेण जिणपालसेट्ठिणा भणिओ सो राया जहा-देव ! न जुत्तं तुम्हाण एवंविहं असमंजसं चेट्ठिउं, अवि य-

हंतूणं परपाणे अप्पाणं जे करेति सप्पाणं ।
 अप्पाणं दिवसाणं कएण नासंति अप्पाणं ॥१६॥
 भासंति जे अलीयं ते अण्णभवम्मि होंति नरनाह ? ।
 अंधा जड-मूयलया वइहीणा पूइगंधमुहा ॥१७॥

तहा-

जे उण अदिण्णयं राय ! लिति परदव्वलोहिया जीवा ।
 ताणऽपरे जम्ममी न गासमित्तं पि संपडइ ॥१८॥
 भुंजंति परकलत्तं मोहंधा जे नराऽहमा चेव ।
 ते बहुदुक्खप्पउरा नपुंसया होंति मरिऊणं ॥१९॥
 जे ओरालपरिग्गहआरंभेसुं पसुत्तया होंति ।
 ते दुग्गइगमणाइं विरूवक्खाइं पावेंति ॥२०॥
 अहवा वि हु सव्वेसि एयाण फलं अणुत्तरा नरया ।
 ता मुंचसु एयाइं पावट्ठाणाइं सव्वाइं ॥२१॥
 घोरंधयारनरो मा वच्चसि देव ! तं पमायंतो ।
 ता उज्जमित्तं धम्मे जिणवयणे आयरं कुणसु ॥२२॥
 मा णिंदसु मुणिवगं हियसुहनिस्सेसकारयं सामि ! ।
 तन्निदणाओ जीवा भमंति संसारकंतारे ॥२३॥
 ता कुणसु धम्मबुद्धिं सामिय ! मा अप्पवेरिओ होसु ।
 जिणधम्मपभावेणं सव्वाओ वि होंति रिद्धीओ ॥२४॥
 एवं वुत्तो वि बहुं नरनाहो सिट्ठिणा उ अहिययरं ।
 से धम्मम्मि पओसं करेइ मिच्छत्तमोहंधो ॥२५॥

एवं च एवंविहं महापउटुं रायाणं जाणिऊण तओ सो जिणपालसावगो न करेइ
 पयडं जत्ताविहाणं, चाउम्मासियाइसु वि रायाइभएण गिहचेइयाणं चेव करेइ महाबलि-
 विच्छड्डातणहवणं । एवं च कुणमाणस्स सपरियणस्स सिट्ठिस्स वच्चए कालो । एत्थंतरम्मि
 य सा संतिमई जाया संपत्तजोव्वणा, अवि य-

वित्थयनियंर्बर्बिबा अद्धोगयथोरथणयपब्भार ।
 उब्भिज्जमाणअइकसिणंजहणनवरोमराइल्ल ॥२६॥
 ण्हवियविलेवियदेहा सव्वालंकारभूसियसरीर ।
 पिउपायवंदणत्थं मायाए पेसिया बाला ॥२७॥

तओ रण्णातीए रूवसोहासमुदयं निएऊण जंपियं जहा-वच्छे ? दिण्णो मए तुह सयंवरो ता करेमि सामग्गि । तीए जंपियं-ताय ! महापसाओ, किंतु ण सयंवरमंडवो कायव्वो, जो ममाऽभिरुइओ तं सयमेव नयरमज्जे दट्टुण वरिस्सामि । रइणा भणियं-एवं होउ । तओ अण्णया चाउम्मासयदिवसम्मि सा चंडिसिरी देवी कयपच्छन्नवेसा रयणीए निग्गया नियचरियाए । तीए य संतिमईए नियजणणि अपेच्छमाणीए पुच्छिया अम्मधार्इ जहा-अम्मो ! कत्थ मे जणणी ? तीए य विण्णायपरमत्थाए भणियं जहा-पुत्ति ? तुह जणणी एवंविहचिट्ठिया नियचरियाए निग्गया न नज्जइ कत्थइ गया । तीए चितियं-अहो ? मम जणणीए जहणत्तणं परं सोहणो एस ममाभिरुइयवरगवेसणोवाओ त्ति । परिभाविऊण भणिया अम्मधार्इ जहा-अम्मो ! पयट्ट मए सह जेण वच्चा मि जणणीगवेसणत्थं, तओ 'मा अद्धिइं करिस्सइ' त्ति मण्णमाणी पट्टिया अम्मधार्इ सह तीए । तओ पढमं निरूवियं नियगेहं दिट्ठं च तं चंडियाययणं, अवि य-

हम्मंतजीवनिवहं गुरुहरिपवाहकहमाइण्णं ।
 दारोलंबियखुर-पुच्छ-सीस-कण्णुट्ट-नासउडं ॥२८॥
 निग्गच्छमाणअइदुब्भिगंधफुट्टंतनासियाविवरं ।
 मुह-मज्ज-मंसपउरं दट्टुणं चितए बाला ॥२९॥
 अहह ! कह तायभवणे दीसइ अइदारुणं इमं कम्मं ।
 जारिसयं अइदारुणसूणानाहस्स गेहम्मि ॥३०॥

एवं च चित्तिऊण निग्गया रायभवणाओ नयरमज्जे, रायदुहिय त्ति अणिवारियप्पसर परिब्भमंती पत्ता धणवइसिट्ठिमंदिरं । तत्थ वि पव्वदिवसं त्ति काऊण विसेसओ निव्वत्तिया नियगुत्तदेवयाए पूया, अवि य-

रत्तंदणोवलित्तं काऊणं देवयं सुरत्तेहिं ।
 कणवीरमाइकुसुमेहिं अच्चिया भत्तिजुत्तेहिं ॥३१॥

आणित्तु विविहमज्जाइं तप्पिउं देवयं तओ सेसं ।
 सकुडुंबो सो धणवइसिद्धी तं पियइ तप्पुरओ ॥३२॥
 तं मज्जगंधमग्घाइरुण चित्तेइ संतिमइकुमरी ।
 मम गेहाओ मणागं सोहणयं वट्टए एयं ॥३३॥

खणंतरेण य निग्गया तत्तो । सेसनयरं पि परिब्भमंती पाएण तव्विहं चैव निएइ
 जाव कमेण पत्ता जिणपालमंदिरं । तं पि चाउम्मासयंति काऊण निव्वत्तिय-
 सविसेसगेहचेइयपूओवयारं पिच्छइ, अवि य-

घणसारपूर-मयणाहिमिस्सगोसीसचंदणरसेण ।
 सव्वाण वि बिंबाणं विलेवणं पिच्छए विहियं ॥३४॥
 सयवत्त-जाइ-कंदोद-कुंदमचकुंदमाइकुसुमेहिं ।
 नाणाविहभंगेहिं रइया पूया जिणिंदाणं ॥३५॥
 कालागरु-घणघणसार-मीणउग्गार-मयमयाईहिं ।
 कयपवरधूयडज्झंतगंधपरिवासियदियंतं ॥३६॥
 ससुयंधसालिअक्खयविभत्तिआलिहियअट्टमंगलयं ।
 परिपक्कसाउफलनियरभरियबहुभायणविसेसं ॥३७॥
 वरनेहपुन्नवट्टयवती पज्जलियमंगलपईवं ।
 गंधुक्कडघयजलपूरपुण्णमणिकणयभायणयं ॥३८॥
 इय बहुविहकयपूयं जिणाण तं सिद्धिमंदिरं दट्टुं ।
 पेच्छइ पुणो वि सिद्धिं परिवारजुयं सुधम्मरयं ॥३९॥
 वंदेइ को वि देवे को वि हु संथुणइ विविहथुत्तेहिं ।
 को वि हु पंचपयारं सज्झायं कुणइ उवउत्तो ॥४०॥
 को वि फलिहक्खमालावगकरो गुणइ पंचनवकारे ।
 को वि हु पोसहनिरओ सामाइयसंठिओ को वि ॥४१॥
 इय एवमाइबहुविहसुधम्मवावारवावडं सव्वं ।
 तं सेट्ठिमंदिरं पेच्छऊण अइहरिसिया बाला ॥४२॥
 चित्तेइ इमाण पुणो मज्झाओ कं वरेमि वरकुमरं ।
 इय चितंती पेच्छइ जिणदत्तं सिद्धिलहुयसुयं ॥४३॥

उवविट्टं पडिमाणं पुरओ परिविहियजोगमुद्दाए ।
 पढमाणं विविहथए कलकोइलकोमलसरेणं ॥४४॥
 मयणं व रूवधारिं दट्टुं परिभावए इमं तुट्टा ।
 मोत्तूण इमं अण्णं विहेमि नियमा न भत्तारं ॥४५॥
 इय निच्छयं विहेउं मह कज्जं सिद्धयंति कलिऊण ।
 धाईय समं चलिउं संपत्ता निययगेहम्मि ॥४६॥

तओ य अण्णदियहम्मि भणिओ नरनाहो संतिमईए - ताय ! करेह पसायं मह तेण सयंवरणेण, मुक्कलह सइच्छाए नयरमज्जे जेण गिण्हामि अभिरुइयं वरं ति । राइणा भणियं - पुत्ति ! जं वो रोयइ तं तहा करेहि । तओ कंचुइ-खुज्जय-वामण-यनाणा-देसयचेडियाचक्कवालसंपरिवुडा गेहंगेहेण निरूवयंती रायपुत्ताइए कुमारे पत्ता जिणपालसेट्टिमंदिरं, दिट्ठो जिणदत्तो । तओ मयरंदगंधट्टणालुद्धमुद्धफुल्लं धयरुणरुणा-सदहलवोलिज्जंतदिसिवहं घेत्तूण उवट्टिया वरमालं । तओ महामिच्छत्तोवहयराय-देवीदंसणसंजायगरुयभएण 'एसा वि ताण चेव धूया तारिस्सी भविस्सइ' ति मण्णमाणेण भणिया सिट्ठिणा जहा-वच्छे ! तुमं रायधूया एसो वि मह सुओ वणियपुत्तो ता हंसी-कायाणं व न सोहए संबंधो, तम्हा अण्णं किं पि रायउत्तमाइयं कलाकोसल्ल-रूय-जोव्वणसुंदेरसुंदरं कुमारं वरेहि । तीए जंपियं-ताय ! मह ताएण सयंवरो दिण्णो तओ जमभिरुइयं तं वरं वरेमि, मम य एत्तियमित्तं नयरं परिब्भमंतीए एस चेवाऽभिरुइओ । सिट्ठिणा भणियं-वच्छे ! अम्हे सावगा, कायव्वं च अम्ह गेहे चेइयवंदणाइयं धम्माणुट्ठाणं, तं च तुह जणणि-जणयाण मणभिप्येयं । तीए जंपियं-न एयं विरुद्धं किंतु परलोगहियं सइच्छयाए य कज्जमाणे न जणणि-जणयाण कोइ अहिगारो । सिट्ठिणा लवियं-जइ वि एवं तह वि अम्हाणं वणियाणं एस समायारो जहा कायव्वो सासूए जाव सवत्तीणं विणओ नाणाविहो य घरवावारो कायव्वो, तं च रायधूयत्तणेण न सक्किहसि काउं तीए भणियं ताय ! जो एवं करेइ सो एवंविहाणं सव्वाणं चित्तं देइ चेव, ता पसायं काऊणमणुमण्णह जेण वरेमि मणोभिरुइयं । सिट्ठिणा वि 'आसन्नभव्वा कावि एसा ता लहउ वराई सिवसोक्खं' ति मण्णमाणेण भणियं-पुत्ति ! जइ एवं ता जं वो रोयइ तं भवउ । तओ तीए हरिसभरसमुब्भिज्जमाणरोमंचकंचुयाए विलइया जिणदत्तस्स कंठे वरमाला । गया नियगेहं । पुच्छियं च राइणा जहा को वरिओ ? कहियं च परियणेणं जहा-देव ! जिणपालसिट्ठिपुत्तो जिणदत्तो तं च सोऊण पाउसकालजलयवलएणं व नहयलं अंधारियं वयणं राइणो,

१. ला. करेहि ॥

भणियं च-आ पावे ! किमेयमहं कुलविरुद्धं तए समायरियं वणियउत्तं सावयं च वरंतीए, ता न पाएणं सुट्ठु अभिजायाऽसि । तीए भणियं-ताय ! सयंवरं दाऊण किमित्थियं खेयं करेसि ? जइ न एयं परिणामसुहावहं भविस्सइ तो नाऽहं निच्छएण अभिजाया । तओ नियवयणपडिबंधेण अणभिमयं पि बाहिरच्छयाए पडिवण्णं राइणा । कारावियं च अणायरेणं चेव पाणिग्गहणं । पेसिया सा ससुरोहं । तओ जहोचियपडिवत्तिसव्वं कुणमाप्पि दडूण तुट्ठेण सेट्ठिणा कया से धम्मदेसणा अवि य-

संसारम्म असारे लद्धुणं माणुसत्तणं दुलहं ।
 वच्छे ! जिणवरधम्मं गिण्हसु चिंतामणिसरिच्छं ॥४७॥
 नर-विज्जाहर-सुर-असुरनाहसुक्खाइं विविहरूवाइं ।
 कमसो य जप्पभावेण लब्भए सिद्धिसोक्खं पि ॥४८॥
 तं तिहुयणनयचलणं अट्टारसदोससंगपरिमुक्कं ।
 देवत्तणेण वच्छे ! पडिवज्जसु जिणवरं देवं ॥४९॥
 अट्टारसठाणेसुं जे सत्तीए जयंति ते मुणिणो ।
 दुद्धरवय-नियमपरा गुरुणो मण्णेहि भावेणं ॥५०॥
 रागद्वेषविउत्तेहिं जं जिणिंदेहिं भणियमविरुद्धं ।
 तं जिणवयणं पडिवज्ज भावओ आगमत्तेण ॥५१॥
 इय सिट्ठिवयणमायण्णिऊण आणंद पुण्णतरलच्छी ।
 सा संतिमई जंपई इच्छामऽणुसासणं ताय ! ॥५२॥

तओ थोवदिवसेहिं चेव जाया परमसाविया । समुप्पण्णा य अण्णदेसेसु पसिद्धी जहा-तारिसे वि जहण्णे नरिदि सव्वजणे वि नरिदाणुमए सो चेव एक्को जिणपालसेट्ठी स परियणो सव्वगुणसमुदओ, सविसेसओ तस्स चेव राइणो जाम्माउओ जिणदत्तो । एसा य पसिद्धी सवणपरंपराए समायण्णिया विजयपुरनिवासिणा विजयसेणराइणा । तेण य तमन्नायमसहमाणेण पसिओ दूओ चंडपुत्तस्स ! पविट्ठो य पडिहारनिवेइओ, भणियं च तेण-देव ! पेसिओ अहं सामिणा विजयसेणनरिदेण, भणावियं च तेण जहा-

‘जमभक्खाइं भक्खसि अपेयपाणं च कुणसि अणवरयं ।
 गच्छसि जमगम्माइं पयट्ठसे विविहपावेसु ॥५३॥

१. ला. ‘मम्हाण कु’ ॥ २. ला. पडिवत्तं स’ ॥ ३. सं.वा.सु. ‘हिं भासियं तहियं । तं । ४. ला. थोवेहिं दि’ ॥ ५. ला. ‘दओ विसे’ ॥ ६. सं.वा.सु. ‘च्छसि गम्मागम्मं प’

तं न वि जुत्तं नरवर ! तुह काउं उभयकुलविसुद्धस्स ।
 ता मुंच नरवइ ! इमं असमंजसचिद्धियं तुरियं ॥५४॥
 तं सुणिय चंडपुत्तो कोवफुरुप्फुरियओट्टुजुयलिल्लो ।
 भिउडीकरालवयणो करघाउदलियमहिवीढो ॥५५॥
 जंपइ 'रे रे ! तुब्भे मह सचिवपयम्मि ठविया केण ! ।
 एयं महंतयत्तं नियपिउणो कुणह गंतूणं' ५६॥
 एवं भणिओ दूओ जंपइ 'रे तुज्झ कुट्टु(प्पि ?)ओ कालो ।
 जं सामेण वि भणिओ जंपसि अइनिट्टुरं एवं ॥५७॥
 हियमवि जंपंताणं जं एवं भणसि निट्टुरं पाव ! ।
 तं धाउविवज्जासो तुह जाओ मरणकालम्मि ॥५८॥
 ता होहि जुज्झसज्जो भणियं वा कुणसु मा भणिज्जासु ।
 जह न वि पुर्व्वि कहियं' कुविओ इय जंपए राया ॥५९॥
 रे लेह लेह एयं पावंमारेह विरसरसमाणं ।
 अह उट्टिया य पुरिसा दूयस्स विणासणट्टाए ॥६०॥
 तो महया कट्टेणं मंतीहिं विमोइओ इमो जाव ।
 ता गंतुं नियरण्णो सव्वं साहेइ सविसेसं ॥६१॥
 तो रुसिऊण पयाणयभेरिं ताडावए विजयसेणो ।
 तीए सद्देणं तओ संवूढा तक्खणं सुहडा ॥६२॥
 तयणंतरं च संवूढं सव्वं पि सेण्णं । दिण्णं च रइणा पयाणयं अणवरयपयाणएहिं
 य वच्चंतो पत्तो विसयसंधिं । तं च समागच्छंतं नाऊण चंडपुत्तराया वि सव्वसामग्गीए
 पत्तो विसयसंधिं जाव मिलियाणि दोण्ह वि अग्गाणीयाणि, पयट्टमाओहणं, अवि य-
 चुण्णिज्जंति गइंदेहिं रहवरा रहवरेहिं वरसुहडा ।
 सुहडवियारियदेहा पडंति धरणीयले सुहडा ॥६३॥
 तुरयारोहप्पहया लोट्टंति महीए मत्तमायंगा ।
 मायंगाहयभेरीरवेण नासंति कावुरिसा ॥६४॥
 इय एरिससमरभरे वट्टंते चंडपुत्तसुहडेहिं ।
 तं विजयसेणसेण्णं खणेण विवरम्महं विहियं ॥६५॥

भज्जंतं दट्टूणं नियसेणं विजयसेणनरनाहो ।
 अप्फालियगंडीवो हक्कंतो उट्टिओ सहसा ॥६६॥
 तस्स सरपहरपहया भग्गा ते चंडपुत्तवरसुहडा ।
 ते भग्गे दट्टूणं अमरिसिओ चंडपुत्तो वि ॥६७॥
 आरोविऊण चावं अब्भिट्टइ विजयसेणनरवइणो ।
 दोण्हं पि ताण जाओ संगामो तियसतोसयरो ॥६८॥
 एवं संगामभरे वट्टंते विजयसेणनरवइणा ।
 लहु हत्थयाए बद्धो वसीकओ चंडपुत्तनिवो ॥६९॥
 बद्धम्मि तम्मि सेणं अनायगं विजयसेणरायाणं ।
 सरणं उवसंपणं सो वि हु सम्माणितं सव्वं ॥७०॥
 पत्तो लच्छिनिवासं नयरं सम्माणिओ पुरजणेणं ।
 पविसरइ रायभवणं अत्थाणत्थो य इय भणइ ॥७१॥
 'आणेह चंडपुत्तं' आणीओ तेण तक्खणं चेव ।
 भणिओ निवेण 'संपइ किं काहिसि उज्जमं धम्मे ? ॥७२॥
 अज्ज वि न किंचि नट्टं नियरज्जं कुणसु धम्मिओ होउं ।
 मज्झ पसाएणिण्हं' तं सोउं जंपए एसो ॥७३॥
 'रे रे का हवसि तुमं जेण पसायं ममाऽवि उल्लवसि ?' ।
 तं सोउं आरुट्टो विजयपुरस्सामिओ सहसा ॥७४॥
 अप्पइ पाणाणेयं भणइ य 'रे एत्थ चेव जम्मम्मि ।
 दंसिज्जह पावफलं एयस्स उ नरयसारिच्छं' ॥७५॥
 देवी वि तस्स डुंबाण अप्पिया ते वि तारिसं भणिया ।
 दियहे दियहे राया जाइज्जइ बहुपयारेहिं ॥७६॥
 एवं नरयसमाणं अणुहवमाणस्स तस्स दुहनिवहं ।
 अणुरत्ता पाणाणं धूया काणा अइकुरूवा ॥७७॥
 तीए समं जा अच्छइ दिणे दिणे ताव ते वि चंडाला ।
 सिद्विलंति जायणाओ नियधूयानेहपडिबद्धा ॥७८॥

राया वि विजयसेणो तं नाउं निययचारपुरिसेहि ।
 कुट्टावइ खयरं (?खरयं) पिव पाणाण वि कुणइ गुरुदंडं ॥७९॥
 रोहज्जाणोवगओ मरिउं अहसत्तमाइ उववण्णो ।
 तत्तो उव्वट्टिता भमिही भवसागरे भीमे ॥८०॥
 तीए वि तब्भज्जाए जाइज्जंतीए डुंबगेहम्मि ।
 अइपाणपिओ खद्धो डुंबसुओ डाइणित्तेण ॥८१॥
 तं नाऊणं डुंबो विविहपयारेहि जाइउं रुट्ठो ।
 मारेति सा वि मरिउं उववण्णा छट्टपुढवीए ॥८२॥
 सा वि तओ उव्वट्टिय संसारमणंतयं परिब्भमिही ।
 एसो पमायदोसो एत्तियचरिएण अक्खाओ ॥८३॥
 एण्ह तु सेसयं पि हु पगयं जं एत्थ अप्पमायस्स ।
 फलसंसाहणहेउं कहेमि अक्खाणयं सुणह ॥८४॥
 राया वि विजयसेणो नियदेसं सुमरिऊण चित्तम्मि ।
 अत्थाणत्थो पुच्छइ अण्णम्मि दिणे तयं लोगं ॥८५॥
 'को एत्थ नयरमज्जे धम्मपरो भणह ?' ते वि जंपंति ।
 सकुडुंबो जिणपालो सिट्ठी इह धम्मिओ देव ! ॥८६॥
 तस्स वि सुओ विसेसेण धम्मिओ सयल गुणगणावासो ।
 नामेणं जिणदत्तो जामाऊ चंडपुत्तस्स ॥८७॥
 तं सोऊणं राया हरिसभरिज्जंतसयलसंहणणो ।
 जंपइ 'रे रे ! तुरियं वाहरह सपुत्तयं सेट्ठि ॥८८॥
 ता वेगेणं गंतुं पडिहारो भणइ सिट्ठिजिणपालं ।
 'वाहरइ तुमं देवो सपुत्तयं तो समागच्छ' ॥८९॥
 सेट्ठी वि जाइ नियए पुत्ते घेतूण रइणो पासे ।
 सो वि निवो जिणभत्तो दडुं आवंतयं सिट्ठि ॥९०॥
 रोमंचपुलइयंगो राया साहम्मिओ त्ति कलिऊण ।
 नियनिद्धबंधवस्स व पडिवात्ति कुणइ सविसेसं ॥९१॥

सेट्टी वि पणमिरुणं उवविट्टो रइणो समीवम्मि ।
 विण्णवइ जोडियकरो 'आएसं देह मे देव !' ॥९२॥
 उल्लवइ निवो वि तओ 'सुकयत्थो तं सि चेव एक्कोऽत्थ ।
 इय धम्मपउट्टस्स वि निवस्स वासम्मि वसमाणो ॥९३॥
 पालसि अक्खंडं चिय सव्वण्णुपणीयधम्मवररणं ।
 ता संपइ मह भाया तुमं जओ निच्चलो धम्मे ॥९४॥
 अइपावओ त्ति काउं सिक्खं पि हु नेयगिण्हए कहवि ।
 एएण कारणेणं एसो उप्पाडिओ राया ॥९५॥
 ता को सो तुह लहुओ पुत्तो जामाउओ इमस्सेव ।
 दंसेहि जेण रज्जे ठवेमि एत्थं सहत्थेणं' ॥९६॥
 तं निवइवयणमायण्णिऊण सेट्टी पयंपए 'देव ! ।
 वणियाणं अम्हाणं पओयणं किंच रज्जेण ॥९७॥
 साहम्मियस्स मज्झं पढमं चिय पत्थणा इमा एक्का ।
 न हु कायव्वा विहला किं बहुणा एत्थ भणिएण ?' ॥९८॥
 तो निब्बंधं नाउं सेट्टी पाडेइ रायचलणेसु ।
 जिणदत्तं सो वि तयं निरूवए अंगुवंगेसु ॥९९॥
 बत्तीसलक्खणधरं अच्चब्भुरूयजोव्वणसमगं ।
 दट्टुं तुट्टो राया आभासइ मंति-सामंते ॥१००॥
 'सव्वकलागमकुसलो एसो बत्तीसलक्खणुक्खिन्नो ।
 तुम्हाण होउ राया सज्जह रायाभिसेयं से' ॥१०१॥
 वयणाणंतरमेव य रायभिसेसो जणेण उवठविओ ।
 ता विजयसेणराया अहिंसिचइ तं महीनाहं ॥१०२॥
 एवं सुत्थं काउं, राया निययम्मि जाइ रज्जम्मि ।
 जिणदत्तो वि हु जाओ, पुहइवई निग्गयपयावो ॥१०३॥

एवं च विलसमाणं जंति वासरा । अण्णया य भणियं संतिसिरीए- 'नाह !
 संपयंपयट्टेसु विसेसेणसुधम्माणुट्टाणं, विहेसु जिणसासणस्सुन्नइं, संबोहेसु सव्वं पि
 नियजणवयनिवासिजणं, कारवेहि य समत्थगामागर-नगर-खेड-कब्बड-मडंब-दोणमुहेसुं

जिणाययणमंडियंनियभुत्ति, पूएसु य विहीए सिरिसमणसंघं' । राइणा वि 'पिए ! जं तुहाऽभिरुइयं सो अम्हाणं मणोरहो चेव' त्ति भणमाणेण पयट्टियं सव्वं विसेसेणं एवं च विसिट्ठसावयधम्मपरायणाइं अण्णया निसण्णाइं गवक्खावलोयणे तत्थय नाणाविह-नयरसोहासमुदयं निएऊण विणियट्टतदंसणकोऊहलाए भणियं संतिसिरीए 'नाह ! संपयं विणियट्टं नयरदंसणकोऊहलं, तो जाव जिणवंदणाए वेला भवइ ता पढेसु किंपि पण्होत्तरं, जओ एसो चेव विसिट्ठजणविणोओ त्ति । राइणा भणियं जइ एवं ता सुव्वउ-

को वयणवाइ सद्दो ? को वा वि धणी विहंगमं वयइ ?

का चलचित्ता ? किं वा खविऊणं जंति सिद्धीए ॥१०४॥

मुच्छइ वसहो समरंगणम्मि कं सुपुरिसा पसंसंति ।

केरिसयं वा कन्हं भणंति सव्वे वि नणु लोगा ? ॥१०५॥

तोतीततं ।

संतिसिरीए य पढियाणंतरमेव उवलहिऊण भणियं-गावीरयं । तओ पुणो वि पढियं

राइणा-

कं इच्छइ सयलजणो ? संबोहसु विच्छियस्स दुट्ठंगं ।

को भक्खइ सयलजणं चलणस्स य भणसु बोहणयं ॥१०६॥

संबोहेसु य नट्टं अम्हं सद्दस्स को य पज्जाओ ? ।

नीरयबोहणाई भण भण सवणस्सई किं पि ॥१०७॥

का जलहीसंजाया ? को वा सद्दो पयंपई सद्दं ? ।

को पउमातो जायइ ? को वा निहलइ मायंगे ? ॥१०८॥

हरिणविसेसा पुच्छंति कोय लहु उगमेइ धण्णाणं ।

चउवत्थं तिसमत्थं पिययमे ! पण्होत्तरं मुणसु ॥१०९॥

ततो संतिसिरीए भणियं - 'नाह ! पुणो वि पढसु' । पुणो वि पढियं । ततो वीमंसिउं लहिऊण य भणियं कमलासणो । तओ भणियं जिणयत्तेण-पिए ! संपयं तुमं पढसु । ततो भणियं संतिसिरीए-जइ एवं ता पहेलियमेकं सुणसु जिणयत्तेण भणियं-पढसु । पढिया तीए, अवि य-

दो बाहा वरगत्ता, सालंबणसुहडगेहसंलग्गा ।

उद्धट्टियलोएहिं, चंपिज्जइ भणसु का नारी ? ॥११०॥

१. न सम्यगवगम्यन्ते इमान्यग्रेतनानि च प्रश्नोत्तराण्यस्माभिः । २. सं.वा.सु. भण सुवणस्सयं किं ॥ ३. ला.

जिणयत्तेण परिभाविऊण भणियं निस्सेणी । संतिमईए भणियं-जइ एवं ता सुणसु पण्होत्तरमेगं, अवि य-

संबोहं मायंगं को वा वज्जत्ति वायओ सद्दो ? ।
 बोहेहि कमलजोणिं सूर्नेरिद व्व कं जिणइ ? ॥१११॥
 का सोहइ विण्हुकरे ? किं वा वि हु देइ दुज्जणो लोए ? ।
 कं व पविट्ठो पाणी दुक्खाणं भायणं होइ ? ॥११२॥
 पीडंति के य जीवं ? को वा वि हु थोववायओ सद्दो ? ।
 का बहु सत्ताउलया ? को वा सिग्घं वयइ सद्दो ? ॥११३॥
 केरिसयं च पसंसइ नरं जणो ? कहव होइ थी पुच्छा ? ।
 को विण्हुवाइसद्दो ? किं सत्थं सत्तुनिट्ठवणं ? ॥११४॥
 केरिसियं दारिदियकुलं भवे ? केरिसं च निवभवणं ।
 पुच्छंति करी सहसा का भज्जइ वानेरेहिं कहिं ? ॥११५॥
 अविलंकाहरमेयं थयं व कह वयइ भणसु आवासी ।
 चउवत्थचउसमत्थं पिययम ! पण्होत्तरं मुणसु ॥११६॥

राइणा भणियं-पिए ! पुणो पढसु । पुणो वि पढियमेईए । तयणंतं च लहिरुण भणियं राइणा-पिए ! लद्धमेयं गयालंकारं । एवं समत्थबुहयणपसंसणिज्जेहिं धम्मियजणाभिमएहिं तियसलोगाभिलसणिज्जेहिं मिच्छत्तोवहयमइपाणिगणदूमणिज्जेहिं पावभरपसरपूरियसत्तसंघायहसणिज्जेहिं अभव्वजणकडक्खएहिं विणोएहिं चिट्ठंताणं कालो परिगलइ ।

अह अण्णया कयाई, निउत्तपुरिसेण पणयसीसेणं ।
 भणियं 'वद्धाविज्जसि, इह चेव वरम्मि उज्जाणे ॥११७॥
 देवाइवंदणिज्जो आगमकिरियाविहाणकयचित्तो ।
 सुपसंतो गुणवंतो दीप्पंतो नाणलच्छीए ॥११८॥
 भवियाण कप्परुक्खो, नामेण गुणायरो महासूरी ।
 बहुसीससंपरिवुडो समोसद्दो एत्थ नयरम्मि ॥११९॥
 तं सोऊणं राया भत्तिवसुल्लसियबहलपुलइल्लो ।
 दाऊण पारितोसियदाणं वद्धावयनरस्स ॥१२०॥

सयलनरनाहजुतो देवीए समं गओ गुरुसयासे ।
 तिपयाहिणं विहेउं उवविट्ठो अह महीवट्ठे ॥१२१॥
 भयवं पि कहइ धम्मं भो भो ! जह एत्थ पुव्वसुकएण ।
 लब्भंती धम्मेणं अर्चितसत्तीओ पयवीओ ॥१२२॥
 ता तं पुणो वि संपइ करेह सुद्धं मणं विहेऊण ।
 सद्धम्मकम्ममणहं समत्थदुक्खाण निदलणं ॥१२३॥
 तं सोऊणं गया विण्णवइ गुरुं पराइ भतीए ।
 'भयवं ! जाव करेमी सुत्थं रज्जस्स ता तुब्भं ॥१२४॥
 पयमूले पव्वज्जं घेतुं सफलं करेमि मणुयत्तं ।
 वाउप्पाडियसिंवलितूलविलोलत्तणसुतरलं' ॥१२५॥
 'मा काहिसि पडिबंधं' गुरुणा भणिए गओ नियं गेहं ।
 सामंत-मंतिपमुहं आपुच्छिय परियणं सव्वं ॥१२६॥
 पुत्तं संतिमईए जिणसेहरनामयं वरकुमारं ।
 अहिसिंचइ रज्जम्मि नीसेसप्पयइपरियरिओ ॥१२७॥
 पणमित्तु तओ जंपइ 'पुत्त ! मए लालियाओ एयाओ ।
 साहम्मियपयईओ पालेयव्वाओ जत्तेणं ॥१२८॥
 पयईओ वि हु पभणइ 'एसो तुम्हाण सामिओ एण्ह ।
 जइ होइ गुणसमग्गो सेवेयव्वो पयत्तेण' ॥१२९॥
 एवं सिक्खविऊणं सिबियारूढो महाविभूईए ।
 संतिमईएसमेओ अणुगम्मंतो नरिंदेणं ॥१३०॥
 पत्तो सूरिसमीवं काऊण पयाहिणं च तिक्खुत्तो ।
 पभणइ भवभीओऽहं संपइ तुह सरणमल्लीणो ॥१३१॥
 ता तह करेसु संपइ भयवं ? न भवामि जह भवोहम्मि ।
 इय भणिओ भयवं पि हु दिक्खेइ तयं सहत्थेणं ॥१३२॥
 अज्जा वि हु संतिमई समप्पिया सिरिमईए गणिणीए ।
 सिक्खंति दो वि सिक्खं जायाइं अह सुगीयाइं ॥१३३॥

१. सं.वा.सु. तुह चलणं ॥

नाणाविहे तवे वि हु काऊणं पच्छिमम्मि कालम्मि ।
 अणसणविहिणा दोण्णि वि पत्ताइं देवलोगम्मि ॥१३४॥
 ततो चुयाइं कमसो माणुस्सं विग्गहं लहेऊण ।
 पव्वज्जं वरनाणं लद्धं मोक्खं लहिस्संति ॥१३५॥
 सो चंडपुत्तरया पमाददोसेण सत्तमि पतो ।
 तस्स य देवी वि तहा पत्ता घोरम्मि नरयम्मि ॥१३६॥
 एवं इमो पमाओ कीरंतो नारयं दुहं देइ ।
 जह चंडपुत्तरया देवी वि य तस्स सिरिचंडा ॥१३७॥
 इय दारुणभवदुक्खं नाऊणं ताण तो पमायं तु ।
 धम्मविसओ पमाओ परिहरियव्वो पयत्तेण ॥१३९॥
 चण्डपुत्राख्यानकं समाप्तम् ॥३९॥

किञ्च-

पमाएणं परायत्ता, तुरंगा कुंजराइणो ।
 कसंकुसाइघाएहिं, बाहिज्जंति सुदुक्खिया ॥१४९॥
 सुखावबोधः, परं कुञ्जरादय आदिशब्दाद्वृषभ-महिष-वेसरखरप्रभृतयो गृह्यन्ते,
 कसा-ऽङ्कुशादि, अत्राऽप्यादिशब्दाद्वर्धु(घ्नी)प्रतोद-लकुटादयोऽवबोद्धव्याः ॥१४९॥
 पमाएणं कुमाणुस्सा, रोगाऽऽयंकेहिं पीडिया ।
 कलुणा हीण दीणा य, मरंति अवसा तओ ॥१५०॥
 प्रमादात् कुमनुष्याः=महादारिद्र्याद्यभिभूतकुत्सितमानवाः, रोगातङ्कैः पीडिताः तत्र
 कालान्तरघातिनो रोगाः, सद्योघातिन आतङ्काः, करुणाः=करुणास्पदम्, हीनाः=सर्व-
 जनाधमाः, दीनाश्च दैन्यवन्तो म्रियन्ते, अवशाः=परवशाः, ततः=तदनन्तरमिति ॥१५०॥
 पमाएणं कुदेवा वि, पिसाया भूय किब्बिसा ।
 आभिओगत्तणं पत्ता, मणोसंतावताविया ॥१५१॥
 सुगमः, नवरं किल्बिषाः=किल्बिषिका अन्त्यजातय इवाऽस्पृश्या निन्द्यकर्म- कारिणश्च
 इह विग्रहादिरुचयो सङ्घादिबहिष्कृता मृत्वा ये देवेषूत्पन्नाः, उक्तं च-
 विग्गह-विवायरुइणो, कुल-गण-संघेण बाहिरकयस्स ।
 नत्थि किर देवलोगे, वि देवसमिईसु अवगासो ॥ (उ० मा० गा० ७०)

‘आभिओगतं (त्तणं)’ पारवश्यं प्राप्ताः, मनःसन्तापतापिताः=‘हा ! किमस्माभिः पापैः प्रमादवशवर्तिभिरिदं कृतं येनैवंविधाः सञ्जाताः’ इत्यादिचित्तखेदवन्त इति ॥१५१॥

पमाएणं महासूरी, संपुण्णसुयकेवली ।

दुरन्ता-ऽणंतकालं तु, णंतकाए वि संवसे ॥१५२॥

प्रमादात्=शैथिल्यात्, महासूरिः=प्रसिद्धाचार्यः, सम्पूर्णं श्रुतकेवली=चतुर्दश-पूर्ववित्, दुरन्ता-ऽनन्तकालं तु=दुःखेनाऽन्तो यस्याऽसदुरन्तः; न विद्यतेऽन्तो यस्याऽसाव-नन्तः, दुरन्तश्चाऽसावनन्तश्च दुरन्तानन्तः स चाऽसौ कालश्च । तम्, यावदनन्तकायेऽपि, आस्तामन्ययोनिषु, वसति=तिष्ठति । तथा ह्यसौ महासूरिः प्रमादाद्विस्मृतचतुर्दशपूर्वो मिथ्यात्वं प्राप्तोऽनन्तकायेषूपद्यत इत्यागमे श्रूयत इति ॥१५२॥

पमाएणं भमंताणं, एवं संसारसायरे ।

तिक्खाणं दुक्खदुक्खाणं, वोच्छेओ नत्थि पाणिणं ॥१५३॥

सुखावबोधः, परम् ‘एवं’ ति पूर्वोक्तप्रकारेण, तीक्षणानाम्=अतिनिशात-शस्त्राग्रवदसह्यानाम्, दुःखदुःखानां=दुःखादप्यतिदुःखानामिति ॥१५३॥

ता पमायं पमुत्तूण, कायव्वो होइ सव्वहा ।

उज्जमो चेव धम्ममि, सव्वसोक्खाण कारणं ॥१५४॥

सुगमश्चाऽयम्, नवरमुद्यमश्चैव इत्यत्र चैवशब्दस्याऽवधारणार्थत्वाद्धर्म एवोद्यमः कर्तव्य इति ॥१५४॥ अत आह

सव्वे संसारिणो सत्ता, कम्मणो वसवत्तिणो ।

कम्मणो य वसित्तं तु, जीवाणं दुक्खकारणं ॥१५५॥

सर्वे=समस्ताः, संसारिणः=भववर्तिनः, सत्त्वाः=प्राणिनः, कर्मणः ।=दैवस्य, वशवर्तिनः=परवशाः, ततः किं कर्मणस्तु वशवर्तित्वं जीवानां दुःखकारणम्=अशर्मकृदिति श्लोकार्थः ॥१५५॥

तस्मात् -

निम्मूलुम्मूलणत्थं च, तम्हा दुट्टुट्टकम्मणो ।

कायव्वो भद्द ! निच्चं पि, धम्मो सव्वण्णुभासिओ ॥१५६॥

निर्मूलोन्मूलनार्थं तस्माद्दुष्टाष्टकर्मणां कर्तव्यः=विधेयः, ‘भद्द !’ इति प्रमादवशवत्सा धर्मिकामन्त्रणम्, नित्यं=सदा, धर्मः=सर्वज्ञभाषित इति श्लोकार्थः ॥१५६॥

कस्माद्धर्म एव विधातव्यः इत्यत आह-

माणुस्सं उत्तमो धम्मो, गुरु नाणाइसंजुओ ।

सामग्गी दुल्लहा एसा, जाणाहि हियमप्पणो ॥१५७॥

माणुष्यं=मानुषत्वम्, उत्तमः=प्रधानम्, धर्मः=दुर्गतिप्रपतदङ्गिगणधारकः शेषधर्मा-
पेक्षया जिनधर्म इति, गुरुः=यथावस्थित शास्त्रार्थप्ररूपकः, सोऽपि ज्ञानादिसंयुतः=ज्ञान-
दर्शन-चारित्राद्यनेकगुणगणालङ्कृतः, सामग्री=समुदायः, दुर्लभा=दुःप्रापा, एषा=पूर्वोक्ता,
जानीहि=अवबुध्यस्व, हितं=श्रेयः, आत्मनः=स्वस्यैतदिति शेष इति श्लोकार्थः
॥१५७॥ ततश्च-

एवंविहाहिं वग्गूहिं दायव्वमणुसासणं ।

पच्चक्खं वा परोक्खं वा गुणवन्तं पसंसए ॥१५८॥

एवंविधाभिः=पूर्वोदिताभिरिति भावः, 'वग्गूहिं'ति वाग्भिः=वचनैः दातव्यं=
विधेयम्, अनुशासनम्=अनुशास्तिः, प्रत्यक्षं वा=समक्षम्, परोक्षं वा=तदसमक्षं वा,
वाशब्दादुभयथाऽपि, गुणवन्तं गुणयुक्तम् प्रशंसयेत्=श्लाघयेदिति श्लोकार्थः ॥१५८॥
किमेतदेव कृत्यमुताऽन्यदपि ? अत आह

अवत्थावडियं नाउं, सामत्थेणं समुद्धरे ।

परोप्परं सधम्माणं, वच्छल्लमिणमो परं ॥१५९॥

अवस्थापितं=दुःस्थतामापन्नम्, ज्ञात्वा, सामर्थ्येन=स्वशक्त्या, समुद्धरेत्=द्रव्यतो
भावतश्च, तत्र द्रव्यतो नीवीद्रव्याद्यर्पणतो निर्वाहकरणेन; भावतो धर्मस्थिरीकरणादिना,
परस्परम्=अन्योन्यं 'सधम्माणं' ति सार्धमिकाणाम्, वात्सल्यं=प्रतिपत्तिः इदम्=एतत्,
परं=प्रधानमिति श्लोकार्थः ॥१५९॥

सार्धमिककृत्यं प्रकरणोपसंहारं च वृत्तेनाह-

अण्णं पि साहम्मियकज्जमेयं जिणागमे पायडमेव जं तु ।

साहारणं पोसहसालमाई कुज्जा गिही सीलगुणावहं ति ॥१६०॥

१. 'ततश्च' इति ला. प्रतौ नास्ति ॥ २. सं.वा.सु. 'मक्षं वा, वाशब्दा' ॥ ३. ला. नीव्याद्यर्प' ॥ ४. ता.
'ज्जमेवं ॥ ५. ता. 'ति ॥१६०॥ सावयाणं ति छट्टं ॥

अन्यदपि=आस्तां तावत् पूर्वोक्तं तद्व्यतिरिक्तमपि, साध्मिक कृत्यं= समान-
धार्मिकप्रयोजनम्, 'एयं'ति एतद्वक्ष्यमाणम्, पाठान्तराद्वा 'एवं'ति अनेनैव पूर्वोक्तप्रकारेण,
जिनागमे=अर्हद्दर्शने, 'पायडमेव' ति प्रकटमेव=प्रसिद्धमेव दीर्घत्वमलाक्षणिकम् 'जं तु'
ति यकत् तु, साधारणं=सर्वसामान्यं द्रव्यमिति गम्यते, साधारणसमुद्भवनिरूपणमिति
भावः, पौषधशालादि=पौषधगृहप्रभृति पौषधशालायां पौषध-सामायिक-प्रतिक्रमणादि
विधीयते, यत उक्तम्-

“साहुसमीवे वा पोसहसालाए वा चेईहरे वा गिहेगदेसे व त्ति,” । यद्वा
साधारणं=सर्वसामान्यं पौषधशालाद्येव, आदिशब्दाद्विनय-वैयावृत्यादिग्रहः 'कुज्ज' ति
कुर्याद्=विदध्याज्जिनोक्तत्वादिति भावः । तथा च भगवत्यामुक्तम्-

“तए णं संखे समणोवासए पोसहसालं पमज्जइ पमज्जित्ता अणुपविसइ”
(शतक१२ सूत्र १२) इत्यादि ।

गृही=गृहस्थः, 'सीलगुणावहं' ति शीलं=सर्वविरतिरूपं तस्य गुणाः=
क्षान्त्यादयस्तानां वहति=विदधाति यस्मात्तदिति शेषः, इति=प्रकरणसमाप्ताविति वृत्तार्थः
॥१६०॥

श्रीदेवचन्द्राचार्यविरचितेमूलशुद्धिविवरणे षष्ठस्थानकविवरणं समाप्तम् ।

[श्राविकाकृत्याख्यं सप्तमस्थानकम्]

व्याख्यातं षष्ठं स्थानकम्, साम्प्रतं क्रमायातं सप्तमस्थानकमारभ्यते । अस्य च
पूर्वेण सहाऽयमभिसम्बन्धः । पूर्वत्र श्रावकोचितकृत्यं कर्तव्यतयोक्तम्, तदनन्तरं
श्राविकाकृत्यस्थानकम् । तस्य चेदमादिसूत्रवृत्तम्-

जं सावयाणं करणिज्जमुत्तं, तं सावियाणं पि मुणेह सव्वं ।

तित्थाहिवाणं (तित्थंकरणं?) वयणे ठियाणं, ताणं विभागेण विसेसकिच्चं ॥१६१॥

यत् श्राविकाणां=श्रमणोपासकानाम्, 'करणिज्जं' ति करणीयं कृत्यम् = 'उत्तं' ति
उक्तं=प्रतिपादितम् तत् श्राविकाणांमपि=श्रमणोपासकानामपि 'मुणेह'ति मुणत=वेत्थ,
सर्वं=समस्तम्, तीर्थकरणाम्=वचने=शासने, स्थितानां=तिष्ठन्तीनाम् 'ताणं' ति तासाम्,
विभागेन=पृथग्भागेन, विशेषकृत्यं पृथक्करणियमेतदिति शेषः । इति वृत्तार्थः ॥१६१॥ तदेव कृत्यं
श्लोकेनाऽऽह-

१. सं.वा.सु. 'समीवं ॥ २. ला. श्रावकमधिकृत्य कर्त' ॥ ३. सं.वा.सु. 'थग्विभा' ॥ ४. इयमुत्थानिका
ला. प्रतौ नास्ति ॥

साहम्मिणीण वच्छलं सावियाणं जहोचियं ।

कायव्वं सावयाणं व वीयरगेहिं वण्णियं ॥१६२॥

‘साहम्मिणीणं’ ति समानधर्मवतीनाम्, ‘वच्छलं’ ति वात्सल्यं = वत्सलता तत्कृत्यमिति भावः, श्राविकाणां = श्रमणोपासिकानाम्, ‘साहम्मिणीणं’ ति एतदस्यैव विशेषणम् यथोचितं = यथायोग्यम् कर्तव्यं’ करणीयम् श्रावकाणामिव वीतरागैतराग-द्वेषैस्तेषा-मलीकभाषणासम्भवात्, उक्तं च-

रगाद्वा द्वेषाद्वा, मोहाद्वा वाक्यमुच्यते ह्यनृतम् ।

यस्य तु नैते दोषास्तस्याऽनृतकारणं किं स्यात् ? ॥३५३॥

वर्णितं = प्रतिपादितमिति श्लोकार्थः ॥१६२॥

अत्राऽन्तरे कश्चित् परः प्राह-

लोए लोउत्तरे चेव, तहाऽणुभवसिद्धिओ ।

सूरी भासंति भावण्णू नारी दोसाण मंदिरं ॥१६३॥

लोके = सामान्यजने, लोकोत्तरे चैव = जिनदर्शने; चैवशब्दो लोकापेक्षया समुच्चयार्थः । तथाऽनुभवसिद्धितः = अनुभवसिद्धेश्च, ‘सूरयः’ पण्डिताः, भाषन्ते = प्रतिपादयन्ति, भावज्ञाः = तत्स्वभाववेदिनः, ‘नारी’ स्त्री, दोषाणां = विरूपस्वभावानाम्, मन्दिरं = गृहमिति श्लोकार्थः ॥१६३॥

यथाऽसौ दोषमन्दिरं तथा श्लोकत्रयेणाऽऽह-

नारीनाम मणुस्साणं, अभूमा विसकंदली ।

नारी वज्जासणी पावा, असज्जाऽणब्भसंभवा ॥१६४॥

नारी = स्त्री, ‘नाम’ इति सम्भावनायाम्, ‘मणुस्साणं’ ति मनुष्याणाम्, अभूमा = भूमिरहिता, विषकन्दली = अभिनवोत्पद्यमानविषलता विषकन्दली हि भूमौ समुत्पद्यते इयं त्वभूमिजा विषकन्दली धारण-मारणात्मकत्वादिति भावः । तथा च-

जह उवभुत्ता विसकंदली उ घारेइ तह य मारेइ ।

तह उवभुत्ता नारी, घारइ मारेइ पुरिसगणं ॥३५४॥

तथा वज्जाशनिः = विद्युत्, पापा = पापस्वभावा, असाध्या = अनिवारणीया, अनभ्र-

१. ता. ‘रगेहिं दंसियं ॥ २. ला. भावज्ञाः = वक्ष्यमाणभाववे’ ॥ ३. ला. भूमावुत्प’ ॥ ४. सं.वा.सु.
‘त्वात् । त’ ॥

सम्भवा=अभ्रव्यतिरिक्तसम्भूतिः वज्रासनी हि (शनिहि?)अभ्रादुत्पद्यते कथञ्चित्साध्या च भवति इयं त्वनभ्राऽसाध्या च मारणात्मकत्वादिति भावः ॥१६४॥

नारी अनामिया वाही दारुणा देइ वेयणा ।

नारी अहेउओ मच्चू सिग्घं पाणे विणासइ ॥१६५॥

अनामकः=नामरहितः, व्याधिः=रोगसम्भूतिः, तथा हि यो व्याधिर्भवति स कास-शोषादिनामवान् भवति, इयं त्वनामको व्याधिः, ततश्च दारुणाः=अत्यन्तरौद्राः, ददाति=प्रयच्छति, वेदनाः=पीडाः, तथा अहेतुकः=कारणरहितो मृत्युस्तथा हि यो मृत्युर्भवति सोऽध्यवसानादिकारणेभ्यो जायत इयं तु निष्कारणो मृत्युः, शीघ्रं=द्रुतम्, प्राणान् विनाशयति=घातयति ॥१६५॥

नारी अकंदरा वग्घी कूरसंघारकारिया ।

पच्चवखा रक्खसी चैव, पसिद्धा जिणसासणे ॥१६६॥

अकन्दरा=कन्दररहिता, व्याघ्री=शार्दूली, सा हि गिरिकन्दरे भवति, इयं त्वकन्दरा व्याघ्री, ततश्च कूरा=कूरस्वभावा, 'संहारकारिका' प्राणशरीरसंहरणशीला, तथा प्रत्यक्षा=प्रकटा, राक्षसी चैव रक्षोभार्या सा ह्यप्रकटा भवति, इयं तु प्रकटा राक्षसी विनाशकत्वात्, प्रसिद्धा जिनशासने=अर्हद्दर्शने इति श्लोकत्रयार्थः ॥१६४-१६६॥

साम्प्रतं 'नारीदोषान् दृष्टान्तैः प्रतिपादयितुकामः श्लोकचतुष्टयमाह-

बद्धुत्तर नियडीणं कूडाणं कवडाण य ।

निरायं पूरिया नारी जहा नेउरपंडिया ॥१६७॥

बद्धोत्तरं=वक्रोत्तरं यथा-

श्वासः किं त्वरितागता, पुलकिता कस्मात् ? प्रसाद्यागता स्रस्ता वेण्यपि पादयोर्निपतनात् क्षामा किमत्युक्तिभिः ।

स्वेदार्रः मुखमातपेन गलिता नीवी गमादागमाद् ।

ति म्लानसरोरुहद्युतिधरस्यौष्ठस्य किं वक्षसि ॥३५५॥

निकृतयः=मायाः, कूटानि=परवञ्चनाद्यर्थः तथाविधप्रयोगविरचनानि, कपटं=स्वकृतदोषोत्तारणार्थमालजालप्रतिपादना, 'निरायं' ति नितरामत्यर्थम्, पूरिता=भृता, नारी=ललना, यथा नूपुरपण्डिता नूपुरोपलक्षितविदग्धेति श्लोकाक्षरार्थः ॥१६७॥

भावार्थस्तु कथानकगम्यस्तच्चेदम् -

[४० नूपुरपण्डिताकथानकम्]

अत्थिभरहद्धवासे जंबुद्वीवम्मि सयलगुणकलियं ।
नामेण वसंतपुरं नयरं तेलोक्कविक्खायं ॥१॥
तत्थाऽरिमयाहिवसप्पमाणगुरुदप्पदलणवणसरहो ।
पसरंतकित्तिसरिपूरगिरिवरो रायजियसत्तू ॥२॥
तस्स पडिवक्खतारातेओहावणपसिद्धमाहप्पा ।
ससिचंदिम व्व पयडा अत्थि पिया धारिणी नाम ॥३॥
तत्थ य नयरे सेट्ठी नामेणं अत्थि देवदत्तो त्ति ।
तस्स य धूया पवरा विसिट्ठलावण्णरूवधरा ॥४॥
जीए य रूवजोव्वणसोहग्गोहामियाओ पुहईए ।
मण्णे सुरंगणाओ पच्चक्खं नेय वियरंति ॥५॥
सेट्ठी कुमारनंदी तीए नयरीए वसइ अण्णो वि ।
तस्सऽत्थि वरो पुत्तो, नामेणं पंचनंदि त्ति ॥६॥
सा तेणं परिणीया महाविभूईए लोगपच्चक्खं ।
तीए य समं भुंजइ भोए अच्चंतमणुरत्तो ॥७॥
अह अण्णया कयाई, ण्हाणत्थं सा नइ गया बाला ।
तं मज्जंतं ददुं अह एगो चितइ जुवाणो ॥८॥
कामकरिकुं भविब्भमचक्कलउत्तुंगथोरथणवट्टे ।
जो रमइ इमीए नरो सो च्चिय इह जियइ जियलोगे ॥९॥
कोमलमुणालविल्लहलसरलबाहार्हि देइ जस्सेसा ।
कंठम्मि पासयं सो एक्कोच्चिय धण्णओ एत्थ ॥१०॥
जो परिणयबिंबाफलसमाणअहरामयं पियइ पुरिसो ।
एईए सइच्छाए सहलं मणुयत्तणं तस्स ॥११॥
किं बहुणा ? सव्वंगं अवगूढो जो इमीए सुरयरसं ।
भुंजइ तेणित्थ जए पत्तं तेलोक्कसव्वस्सं ॥१२॥

इय निम्भरणुगो तीए भावोवलक्खणनिमित्तं ।
 सुवियङ्कुर्याइ कलिओ एयं गाहुल्लियं पढइ ॥१३॥
 'सुण्हायं ते पुच्छइ एस नई मत्तवारणकरोरु ? ।
 एए य नईरुक्खा अहं च पाएसु ते पडिओ' ॥१४॥
 एयं सोऊणं सा चलंतसकडक्खदिट्ठिबाणेहिं ।
 सव्वंगं विंधेउं वियङ्कुर्याए इमं भणइ ॥१५॥
 सुभगा हुंतु नईओ चिरं च जीवंतु जे नईरुक्खा ।
 सुण्हाय पुच्छगाणं घत्तीहामो पियं काउं ॥१६॥
 नाऊण तीए भावं घरमाइवियाणणत्थमेईए ।
 सहआगरयडिभाणं देइ फलाइं तडितरूण ॥१७॥
 दाऊण फले पुच्छइ, ताइं तओ कस्स एस णणु धूया ?
 कस्स व सुण्हा भज्जा ?, गेहं वा कत्थ एईए ॥१८॥
 अइमुद्धडत्तणाओ, सव्वं एयस्स तेहिं परिकहियं ।
 जह देवदत्त धूया, सुण्हा उ कुमारणादिस्स ॥१९॥
 भज्जा उ पंचनंदिस्स एस गेहं तु ताण अमुगत्थ ।
 इय सव्वं नाऊणं, गंतुं सो निययगेहम्मि ॥२०॥
 तीए समागमहेउं पव्वाइयमेगमुवयरेऊणं ।
 तीए सयासं पेसइ सा वि गया तत्थ गेहम्मि ॥२१॥
 दिट्ठु य तीए इंती पव्वाई भिसिय-कुंडियविहत्था ।
 तो सा तीए पणामं काऊणं आसणं देइ ॥२२॥
 पुच्छइ सुहासणत्थं 'किं भगवई ? किंचि दिट्ठमच्छरियं ।
 सा भणइ 'दिट्ठमामं अच्छरियं एत्थ नयरम्मि' ॥२३॥
 'किं तं ?' ति जंपइ इमा पव्वाई बोल्लए 'इहं चेव ।
 नयरम्मि सिट्ठिपुत्तो सुदंसणो नाम सुपसिद्धो ॥२४॥
 जो य कुलीणो मइमं मज्झत्थो देस-काल-भावन्तू ।
 गंभीरो मेहावी पडुओ दक्खो महासत्तो ॥२५॥

१. ला. 'याए ॥ २. सं.वा.सु. तु ॥ ३. ला. तस्स ॥

चाई रसिओ रूवी बहु मित्तो ईसरो कलाकुसलो ।
 सुभगो विऊ विणीओ, धम्मपरो पत्थणिज्जो य ॥२६॥
 पुव्वाभासी पडिवन्नवच्छलो सच्चवाइ नयजुत्तो ।
 उज्जलवेसो जसमं सरणागयवच्छलो अहियं ॥२७॥
 पावेहि तयं मुद्धे अणुरूवं रूवजोव्वणगुणडुं ।
 अइअणुरत्तं भत्तं, भत्तारमणणसारिच्छं' ॥२८॥
 'तप्पेसियय'त्ति नाउं सुवियड्ढा सा वि 'मा हु छक्कणं ।
 होउ रहस्समिमं पि वि पव्वाइं वंचयामि त्ति ॥२९॥
 चित्तेऊणं एयं थालीतलकरणवावडाइ तओ ।
 पंचंगुलीहिं पहया पव्वाइ पुट्टिदेसम्मि ॥३०॥
 पभणइ य इमं 'पावे ? वइप्पी होऊण जीवसेकीस ।
 कुलवहुसीलंभंसणवयणाइं पयंपमाणी उ ?' ॥३१॥
 तो सविलक्खा एसा पुट्टिपहारं इमस्स दायंती ।
 जंपइ 'पुत्त ! न जोग्गा तुह सा सीलम्मि पडिबद्धा' ॥३२॥
 चित्तेति इमो वि अहो ! वियड्ढया तीएऽणणसारिच्छ ।
 जं एसा विवराई पव्वाइ वंचिया मुद्धा ॥३३॥
 दिण्णो मह संकेओ कसिणाए पंचमीए रयणीए ।
 पच्छिमपहरदुगम्मि ठाणं तु न सूइयं एत्थ ॥३४॥
 ता पेसेमि पुणो वि हु संकेयट्ठाणजाणणनिमित्तं ।
 एयं' ति चित्तिऊणं पव्वाइं भणइ पुण एसो ॥३५॥
 'जइ वि हु सा सीलवई तह वि हु गंतूण भणसु तह अम्मो ? ।
 एक्कं वारं जेणं मह चित्तं मुयइ अणुबंधं' ॥३६॥
 तं पुणरवि पव्वाइ गंतूणं भणइ महरवयणेहिं ।
 चित्तइ वहू वि एसा 'किमत्थ इह आगया पुण वि ? ॥३७॥
 हुं नायं संकेय ट्ठाणं न य दंसियं मए तस्स ।
 तेणेसा पट्टविया' अहिययरं रूसिया बाला ॥३८॥

'आ निल्लज्जे ! धिट्ठे ! तह वि हु निब्भच्छिया पुणो आया ।
 फेडिमि तुज्झ आसं' इय वोत्तुं उट्ठिया एसा ॥३९॥
 घेतुं कंठम्मि तयं पव्वाइमसोगवणियदारेणं ।
 निद्धाडइ सा वि तयं सव्वं साहेई इयरस्स ॥४०॥
 सो विण्णायसरूवो, जंपइ 'अम्मो ! न तीए मह कज्जं ।
 जा एवमणणुरागां तृज्झ वि वयणं न मण्णेइ' ॥४१॥
 अह संकेयदिणम्मि पत्ते सो जाइ मज्झराईए ।
 सा वि नियं भत्तारं रंजेउं सुरयसोक्खेणं ॥४२॥
 सुत्तम्मि तम्मि पच्छ गच्छइ जारस्स अंतियं एसा ।
 तेण वि सह सुरयसुहं भुंजइ विविहप्पयारेहिं ॥४३॥
 अइसुरयचड्डुणानिस्सहाइं खिन्नाइं दो वि सुत्ताइं ।
 जा ताव तीए ससुरो समागओ देहर्चिताए ॥४४॥
 पेच्छइ विडेण समयं पासुत्तं नियवहुं तओ एसो ।
 चिंतइ न एस पुत्तो मज्झं अन्नो विडो को वि ॥४५॥
 अइनिच्छयकरणत्थं पलोयए जाव वासभवणम्मि ।
 ता पेच्छइ पल्लंके एक्कल्लं निय सुयं सुत्तं ॥४६॥
 तं दट्टुणं कुविओ पच्चयहेउं तु तीए पायाओ ।
 उत्तारित्ता सणियं घेतूणं नेउरं जाइ ॥४७॥
 सा वि तयं घेप्पंतं ससुरेणं जाणिरुण भयभीया ।
 उट्ठवइ तयं जारं साहइ सव्वं पि से कज्जं ॥४८॥
 पभणइ य 'जाहि सिग्घं पत्थावं जाणिरुण साहिज्जं ।
 नियपोढिमाइ सरिसं कायव्वं जं जहाजोगं' ॥४९॥
 विगयम्मि तम्मि सा वि हु सणियं सणियं पइस्स पासम्मि ।
 पल्लंकम्मि निसीयइ खणेण उट्ठाविउं कंतं ॥५०॥
 जंपइ य एत्थ घम्मो असोगवणियाए जामु ता नाह ! ।
 अवियाणियपरमत्थो सो वि गओ तत्थ तीए समं ॥५१॥

जा सुतो ताव तयं उट्टावित्ता पयंपई एसा ।
 'किं तुम्ह कुले एसो आयारोऽण्णसारिच्छे ? ॥५२॥
 जं नियपइणा वि समं सुत्ताए वहूए नेउरं ससुरे ।
 पायाओ उत्तारिय घेतूणं जाइ' सो आह ॥५३॥
 'सुयसु पिए ? निच्चिता कत्थ तयं वच्चिही पभायम्मि ।
 अप्पिस्सइ' सा जंपइ 'नणु मग्गसु संपयं चैव' ॥५४॥
 सो भणइ 'पिए ! ताओ न चैव दूरं गमिस्सइ कर्हि पि ।
 सा भणइ 'अत्थि एवं परं कलंकं मह विलगं' ॥५५॥
 सो भणइ 'मए साहीणयम्मि को तुज्झ कुणइ वयणिज्जं ? ।
 ता सुयसु जओ निद्दा आगच्छइ अम्ह अइअहियं' ॥५६॥
 सा जंपइ 'जइ एवं ता सुयसु परं पभायकालम्मि ।
 एयस्स पुण विवागं पेच्छिहिसि न एत्थ संदेहो' ॥५७॥
 एवं जंपंताइं पासुत्ताइं खणंतरं जाव ।
 ताव पभाया स्यणी परिविगलइ तारयानियरो ॥५८॥
 वासंति तंबचूडा मूयं लिज्जंति घूयसंघाया ।
 करकरकरंति काया चुहु चुहु वासंति घरचिडया ॥५९॥
 पाहाउयतूराइं वज्जंति पयट्टए पहियलोगो ।
 एत्थंतरम्मि जाया पुव्वदिसा रायरत्त व्व ॥६०॥
 अहवा पइसंजोगे रत्त च्चिय इत्थिया हवइ बाढं ।
 खणमित्तेण य विहसइ पहुच्छिता पोढमहिल व्व ॥६१॥
 ततो कमेण उइओ दिणनाहो वियसमाणकरपसरो ।
 पयडी कारुण व तीए दुट्ठचिट्ठाओ लोयाण ॥६२॥
 तो उट्टिऊण वच्चंति दो वि गेहम्मि जाव ता तेण ।
 सिट्ठं सव्वं पि तयं एगंते ठविय नियपुत्तं ॥६३॥
 सो भणइ 'ताय ! अहयं पि किं तए नणु परो त्ति परिकलिओ ?' ।
 जणओ वि भणइ 'पुत्तय ! आसि तुमं निययसेज्जाए ॥६४॥

एसा पुण अण्णेणं केण वि सह आसि पुत्त ! पत्तियसु ।
 सुहनिद्दाए पसुत्तो तइय च्चिय बोहिओ न तुमं ॥६५॥
 सो भणइ 'ताय ! वुड्ढत्तणेण ते लोयणा विसंवइय्य ।
 निद्दावसेणे य पुणो रयणीए न सुट्ठु पेच्छंति' ॥६६॥
 थेरो भणइ 'न एवं मह पत्तिय होइ नऽन्नहा एवं' ।
 तो तडियभिउडिभासुरवयणो पुत्तो पयंपेइ ॥६७॥
 'आ पावय ! किं चलिओ सि तंसि मह तीए तक्खणं चेव ।
 सिट्ठु' मिय विवयमाणाण ताण तो जंपए वहुया ॥६८॥
 'जइ एवं तो सुद्धा अहयं काहामि भोयणं अज्ज' ।
 तं सोऊणं सयणो सव्वो वि हु तक्खणं मिलिओ ॥६९॥
 जंपइ य तओ लोगो 'सुद्धी एयाए का हु दायव्वा' ।
 केणाऽवि तओ भणियं 'किमित्थ बहुयाहिं सुद्धीहिं ॥७०॥
 सन्निहियपाडिहेरे जक्खे अप्पाणयं विसोहेउ ।
 'एवमिणं' सा जंपइ तो सामग्गी कया सव्वा ॥७१॥
 ण्हाया कयबलिकम्मा सियकुसुमविलेवणा सियदुगुल्ल ।
 सयणेहिं संपरिवुडा संचलिया जक्खभवणम्मि ॥७२॥
 सो वि हु तीए जारो सव्वं एयं तु लोगवयणाओ ।
 जाणित्ता कयकारिमगहवेसधरो समायाओ ॥७३॥
 धूलीधूसरियतणू जरडंडीखंडनिवसणधरो उ ।
 बहुडिभविहियकोलाहलेण पूरंतदिसियक्को ॥७४॥
 नच्चंतो गायंतो रोयंतो तह य पोक्करंतो य ।
 आर्लिगंतो बहुविहनारिगणं जाइ तयहुत्तं ॥७५॥
 सव्वंगं आर्लिगइ तत्तो लोणेण पेळ्ळिओ दूरं ।
 'आ पाव ? किं तइ इमं छित्ता जक्खालयं जंती ?' ॥७६॥
 तो पुणरवि पक्खालियदेहा जक्खालयं गया झत्ति ।
 पूएइ तयं जक्खं विहीए लोए हिं परियरिया ॥७७॥

विण्णवइ 'जक्ख ! भयवं ! सच्चोऽसि तुमं ति जं किर असुद्धं ।

जंघातलेण जंतं चंपेऊणं दढं धरसि ॥७८॥

ता निसुणसु विण्णत्तिं गुरुदेवविण्णयं नियं कंतं ।

एयं च सव्वपयडं गहिल्लयं मोतु जइ अन्नो ॥७९॥

लग्गो मह अंगम्मि सच्चेण इमेण साविओ तं सि ।

ता धरसु ममं अन्नह न वत्ति' इय जंपिडं सिग्घं ॥८०॥

अव्वो किमित्थ जुत्तं ? ईहापूहाइवट्टमाणस्स ।

जक्खस्स विणिकखंता जंघाजुयलस्स मज्झेणं ॥८१॥

चित्तइ जक्खो वि इमं 'कह छलिओऽहं इमीए धुत्तीए ?' ।

एत्थंतरम्मि तीए उच्छलिओ साहुवाओ त्ति ॥८२॥

'अहह ! महासइ एसा कज्जेण विणा खलीकया एवं ।

परिनिदिओ य ससुरो 'धिसि धिसि नाणस्स तुह पाव ?' ॥८३॥

अह गहिरतूरसंदेहिं निययभवणं समागया एसा ।

विहियं वद्धावणयं तीए जणएहिं पइणा य ॥८४॥

ससुरस्स वि य अवक्खा जाया कह सो वि वंचिओ जक्खो ।

एईइ अवक्खाए निद्दा दूरेण ओसरिया ॥८५॥

तं च सुयं नरवइणा जह निद्दा नत्थि कुमरनंदिस्स ।

ता अंतेउरक्खो सुंदरओ होइ नणु एसो ॥८६॥

तो हक्कारिय ठविओ नरनाहेणं महल्लयपयम्मि ।

जा देवीओ रक्खइ ता पेच्छइ ताण मज्झम्मि ॥८७॥

उट्ठितनिसीयंतं चलवल्लुव्वेल्लयं करेमाणं ।

एक्कं देविं तत्तो पासुत्तयविडुयं कुणइ ॥८८॥

तं सुत्तं नाऊणं जालगवक्खम्मि सा समारूढा ।

तस्स तले नरवइणो आगलियं हत्थिवररयणं ॥८९॥

तो मिठचोइएणं करिणा उत्तारिया करग्गेण ।

किं अइवेला विहिया मिठेणं संकलाइ हया ॥९०॥

जंपइ य 'नाह ! मा ताडसु' त्ति जो अज्ज राइणा दिण्णो ।
अंतेउरआरक्खो एत्तियवेलाए सो सुत्तो ॥९१॥
तो तेण केसगहणाइपुव्वयं निब्भरं रमेऊण ।
पुण तेणेव कमेणं चडाविया मत्तवारणयं ॥९२॥
चित्तिइ सेट्ठी वि तओ 'रक्खिज्जंताओ एवमेयाओ ।
जइ एवंचिट्ठाओ ता अम्हे पुण्णभाइ त्ति ॥९३॥
जाणऽज्ज वि महिलाओ नीराइगयाउ इंति नियगेहं ।
इय चित्तिउं पसुत्तो निब्भरनिद्दाइ सो सेट्ठी ॥९४॥
जावुगए वि सूरे न उट्टए ताव पुव्वपाहरिया ।
साहंति य नरवइणो जह 'अम्हे उग्गए सूरे ॥९५॥
उट्टंता एसो पुण न उट्टए उग्गए वि सूरम्मि' ।
रणा भणियं 'मा उट्टवेह जावुट्टए न सयं' ॥९६॥
अह सत्तमम्मि दिवसे विगए सो उट्टिओ तओ रणा ।
दुद्धं घयगुलमीसं तु पाइओ विज्जवयणेण ॥९७॥
तो जाव सत्थओ सो संजाओ ताव पुच्छिओ रणा ।
'किं अइबहुयं सुत्तो ?' तेणाऽवि हु जंपियं 'देव ? ॥९८॥
अत्थि इह कारणं किंतु देव ! साहेमि कुणह एगंतं' ।
अवलोइयमित्तेणं सव्वा ओसरइ सा परिसा ॥९९॥
तो साहिउं पवत्तो 'देव ! न याणामि का वि सा देवी ।
साहिन्नाणं पुण से पिट्ठीए संकलाघाओ ॥१००॥
एएण कारणेणं विगयावक्खस्स देव ? मह जाओ ।
बहुदिवससेवणिज्जो सहसा निद्दाभरो अहियं ॥१०१॥
सम्माणिऊण सेट्ठी राएण विसज्जिओ गओ गेहं ।
तीए वियाणणत्थं, भिडमयं कुणइ करिनाहं ॥१०२॥
अंतेउरस्स मज्जे जंपइ 'देवीओ करिवरं एयं ।
गयवसणाओ लंघह मम विग्घविघायणट्ठाए' ॥१०३॥

लंघंति निव्वियप्यं ताओ सव्वाओ रायपच्चक्खं ।
गयवसणाओ नवरं जंपइ सा दुट्टपत्ती से ॥१०४॥
'बीहेमि अहं एयस्स देव !' तो रइणा अणक्खेहिं ।
उप्पलनालेण हया निवडइ मुच्छए धरणियले ॥१०५॥
तो पुट्ठिं जा जोयइ ताव य सो नियइ संकलपहारे ।
ते दट्टुणं कुविओ राया गाहुल्लियं पढइ ॥१०६॥
मत्तगयमारुहंतिए भिंडमयस्स हत्थिस्स बीहयंतिए ।
तत्थ न मुच्छिय संकलाहया, एत्थ य मुच्छिय उप्पलाहया' ॥१०७॥
तो कोवफुरियअहरेण नरवरिंदेण ताणि वज्झाणि ।
तिण्णि वि आणत्ताइं मिढे देवी गइंदो य ॥१०८॥
'गयखंधे आरोविय पाडेह इमाणि छिण्णटंकाओ' ।
आरूढाइं तिण्णि वि छिण्णटं कम्मि तो लोगो ॥१०९॥
भणइ किं देव ! एसो तिरिओ हत्थी वियाणई जेण ।
मारिज्जइ राया वि हु न मुयइ कोवं तदुवरिम्मि ॥११०॥
चोइज्जंतो हत्थी एगं पायं ठवेइ आगासे ।
पुण चोइयो य बीयं पुणरुत्तं चोइयो तइयं ॥१११॥
जा तिहिं पाएहिं करी आगासे ठइताव लोगो वि ।
हाहाकारं काउं जंपइ एयारिसं वयणं ॥११२॥
'अहह ! अह निव्विवेओ एस नरिंदो न एत्थ संदेहो ।
जो एरिसकरियणं विणा वि कज्जं विणासेइ' ॥११३॥
तं सोउं नरनाहो वियलियकोवो पयंपइ मिठं ।
'किं तरसि नियत्तेउं करिं ?' तओ सो वि पडिभणइ ॥११४॥
जइ देवीए समाणं मह अभयं देसि तो नियत्तेमि' ।
रण्णा वि य पडिवण्णे नियत्तिओ तेण करिनाहो ॥११५॥
भणियाणि ताणि दोण्णि वि मह विसयं चइय जाह अन्नत्थ ।
ताणि वि हिंडंताइं पत्ताइं कमेण एगत्य ॥११६॥

नयरम्मि तत्थबाहिरदेवउले सुत्तयाइं रयणीए ।
 अण्णो वि तत्थ पविसइ नागरयपरद्धओ चोरो ॥११७॥
 नागरएहिं य भणियं 'रे रे वेढेह देउलं एयं ।
 मा पविसंताणेसो घायं अदि(हि)ट्टओ काहिइ ॥११८॥
 गिण्हस्सामि(?मो) पभाए' वेढित्ता देउलं ठिया एए ।
 भममाणो य भएणं लग्गो सो तीइ अंगम्मि ॥११९॥
 तस्स य अउव्वफासं वेएउं मुच्छिया भणइ एसा ।
 'को सि ? तुमं भो ! साहसु सो जंपइ 'तक्करो अहयं ॥१२०॥
 लोएहिं परब्भंतो एत्थ पविट्ठो मि' भणइ तो एसा ।
 'आहरणरयणपुण्णं पडिवज्जसि जइ ममं भद्द ? ॥१२१॥
 तो रक्खेमि निरुत्तं तुमं इमं अप्पिऊण लोगाण ।
 नियनाहं' तेणाऽवि हु सुजुत्तिजुत्तं ति पडिवण्णं ॥१२२॥
 रइसोक्खं कित्ति जीवियं च वित्तं च देइ जा तुट्ठा ।
 तं सयमागच्छंती को मुंचइ कामधेणु व्व ॥१२३॥
 जाए य तो पभाए तिण्णि वि गहियाइं तेहिं पुरिसेहिं ।
 जंपइ य तओ मिठो 'नाऽहं चोरो अहो भद्दा !' ॥१२४॥
 जंपइ य सयललोगो 'दोण्णि इहं देसियाइं एगो य ।
 चोरो परं न नग्गइ को चोरो पंथिओ को वा ?' ॥१२५॥
 पुट्ठा य तओ महिला भद्दे ? को तुह इमाण भत्तारो ?' ।
 गहिउं करम्मि चां सा जंपइ 'एस मे भत्ता ॥१२६॥
 दिण्णो देव-गुरूहिं एसो पुण तक्करो' तओ तेहिं ।
 सुद्धसहावो वि इमो गहिओ मिठो विचित्तेइ ॥१२७॥
 "विहिणो वसेण कम्मं जयम्मि तं किंपि पाणिणो पडइ ।
 जं न कहिउं न सहिउं न चेव पत्थाइउं तरइ ॥१२८॥
 सव्वाणं पि अणत्थाण मूलमेसा जगम्मि नणु महिला ।
 तव्वसवत्ती जीवो पावइ दुक्खाइं घोराइं ॥१२९॥ उक्तं च-

दुःस्वभावा यतश्चैता निसर्गादेव योषितः ।
 ततो नाऽऽसां वशं गच्छेद्विद्वितार्थी प्रेत्य चेह च ॥३५६॥ ॥१३०॥
 गणयन्ति न रूपाढ्यं नाऽर्थाढ्यं न प्रभुं कुलीनं वा ।
 मन्मथपीडितगात्राः स्वच्छन्दाः सम्प्रवर्तन्ते ॥३५७॥ ॥१३१॥
 भ्रातृसमं पुत्रसमं पितृसमं यान्ति नेह लज्जन्ते ।
 मन्मथदर्पाविष्टा गाव इवाऽत्यन्तमूढत्वात् ॥३५८॥ ॥१३२॥
 त्यजन्ति भर्तृनुपकारकर्तृन् विरक्तचित्ता अपि घातयन्ति ।
 खलेऽपि रज्यन्त इह स्वतन्त्रा भुजङ्गपत्न्यः प्रमदाश्च तुल्याः ॥३५९॥ ॥१३३॥
 रागमेकपदमेव हि गत्वा, यान्ति शीघ्रमविचार्य विरागम् ।
 चञ्चलत्वमिदमात्मवधार्थं, योषितां च तडितां च समानम् ॥३६०॥ ॥१३४॥
 आधारे मानसानां कपटशतगृहं पत्तनं साहसानां,
 तृष्णानेर्जन्मभूमिर्मदनजलनिधिः कोपकान्तरपारः ।
 मर्यादाभेदहेतुः कुलमलिनकरी नित्यदुर्ग्राह्यचित्ता,
 स्त्री नामाऽतीवदुर्गं बहुभयगहनं वैरिणा केन सृष्टम् ? ॥३६१॥ ॥१३५॥
 वचनेन हरन्ति वल्गुना, निशितेन प्रहरन्ति चेतसा ।
 मधु तिष्ठति वाचि योषितां, हृदये हालाहलं सदा विषम् ॥३६२॥ ॥१३६॥
 अत एव मुखं निपीयते, वनितानां हृदयं तु ताड्यते ।
 पुरुषैः सुखलेशवञ्चितैः, मधुगृद्धैः कमले यथाऽलिभिः ॥३६३॥ ॥१३७॥
 इयं चिंततो मित्रे सूलाएँ रेविओ तओ नेउं ।
 अच्छइ जा खणमेकं जिणदासो नाम ता सङ्गे ॥३६४॥
 तेणऽं तेणं वोल्इ दट्टुणं तं पयंपई मित्रे ।
 'भइ ! विसिट्ठो दीससि ता कुणसु ममोवरि दयं ति ॥३६५॥
 पाएहि जलं सामिय ! तिसाभिभूओ जओ अहं अहियं' ।
 तं सोउं जिणदासो पभणइ 'जइ भइ ! सुमरेसि ॥३६६॥
 एयं जिणनवकारं दुहगिरिवरदारणेक्कवरकुलिसं' ।
 सो पाणियलोभेणं पढइ तयं सिट्ठिवयणाओ ॥३६७॥

सेट्टी वि सीयलजलं घेतूणं एइ जाव ता मिठो ।
 दट्टूण जलं इंतं मणम्मि उक्करिसिओ बाढं ॥१४२॥
 काऊण गरुयथामं उग्घोसइ जाव पंचनवकारं ।
 भिन्ना झडत्ति सूला मरिऊण य वंतरो जाओ ॥१४३॥
 दट्टूण निययरिद्धि ओहिन्नाणेण जा पलोएइ ।
 ता पेच्छइ नियदेहं सूलाए उवरि संभिन्नं ॥१४४॥
 पंचनमोक्कारफलं एर्यंति वियाणिऊण जा नियइ ।
 तो पेच्छइ जिणदासं गहियं आरक्खियनरेहिं ॥१४५॥
 चोरस्स भत्तदाई एसो त्ति निवेण ठविओ दोसं ।
 भामित्तु नगरमज्झे पच्छ वज्झो समाणत्तो ॥१४६॥
 तं वज्झं निज्जंतं दट्टुं देवो समागओ तुरियं ।
 नयरस्सुवरि विउव्वइ अच्चंतमहालयं सेलं ॥१४७॥
 तं दट्टुं नरनाहो भयभीओ सयललोगपरियरिओ ।
 धूवकडच्छुयहत्थो विण्णवई तम्महो होउं ॥१४८॥
 'देवो व दाणवो वा जो को वि हु कोविओ अयाणेहिं ।
 सो खमउ अम्ह सव्वं' इय भणिए जंपए देवो ॥१४९॥
 'रे रे पाव ! नराहिव ! अवियारियकज्जकारय ! अणज्ज ।
 चूरेमि निच्छएणं' इय भणिए भणइ पुण वि निवो ॥१५०॥
 'अन्नाणेणं सामिय ! जं किंचि कयं खमेहि तं सव्वं ।
 तुह आणानिद्देसे वट्टामो संपयं अम्हे' ॥१५१॥
 रे रे ! निरावराहो अहयं पिं विणासिओ विसेसेण ।
 एसो पुण मज्झ गुरू वज्झो आइट्टओ तुमए ॥१५२॥
 पावेसु जो अपावो वंचणनिउणेसु जो सया सरलो ।
 अदयेसु वि दयकलिओ सत्तूसु वि जो सया मित्तो ॥१५३॥
 तियसाण वि जो पुज्जो जिणधम्मपरो समत्थगुणनिलओ ।
 सो वि हु वज्झो विहिओ एमेव य कह तए पाव ! ॥१५४॥

ता जइ तं खामेउं महाविभूर्इए पेससि परम्मि ।
 ता तुह मोक्खो अन्नह पुँरिसहियं झत्ति चुण्णेमि' ॥१५५॥
 तं सोउं नरनाहो सहस त्ति समुद्धिओ सपरिवारे ।
 खामेतु तयं सेट्ठि महाविभूर्इए आणेइ ॥१५६॥
 देवो 'वि निययचरियं संसिय नीसेसलोगपच्चक्खं ।
 वंदित्ता जिणदासं पुणो वि ओहिं पउंजेइ ॥१५७॥
 एतो चोरेण समं वच्चइ पंथम्मि हरिसिया देवी ।
 सार्हिती नियचरियं भयजणयं चोरपुरिसस्स ॥१५८॥
 सोऊण तीए चरियं भयभीओ जाइ इय वियप्पंतो ।
 जह किर एसा पावा मारिस्सइ कत्थवि ममं पि ॥१५९॥
 तो परिहरामि एयं चितंतो जाव जाइ ता पुरओ ।
 पेच्छइ जेलपडिपुण्णं महानइं अइदुरुत्तारं ॥१६०॥
 तो भणिया तेणेसा 'वत्था^१लंकारमाइयं सव्वं ।
 अप्पेहि जेण पारे मोत्तूणं गेमि तं पुण वि' ॥१६१॥
 तो तीए निव्वियप्पं चोरस्स समप्पियं तयं सव्वं ।
 जहजायतणू थक्का, चोरो वि तयं गहेऊण ॥१६२॥
 उत्तरिउं जा चलिओ पुरओ ता तीए जंपियं एवं ।
 'किं मं मोत्तुं चलिओ ? हरेसि किं भंडगं एयं' ॥१६३॥
 भणियं चाऽऽवस्सयच्चुन्नीए-
 पुँन्ना नई सा तडि कागपेया सव्वं चिमं भंडग तुज्झ हत्थे ।
 जहा तुमं तीरंगंतु(?तीरमतीतु)^२कामो ध्रुवं तुमं भंडगहाउकामो ॥३६४॥ ॥१६४॥

तेण भणियं -^३Δ

'चिरसंथुयं चाऽलियसंथुएण मे^४ल्लेपि ताव ध्रुव अध्रुवेण ।

जाणेपि तुज्झं प्रकृतिस्वभावं अँन्नो नरो को तुँह वीससेज्जा ?(॥३६५॥) ॥१६५॥

१. ला. पुरस' ॥ २. ला. 'मुद्धिउं ॥ ३. सं.वा.सु. जिणयासं ॥ ४. ला. कत्थइ ॥ ५. सं.वा.सु. जडप' ॥ ६. Δ एतच्चिह्नद्वयान्तर्गतः पाठः ला. संज्ञकप्रतावेवोपलब्धः ॥ ७. "पुत्रा नई दीसति कागपेया" इति मुद्रितावश्यकचूर्णौ ॥ ८. "जहा तुमं पारमतीतुकामो" इति मुद्रितावश्यकचूर्णौ, दृश्यतां ४६४ तमं पत्रम् ॥ ९. 'थूओ वाड' मुद्रितावश्यकचूर्णौ ॥ १०. मेल्लेवि मुद्रितावश्यकचूर्णौ ॥ ११. पण्णो मुद्रितावश्यकचूर्णौ ॥ १२. सं.वा.सु. तव ॥

इय एवं जंपंतो गओ इमो सा वि लज्जमाणी यं ।
 सरथंबमावरिता चिट्टइ अट्टं झियाइती ॥१६६॥
 एत्थंतरम्मि दिट्ठा देवेणं तो किवाए सो तत्थ ।
 आगंतूण विउव्वइ कोल्हुगरुवं तर्हि एक्कं ॥१६७॥
 मुहगहियमंसपेसीसमण्णियं तह नईए तीरम्मि ।
 उच्छल्लयं च मच्छं मयगं पिव अइमहाकायं ॥१६८॥
 मोत्तूण मंसपेसिं मच्छस्स पहाविओ इमो जाव ।
 ता उच्छल्लिय मच्छे नइनीरे झत्ति संपत्तो ॥१६९॥
 मंसं पि सउलियाए अक्खित्तं तं नियच्छिउं एसा ।
 कलुणं झियायमाणं एवं तं कोल्हुगं भणइ ॥१७०॥
 'साहीणं मंसं उज्झऊण पत्थेसि मूढ ! रे ! मीणं ।
 इर्णिह दुण्ह वि चुक्को अप्पाणं खायसु सियाल ?' ॥१७१॥

सियालेण भणियं-

'करसंछइयगुज्जे ! मइलियसप्पुरिसकुलहरे ! पावे ।
 नरनाह-मिठचोराण चुक्किया रुयसु अप्पाणं ॥१७२॥
 तं सोऊणं एसा अव्वो तिरिया कहं णु जंपंति ।
 भयवेविरसव्वंगा संजाया तक्खणं चेव ॥१७३॥
 ता देवो तप्पुरओ रूवं मिठस्स विहिय अवयरिओ ।
 साहेइ निययचरियं सवित्थरं जं जहावत्थं ॥१७४॥
 कहियम्मि तम्मि तो सा जोडियकरसंपुडा तयं भणइ ।
 'आइस पावाए मए जं कायव्वं तयं इर्णिह' ॥१७५॥
 जंपइ य तओ देवो 'भदे ! तं सव्वपावनिहल्लिणं ।
 गिण्हसु जिणवरदिक्खं' इय भणिए जंपए एसा ॥१७६॥
 अवणेहि कलंकमिणं जेणं सुद्धं करेमि सामण्णं ।
 तो तेणं उप्पाडिय खणेण नीया वसंतपुरे ॥१७७॥

भेसविणं रण्णा अइघोरपिसायरूवतियसेण ।
 सम्मावि(णि?)या समाणी गिण्हइ जिण्देसियं दिक्खं ॥१७८॥
 उगं कारुण तवं अणसणविहिणा मरित्तु सा ततो ।
 वरकंति-सत्तिजुत्तो देवो तियसालए जाओ ॥१७९॥

नूपुरपण्डिताख्यानकं समाप्तम् ॥४०॥

नारी साहस्सिया कूर, जहा भत्तारमारिया ।
 नारी पच्छउबुद्धीया जहा सा पियदंसणा ॥१६८॥

नारी साहसिका=साहसवती, कूर=दुष्टाध्यवसाया, यथा भर्तृमारिका=
 पतिविनाशकारिणी, तथा नारी पश्चाद्बुद्धिः=पार्ष्णिकामतिः, यथा सा प्रियदर्शना=
 चन्द्रावतंसकभार्येत्यक्षरार्थः ॥१६८॥ भावार्थस्तु कथानकाभ्यां गम्यः तत्र तावत्
 पतिमारिकाकथानकमाख्यायते-

[४१. पतिमारिकाकथानकम्]

अत्थि इहेव जंबुद्धीवे दीवे भारहे वासे भरुयच्छं नाम नयरं । जं च सप्पुरिसदेहं
 व नम्मयाकलियं, अरण्णं व वरसप्पायारं कसमीरं व पहाणफलहाणुगयं, केलाससिहरं पिव
 धवलहरलंकियं, बंभाणं पिव सयाणंदं, विण्हं पिव पउमावासं, जिणेसरं पिव बहुसत्ताहारं,
 बुद्धं पिव सुगयं, अवि य-

जं देवेहिं समाणं उवमिज्जइ तस्स वत्तणा कहणु ? ।

धरणियलकोउगेण व अवयरियं सग्गनयरं व ॥१॥

तत्थ य अइउज्जुगो अत्थि गंगाइच्चो नाम थेरुवज्झायमाहणो, सो य पाढइ
 पभूयजणडिंभरूवाणि, विढत्तं च बहुयं दव्वं । तओ परिणीया तेण पउरदव्वप्पयाणेण एगस्स
 दारिद्दमाहणस्स धूया नवजोव्वणुद्धुर गोरी नाम कण्णया सा य अइवियड्ढा, अवि य-

अइसुवियड्ढा चउरा बहुकलकुसला सुरूवसंपन्ना ।

नवजोव्वणउम्मत्ता न हु तिप्पइ तेण सा पइणा ॥२॥

तो पिंडारो तीए अह विहिओ उववई मयंधाए ।

छंडित्ता कुलसीले दिणे दिणे जाइ रयणीए ॥३॥

तस्स सयासं अच्छइ तेण समं रइसुहाइं भुंजंती ।

न मुणइ य उवज्जाओ मुद्धो तीसे इमं चरियं ॥४॥

जया य बलिवइसदेवकाले उवज्झाओ कायबलिं पयच्छवेइ तथा भणइ-अहं कायाणं बीहेमि । तओ सो उवज्झाओ उजुसहावयाए तीए कवडत्तणं पि सभावं मण्णमाणो चट्टे आइसइ, अवि य-

‘भो भो चट्टा ! एसा तुम्हाणोज्झायणी अइभयालू ।

धणुहत्था कायाणं वारंवारेण रक्खेह ॥६॥

ते वि हु गुरुणो वयणं तह त्ति पडिवज्जिऊण रक्खंति ।

वारंवारेण तयं धणुवरसरवावडकरग्गा ॥७॥

इओ य ताण मज्जे एगो चट्टो अइवियड्डो उदग्गजोव्वणो पत्ते नियवारए चित्तेइ ‘हंत ! न एसा अइमुद्धा, किंच न बालो वि कायाणं बीहइ, एसा पुण एवं बीहइ, ता न एयं परमत्थेणं चेव एवंविहं संभावियइ किंतु कट्टरं किंपि वियक्केमि, ता निरूवियव्वा एसा अहोरत्तं’ जाव अन्नदियहे तहेव निरूविउं पवत्तो, अवि य-

जं जं करेइ चिट्ठं रंधण-पयणाइयं तयं सव्वं ।

पच्छन्नठिओ एसो निरूवए निउणदिट्ठीए ॥८॥

इत्थंतरम्मि सूरो तीए नाहो व्व थेरओ जाओ ।

असमत्थो दिणलच्छि दइयं पिव रंजिउं सुरए ॥९॥

लोयाणं लज्जाए अवरसमुद्धहम्मि सो लीणो ।

लज्जाए अहव सूरो पविसरइ जले व जलणे वा ॥१०॥

अइरत्तो विहु वुड्ढत्तणम्मि सूरो पियं अरंजंतो ।

अहिमाणगरुययाए अत्थमणं सरणमल्लीणो ॥११॥

अत्थमियम्मि उ सूरे रत्ता रत्तंभरा य दिणलच्छी ।

जाया ऽहव पइमरणे करेइ एवंविहा इत्थी ॥१२॥

रमेउं असमत्थो वुड्ढत्तेणं रवी दिणसिरीए ।

राउक्कडाइ खित्तो पेळेऊणं समुद्धम्मि ॥१३॥

पक्खित्ते नियदइए समुद्धमज्झम्मि अयसभयभीया ।

पच्छुत्तावेणऽहवा सा वि तर्हि चेव निव्वुड्डा ॥१४॥

पइवहणपावमसिगरुयलेवलित्त व्व कसिणया जाया ।

परियत्तियलावण्णा रयणिछ्लेणं व दिणलच्छी ॥१५॥

एरिसम्मि य पओससमए जलाणयणदच्छलेण घडगं घेतूण^१ पयट्टा नम्मया महानईपरतीरसंठियपरिचियमहिशीपालसमीवे, अवयन्ना य घडनावए नम्मयं । एत्थंतरम्मि य अयाणमाणा केवि देसिया कुतित्थेणावइन्ना नम्मयं, गहिया य महामयेण ओकूवियं तेहिं महया सदेणं । तओ तीए जंपियं जहा - अच्छीणि ढंकह एयस्स मयरस्स । तओ तेहिं तहेव कए ते मोत्तूण^२ नट्टो मयरो । भणिया य ते तीए जहा-किं कुतित्थेणावइण्णा ? एवं च जंपमाणी गया परकूलं । रमिऊण य तेण समं पुणो समागया नियगेहे । दिट्ठं च तं सव्वं पिट्ठओ निरूवमाणेण तेण वियड्ढुवट्टेण समागए य नियरक्खणवारए एगाईणि दट्टूण भणिया सा तेण, अवि य-

दिवा कागाण बीहेसि, रत्ति तरसि नम्मयं ।

कुतित्थाणि य जाणासि अच्छीणं ढंकणाणि य ॥१६॥

तमायणिणरूण 'अहो ! दिट्ठं सव्वं मम चेद्वियमणेणं' ति भावेमाणीए भणियमिमीए जहा-तुम्हारिसाणं विओगे एयं मए अणुद्वियं' । तेण भणियं - 'हा ! किमेवं भणिसि किं न पिच्छेसि उवज्झायं' । तीए य चितियं जहा-उवज्झायभएण एसो ममं न पडिवज्जइ, ता विणासेमि उवज्झायं, जेण मम एएण सह निरंतरं विसयसुहं भवइ' । तओ रयणीए सुहप्पसुत्तो वावाइओ अणाए भत्ता, अवि य-

परपुरिसरागरत्ता विसयसुहाऽऽसायमोहिया पावा ।

मारेइ निर्ययदइयं अंइघोरं घोरपरिणामा ॥१७॥

चितेइ 'हंत एसो पभायसमयम्मि कहणु कायव्वो ।

ता रत्ति चेव इमं परिट्टवेमि' ति चितेउं ॥१८॥

छुरियाए खंडखंडं कारुणं भरिय पिडगमेगं तु ।

'ता उज्झामि' ति इमं चितंती निग्गयाबाहिं ॥१९॥

इत्थंतरम्मि कुलदेवयाए दिण्णो कर्हिचि उवओगो ।

ता पेच्छइ तं तीए अइघोरं वइससं विहियं ॥२०॥

तं दट्टुं कुलदेवी चितइ 'पावाइ केरिसं विहियं ।

अइनित्तिसं कम्मं मिच्छेसु वि जं न निव्वडइ ॥२१॥

१. Δ Δ एतच्चिह्नद्वयान्तर्गतः पाठः ला. प्रतावेवोपलब्धः ॥ २. सं.वा.सु. दिया ॥ ३. ला. णाइं य ॥ ४. ला. एवं ॥ ५. ला. उज्झायं ॥ ६. ला. उज्झायं ॥ ७. ला. मं ॥ ८. ला. निर्यं दं ॥ ९. सं.वा.सु. खंडखंडि (डी)का ॥

ता एईए सीसे पाडेमि इमं ति चित्तुं देवी ।
 थंभेइ तयं पिडयं तह चेव य तीए सीसम्मि ॥२२॥
 तो जा सीसाउ इमा पक्खवइ महीए किर तयं पिडयं ।
 ता न पडइ तं पिडयं तं दट्टुं चित्तए एसा ॥२३॥
 “हंत ! इमं पावफलं उवट्टियं नूण किं चि मण्णेमि ।
 जं न वि एयं पिडयं निवडइ मह उत्तिमंगाओ ॥२४॥
 ता वच्चामि इओ च्चिय ठणाउ कर्हि पि अण्णदेसम्मि ।
 जत्थ महं नामं पि वि न मुणिज्जइ गरुयपावाए” ॥२५॥
 इय चित्तिरुण चलिया जा ता पेच्छेइ नेय अच्छीर्हि ।
 नयरे पविसंतीए जायइ साभाविया दिट्ठी ॥२६॥
 तो तत्थ नयरबाहिं दिणाणि दो तिण्णि वा वि गमिरुण ।
 तण्हा-छुहाकिलंता पविसइ नयरस्स मज्झम्मि ॥२७॥
 कुहियं च तयं कुणिमं पूइगलंतं मुहच्छिन्नासाण ।
 मज्जेण दुब्धिगंधं देविपभावेण अणवरयं ॥२८॥
 सव्वत्तो वि य अइदुब्धिगंधपसरंतपूयपवहेर्हि ।
 अइबीभच्छसरीरा गेहंगेहेण परिभमइ ॥२९॥
 ‘देहं पइमारियाए अम्मो ! गासं ति पावकम्माए’ ।
 इय घडखप्परहत्था भमडइ सव्वत्थनयरम्मि ॥३०॥
 “धीधीपावविलाए निग्घणनिर्त्तिसकूरकम्मए ।
 हणिरुणं भत्तारं कह पुरओ होसि अम्हाणं ? ॥३१॥
 ता ओसर निल्लज्जे ! मा चिट्ठसु मज्झ गेहदारम्मि ।
 धिसि धिसि कह ते हत्था वूढा एवं कुणंतीए ॥३२॥
 जं भत्तो अणुरत्तो सरलसहावो गुणाण आवासो ।
 निहओ नियभत्तारे तेण अदिट्ठव्विया तं सि ॥३३॥
 हा हा ! कह न विलीणा पावं एयारिसं करेरुण ।
 ता जाहि जत्थ सुव्वइ नामं पि वि तुज्झ न हयासे” ॥३४॥

१. ला. -“इ सा नयरमज्झम्मि ॥ २. ला. च्चिय ॥ ३. ला. धिदि ॥

इय बहुविहनिदणयं अवमाणं ताडणं च लोगाओ ।
 हीलणखि सण-गरिहणदुहाइं लोगाउ पाविती ॥३५॥
 हिडइ घरंघरेणं दुस्सहल्लुह-तणहपीडिया अहियं ।
 न लहइ पायं गासं करुणाए को वि पक्खवइ ॥३६॥
 'परपुरिसरया अहयं अहयं भत्तारघाइगा पावा ।
 अहयं कुलदूसणिया इय गरिहंती' परिब्भमइ ॥३७॥
 कालंतरेण केणइ दुक्करतवचरणसोसियंगाओ ।
 सीलंगवरट्टारससहस्सभरभारियतणूओ ॥३८॥
 नवबंभचेरगुत्तीसणाहवरबंभचेरकलियाओ ।
 बायालीसेसणदोसवज्जणादिण्णचित्ताओ ॥३९॥
 समतिण-मणि-मोत्ताओ गोयरचरियाए विहरमाणीओ ।
 दिट्ठाओ समणीओ समत्थदुक्खोहदलणीओ ॥४०॥
 दट्टूण तओ ताओ पयडसमुब्भिज्जमाणरोमंचा ।
 पइमारिया विचिंतइ "अहो ! कयत्थाउ एयाओ ॥४१॥
 जाहिं इमो वावारो विसयगओ दूरओ परिच्चत्तो ।
 कामासत्ताइ मए कयं पुणो किं पि तं पावं ॥४२॥
 जेणं नरयसमाणं इह चेव य दारुणं महादुक्खं ।
 जायं परलोगे पुण पडियव्वमवस्स नरयम्मि ॥४३॥
 ता वंदित्तु इमाओ अज्ज पवित्तं करेमि अप्पाणं" ।
 इय भाविऊण पडिया समणीणं चलणजुयलम्मि ॥४४॥
 तो साहुणीण तेयं असहंती वंतरी पलाणा सा ।
 पाएसु पडंतीए पडियं पिडयं तओ ज्ञत्ति ॥४५॥
 तं समणीणऽणुभावं दट्टूणं विम्हिया दढं एसा ।
 एयाओ मे सरणं भाविती जाइ ताहिं समं ॥४६॥
 दट्टूणुवस्सयं तो गंतूण जलासयम्मि नियदेहं ।
 पक्खालिय सुइभूया पविसइ समणीण वसहीए ॥४७॥

दिद्वा य तत्थ गणिणी निम्मलपडरयणपाउयसरीर ।
 अइधवलजलयछन्ना चंदस्स व चंदिमा सोमा ॥४८॥
 तं दडूणं एसा बहलसमुब्भिज्जमाणरोमंचा ।
 वंदइ गणिणीपाए बाहजलोहलियगंडयला ॥४९॥
 पुद्वा य तओ तीए वच्छे ! तं आगयाकओ इहइं ।
 तीए य अपरिसेसा मूलाओ अक्खिया वत्ता ॥५०॥
 तं सोऊणं गणिणी भणइ अहो ! दारुणं समणुभूयं ।
 इह लोग च्विय तुमए दुक्कडकम्मस्स फलमउलं ॥५१॥
 पइमारिया वि जंपइ सामिणि ! मह कहसु किंपि तं इण्हि ।
 जेणं भवंतरेसु वि न होमि दुहभायणं अहयं ॥५२॥
 तो गणिणीए कहिओ धम्मो खंताइओ दसपयारो ।
 जह वच्छे ? कायव्वा पढमं खंती पुढविसरिसा ॥५३॥
 तत्तो य मद्दवं पुण गुरुयणविणयाउ होइ कायव्वं ।
 सव्वत्थ(त्थ)ज्जुसहावत्तणेण अह अज्जवं तत्तो ॥५४॥
 लोभच्चाएण तओ मुत्ती निच्चं पि होइ कायव्वा ।
 तत्तो दुवालसविहो बज्जो अर्ब्भितरो य तवो ॥५५॥
 तत्तो य सतरसविहो कायव्वो संजमो सुहत्थीहिं ।
 दसविह चउव्विहं वा तत्तो सच्चं अणुट्टेयं ॥५६॥
 उवगरण-भत्त-पाणाइएसु सोयं तओ विहेयव्वं ।
 आर्किचणं पि तत्तो वराडियाए वि परिहारो ॥५७॥
 तत्तो य बंभचेरं उगं अइदुद्धरं धरेयव्वं ।
 एसो दसप्पयारो धम्मो सिवसंपयं देइ ॥५८॥
 कम्मखओवसमेणं चित्तं एएण रंजियं तीए ।
 भणइ य 'भयवइ ! अहयं जइ जोग्गा देहि तो एयं' ॥५९॥
 जंपइ गणिणी 'वच्छे ! जोग्गा तं किंतु अण्णदेसम्मि ।
 इइ भणिणए गणिणीए समंगया अण्णदेसम्मि ॥६०॥

१. सं.वा.सु. तं कत्थ आगया इहइं ॥ २. ला. सव्वत्थ उ उज्जु ॥ ३. सं.वा.सु. अओ ॥ ४. सं.वा.सु. अणुट्टेयं ॥ ५. ला. भणिया ॥

गहिरुण तत्थ दिक्खं काउं तवसंजमं अणणसमं ।

मरिऊण तओ जाया देवो सा देवलोर्गम्मि ॥६१॥

पतिमारिकाख्यानकं समाप्तम् ॥४१॥

साम्प्रतं प्रियदर्शनाख्यानकं व्याख्यायते-

[४२. प्रियदर्शनाऽऽख्यानकम्]

अत्थि इहेव जंबुद्दीवे दीवे भारहे वासे सुकइकव्वं व सुवण्णरयणालंकिंयं
समत्थरसाणुगयं सालंकारं सुहयं सुगयं विबुहाणंदं सुभासाणुगयं साकेयं नाम नयरं,
तत्थ य

जिणदरिसणाणुरत्तो उत्तमसत्तो विसिट्ठसम्मत्तो ।

दरियारिजयपवत्तो जिण-मुणिपयपंकयासत्तो ॥१॥

अवगयवरसियवाओ गयमय-माओ रणे अणुव्वाओ ।

कामो व्व पवरकाओ पणईयणनिच्चकयचाओ ॥२॥

सेवयकयप्पसाओ अट्टारसपयइजणियअणुराओ ।

निच्चं चिय सण्णाओ कयपंचपयारसज्जाओ ॥३॥

पालियवरमज्जाओ सच्छओ वरकलासुवज्जाओ ।

चंदवडिसयराओ समत्थतेलोककविक्खाओ ॥४॥

तस्स य चंदवडिसयमहारायस्स सुदंसणा-पियदंसणानामाओ दोण्णि अग्गम-
हिसीओ । तत्थ पढमाए सयलगुणगणाहारा रूवाइविणिज्जियसुरकुमार उव्वूढदुद्धरमहारज्ज-
भारा विण्णायकलागमसारा विहियजिणदंसणवियारा सागरचंद-मुणिचंद नामाणो अत्थि दुन्नि
कुमार, पियदंसणाए वि तत्तुल्लगुणा चेव गुणचंद-बालचंदनामाणो संति दोण्णि पुत्ता । एवं
च तस्स चंदवडिसयरायस्स पुत्त-कलत्तसमण्णियस्स वच्चए कालो ।

अण्णया य चाउद्दीदिणे विसज्जियासेससामंताइपरियणो कयबंभचेरपोसहो
सिज्जापरिचारिगामित्तपरियणो पविट्ठो वासभवणे तत्थ य निवायनिघाघायत्तणाओ
अईवसोहासमुदय समण्णियं असेसावतमसविद्धंससमत्थलट्ठि(ट्ठि)पईवसिहमवलोइऊण
चित्थियं जहा-करेमि एयं दीवयसिहमंगीकाऊण किंचि नियमविसेसं, जओ संकेयपच्चक्खाणमेयं
भयवया वण्णियं, अवि य-

१. सं.वा.सु. "कियं परमत्थवसाणु" ॥ २. सं.वा.सु. सुइहयं ॥ ३. सं.वा.सु. जिणदरिसणाणुरत्तो
उत्तमसद्धो ॥ ४. ला. चंडव एवमन्यत्रापि ॥ ५. ला. "णो दोन्नि ॥ ६. सं.वा.सु. "सं संके" ॥ ७. ला भणियं ॥

अंगुट्टु-गंठि-मुट्टी-घर-सेऊ-सास-थिबुग-जोइक्खे ।

एय संकेयभणियं धीरेहि अणंतनाणीहि ॥५॥

तो जाव इमा पजलाइ दीवसिहा ताव पेय पारेमि ।

काउस्सगगप्पडिमा इय चितिय ठइ उस्सगगे ॥६॥

एवं च पढमपहरे रयणीए वोलियम्मि सो दीवो ।

विज्झाइउं पयत्तो वियलियनेहो त्ति काऊण ॥७॥

तो सेज्जापालीए मज्झ पहू कह णु अंधयारम्मि ।

चिट्टिस्सइ कलिरुणं नेहेणाऽऽवूरिओ पुण वि ॥८॥

एवं च बीयपहरे, तइए यं तहेव तीए परिविहियं ।

एवं सव्व(व्वं)रयणिं काउस्सगगे ठिओ राया ॥९॥

तओ अईवसुकुमालत्तणओ सरीरस्स निग्गओ फुट्टिरुण चलणेसु रुहिरप्पवाहो, नित्थामं जायं सरीरं, वियलियाइं अंगाइं, मउलियाइं लोयणाइं, निरुद्धो सासप्पसरो, निवडिओ धरणिवट्टे तओ सविसेसापूरमाणधम्मज्झाणो कयपंचनमोक्कारे अत्थामं ति वियाणिरुण विहियचउव्विहाहारपच्चक्खाणो विमुक्को जीविएणं न य सत्तेणं, अवि य-

अवि चलइ सेलराया निवडंतअसेससिहरपब्भारे ।

जलही वि सुसइ वियलियजलवीइतरंगरंगिल्लो ॥१०॥

रयणी वि होज्ज दिवसं ससि-सूर वि हु उयंति अवरए ।

न य उत्तमा पइण्णं गहियं मुंचंति पलए वि ॥११॥

तो मरिउं सो राया सव्वुत्तमकंतिदित्तिसंजुत्तो ।

वेमाणियदेवेसुं उप्पण्णो झत्ति वरतियसो ॥१२॥

रणा य जीवंतएण चेव किर 'सागरचंदस्स रज्जं पयच्छिस्सामि' त्ति मुणिचंदकुमारस्स उज्जेणी कुमारभुत्ती दिण्णा । सागरचंदो वि उवरए पियरम्मि चित्तिउमाढत्तो, अवि य-

“असारो एस संसारो दुक्ख-क्केसाण भायणं ।

खणदिट्टुविणट्टो य इंदियालसमप्पभो ॥१३॥

जीवियं धणरिद्धी य भज्जाओ भोगसंपया ।

खणेण दीसए सव्वं खणेणं चेव नासए ॥१४॥

सरंधपुडए नीरं जहा गलइ निरंतरं ।
 एवं निरंतरं जाइ जीवाणं पि हु जीवियं ॥१५॥
 विविहोवक्रमेहिं च सूलाईहिं विणस्सए ।
 झड ति ओसर्बिदु व्व कुसग्गे जह वाउणा ॥१६॥
 धणं चउप्पयाईयं खणद्धेणं न दीसए ।
 छहियाखे डुए चेव जहा गय-हयादओ ॥१७॥
 एसा वि विविहा रिद्धी, खणदिट्टुविणस्सरा ।
 गंधव्वनगरायारा, पेच्छंताणं विणस्सए ॥१८॥
 भारियाओ सुरूवाओ मोहणीओ जमेण उ ।
 विणासिज्जंति वाएण, सिहाओ दीवयस्स व ॥१९॥
 सद्दाई भोगरिद्धीओ, दिट्टुनट्टाउ तक्खणं ।
 सनीरमेहखंडे व्व, विज्जुलाओ व्व सव्वया ॥२०॥
 ता न ऋज्जं ममेएण, पावसंतावकारिणा ।
 सुंदरेणाऽवि रज्जेण, केसाऽऽयासविहाइणा ॥२१॥
 गुणचंद-बालचंदाण, कुमारण इमं तओ ।
 दाउं करेमि पव्वज्जं, सव्वदुक्खविमोक्खणी" ॥२२॥

एवं च चित्तिरुण भणिया पियदंसणा जहा-अम्मो । पडिच्छसु कुमारण रज्जं जेण
 अहिसिचिरुण गुणचंदं रज्जे, बालचंदं च जुवरज्जे करेमि अप्पणा पव्वज्जा-तव-
 संजमाइयं अणुट्टाणं ति । पियदंसणाए वि 'एएण चेव एयं रज्जं' ति मण्णमाणीए जंपियं
 जह-पुत्त ! बाला कुमार असमत्था रज्जपरिपालणम्मि, तुमए उ पव्वज्जंते सव्वहा विणस्सए
 रज्जं ता तुमं चेव परिपालेहि, तुमए य रायाणए मह कुमारण रज्जं चेव, ता सव्वहा न
 तुमए पुणो वि एरिसं मंतेयव्वं । तओ सागरचंदो अणिच्छमाणो वि रज्जविणासभएण
 अहिसित्तो मंतिसामंतेहिं रज्जे । जाओ य महारायाहिरओ । अणुरत्तपयइसामंतो य पालए
 रज्जं । अण्णया य महाविभूर्ईए निग्गच्छंतमागच्छंतं च सागरचंदं महारायं दट्टूण 'पच्छबुद्धि
 महिल' ति कारुण चित्तियं पियदंसणाए, अवि य-

“अहह ! कह मंदभग्गाए पावकम्माए एरिसं विहियं ।

गेहम्मि कामधेणू दंडेण हया पविसमाणी ॥२३॥

निययंगणमिं कप्प द्दुमो वि उट्टंतओ मए छिन्नो ।
 पत्तो वि कामियघडो भग्गो पण्हप्पहारेण ॥२४॥
 जं एरिसरायसिरी दिज्जंती वि हु इमेण पुत्ताण ।
 दुब्बुद्धिहयाए मए निप्पिहवयणेहिं परिहरिया ॥२५॥
 मह पुत्ता वि हु एवं ललंतया जइ तया न वारिती ।
 तो कह इण्हि लब्भइ इमा इमेणं जियंतंणं ॥२६॥

ता केण उवाएणं एयं विणासेमि जेण अण्णिदिएणेव विहिणा मम पुत्ताणं रज्जसिरी भवइ” । एवं च चित्तित्तं नरवइणो छिड्डाइं गवेसित्तं पयत्ता । अण्णया य पुव्वदिण-कयतवोविसेसस्स बीयदिणे विसेसेण छुहा बाहित्तं पयत्ता राइणो । तओ समाणत्तो सूवयारो जहा-‘अज्ज मह रायवाडियागयस्स किंचि पढमालियं पच्छण्णं पट्टविज्जसु । सुयं च एयं राइणो वयणं पियदंसणाए ‘अहो सोहणं छिड्डुं’ति चित्तिरुण पढममेव विसभाविए हत्थे काऊण ठिया । सूवयारेण वि चिरगयस्स राइणो दासचेडीहत्थे पेसिओ पच्छन्नमेव एगो सुसंभिओ सीहकेसरयमोयगो । सा य गच्छंती भणिया पियदंसणाए-‘भदे ! किमेयं ?’ तीए वि जणणि त्ति काऊण निव्वियप्पाए सव्वं साहियं । तओ तीए जंपियं जहा-‘पेच्छमि केरिसा पढमालिया ! तओ तीए दंसिओ मोयगो । तओ पियदंसणाए गहिओ विसलित्तेहिं हत्थेहिं सो मोयगो लोलित्ता य चिरं ‘अहो ! सोहणो अहो ! सुयंधो’ त्ति भणंतीए पच्चप्पिओ । दासचेडी वि गया राइणो समीवं । पच्छण्णं च समप्पिओ । एत्थंतरम्मि य ते दो वि कुमार राइणो समीवे चिट्ठंति । ते य दट्टुण चित्तियं राइणा-अहाहि ! कहमहं इमेहिं बालेहिं समीवत्थेहिं एगागी भुंजिस्सं त्ति तओ सो मोयगो दुहा काऊण तेसिं दुण्ह वि दिण्णो । ते य जाव भुंजिउमाढत्ता ताव य किं संजायं तेसिं ?, अवि य-

धमधमियं अंगेहिं वियलित्ति य सव्व संधिबंधा उ ।
 जीहा लल्लविलल्ल अइजड्डा तक्खणं जाया ॥२७॥
 आवंति य विसवेगा खणे खणे नीससंति अइदीहं ।
 तत्तो मउलियनयणा सहसा धरणीयले पडिया ॥२८॥

तओ राया विसवियारु त्ति नाऊण आउलीहुओ भणिया य पासवत्तिणो-रे रे लहुं पाहाणमाणेह । आणीओ वयणाणंतरमेव । तओ तत्थ राइणा घसिऊण सद्धसोलसवण्णिया सुवण्णमुद्दियारयणं पाइया कुमार । अचित्तमाहप्पयाए सुवण्णस्स जाया सच्छसरीरा कुमार ।

१. ला. ‘यणेण ॥ २. ला. ‘ती ॥ कह इण्हि लब्भइ इमा इमेण परिजीवमाणेणं ॥२६॥ ३. ला. चित्तिरुणं ॥ ४. ला. ‘वाहियालिं गय’ ॥

पुच्छिया य दासचेडी जहा-भदे । को निव्विण्णो नियजीवियस्स ? दासचेडीए भणियं-सामि !
णियसूवयारं एयाणं च मायं ममं च मोत्तूण न अन्नस्स कस्सइ हत्थे चडिओ । राइणा चितियं
अहो ! तीए पावाए दुट्टचेट्टियं, जओ तया रज्जं दिज्जमाणं पि नेच्छियं संपयं पुण
वावाएउमिच्छइ, ता सव्वहा जारिसयं तित्थयेरेहिं वण्णियं तारिसं चैव इत्थीण चेट्टियं, जओ
भणियं-

महिला य रत्तचित्ता उच्छूखंडं व सक्करा चैव ।
सा पुण विरत्तचित्ता विसअंकूरे विसेसेइ ॥२९॥
महिलादिज्ज करेज्ज व मारेज्ज व संठविज्ज व मणुस्सं ।
संतुट्ठा व जियावेज्जऽहव नरं बंधैयाविज्जा ॥३०॥
मारेइ जियंतं पि हु मयं पि अणुमरइ कावि भत्तारं ।
विसहरगइ व्व चरियं वंकविवंकं महिलियाणं ॥३१॥
एवं च चित्तिरुणं गेहं गंतूण तं इमं भणइ ।
हा ! दुट्टु कयं अम्मो जं तइया नेच्छसे रज्जं ॥३२॥
इण्हं पुण अकयतवो तुमए खित्तो मि आसि संसारे ॥
बालाण य एयाणं मणयं मरणं न संजायं ॥३३॥
ता गिणहसु रज्जमिणं इण्हं पि न कज्जअ(म)म्हमेएण ।
संसारकारणेणं अइदारुणदुक्खजणएण ॥३४॥
एवं च जंपिऊणं हक्कारित्ता उ मंति-सामंते ।
अहिंसिचइगुणचंदं रज्जे इयरं तु जुवरज्जे ॥३५॥
तत्तो भलाविऊणं सामंताइण ते उ सव्वेसिं ।
गिण्हइ जिणवरदिक्खं सुगुरुसमीवे विभूईए ॥३६॥
उगं तवं कुणंतेण जह उ मुणिचंदभाइणो पुत्तो ।
बीओ पुरोहियसुओ उवसग्गरया मुणिजणाण ॥३७॥
सिक्खविऊण निबुद्धेण दो वि पव्वाविया जहहठेणं ।
सम्मं च परिणया जह पव्वज्जा रायउत्तस्स ॥३८॥
इयरो पुरोहियसुओ हठेण पव्वाविओ त्ति गुरुविसयं ।
काऊण य प्पओसं ईसिदुगुंछं च धम्मम्मि ॥३९॥

आराहणाइविहिणा दुण्णि वि पत्ता जहेव सुरलोए ।
 जह कहिओ उ जिणेणं दियपुत्तो दुलहबोहीओ ॥४०॥
 माउय ! पडिबोहिज्जसु^३ बीयं अब्भत्थिऊण च विय इहं ।
 जह जाओ मेअज्जो परिणइ जह अट्ट कण्णाओ ॥४१॥
 कट्टेण बोहिओ जह देवेणं पुण वि परिणित्तं कण्णं ।
 नवमं सेणियधूयं भोत्तुं भोए अणण्णसमे ॥४२॥
 पत्तो महामुणित्तं सुवण्णगारस्स जह गओ गेहं ।
 अट्टुं कणयजवे जह तेणं मुणिवरो पुट्ठो ॥४३॥
 तेण वि जीवदयाए जवावहारी न कुंचओ सिट्ठे ।
 कुट्टेण य अइघोरो उवसग्गो जह कओ तेण ॥४४॥
 उप्पाडिऊण नाणं पत्तो मोक्खम्मि परमसोक्खम्मि ।
 जह सो तह सव्वं पि वि सवित्थरं मुणह अण्णत्तो ॥४५॥
 सागरचंदमुणी वि हु सुद्धं परिपालिऊण पव्वज्जं ।
 अणसणविहिणा मरित्तं संपत्तो देवलोगम्मि ॥४६॥
 प्रियदर्शनाख्यानकं समाप्तम् ॥४२॥

तथा-

बंधुनेहखयंकारी, नारी पउमावई इव ।
 नारी जालावली चेव, महासंतावकारिणी ॥१६९॥
 बन्धुस्त्रेहक्षयकारिणी= भ्रातृप्रेमानुबन्धविनाशविधायिनी नारी, उक्तं च-
 स्त्रीणां कृते भ्रातृयुगस्य भेदः, सम्बन्धभेदे स्त्रिय एव मूलम् ।
 अप्राप्तकामा बहवो नरेन्द्रा, नारीभिरुत्सादितराजवंशाः ॥३६६॥

पद्मावतीव=कोणिकभार्येव, तथा नारी ज्वालावलीव=ज्वालावल्ग्यभिधानस्त्रीवत्,
 यद्वा ज्वालानामावली ज्वालावली=वह्निशिखासन्ततिरिव, महासन्तापकारिणी=
 प्रचुराशर्मविधायिनीति श्लोकाक्षरार्थः ॥१६९॥

भावार्थस्तु कथानकाभ्यामवसेयः । तत्र पद्मावती कथानकं कथ्यते -

१. ला. आराहिऊण वि ॥ २. "बोधिबीजम्" इत्यर्थः ॥ ३. ला. वि जह्वा दं ॥

[४३. पद्मावतीकथानकम्]

अत्थि इहेव जंबुद्वीवे दीवे भारहे वासे वसंतपुरे नयरे जियसत्तू रया । तस्स य सयलंतेउरप्पहाणा रूयाइविणिज्जियामरसुंदरी धारिणी नाम देवी । तीसे य गब्भसंभवो अणेगगुणसंभवो बाहत्तरिकलाकुसलो सुमंगलो नाम अइकोउयासत्तो पुत्तो । ताणं च अमच्चपुत्तो सेणगो नाम, सो य कुरूवो, अवि य-

अइपिहुलथूलपाओ सुप्पनहो मडहविसमजंघालो ।

घोलोरू वंककडी पलंबपोट्टो विसमकुच्छी ॥१॥

निन्नुनयवच्छयलो लहुबाहो विसमखंध-लहुगीवो ।

जियदंतच्छयअइवंकदसणओ लंबअहरुट्टो ॥२॥

अइचिबिडभग्गनासो मंजारच्छे य भुंडभालयलो ।

अवलक्खणसवणजुओ सिहिसिहसमकेसपब्भारे ॥३॥

इय एवंविहरूवो सो मंतिसुओ जणोहहसणिज्जो ।

तं सो रायस्स सुओ सुमंगलो हसइ तदियहं ॥४॥

तह य कयत्थइ अहियं विडंबणाहिं बहुप्पगारहिं ।

कीलाए रायसुओ अमच्चपुत्तं तयं सययं ॥५॥

एवं च तस्स पइदियहं तेण कयत्थिज्जमाणस्स समुपण्णं वेरगं, चित्तियं च तेण, अवि य-

“तं किं पि कयं पावं पुव्वभवे जेण एरिसदुहाइं ।

पत्ताइं इह जम्मे नारयदुहसरिसरूवाइं ॥६॥

ता तं करेमि संपइ जेणऽण्णभवे वि नेय पावेमि ।

एरिसविडंबणाइं” चित्तिय नयराउ निक्खंतो ॥७॥

तओ परिब्भमंतो विविहगामा-ऽऽगर-नगरेसु हिंडमाणो पत्तो एगं तावसासमं । दिट्ठो य तत्थ कुलवई । पणमिओ य भावसारं दिण्णा य तेण आसीसा, पुच्छिओ य जहा-‘वच्छ! कओ तुमं किं वा कारणेणमिह आगओसि?’ तेण जंपियं-वसंतपुराओ गिहनिव्विण्णो इह आगओ मि । तओ तेण पत्तभूओ त्ति नाऊण कया धम्मदेसणा । तं च सोऊण जाओ तावसो । संवेगाइसयाओ करेइ उगं तवोणुट्ठाणं जाव जाओ उट्टियाखमओ । संपत्तो य विहरमाणो वसंतपुरं । जाया य पसिद्धी जहा-एरिसो तारिसो एस महा-तवस्सि

ति । सुयं च एयं राइणा जहा-एत्थ कोइ महामुणी समागओ । तओ परमभत्तीए गओ राया से वंदणत्थं । वंदिऊण य पुच्छिओ जहा-भयवं किं तुम्ह वेरगकारणं ? मुणिणा भणियं-महाराय ! संसारो चैव पढमं निव्वेयकारणं बीयं पुण सुमंगलो नाम रायपुत्तो परमकल्लणमित्तो वेरगकारणं ति । राइणा भणियं कहं चिय ? तओ मूलाओ आरब्भ कहियं सव्वं पि नियचरियं तओ य-

जह जह निसुणइ राया नियदुच्चरियं इमेण सीसंतं ।

तह तह लज्जामइओ व्व जायए तक्खणं राया ॥८॥

पाएसु पणमिऊणं राया खामेइ सो अहं पावो ।

तुह उव्वेययकारी ता मरिससु जं कयमकज्जं ॥९॥

ता खमह तया तुब्भे कयत्थिया जं निरावराहा वि ।

दट्टं तुब्भे संपइ अहियं उत्तम्मए हियं ॥१०॥

तओ चित्तियं तेण 'अहो ! लज्जिओ एस राय' ति चित्तिऊण भणियमणेण-महाराय ! अलमुव्वेयेणं को तुज्झ दोसो ?' परममित्तो तुमं जेण तुह निमित्तेणं पाविओ मए धम्मो ति । राइणा चित्तियं-अहो ! महप्पा एसो जेण दोसो वि गुणपक्खे ठाविओ । तओ भणिओ रिसी-मह गिहागमण-भोयणाइणा अणुगहेसु मं पावकम्मकारिणं । तेण भणियं-महाराय ? मज्झ एस कप्पो जहा-मासाओ मासाओ पारेमि, तत्थ वि पढमघराओ चैव लाभे वा अलाभे वा नियत्तिऊण पुणरवि पविसामि उट्टियं, एस मे भोयणे पइण्णाविसेसो, ता अज्ज वि न पारणयदिणो समागच्छइ । राइणा भणियं - अविग्घेण पत्ते पारणयदिणे मह गेहाओ न अन्नत्थ गंतव्वं । [तेण भणियं-?]अंतरायं मोत्तूणमेवं काहामो । 'महापसाओ' ति भणंतो हरिसिओ राया । पत्ते य पारणयदिणे गओ एसो राइणो मंदिरं । कम्मधम्मसंजोगेण य गाढमसत्थीभूओ तम्मि दिणे राया । तओ तव्वाउलत्तणाओ वयणमित्तेण वि न केणावि उल्लविओ । निग्गओ य रायमंदिराओ । पविट्ठो गंतूण उट्टियं । सच्छसरीरेण य पुच्छियं राइणा जहा-किमागओ अज्ज रिसी नव ? ति । लोणेण य भणियं जहा-आगओ आसि परं तुम्ह सरीरकारणवाउलत्तणाओ न केणावि संभासिओ । 'हा ! दुट्टुकयं मए पावेणं' ति चित्तंतो गओ सयमेव तत्थ राया । बहुप्पयारं च निदिऊण अप्पाणं भणिउमाढत्तो भयवं ? महंतो मम एस संतावो जमकयपारणओ तुमं गेहाओ पडिनियत्तो । तेण भणियं-महाराय ! अलं संतावेण, को तुज्झाऽवराहो ? । राइणा भणियं-भयवं ?

१. ला. 'रणं । तो रा' ॥ २. ला. व्व तक्खणं जायए राया ॥ ३. ला. कयं कज्जं ॥ ४. सं.वा.सु. मह ॥

तहावि मम न एस संतावो नियत्तइ जाव तए मम गेहे पारणयं न कयं । तेण भणियं-जइ एवं ता करिस्सामो । तओ 'महापसाओ' ति भणिरुण पडिनियतो राया । दुइयपारणयकाले वि तहाविहभवियव्वयाए पुणो वि असत्थीहूओ राया । तत्थ वि तह चेव नियत्तिरुण पविट्ठो उट्टियं रिसी । सत्थीभूओ य नाऊण तहेव अप्पा(प्पं ?) निंदंतो गओ राया । दिट्ठो य अच्चंतं सुसियसरीरो । सविसायं च पायपडिओ भणिउमाढतो राया-भयवं ! लज्जिओऽहं इमेण बुहयणपरिर्निदिएण पमायचिट्ठिएण, तुह सरीरपीडाजणिएण य पावकम्पुणा निबद्धं नरयाउयं ति, अवि य-

जं परिभविओ पुर्व्वि तं चिय मं दहइ जं पुणो इण्हि ।

दोवारे तेण तुहं मुहं पि दाऊण न तरामि ॥११॥

'अहो ! से महाणुभावया, अहो ! से पच्छयावो, अहो ! से पावकम्मभीरुत्तणं, जेण मए अकयपारणए एवं परितप्पइ ता सव्वहा एयस्स गेहे न जाव मए पारणयं कयं न ताव एसो धिइं लहइ' ति चित्तिरुण भणियं तेण रिसिणा जहा-महाराय ! मा संतप्पसु निव्विग्घेण परिसमत्तीए करिस्सामि तुह गेहे पारणयं । राया वि 'भयवं ! महापसाओ' ति भणमाणो निवडिओ चलणेसुं, हरिसियमणो गओ नियगेहं । कमेण य पारणए तहाविहभवियव्वयाए तम्मि चेव दिवसे अच्चंतमसत्थीभूओ राया । एत्थंतरम्मि सुसियदेहो पारणद्धा पत्तो दुवादेसं सो मुणी । 'अहो ! जया जया एस महापावकम्मो रिसी गिहमागच्छइ तया तया एवंविहावत्थो भवइ राय ति अवि य-

पविसइ जत्थ अहव्वो तत्थ वसंताण निव्वुइं हइ ।

अहवा सुक्कइ डालं कपोडगो जत्थ अल्लियइ ॥१२॥

चित्तंतेहिं अकयपारणओ गलच्छिरुण नीणियो दोवारियनरेहिं । थोववेलाए य उवसंतवेयणेण मुणिओ एस वुत्तंतो रइणा । 'अहो ! मे असुहपरिणई जेण जं जं करेमि तं तं विवरीयं परिणमइ, ता कहं पुणरुत्तकयनाणाविहावराहं मुणिणो अप्पाणं दंसेमि[त्ति] भावंतो न गओ राया । समुप्पण्णकोवानलेण य चित्तियं मुणिणा-अहो ? गरुओ वेराणुबंधो एयस्स नरिदाहमस्स ममोवरि जेण ममं गिहत्थं विडंबंतो तहा इयाणिं पि विडंबइ, ता करेमि से पच्चुवयारं । चित्तंतेणं कयमणसणं ति । 'जइ इमस्स तवनियमस्स फलमत्थि तोऽहं इमस्स वहाए भविज्जामो'त्ति कयनियाणो मरिरुण जाओ अप्पिड्डिओ वाणमंतरो ।

तन्निव्वेएण य जाओ सुमगलराया वि तावसो । कालमासे य मओ समाणो जाओ सो वि वाणमंतरसुरो । कमेण य तत्तो चविरुण समुप्पण्णो रायगिहे नयरे पसेणइस्स

रण्णो पुत्तो सेणियो नाम । सो कालंतरेण य जाओ महासासणो न[ग्रंथाग्रम् १००००]रवई ।

सो वि सेणगजीवो ततो चविऊण सेणियस्स रण्णो चेळ्ळणाए देवीए कुर्च्छिसि जाओ पुत्ताए । तीसे य चेळ्ळणाए देवीए तम्मि गब्भत्थम्मि जाओ डोहलो जहाँ सेणियस्स अंताणि भक्खेमि,

दीसंतो अमयमओ जो पुर्व्वि आसि सो च्विय इयाणि ।

विससरिसो संजाओ अइदारुणगब्भदोसेणं ॥१३॥

तओ तारिसं डोहलं समुप्पणं जाणिऊण चित्तियं तीए-हंत ? को वि एस राइणो वेरिओ समुप्पणो मम गब्भे ता गब्भसाडणाईहिं साडेमि । तओ साडिउमाढत्ता । सो य कर्हिचि जाव न सडइ ताव डोहलए अपूरमाणे सा झिज्जि उमाढत्ता । पुच्छिया य तओ सेणियराइणा न य साहइ । तओ कहकहवि सवहसावियाए महया कट्टेण सिट्ठं । रण्णा वि 'पिए ! वी सत्था चिट्ठसु तहा करिस्सामि जहा तुह चित्तस्स निव्वुई भविस्सइ' ति समासासिऊण सिट्ठं अभयस्स । अभएणवि सेणियस्स पोट्टेवरि छालंगंताओ ठविऊण अविभाविज्जंत चीवरेण छइऊण उताणयस्स ठियस्स तीसे पेच्छमाणीए अलियवियणां- वेगाऽऽउरत्तणं कुणंतस्स उक्कत्तिऊण दिण्णाओ । तओ भक्खिउमाढत्त ति । अवि य-

चित्तेइ जाव गब्भं ताव धिइं होइ रायतणयाए ।

चित्तेइ जाव रायं ता अहियं दुक्खिया होइ ॥१४॥

अवणीए डोहले मोहवसमुवगयाए पगुणीभूओ दाविओ राया । तओ सत्थचित्ता जाया । एवं च अणिच्छमाणीए विगब्भधारणं समागओ पसूइसमओ, जाओ दासओ । तओ रायवेरिओ ति काऊण भणिया दासचेडी-हला ! एयं एगंते उक्कुरुडियाए छुडेहि । सा वि तह ति पडिवज्जिऊण गया असोगवणियाए । तत्थ मोत्तूणं जाव समागच्छइ ताव दिट्ठा सेणियनिवेण, पुच्छिया य-भदे ? कर्हि गया आसि ? तीए य भउब्भंताए साहियं । तओ गओ सयमेवतत्थराया जाव पेच्छइ निययप्पभाजालेणुज्जोवियं सव्वमसोगवणियं । तं च दट्टूण चित्तियं राइणा-अहो ! चंदेण विय उज्जोविया सव्वा असोगवणिया इमेणं, ता मुद्धा देवी जा एवंविहं पि परिचयइ । तओ घेतूण समागओ चेळ्ळणासमीवं, अंबाडिऊण य भणिया सा जहा-किंनिमित्तमेसो परिचत्तो ? तीए भणियं-तुम्हाणं वेरिओ ति काऊण । तओ भणियं सेणिएण-भदे ? जइ एयं जेट्टुपुत्तं परिचयसि तो तुज्झ अन्ने पुत्ता थिरा न

१. सं.वा.सु. अंताओ ॥ २. ला. साडिउं समाढत्तो ॥ ३. *लगअंताओ ॥ ४. ला. *वरेणुच्छ* ॥ ५. ला.

णाउ ॥ ६. ला. *ए । एत्थंतरं मो* ॥ ७. ला. समीवे ॥

भविस्संति । [त्ति]भणमाणेण समप्पिओ । तीए वि अणिच्छमाणीए विपरिपालिओ । असोगचंदो त्ति नामं कयं तस्स । असोगवणियाए उज्झियस्स एगा अंगुलिया कुक्कुडियाए पिंछेण कूणिया, सा य पूयं गलइ, तीए य वेयणाए निरंतरं रोयमाणं दट्टूण गया तमंगुलियं मुहे धइ तओ सो रोयमाणो विरमइ । अवि य-

कुक्कुडयपिच्छविद्धं अंगुलियं पूयरुहरिबीभच्छं ।

जाहे चूसइ गया ताहे वियणा न से होइ ॥१५॥

तेण य कारणेणं रमतस्स डिंभरूवेहिं कोणिओ त्ति बीयं नामं ठवियं । तस्स य अणुमग्गजाया हल्ल-विहल्लभिहाणा कुमार । ते य तिण्णि वि राइणा सह रायवाडियाए निग्गच्छंति । ताण य 'रायसत्तु त्ति कोणियस्स चेल्लणा गुलमोयगे हल्ल-विहल्लणं पि खंडमोयगे पेसेइ । सो चित्तेइ मम एयं सेणिओ कारवेइ । एवं च जाव पत्तो जोव्वणं कोणिओ ताव परिणाविओ पउमावईनाम रायधूयं । एवं च-

अभयकुमारईया सुरसरिस्सा सेणियस्स वरतणया ।

उप्पण्णा कयपुण्णा आणंदियमहियलाभोगा ॥१६॥

तओ सव्वजेट्टो सयलगुणगणवरिट्टो नीसेसकलापत्तट्टो चउव्विहबुद्धिलद्धो समत्थरज्जभरुव्वहणपत्तट्टो त्ति काऊण भणिओ अभयकुमारो सेणियराइणा-पुत्त ! पडिच्छाहि रज्जं । तेण य पुट्टो भयवं वीरनाहो-को रायरिसीणं अपच्छिमो ? भगवया भणियं-उद्दायणो । तेण य गहिया पव्वज्ज त्ति काऊण न पडिच्छियं रज्जमभएण गहिया पव्वज्जा । तओ सेणिएण 'कोणियस्स रज्जं दाहामि त्ति हल्ल-विहल्लणं दिण्णो सेयणगकरी, सो रज्जतुल्लो, अट्टारसचक्कहार-कुंडलजुयल-वत्थजुयलाणि य, एयाणि य सव्वाणि कहमुप्पन्नाणि ? तओ सेयणगस्स उप्पत्ती-

अत्थि एगत्थमहारण्णे एगं करिजुहं । तस्स य जो जूहाहिवई सो जाए जाए गयकलभगे विणासेइ, मा समत्था जूहं हरिस्संति । अण्णया य एगा करिणी आवण्णसत्ता चित्तेइ जहा-एएण मम बहुपुत्ता विणासिया ता एगं केणइ उवाएण रक्खेमि त्ति । चित्तिऊण य कओ कुंटयवेसो, मंदं मंदं च परिसक्कइ । तओ सो करिवरो थोवंतरं गंतूण पडिवालेइ, मा अण्णो कोवि करिवरो रामेहिइ । एवं दिणे दिणे अहियाहियं सा कुंटत्तं दरिसंती अद्धपहरओ पहरओ दिणाओ दोण्हं तिण्हं वा दिवसाणं मिलइ । एवं च वीसासेऊण तिण्णपूलियं उत्तमंगे काऊण गया तावसासमं निवडिया ताण चलणेसु । तेहिं वि 'सरणागया

१. सं. वा. सु 'म धूयं । अन्ने य अन्नदेवीणं अभयकुमारपभिइओ अणेगपुत्ता जाय त्ति, अवि-य-अभयकुमारईया ॥ २. ला. वरपुत्ता ॥ ३. तट्टो ॥ ४. ला. वं महावीर ॥

एसा वराईणि' त्ति मण्णमाणेहिं तावसेहिं भणिया जहा-वच्छे ? अच्छ वीसत्था । तओ सा अण्णम्मि दिणे पसूया पहाणं हत्थिरयणं । अवि य-

ससहरकरनियरसमं चउदसणं सव्वलक्खणसमगं ।

भूमिपइट्टियसत्तंगरेहिरं जणइ करिनाहं ॥१७॥

तं च तत्थेव मोत्तूण झड त्ति मिलिया जूहस्स । तओ अंतरंतेणाऽऽगंतूण पोसेइ तं गयपोययं । सो य वडुंतो ते तावसकुमारे गएहिं आरामरुक्खए सिंचंते दट्टूण जलभरियसुंडादंडेण सिंचइ । तओ तावसेहिं सेयणगो त्ति नामं कयं सो परिवतो कमेण जाओ महाकुंजरो । अण्णया य नईए जलपाणत्थं गएण दिट्ठो सो जणयजूहाहिवई । तओ तं च दट्टूणं लग्गो जुञ्जिउं, अवि य-

विंधंति दंतमुसलेहिं दो वि पहणंति सुंडदंडेहिं ।

कोवाऽऽयंबिरनयणा खिवंति तह पत्थरे दो वि ॥१८॥

एवं जुञ्जंताणं सो जणयकरी इमेण तरुणेण ।

जरजज्जरियसरीरो पंचत्तं पाविओ सहसा ॥१९॥

तओ अहिट्टिरुणतं जूहं जाओ सयमेव जूहाहिवई । चित्तिं च तेण जहा-किल जणणीए अहं - छउमेण रक्खिओ, ता भंजिरुण तं आसमपयं तहा करेमि जहा अण्णा वि कावि एवं न रक्खइ त्ति । चित्तिरुण भगं तं आसमपयं । तओ तेहिं तावसेहिं 'पेच्छ पावस्स कयग्घत्तणं' ति रुट्ठेहिं कहिओ सेणियनिवस्स जहा-एरिसो तारिसो तुह भवणजोग्गो रण्णे रायकुंजरो चिट्ठइ ता सो धिप्पउ । सेणिएणाऽवि तक्खणं चैव गंतूण बंधिरुणाऽऽणीओ । तओ आगलिओ आलाणखंभे । एत्थंतरम्मि य तेहिं तावसेहिं भणिओ जहा-भो सेयणग ? केरिसी तुह अवत्था वट्टइ ? त्ति, पत्तं अम्ह आसमपयभंजणस्स फलं । तेण वि 'अहं एएहिं एवंविहं अवत्थं पाविओमि' त्ति रूसिरुण भंजिरुणाऽऽलाणखंभं चूरंतो पच्चासण्णतावसे गओ वणंतरालं । सेणियो वि अणुप्पएणप्पहाविओ । सो य हत्थी देवयाहिट्टिओ । तओ तस्स देवयाए साहियं जहा-तए एरिसं कम्मं विहियं जेण सेणियस्स वाहणेण होयव्वं ति बला वि निज्जिहिसी, ता सयं गच्छंतस्स गोखो सेयणगो विहियोवएसं गिण्हिरुण गओ सयमेव ठिओ आलाणत्थंभे । सेणियस्स कहियं लोगेहिं-देव ! हत्थी सयमेवाऽऽगओ, सेणिएण वि सदेवओ त्ति कलिय कओ पट्टहत्थी । एसा सेयणगस्स उप्पत्ती ।

१. ला. सयललं ॥ २. गडूए ॥ ३. ला. कावि न करेज्ज इमं ति चित्तिं ॥ ४. ला. च्छ एयस्स ॥ ५. ला. अणुपिट्ठओ पहा ॥ ६. ला. निव्वत्तियं ॥ ७. णखंभे ॥ ८. ला. कलिरुण ॥

इयाणि. हाराईणं-

अत्थित्थ भरहवासे कोसंबीपुरवरीए सुपसिद्धो ।
 राया सयाणिओ त्ति य सूरुवीरो य विक्कंतो ॥२०॥
 अण्णो वि तत्थ निवसइ, मुख्खदिओ सेडुउ त्ति नामेणं ।
 सो गुव्विणीए भज्जाए पणइओ घय-गुलाईयं ॥२१॥
 तेण वि भणियं भद्दे ! अहं न याणामि किंचि विण्णाणं ।
 सा भणइ पुप्फहत्थो ओलग्गसु नरवरं गंतुं ॥२२॥
 तो तीए उवएसं, तह चेव य सो करेइ अणवरयं ।
 अह पत्तो उज्जेणीपूरीए निवचंडपज्जोओ ॥२३॥
 आगंतूण सयाणियरायं विग्गहइ सो वि तस्स भया ।
 उत्तरिउं कार्लिदि उत्तरकूलम्मि संठाइ ॥२४॥
 उत्तरिउं अचयंतो कार्लिदि सो वि दाहिणे कूले ।
 चिट्ठइ इयरो वि तयं पीडइ उक्खंदबाणेहिं ॥२५॥
 उक्खंदेहिं परद्धो पज्जोओ वलइ निययपुरहुत्तं ।
 दिट्ठो पुप्फ-फलाणं गएण सेडुययभट्टेण ॥२६॥
 आगंतुं वद्धावइ सयाणियं सेडुओ जहा देव ! ।
 नियघरहुत्तं वच्चइ सेण्णं पज्जोयरायस्स ॥२७॥
 तेणं पियवयणेणं तुट्ठो राया पयंपई विप्पं ।
 'मग्गसु जं तुह रुइयं' सो जंपइ 'देव ! नियपत्ति ॥२८॥
 पुच्छित्ता मग्गिसं' राया वि हु भणइ होउ एवं ति ।
 सो गंतुं नियगेहे साहइ सव्वं पि भज्जाए ॥२९॥
 भट्टिणि ! जह मह तुट्ठो राया मग्गेमि भणसु जं रुइयं ।
 सा जंपइ मग्ग निवं भोयणमग्गासणे भट्ट ! ॥३०॥
 पइदियहं तह दीणारदक्खिणं पुणखणंतरं एक्कं ।
 उस्सारगं तु मग्गसु इय भणिओ जाइ निवपासे ॥३१॥

मग्गइ जह सिक्खवियं राया वि हु मुद्धओ त्ति कलिरुण ।
 पडिवज्जिय तं सव्वं दिणे दिणे कुणइ अक्खलिय ॥३२॥
 ऊसारगट्टियं तं दट्ठं लोगो विचितए एवं ।
 'एसो निववल्लहओ भयामु अम्हे वि जेणेसो ॥३३॥
 अम्हाणं पि हु कज्जं विण्णवई तह य आवईए य ।
 जायइ य परित्ताणं इय चितिय भणइ से लोगो ॥३४॥
 तो दक्खिणलोभेणं पुव्विल्लं वमियं अन्न गेहेसु ।
 जाइ तओ वित्थरिओ रिद्धीए पुत्त-मंडेहिं ॥३५॥
 वमणस्स कुसुद्धीए कोढो अइदारुणो समुप्पण्णो ।
 मंतीहिं तयं दट्ठं विण्णविओ नरवई एवं ॥३६॥
 संचारिमरोगोऽयं बाढं ता देव ! भोयणमिमस्स ।
 अग्मासणम्मि पुत्ता कुणंतु तं मण्णए राया ॥३७॥
 तो भणिओ मंतीहिं भट्ट ! तुमं संपयं निययपुत्ते ।
 जइ दंससि रायाणो अणुवत्तइ ता तह च्चेय ॥३८॥
 तेण वि तं पडिवज्जिय निययसुया दंसिया नरिदस्स ।
 भणियं च देव ! एए मह पडिवत्तीए दट्ठव्वा ॥३९॥
 रण्णा वि तहा विहियं तत्तो पायं घरम्मि सो थक्को ।
 लज्जंतेहिं य तेहिं पुत्तेहिं घरस्स दारम्मि ॥४०॥
 कुडियं काउं ठविओ सूयायंतीओ ताओ वहुयाओ ।
 उव्वरियं भत्ताई दिंति अवण्णाए दूरत्था ॥४१॥
 किं बहुणा ? सव्वं पि हु कुटुंबमह पासिउं तयं भट्टं ।
 निट्ठुवई सूयाए तं दट्ठुं चितए एसो पेच्छह कह पावाइं ॥४२॥
 मज्झ पसाए पत्तविहवाइं ।
 जायाइं तह वि महं कुणंति नणु परिभवंकह णु ? ॥४३॥
 तो एयाणं एयं (वं)उम्मत्ताणं सिरम्मि पाडेमि ।
 दुव्विलसियफलमेयं जंपइ हक्कारिउं पुत्ते ॥४४॥

१. सं.वा.सु. सूयाइंतीओ ॥ २. सं.वा.सु. पभावेण ॥ ३. सं.वा.सु. 'भवं गरुयं ॥४३॥

पुत्त ! अहं निव्विण्णो इमस्स दुहयउरजीवियव्वस्स ।
 ता वेयविहाणेणं चयामि तित्थम्मि नियजीयं ॥४५॥
 ता आणह पसुमेगं मंतविहाणेण जेण पोसेउं ।
 तुम्हाणं दाऊणं पच्छ तित्थम्मि वच्चामि ॥४६॥
 तो तेहिं हरिसिएहिं बलवं सुपमाणओ अओ एक्को ।
 आणेऊणं बद्धो खट्टाए तस्स पासम्मि ॥४७॥
 सो नियदेहं उव्वट्टिऊण भक्खावए तयं सव्वं ।
 थोवेहिं य दियेहेहिं महकुट्टी छालओ जाओ ॥४८॥
 अभिमंतिऊण य तयं अप्पइ पुत्ताण जह इमं पुत्ता ! ।
 वेयविहियं ति काउं भक्खह सह दार-पुत्तेहिं ॥४९॥
 तेहिं वि सव्वं विहियं कालेणं ते वि रोगिणो जाया ।
 इयरो वि य निग्गंतुं वच्चइ उट्टंकिरिसिहरं ॥५०॥
 तत्थ य बहुविहतरुवरकसायपउरे गिरिस्स कुहरम्मि ।
 आकंठं परिपीयं तेण विरिक्को लहुं एसो ॥५१॥
 कइवयदियहेहिं तओ पगुणीहूओ पुणणवो जाओ ।
 चितइ 'गिहम्मि गंतुं पेच्छामि ताण जं जायं' ॥५२॥
 अह आगओ गिहम्मि पुच्छिज्जइ सयण-नगरलोएणं ।
 'कह एरिसयं देहं संजायं भट्ट ! तुह ? कहसु' ॥५३॥
 सो वि हु मायाजुत्तो जंपइ 'तुट्टाए देवयाए इमं ।
 विहियं' इय जंपंतो पत्तो निययम्मि भवणम्मि ॥५४॥
 जा पेच्छइ ताणि तओ गलंतंकोडेण सडियअंगाणि ।
 पभणइ य 'मज्झ दुव्विणयविलसियं भुज्जए एयं' ॥५५॥
 तेहिं तओ पडिभणियं 'किं तुमए एरिसं कयं कम्मं ?' ।
 सो भणइ 'एवमेयं अन्नस्स कओ इमा सत्ती ?' ॥५६॥
 तं सोउं सव्वो वि हु नयरजणो भणइ 'किं कयं पाव ? ।
 पियरेण वि होऊणं अच्चंतं निद्दयमकज्जं ?' ॥५७॥

सो जंपइ 'पियरम्मि वि ममम्मि एयाण किं तयं जुत्तं ।
 जं एएहिं विहियं ?' तहावि परिखिसए लोगो ॥५८॥
 खिसाभएण सो वि हु गंतुं रायगिहनगरदारम्मि ।
 दोवारियस्स पासे समस्सिओ चिट्टए जाव ॥५९॥
 ता भयवं भवमहणो समोसढो तत्थ वीरनाहजिणो ।
 हल्लप्फलो य लोगो निग्गच्छइ वंदणट्टाए ॥६०॥
 तं पोलीय दुवारे ठविऊणं भणइ दारपालो उ ।
 'खायसु तुमं जहिच्छं दुवारदेवीए नेवज्जं ॥६१॥
 मोत्तूण दारदेसं अन्नत्थ कहिं पि नेय गंतव्वं' ।
 इय तज्जिऊण एसो वच्चइ जिणवंदणनिमित्तं ॥६२॥
 बहुभक्खणा उ सो वि हु अच्चंतं पीडिओ नणु तिसाए ।
 दोवारियबीहंतो न गच्छए नीरपाणत्थं ॥६३॥
 'नीरंनीरं' ति तओ ज्ञायंतो मरिय एक्कवावीए ।
 संजाओ मंडुक्को सालूरीगब्भमज्झम्मि ॥६४॥
 गब्भाओनीहरिउं जा जाओ जोव्वणम्मि संपुण्णो ।
 ताव य पुणो वि पत्तो तिलोगबंधू जिणो वीरो ॥६५॥
 तो तस्स वंदणत्थं निर्वस्स वच्चंतयस्य उल्लवे ।
 सोऊणं सो चितइ नणु सुयपुव्वो इमो सद्दो ॥६६॥
 ईहापूहाइ तओ जाइस्सरणं इमस्स उप्पणं ।
 चलिओ य वंदणत्थं उप्फिडमाणो जिणिदस्स ॥६७॥
 जा पत्तो रायपहे ता सेणियरायसेण्णतुरएणं ।
 अक्कंतो सुमरंतो जिणवीरं पाविओ निहणं ॥६८॥
 नामेण दहरंके विमाणपवरम्मि सुरवरो जाओ ।
 दट्टूणं पुव्वभवं एइ दुयं जिणसयासम्मि ॥६९॥
 निसुओ य सुरिदेणं वणिज्जंतो उ सेणियनरिदो ।
 जह सम्मत्तम्मि इमो दढचित्तो सेलराओ व्व ॥७०॥

तो तस्स परिव्खत्थं कोढियरूवं विउव्वियं तियसो ।
 लिपइ नियरसियाए निरंतरं सामिणो पाए ॥७१॥
 तं दट्टूण नरिदो कोवफुरप्फुरियउट्टुजुयलिल्लो ।
 चितइ “पिच्छह पावो परिभवइ कहं तिलोयगुरुं ॥७२॥
 ता निहणामि एयं गुरुपरिभवकारिणं महापावं ।
 अहव न जुत्तं एयं परमेसरपायमूलम्मि ॥७३॥
 जम्हा हु उवसमंती समत्थवेराणि भगवओ पुरओ ।
 ता निग्गच्छउ एसो पच्छ काहामि जं जोगं” ॥७४॥
 एत्थंतरम्मि छीए जिणेण सो भणइ ‘मरसु सिग्घं ति ।
 अहिययरं परिकुविओ “पावस्स अहो ! अवण्ण त्ति ॥७५॥
 जम्हा सामण्णेण वि, छीयम्मि जणो पयंपई ‘जियसु’ ।
 एसो उ भयवओ वि हु कह जंपइ निट्टुरं वयणं ?” ॥७६॥
 एवं चितंतेणं छीयं तेणेव सेणियनिवेण ।
 अह कुढिएण पलत्तं ‘सुइरं तं जियसु नरनाह !’ ॥७७॥
 चितइ पुणो वि राया ‘हुं मज्झ भएण भणइ जियसु’ त्ति ।
 अभएण वि छीर्याम्मि ‘मरसु व जीवसु व’ सो भणइं ॥७८॥
 कालयसोयरिण वि छीए ‘मा जीव मा य मरसु’ त्ति ।
 इय जंपिऊण तियसो निक्खंतो समवसरणाओ ॥७९॥
 अह सन्निया य पुरिसा दिट्ठीए सेणिएण जह एयं ।
 गिण्हह ते पुट्ठीए जा लग्गा ताव सो तियसो ॥८०॥
 गयणम्मि समुप्पइओ होऊणं ललियकुंडलाभरणो ।
 पुरिसा वि सेणिएणं घरम्मि पत्तेण परिपुट्ठा ॥८१॥
 तेहिं वि सव्वं कहियं तओ नरिदस्स विम्हओ जाओ ।
 बीयदिणम्मि य पुट्ठो वुत्तंतं सिरिजिणो भयवं ॥८२॥
 कहिओ य भगवया से ‘एसो देवो हु दहुरंको’ त्ति ।
 भणइ निवो ‘जइ देवो ता रसियं लायए कीस ?’ ॥८३॥

भयवं पि भणइ न हु सा रसिया गोसीसचंदणं तं तु ।
 किंतु तुह दिट्ठीमोहो परिकखणत्थं कओ तेण' ॥८४॥
 भणइ निवो 'जइ एवं छीयाईयं कहां णु संघडइ' ।
 भयवं पि भणइ "सच्चं सव्वं पि हु तेण तं भणियं ॥८५॥
 मज्झं मयस्स मोक्खो होही जीवंतयस्स पुण दुक्खं ।
 तुह पुण इहइं रज्जं मयस्स नरयम्मि पुण गमणं ॥८६॥
 अभओ अज्जेइ गुणे इहइं पाविहिइ पुण परे सगं ।
 सोयरिओ पुण पावं कुणइ परे वच्चिही नरयं" ॥८७॥
 सोऊण जंपइ निवो 'तुब्भेहिं विसामिएहिं किं नरयं ।
 वच्चिस्सामि ?' जिण्णिदो भणइ इमो 'भाविओ भावो ॥८८॥
 होति' नियतिकखनारयदुहमोहविमोहिओ नरवरिदो ।
 जंपइ 'तहा वि भयवं ! किमत्थि विणिवारणं किं पि ? ॥८९॥
 जेण न गम्मइ नरये' भयवं पि हु भणइ 'अत्थि जइ कविलं ।
 दावसि जईण भिक्खं सोयरियं रक्खसे हिंसं' ॥९०॥
 इय एवं सोऊणं वंदित्ता जा गिहम्मि संचलिओ ।
 तुट्टेण दहुरंकेण ताव दिण्णो नरिदस्स ॥९१॥
 अट्टदसचक्कहारो वट्टयजुयलं च जंपियं तह य ।
 तुट्टमिमं जो हारं संधिस्सइ सो धुवं मरिही ॥९२॥
 दिण्णो य चेत्थणाए हारो वट्टयजुयं च नंदाए ।
 रुट्ठा जंपइ 'किमहं जुग्गा एयस्स दाणस्स ? ॥९३॥
 डिंभाणं चिय जोगं एयं' एवं पयंपमाणीए ।
 अप्फोडियं च खंभे सहस च्विय रोसभरियाए ॥९४॥
 एकत्तो वत्थजुयं कुंडलजुयलं तहेव बीयाओ ।
 निक्खंतं महमोळं धावित्ता गिण्हए तुट्ठा ॥९५॥
 कविला वि नरवरेणं, भणिया 'भिक्खं पयच्छ साहूणं ।
 जेण पयच्छमि धणं जं रुइयं तुज्झ चित्तस्स' ॥९६॥

सा जंपइ 'सव्वंगं जइ वि हु वरकणयनिम्मियं कुणसि ।
 जम्मंतरे वि तह वि हु एवमहं नो करिस्सामि' ॥९७॥
 सोयरिओ वि हु भणिओ, 'चय हिंसं देमि गाम-नगराइं' ।
 सो भणइ "वल्लहं पिवपियं न सक्केमिमं चइउं ॥९८॥
 को वा पहु ! इह दोसो थोववहे जेण भूरि जीवंति ।
 जीवा अओ न हिंसं पाणच्चाए वि वज्जेमि" ॥९९॥
 एवं जाव उवाओ न सक्किओ नरवरेण काउं जे ।
 तो अधिईसंपण्णो वच्चइ जिणपायमूलम्मि ॥१००॥
 भणिओ जिणेण 'नरवर ! मा झूरसु जेण आगमिस्साए ।
 होहिसि पढमजिणिदो नामेणं पउमनाहो' त्ति ॥१०१॥
 तं सोऊणं जाओ हरिसवसुल्लसियबहलरोमंचो ।
 वंदित्ता य जिणिदं पुणो वि निययं गओ गेहं ॥१०२॥
 एवं हारस्स इमा, उप्पत्ती तह य कुंडलजुयस्स ।
 वत्थजुगस्स य कहिया संपइ पगयं निसामेह ॥१०३॥

तओ अभयकुमारमायाए सुनंदाए अभयकुमारेण सह पव्वयंतीए दिण्णाणि हल्ल-
 विहल्लणं कुंडलजुयल-वत्थजुयलरयणाणि । चेल्लणाए वि ताण चेव दिण्णो अट्टारस वंको हारो ।

एत्थंतरम्मि य चित्तियं कोणिएणं जहा-न देइ मज्झ रज्जं सेणियो ता बला वि
 गिण्हामि' त्ति चित्तयंतेण भेइया कालादयो दस कुमार, भणिया य ते कोणिएण जहा-
 'बंधामो तायं, पच्छा रज्जं एक्कारसहिं विभागेहिं भुंजिस्सामो' त्ति । सामत्थिऊण, बद्धो
 सेणियनरिदो, पक्खित्तो कट्टहरण । चेल्लणा वि न लहइ पयडं पवेसं, देइ य दिणे दिणे
 अट्टुत्तरसयं कसघायाणं । चेल्लणा वि सयंधोयसुराए केसपासं वोलिऊण कुम्मासर्पिडियं च
 गोविऊणं देइ दिणे दिणे तेण य मज्जपाणएणं न वेएइ ते कसघाए सम्मं । एवं च
 विभत्तमेक्कारसहिं विभाएहिं रज्जं ।

अण्णया कोणियस्स पुतो पउमावईकुच्छिसमुब्भवो उदाई नाम कुमारे, तेण य
 उच्छंगगएण कोणियो भोयणं भुंजइ । तओ तेण थाले मुत्तियं । 'मा पीडा होहि' त्ति न
 चालिओ । तत्तियं च थालाओ कूरमवणेऊण सेसं भुत्तुमाढत्तो । इओ य तम्मि चेव समए
 चेल्लणा से पासपरिवत्तिणी । तओ संजायाणंदेण य पुट्टा जणणी कोणिएण-'अम्मो ! किम-

णस्साऽवि एयारिसो सुओ वल्लहो जारिसो ममं ?' चेल्लणाए भणियं-अइअहव्व ! केयारिसो एस तुह वल्लहो ?, जारिसो तुमं नियपिउस्स वल्लहो आसि, जओ एयं तुह अंगुलियं पूईयसिडिहिडंतयं राया वेयणावहरणत्थं वयणम्मि धरंतओ आसि, तहावि नियजणयस्स तए एरिसं ववसियं । तेणं पडिभणिया-जइ एवं तो रायवाडियागयाणं अम्हाणं कीस मम गुलमोयगे पेसितो हल्ल-विहल्लणं पुण खंडमोयगे ?' चेल्लणाए भणियं-'आ अणज्ज ! तं सव्वं रायवेरिओ त्ति काऊण अहं कुणंती' । तओ कोणिएण भणियं-'अम्मो ! जइ एवं ता असोहणं कयं मए जं नियपिया आवइं पाविओ । ता संपयं नियले भंजिऊण रज्जे ठवेमि त्ति परसुं गहाय नियलभंजणत्थमुद्दाइओ । दिट्ठो य पाहरिएहिं तहा समागच्छंतो । दट्टूण य पायवडिएहिं विण्णत्तो तेहिं सेणिओ जहा-'देव ! अण्णया सो तुम्ह दुप्पुत्तो कसविहत्थो आगच्छंतो अज्ज पुण परसुविहत्थो समागच्छइ' । सेणिएणं वि 'न नज्जइ केणइ कुमारेण मारिहिइ' त्ति चित्तिऊण तालपुडविसं जीहग्गे दिण्णं । तेण य सेणिओ पंचत्तमुवगओ । तं च तारिसं दट्टूण कोणिओ विसायमुवगओ विलविउमाढतो, अवि य-

खमसु महायस ! जं मे अयाणमाणेण तुज्झ अवयरियं ।

पणिवइयवच्छल च्चिय हवंति लोगम्मि नणु जणया ॥१०४॥

पडिवयणपयाणेणं दुक्खमिमं ताय ! हर ममाहितो ।

नत्थि तुमाओ अण्णो जो सोगमिमं पणासेइ ॥१०५॥

कयपुन्नसुएहिं तो जणया पावेंति सव्वसोक्खाइं ।

पत्तं ममाउ मरणं ताएण विसुद्धभावेण ॥१०६॥

इय एवमाइबहुविहविलवंतो उज्झिऊण नियरज्जं ।

निव्वावारे चिट्ठइ सोगानलताविओ राया ॥१०७॥

'अहो ! विण्णं रज्जं इमिणा मोहमुवगएण, ता किमित्थ कायव्वं ?' त्ति चित्तंतेहिं भणिओ राया मंतीहिं - देव ? अलं सोगेण परलोगगयस्स पिउणो, पवत्तेसु पिंड-जलाइ-दाणं जेण सो तत्थ पावइ । तओ तह त्ति पडिवज्जिऊण पवत्तियं सव्वमिणं कोणिगण । कालेण अप्पसोगा जाओ । तप्पभिइं च सव्वलोगेण वि पवत्तियं पिंडदाणा-इयं । तस्स य कोणिय नरिदस्स तत्थ रायगिहे नयरे पिउणो कीलाइठणाणि पेच्छमाण-स्स पइदिणमुप्पज्जए सोगो । तओ भणिया तेण महंतया जहा-अण्णं पुरं निवेसह । तेहिं वि तह त्ति पडिवज्जिऊण वेत्थुविज्जाजाणगा पेसिया नयरजोग्गट्टाणगवेसणनिमित्तं ।

तेहि वि दिट्टो एगत्थ ठाणे महंतो अइपरूढवित्थरो पुप्फाइसोहासमुदओववेओ अणेगसउणगणसेविज्जमाणो चंपयरुक्खो । तं च दट्टूण चितियमणेहि-‘अहो ! जइ एत्थ ठाणे नयरं कीरइ तो एवं सोहासमण्णियं पभूयजणाहारं च भवइ’ । एवं च चितिरुण निवेसिया तत्थ ठाणे चंपा नाम महापुरवरी । गओ य तत्थ सबलवाहणो कोणियनरिदो, भुंजए य सइच्छए महारज्जसिरि । अण्णया य ते हल्ल-विहल्ल कुमारा सेयण्यमहा- गंधहत्थिखंध-समारूढा हारइरयणविभूसिया देवकुमार व्व कीलंति, अवि य-

सेयणगगंधहत्थि आरूढा सुरवर व्व दीसंति ।

हारेत्थयवच्छयला वरकुंडलभूसियकवोला ॥१०८॥

वरदेवदूससंवुयदेहा निच्चं ललंति परितुट्टा ।

दट्टूण ताण लच्छि चितइ पउमावई देवी ॥१०९॥

‘रज्जं परमत्थेणं हल्ल-विहल्लण अंमह पर सद्दो ।

दोगुंदुगदेवा इव रमंति जे विविहकीलार्हि’ ॥११०॥

एवं च चितिरुण भणिओ कोणियनरिदो जहा-‘नाह ! नाममित्तेण चेव अम्ह रज्जं, परमत्थओ पुण कुमाराण, ता मग्गेहि एयाण पासाओ रयणाणि’ । तओ भणियं राइणा-‘देवि ! कहां पिउणा अंबाहिय दिण्णाणि रयणाणि मग्गिज्जं’ति ?, महंतो एस अयसो, ता एयं न करेमि त्ति’, भणिए ठिया तुण्हक्का देवी ।

तओ पुणो वि अण्णया य भणिओ तत्थ वि निसिद्धा । तइयवाराए एवं जंपियं पउमावईए-नाह ! अवस्समेव कायव्वमेयं जइ मए जीवमाणीए पओयणं । तओ पडिवन्नं राइणा अणवरयभणिणं तम्मोहमोहिण य, यत उक्तम् -

पाषाणजालकठिनोऽपि गिरिर्विशालः, सम्भिद्यते प्रवहता सततं जलेन ।

कर्णोपजापनिपुणैः परिधृष्यमाणः, को वा न याति विकृतिं दृढसौहृदोऽपि ॥३६७॥

तथा

ददाति शौचपानीयं, पादौ प्रक्षालयत्यपि ।

श्लेष्माणमपि गृह्णाति, स्त्रीणां वशगतो नरः ॥३६८॥

किं न दद्यात् किं न कुर्यात्, स्त्रीभिरभ्यर्थितो नरः ।

अनश्वा यत्र हेषन्ते ऽपर्वणि मुण्डितं शिरः ॥३६९॥

५^२ किञ्च-

स्त्रीणां कृते भ्रातृयुगस्य भेदः, सम्बन्धभेदे स्त्रिय एव मूलम् ।

अप्राप्तकामा बहवो नरेन्द्रा, नारीभिरुत्सादितराजवंशाः ॥३७०॥ ५

तओ अण्णदियहम्मि भणिया कुमारा राइणा जहा-वच्छ !

समप्पेह मे रयणाइं, जेण देमि तुम्हाणं रज्जस्सद्धं । कुमारेहिं कवडेण भणियं-जं देवो आणवेइ त्ति । भणिरुण गया नियगेहं । तओ परोप्परं मंतियमिमेहिं जहा-न सोहणो एयस्साऽभिप्पाओ, ता वच्चाओ रयणाणि घेतूण अज्जयसयासं । को य तेसिं अज्जओ ? ,

अवि य-

अत्थि नयरी पहाणा पोराणा सयलगुणगणमहग्घा ।

वरसाला सुविसाला वेसाला सोहियट्टाला ॥१११॥

तं च परिपालए हेहयकुलुब्भवो चेडओ नाम महाराया, जो य -

अहिगयजीवा-ऽजीवो उवलद्धपुण्ण-पावो आसव-संवरनिज्जरा-किरिया-ऽहिगरण-बंध-मुक्खकुसलो असहेज्जदेवा-ऽसुरगरुल-गंधव्व-जक्ख-किन्नराइएहिं देवगणेहिं णिगंथाओ पावयणाओ अणइक्कमणिज्जो, निगंथे पावयणे निस्संकिओ निक्कंखिओ निव्वितिर्णिछे अमूढदिट्ठी अट्ठिमिजपेमाणुरागरतो, अयमाउसो निगंथे पावयणे अट्टे, अयं परमट्टे सेसे अणट्टे, ऊसियफलिहो अवंगुयदुवारो वियत्तंतेउरघरप्पवेसो चाउद्धसि-अट्टमुद्धिपुण्णमासिणीसु पडिपुण्णं पोसहं समणुपालेमाणो, समणे निगंथे फासुएसणिज्जेणं असण-पाण-खाइम-साइमेणं वत्थ-पडिगहकंबल-पायपुंछणेणं पीढफलग-सेज्जासंधारणं पडिलाभेमाणो, विहरइ । () ॥

स्पष्टश्चाऽयं वर्णकः परं, 'असहेज्ज' त्ति असह्याः=सोढुमशक्याः असहाया वैकाकिनोऽपि सामर्थ्यवन्तो ये देवादयस्तैः । 'अट्ठिमिज' त्ति अस्थिमज्जा=अस्थ्यन्त-वर्ती षष्ठो धातुः, साऽपि जिनदर्शनप्रेमानुरागरक्ता यस्य स तथा, तथाहि- यथा कस्यचित् प्राणिनः केनाऽपि योगेनाऽऽषष्ठधातुर्व्याप्तो भवति न च कथञ्चिदुत्तरति, एवमस्याऽपि जिनदर्शनानुराग इति भावः । 'ऊसियफलिह' त्ति उच्छृतम्=उच्चं स्फटिकमिव स्फाटिकं निर्मलत्वात् सम्यक्त्वं यस्येति भावः, यद्वोच्छ्रितपरिधः=ऊर्ध्वीकृतद्वारगलः । 'अवंगुयदुवारो' त्ति अप्रावृत-द्वारो दीनानाश्चादिप्रवेशार्थं परतीर्थिकप्रवेशेऽपि मम परिवारस्य क्षोभयितुम-शक्यत्वादित्याशयेन वा जिनधर्मप्राप्त्या वा उद्घाटशिरास्तिष्ठामीत्यभिप्रायेण वा । 'वियत्तं' त्ति प्रीत्या । 'उद्धिट्ट' त्ति उद्धिष्टाऽमावास्या, 'पुण्णमासिणी' इति पूर्णमासी ।

१. सं.वा.सु. 'हिं भ' ॥ २. ला. 'माउसा ॥ ३-४. ला. ऊससिय' ॥

एवंविहो य सो चेडओ राया । तेण य भगवओ सयासे दिणमज्जे 'एगं बाणं मोत्तूणं न बीयं मुयामि' त्ति अभिग्गहो गहिओ । तस्स य चेळ्ळणा 'धूयं' त्ति काऊण अज्जओ भवइ हल्ल-विहल्लणं । जहा चेळ्ळणा परिणीया तहा सुलसाक्हाणए पुव्वमावेइयं । तओ ते हल्ल-विहल्ल्हा रयणीए रयणाणि अंतेउरं च गहाय गया चेडयसमीवं । पभाए य कोणिएण नायं तओ चितियं-हन्त ! मम धण-मित्तनासो संजाओ जओ कुमार वि न जाय त्ति । चितिरुण चेडयस्स दूयं विसज्जेइ । कमेण य पत्तो तत्थ दूओ । पडिहारणुन्नाओ य पविट्ठो । कयजहारिहकायव्वो य विण्णवइ, अवि य-

'विण्णवइ देव ? कोणियराया जह पणयकोवपरिकुविया ।

पेसिज्जंतु कुमार गयाइरयणेहिं संजुत्ता' ॥११२॥

तओ भणियं चेडएण, अवि य-

'जे रुसिरुण पत्ता ते जइ सयमेव जंति तो लट्ठं ।

मड्ढाए पुणो कुमरे रे दूय ! अहं न पेसेमि' ॥११३॥

तओ पुणो वि जंपियं दूएण, अवि य-

'जइ सरणागयवच्छल ! कुमरे नो पट्टवेसि ता तुरियं ।

पेसेसु य रयणाणि उ' भणिओ दूएण नरनाहो ॥११४॥

तेण वि भणिओ दूओ जइ य सयं दिति करिवरं कुमार ।

ता गिण्हिरुण वच्चसु राया कुमार वि मम सरिसा ॥११५॥

दूएण वि सविसेसं गंतूण साहियं कोणियस्स जहा-न अप्पेइ रयणाणि अज्जगो । तं च सोऊण रोसवसतडियभिउडिभासुरतिवलीतरंगभंगुरभालवट्टेणं भणियं रइणा-अरे ? लहुं गंतूण भणसु अज्जयं 'जइ रयणाणि न अप्पेसि तो जुज्झसज्जो भवाहि । तहा कहिए य दूएण चेडएण भणियं-जं रोयइ तं कुणसु, नाऽहं बलामोडीए कुमारे रयणाणि वा अप्पेमि जओ-

सरणागयं चयंता अयसं गिण्हंति सासयं पुरिसा ।

नियसत्तीए तं चिय रक्खंता निरुवमं किंत्ति ॥११६॥

तओ गंतूण सव्वं निवेइयं दूएण कोणियस्स । तव्वयण-सवणाणंतरं च ताडविया कोणिएण पयाणयभेरी, अवि य-

फोडइ व गयणमगं दलइव्व महीयलं असेसं पि ।

कोणियनिवपत्थाणयभेरीसद्धो समुच्छलइ ॥११७॥

सोऊण तीइ सहं खुहिया सव्वा वि पुरवरी सहसा ।
 सन्नज्झिउं पवत्तो सव्वो वि हु तत्थ पुरलोगो ॥११८॥
 कालाइया कुमार चउविहनियसिन्नपरिवुडा तुरियं ।
 संपत्ता निवपासे सो वि हु सुहलग्गजोगम्मि ॥११९॥
 ण्हाओ कयबलिकम्मो सियवत्था-ऽऽहरण-कुसुमसोहिल्लो ।
 धरियधवलायवत्तो विणिग्गओ झ त्ति नयरीओ ॥१२०॥
 कालाइकुमाराणं एक्केक्कस्स य झरंतगंडाणं ।
 तिण्णेव य तिण्णेव य लक्खा हत्थीण तुंगाणं ॥१२१॥
 संगामकरणदच्छ आउहआवरणपूरिया सझया ।
 वरतुरयसंपउत्ता तत्तियमित्ता वररहा वि ॥१२२॥
 मणपवणजइणवेगा सावरणा पवरजोहपरिगहिया ।
 खुरखुन्नखोणिवट्ठा तत्तियमित्ता तुंगा वि ॥१२३॥
 एकलपाइक्काणं कोडीओ तिण्णि तिण्णि पत्तेयं ।
 सन्नद्धबद्धकवयाण विविहवरपहरणकरणं ॥१२४॥
 जाव इयं तु दसण्ह वि सेण्णं कालाइयाण कुमराणं ।
 तावइयं एक्कस्स वि सिरिकोणियराइणो सेण्णं ॥१२५॥
 कालाईहिं समेओ अणवरयं जाइ कोणियनरिंदो ।
 दसहिं दियंतेहिं समं पाउसमेहो व्व गज्जंतो ॥१२६॥
 सव्वं पि इमं सिट्ठं चेडयरायस्स चारपुरिसेहिं ।
 सो वि तयं सोऊणं मेलइ सव्वं पि नियसेण्णं ॥१२७॥
 अट्ठारस वि नरिंदा गणरायाणो समागयां झ त्ति ।
 तेसिं पि य बलसंखा नायव्वा होइ एगस्स ॥१२८॥
 तिण्णि सहस्सकरीणं इत्तियमेत्ता रहा तुंगा वि ।
 तिण्णेव य कोडीओ पाइक्काणं सुपक्काणं ॥१२९॥
 सव्वेसिं बलसंखा एसा एयाण होइ पत्तेयं ।
 एयाण सव्वसंखातिगुणा सिरिचेडयबलस्स ॥१३०॥

एवं च चेड्यबलं पि अणवरयपयाणेहिं गच्छंतं पतं विसयसंधिं जाव मिलियाइं
दोणिण वि अग्गाणीयाइं, पवाइयाइं रणतूराइं अवि य-

वाइय जमलसंख अइभीसण, वाइय भाणयसमढक्कासण ।
वाइय काहल अइतारस्सर, वाइय भेरिचक्क गहिरस्सर ॥१३१॥
वाइय पडह भुयंग समहल, गुरुयनायउक्कपियपरबल ।
वाइय झल्लरि करड सुनिदय, वाइय कंसालय वरसदय ॥१३२॥
वाइय डमरुय डक्क भयंकर, वाइय पडहय दारियकायर ।
इय वाइउ खरतूरमहागणु, गहिरसदि जह फुडइ नहंगणु ॥१३३॥
इय एवं सोऊणं समरमहाग^३हिरतूरनिग्घोसं ।
जयसिरिलुद्धाइं दढं भिडंति अह दुन्नि वि बलाइं ॥१३४॥
तुरया तुरंगमाणं रहाण रहिणो गयाण वि गइंदा ।
समयं चिय संलग्गा सुहडा दप्पुद्धरभडाणं ॥१३५॥

एवं च जायं महासंगरं, अवि य-

पडंतछत्तचिधयं, लुढंत छिन्नगतयं ।
पयट्टलोहियावहं, भमंत भूरिसावयं ॥१३६॥
पडंतमत्तकुंजरं, जायंतबाणपंजरं ।
भज्जंतसंदणोहयं, छिज्जंतचिधसोहयं ॥१३७॥
खिप्पंतसेल्ल-सव्वलं, अणेगसत्थसंकुलं ।
घोसंतनाम-गोत्तयं, पढंत भट्टजुत्तयं ॥१३८॥
छिज्जंतणेयसीसयं, हेसंत भिन्नआसयं ।
तुट्टंतखग्गभीसणं, सुव्वंतणेयनीसणं ॥१३९॥
इय कायरजणकयबीहणयं, सुहडोहविमुक्कसुसीहणयं ।
इइछाइयदिसिकयमोहणयं, इय जायं तं रणयंगणयं ॥१४०॥

इय गंधव्व-सिद्ध-विज्जाहरछाइयगयण मग्गए,
भीमभमंतदुट्टकत्तियकरडाइणिसयसमग्गए ।

चेडयसेण्णदिण्णअइदारुणघायविभिन्नगतयं,
 कोणियरायसेण्णु नीसेसु वि भग्गं मुक्कसत्तयं ॥१४१॥
 तं भग्गं दट्ठूणं आसासितो खणेण सेणाणी ।
 कालयघणो व्व वरिसइ कालो सरनियरधारहिं ॥१४२॥
 तस्स सरनियरधारसमाहयं सायरं व पक्खुहियं ।
 सायरवूहं सव्वं चेडयराएण जं रइयं ॥१४३॥
 तं भिदेउं एसो पविसइ मज्झम्मि तस्स वूहस्स ।
 जत्थऽच्छइ सयमेव य चेडयरायाहिराओ त्ति ॥१४४॥
 तं दट्ठूणं चितइ चेडयराया अहो ! णु एयस्स ।
 न वि छुट्टइ मह सेण्णं जा न वि वावाइओ एसो ॥१४५॥
 इय चित्तिऊण मुक्को दिव्वसरो तेणं तेण सो भिन्नो ।
 संपत्तो कालघरं कालो सेणावई सहसा ॥१४६॥
 तो नायगपरिहीणं तं सेण्णं वलइ कोणिओ वितओ ।
 उवसंहरिउं समरं दिणसेसे ठइ सट्ठाणे ॥१४७॥
 अह बीयदिणम्मि तओ महकालो नाम बीयओ भाया ।
 सयमेव कोणिएणं सितो सेणाहिवत्तेण ॥१४८॥
 सो वि हु एगसरेणं बीयदिणे घाइओ नरिदिण ।
 एवं दसहिं दिणेहिं पट्टविया दस वि जमगेहं ॥१४९॥
 अह कोणिओ विचितइ 'अज्जयबाणस्स को किर समत्थो ।
 पुरओ ठाउं तम्हा मज्झ वि पुण्णोऽवही मण्णे' ॥१५०॥
 इय चित्तंतस्स तओ तस्स मई एरिसा समुप्पण्णा ।
 जह 'आराहेमि अहं सुरनाहं पुव्वसंगइयं' ॥१५१॥
 तो सुरनाहाराहणहेउं सो कुणइ तिण्णि उववासे ।
 चलियासणो खणेणं समागओ सुखई तत्तो ॥१५२॥
 मह ठाणाओ चविउं एसो नणु कोणिओ समुप्पण्णो ।
 मह तुल्लो आसि इमो इय नाउं एइ चमरो वि ॥१५३॥

इय असुरिद-सुरिदा दोणि वि जंपंति कोणियं एवं ।

'भण किं कीरउ नरवइ ?' सो जंपइ 'चेडयं हणह' ॥१५४॥

जंपंति ते वि 'साहम्मियस्स वरसावयस्स एयस्स ।

पहरामो न कर्हिचि वि भण अण्णं किं पि करणिज्जं ॥१५५॥

तो कोणिओ पयंपइ जइ एवं आगयं महं मरणं ।

को चेडयबाणाओ किर छुट्टइ चक्कवट्टी वि ॥१५६॥

तं सोऊणं इंदा भणंति तुह देहरक्खणं कुणिमो ।

जंपइ कोणिओ 'एवं होउ व पुण्णं महं णेण' ॥१५७॥

चमरेण तओ विहिओ महासिलाकंटओ य रहमुसलो ।

दो संगामा घोरा कोणियरायस्स हियहेउं ॥१५८॥

पढमम्मि कंटओ वि हु सत्थपहाराओ होइ अब्भहिअे ।

तह कक्करो वि लग्गो महासिलासान्निहो होइ ॥१५९॥

बीयम्मि रहो मुसलं च दो वि सुण्णा सणाइं हिंडंति ।

चमरस्स पभावेणं जणनिवहमहाखयकराणि ॥१६०॥

इय तत्थ तिण्णि इंदा सुरिद-असुरिद-माणुसिदा य ।

चेडयनिवेण सर्द्धि कुणंति अइभीसणं समरं ॥१६१॥

अह चेडयनरवइणो वरुणो नामेण सारही सुहडे ।

रहमुसलं संगामं देइ समं कोणियनिवेण ॥१६२॥

जा सो गाढपहारो जाओ ता नींसरित्तु समराओ ।

रइउं तणसंथारं तत्थ निसण्णो इमं भणइ ॥१६३॥

सरणं मम अरहंता सिद्धा साहू सुयं च धम्मो य ।

पच्चक्खामि य सव्वं आहारं चउपयारं पि ॥१६४॥

एवं आराहेउं पंचनमोक्कारसुमरणपसत्तो ।

उववण्णो सुरलोए देवो वरकंति-दित्तिधरो ॥१६५॥

तम्मि हए वरसुहडे चेडयसेणावइम्मि वरुणम्मि ।

कलयलखं कुणंतं उच्छलियं कोणियस्स बलं ॥१६६॥

तो उट्टिया नरिंदा गणरायाणो सरेहिं वरिसंता ।
 पाउसकालघणा इव अंधारियसयलदिसिविवरा ॥१६७॥
 तो तक्खणेण भग्गं कोणियरायस्स तंबलं सव्वं ।
 गणराईणं तेसिं सरनियरपहारजज्जरियं ॥१६८॥
 तं दट्टुणं भग्गं उट्टुइ सयमेव कोणियनरिंदो ।
 गज्जंतो वग्गतो सीहो इव कुंजरघडाणं ॥१६९॥
 तो तेण मयंदेण व करिजूहं पिव विलोलियं दट्टुं ।
 कुविओ चेडयराया तस्स वहाए मुयइ बाणं ॥१७०॥
 फालियसिलं विउव्विय अवंतरे पडिहयं तयं हरिणा ।
 न य बीयं सो मिल्हइ अभिग्गहो जेण तस्सऽत्थि ॥१७१॥
 तो चेडयस्स बाणं तममोहं पडिहयं पलोएत्ता ।
 पुण्णक्खओ त्ति मुणियं चेडयगणराइणो नट्टा ॥१७२॥
 ते नट्टे दट्टुणं निययबलेणं तु नयरमज्जम्मि ।
 पविसित्तु चेडयनिवो रोहयसज्जो ठिओ झ त्ति ॥१७३॥
 कोणियनिवो वि नयरिं सव्वं संरोहए असंचारं ।
 दियहे दियहे य तओ संजायइ ताण संगामो ॥१७४॥
 ते वि य हल्ल-विहल्ला सेयणयकरिम्मि आरुहेऊणं ।
 रयणीए पइदियहं उक्खंदं दिंति कडयाम्मि ॥१७५॥
 पइदियहं तेहिं तओ कडगं सव्वं पि तं उवहवियं ।
 न य जंति कह वि घेत्तुं सेयणयकरिट्टिया जम्हा ॥१७६॥
 तो कोणिओ पर्यपइ कह मारिज्जंति दो विमे कुमरे ।
 जम्हा सव्वं सेण्णं पाएणमभिदुयमिमेहिं ॥१७७॥
 तो भणइ मंतिवग्गो देव ! न जीयंतयम्मि हत्थिम्मि ।
 मारेऊणं एए सक्किज्जंते अइपर्यंडा ॥१७८॥
 तो भणइ कोणियनिवो, जइ एवं तो गयं पि मारेह ।
 मा थोवयदिवसेहिं अम्हाण खयं करिस्संति ॥१७९॥

मंतीहि तओ विहिया खायरङ्गालपूरिया खड्डा ।
 उवरिं कया अलक्खा मग्गम्मि तस्स हत्थिस्स ॥१८०॥
 संपत्तो रयणीए सो हत्थी जाव तम्मि ठणम्मि ।
 ता मुणिय विभंगेणं चोइज्जंतो वि नो कमइ ॥१८१॥
 तो तेहिं दुत्थिओ सो 'रे पावय ! तुह कएण अम्हेहिं ।
 आवइमहासमुदे पक्खित्तो अज्जओ एसो ॥१८२॥
 जाव तुमं पि ये थक्को' इय भणिओ निययपुट्टिदेसाओ ।
 उत्तारइ ते कुमरे दुसहं पहुवयणमसहंतो ॥१८३॥
 देइ सहस त्ति झंपं खड्डाय मओ य पढमपुढवीए ।
 उवक्खणो कुमरा वि हु भणेण एवं विचिंतंति ॥१८४॥
 "अकयण्णुयाण अम्हाण दुट्टवयणेहिं मास्सिओ अप्पा ।
 संरक्खरुण अम्हे करिणा किं अम्ह जीएण ? ॥१८५॥
 संपाविओ य वसणं सरणागयवच्छलो महाराओ ।
 अट्टारसहिं समेओ पुहईनाहेहिं सबलेहिं ॥१८६॥
 कुलमाणगव्वियाणं नराण कोडीउ सह तुरंगेहिं ।
 माराविया उ दूरं अम्हेहिं असुद्धभावेहिं ॥१८७॥
 समयं रहेहिं लक्खा तियसिंदगयंदविब्भमगयाण ।
 पट्टविया जमगेहं नियदेहसमा य रायाणो ॥१८८॥
 धण्णो अभयकुमारो जो रज्जं उज्झरुण पव्वइओ ।
 अम्हे वि पव्वयामो अलाहि पावेण रज्जेण ॥१८९॥
 इय एवं ते कुमरा दोण्णि वि वड्डंतचरणपरिणामा ।
 भावसमण त्ति काउं उद्धरिउं पवयणसुरीए ॥१९०॥
 विहरंतयस्स परओ किंचि समब्भहियजोयणसयस्स ।
 नीया तेलोक्कदिवायरस्स वीरस्स पासम्मि ॥१९१॥
 नरयाणलस्स हेउं रज्जं मोत्तूण मोक्खतरुबीयं ।
 गिण्हंति असामण्णं सामण्णं जिणसमीवम्मि ॥१९२॥

तह वि न सक्कइ घेतुं वेसाली जाव ताव नरवइणा ।
 अमरिसवसेण गहिया इमा पइण्णा अइपयंडा ॥१९३॥
 जइ रसभजुत्तेण हलेण नयरिं इमं न खेडेमि ।
 ता गिरिणो अप्पाणं मुयामि जलणे व्व पविसामि ॥१९४॥
 नयरीए अभंगेणं खेइयचित्तस्स राइणो देवी ।
 कूलयवालयसमणंगरुट्ठा गयणंगणे भणइ ॥१९५॥
 समणे जइ कूलवालाए मागहियं गणियं गमिस्सए ।
 लोया असोगचंदए वेसालिं नगलिं गहिस्सए ॥३७१॥ ॥१९६॥
 एयं च निसामिरुण भणियं कोणिएणं-

बालया जं च भासंति जं च भासंति इत्थिओ जा य उप्पाइया भासा, न सा भवइ
 अण्णहा ॥३७२॥ ॥१९७॥

ता कत्थ सो कूलवालओ ? कत्थ सा मागहिया गणिया ? । तओ भणियं
 मंतीहिं-देव ! मागहिया ताव तुम्हाण चेव नगरीए पहाणगणिया, कूलवालयं पुण न
 पाणामो । तओ नयरीरोहमे सेसबलं निजोजिऊण सयं गओ चंपं । सद्दविऊण भणिया
 मागहिया-‘भदे ! जहा कूलवालयासाहू ते पई भवइ तहा करेहि’ । तओ भणियमणाए,
 अवि य-

नियरूवबुद्धिजोव्वणपुलइयभणिएहिं तियसनाहं पि ।

आणेमि वसं पत्थिव ? का संका सेसपुरिसेसु ॥१९८॥

तओ मायाए जाया कवडसाविया । तओ परमसाविय व्व करेइ जिणाययणेसु पूयाओ,
 पयट्टावए ण्हवण-बलि-जत्ता-महूसवे, देइ दीणा-ऽणाहाईसु दाणाइं, पडिलाहए साहु-साहुणीओ
 गोरवेइ सिरिसमणसंघं, विहेइ साहम्मियभत्ति । तओ पत्ता परं पसिद्धि । पुच्छिया य तीए सूरिणो
 जहा-भयवं, को एस कूलवालओ ? तेओ अमुणियतयभिप्पाओ सूरी भणिउमाढत्तो-साविए !
 अत्थि एगो पंचविहायारसुद्धिओ पवयणाहारो आयरिओ । तस्स एगो चेळ्ळओ । सो य
 असमायारिपयट्टो सारण-वारणाईहिं चोइज्जमाणो रोसमुवागच्छइ तहा वि आयरिया न विरमंति,
 जओ भणियमागमे-

रूसउ वा परो मा वा विसं वा परियत्तउ ।

भासियव्वा हिया भासा सपक्खगुणकारिया ॥३७३॥

१. सं.वा.सु. वाहेमि ॥ २. ला. ‘या कूडसा’ ॥ ३. ला. भणिउं पयत्तो ॥

एवं च पुणरुत्तं सामपुव्वयं च भणिओ न सम्मं वट्टइ, अवि य-
गुरुणा महुरं भणिओ जंपइ 'फरुसं' सुणेसु 'न सुणेमि' । 'चिट्टसु' भणिओ वच्चइ
आयारं कुणसु 'न करेमि' ॥१९९॥

अइसुंदरं पि भणियं हियए किं ठाइ पावकम्मस्स ।
अहवा गरकल्लेले ठाणं किं होइ अमयस्स ? ॥२००॥
जलइ कुसीसो वडवानलो व्व वयणामएहिं सिंचंतो ।
सुंदरसीसो सरयागमो व्व फलरेहिरो होइ ॥२०१॥
चित्तंतो वि य न तरइ धम्मपभावेण मंगुलं काउं ।
अह विहरंता कमसो गिरिनघरे सूरिणो पत्ता ॥२०२॥
तो अन्नया कयाई उज्जितमहागिरिम्मि ते चडिया ।
चेइयवंदणहेउं तेणेव य खुड्डुएण समं ॥२०३॥
देवे वंदित्ताणं समोयरंताण ताण सूरिणं ।
उवरिट्टिएण खित्तो चालेउं गंडपाहाणो ॥२०४॥
तक्खडहडं सुणेउं अवलोयइ पिट्टओ तओ सूरी ।
दट्टूण गंडसेलं अवयच्छइ दो वि जंघाओ ॥२०५॥
ताणंतरेण सो वि हु पाहाणो निग्गओ न य गुरूणं ।
मणयं पि कया पीडा गुरुणा रुट्टेण ता उत्तो ॥२०६॥
'इत्थीइ सयासाओ तुज्ज विणासो ति होहिई' गुरुणा ।
भणिए पडिभणइ "तुमं अवस्स अलियं करिस्सामि ॥२०७॥
नारीए वयणं पि हु जत्थ न पेच्छामि तत्थऽरण्णम्मि ।
अच्छेऊणं नियमा दुक्करतवचरणनिरएणं ॥२०८॥

एवं च जंपिऊणं अवकंतो गुरुसयासाओ । गओ एगं निम्माणुस्सं महाडविं । तत्थ य
एगाए गिरिनईए कूले ठिओ काउस्सग्गेणं पावासुयाइसयासाओ अद्धमासाओ मासाओ वा पारेइ ।
एवं च तस्स तवं कुणंतस्स समागओ पाउसकालो, अवि य-

गज्जंति नहे मेहा, चमक्कए वेज्जुला पडइ नीरं ।
थाणत्थो पहियगणो भज्जंति पवाण मंडवया ॥२०९॥

विरडंति ददुरगणा गिरिसरियाओ वहंति पूरेणं ।

एवंविहम्मि काले जलपूरपवाहपउरम्मि ॥२१०॥

तओ चितियं तीए गिरिनइदेवयाए-हंत^१ कहमेयं महातवस्सि नियपूरेणं पेळिस्सं ति । चितंतीए वालियं नियकूलं देवयाए, पयट्टा अण्णदिसाए । तप्पभिइं तस्स साहुस्स कूलवालओ नामं जायं । सो य अमुगत्थ पएसे चिट्टुइ^२ । तं च सोऊणं हरिसुप्फुल्ल्लोयणा कयसयलसामग्गीविसेसा तित्थजत्ताछलेण वंदंती य कमसो चेइयाइं गया तमुद्देसं । दिट्ठो साहू । वंदिओ सविणयं, भणियं च-

‘वंदाविओऽसि मुणिवर ! सितुंज्जुज्जितमाइतित्थेसु ।

नाणाविहजिणवरचेइयाइं’ इय जंपिए तीए ॥२११॥

उस्सारिऊण सो वि हु उस्सगं देइ धम्मलाभं से ।

वंदित्तु चेइयाइं परिपुच्छइ ‘साविए ! कत्तो ॥२१२॥

तुब्भेत्थ आगयाई’ सा जंपइ “सामि ? चंपनयरीओ ।

तित्थाण वंदणत्थं समागया एत्थ ठाणम्मि ॥२१३॥

तित्थाण परमतित्थं तुब्भे इह जंगमं सुया तित्थं ।

तो तुम्ह वंदणत्थं इह पत्ता भत्तिसंजुत्ता ॥२१४॥

ताऽणुग्गहेहि भयवं ! फासुयएसणियसंबलेणऽम्ह^३’ ।

इय भणिओ सो साहू तीए सह जाइ सत्थम्मि ॥२१५॥

पडिलाभिओ य विहिणा संजोइयदव्वमोयगेहि तु ।

ते पारियमेत्तस्स उ होइ तओ तस्स अइसारो ॥२१६॥

तेणेसो अइकट्ठं गिलाणयं पाविओ महाघोरं ।

किं बहुणा ? अंगाइं वि न सक्कए संवरेऊणं ॥२१७॥

तं पासिऊण एसा निंदइ अप्पाणयं बहुपयारं ।

“हा ! अम्ह निमित्तेणं जाओ तुम्हाण अइसारो ॥२१८॥

ता कहं एयावत्थगया तुब्भे मोत्तूण मम पाया वहंति ?” एयं जंपिऊण ठिया तत्थेव एसा । तओ ओसहदाणनिमित्तं उव्वट्टणाइनिमित्तं च अल्लियइ । तओ तहा तहा उव्वट्टणाइयं विहेइ जहाजहा नियावयवाणं से फंसो भवइ । कओ य कालक्खण पगुणो । रंजियं च चित्तमेयस्स तीए असाहारणाए भत्तीए । तप्फंस-कडक्खविक्खेव जंपिएहिं य

चलियं चित्तं निबद्धो दइयसद्दो त्ति, अवि य-

सइदंसणाउ पेम्मं पेम्माउ रई रईइ वीसंभो ।

वीसंभाओ षणओ पंचविहो वट्टि(ड्डि)ओ मयणो ॥२१९॥

तओ नीओ तीए कोणियसयासं, भणियं-च देव ! एस मए कूलवालओ अप्पई काऊण य इहाऽऽणीओ, ता संपयं भणसु जमेएण कायव्वं । कोणिएण भणियं तहा करेसु जहा वेसाली लहु भज्जइ । सो वि आएसो त्ति भणित्ता लिंगिणो रूवेण पविट्ठो नयरीए । निरूविउमाढतो नगरवत्थूणि जाव दिट्ठं मुणिसुव्वयसामिथूभं तं च दट्टूण चितियमणेण “हंत ! एरिसे लगे एयं पइट्टियं जारिसे एयम्मि विज्जमाणे इंदेहिं वि न भज्जए नयरी, ता केणइ उवाएण एयं ऊसारावेवेमि” त्ति चित्तंतो भमइ नयरीमज्जे । तं च दट्टूण लोगो पुच्छइ जहा-भयवं ! जाणसि किंचि कया अम्हाणं रोहगो फिट्ठिहिइ ?’ तेण भणियं ‘सुट्टु जाणामि, जावेयं थूभं चिट्टुइ न ताव तुम्हाणं रोहगो अवेइ, एयम्मि अवणीए पुण नियमा अवेहिइ, पच्चओ य एयमवर्णिताणं चेव किंचि सरिस्सइ परचक्कं’ । लोगो वि आदण्णो जाव उक्किल्लिउमाढतो ताव णेण गाउयदुगमेत्तमोसारिओ कोणिओ । तओ संजायपच्चएण लोगेण निम्मूलमुप्पाडियाणि से वत्थूणि । कोणिएण वि समागंतूण भग्गा नयरी । भणाविओ य चेडयराया जहा ‘अज्जय ! भण संपयं किं ते पियं कीरउ ?’ चेडएण भणियं ‘मुहुत्तमित्तं विमालिऊण नयरीए पविसिज्जसु । चेडओ वि अणसणं गहेऊण लोहमयपुत्तलियं गले बंधिऊण पविट्ठे अत्थाहसलिलं । तओ साहम्मिओ त्ति काऊण नीओ धरणिंदेण नियभवणे । तत्थ य आलोइयपडिक्कंत-सव्वपावकम्मो पंचनमोक्कारपरायणो समाहीए कालगओ समुप्पण्णो तियसो तियसालये त्ति नयरीलोगो य सच्चइणाउप्पाडिऊण नीओ नेवालवत्तिणीए । कोणिएण वि रासहजुत्तेहिं हलेहिं खेडाविया नयरी, अवि य-

घोरगारो जाओ बारस वरिसाणि ताण संगामो ।

जो वण्णिउं न तीरइ जीएण वि दीहकालेण ॥२२०॥

जत्थ सयं अवयरिओ सक्को चमरो य कोणियगुणेहिं ।

अन्ने य विविहतियसा, चेडयगुणनियरपडिबद्धा ॥२२१॥

पडिया जत्थ सहस्सा निबद्धमउडाण नरवइसुयाणं ।

करिणो य लक्खसंखा रहेहिं सह सेलसरिसेहिं ॥२२२॥

जच्च तुरंगमदप्पुद्धुराण पुरिसाणऽणेगकोडीओ ।

नियबंधूहिं समेया खंधारनरा असंखेज्जा ॥२२३॥

१. सं.वा.सु. *याइं ॥ २. ला. नीओ नीलयं(वं)तगुहाए । को ॥ ३. “जीवेन=बृहस्पतिना” इत्यर्थः ॥

किं जंपिण बहुणा ? दुवालसंगीए भासियं गुरुणा ।

ओसपिणीइमीसे न एरिसो अण्णसंगामो ॥२२४॥

इओ य सेणियस्स भज्जाहिं पुच्छिओ तेलोक्कमहापईवो समवसरणत्थो भयवं महावीरो कालाईण नियपुत्ताणमागमणं । भगवया वि धम्मदेसणापुव्वयं तथा कुमाराण मरणमाइट्टं जहा मुणियसंसारसरूवाओ साहुणीओ संवुत्ताओ त्ति, अवि च-

तह जिणवरेण सिट्ठं, संसारासारयाए सह मरणं ।

पुत्ताण जहा सव्वा, निक्खंता मुणियसम्भावा ॥२२५॥

कोणिओ वि सव्वबलसमण्णिओ पत्तो चंपं । तत्थ समोसरिओ तेलोक्कचूडामणी भगवं वद्धमाणा । कयं तियसेहिं समवसरणं । संपत्ता तियसिंदाइणो कोणिएण चित्तियं- 'अव्वो ? मह रिद्धी तारिसी जारिसी चक्किस्स, ता कह एयाए रिद्धीए अहं चक्की न व ? त्ति ता संपयं किं वियप्पेण ? पुच्छमि भगवंतं' । चिंततो गओ सव्वबलसमुदएणं भगवओ वंदणनिमित्तं । वंदिरुण य जहावसरं भणियमणेण जहा 'अपरिचत्तकामभोगा कत्थोववज्जंति चक्किणो ?' भगवया भणियं- 'अहे सत्तमाए पुढवीए' । तेण भणियं 'अहं कत्थोववज्जिस्सामि ?' भगवया भणियं- 'छट्टीए' । तेण भणियं किमहं सत्तमीए न वच्चामि ?' भगवया भणियं 'तुमं चक्कवट्टी न भवसि' । तेण भणियं 'ममं पि जत्तिया चक्किणो गयंदतुरय-संदण-पाइक्काइणो तत्तिया संति' । भगवया भणियं 'रयणाणि तुज्झ नत्थि' । तओ कित्तिमाणि लोहमयाणि एगिंदियरयणाणि काऊण महाबलसमुदएणं ओर्यवितो भरहं, उत्थायंतो रिउणो करितो ववत्थाओ, पूरितो पणइयाण आसं, मार्णितो माणणिज्जे, पत्तो तिमिसगुहां कयतिरत्तोववासेण य आहयाणि तेण दंडरयणेण पउलीकवाडाणि । 'अव्वो ? को एस कयंतमंदिरुक्कंठिओ पउलीकवाडाणि ताडेइ ?' त्ति भावेंतेण भणियं कयमालदेवेण- 'को एस ?' कोणिएण भणियं 'अहं असोकचंदो चक्कवट्टी समुप्पन्नो' । कयमालेण भणियं 'समइक्कंता दुवालस चक्किणो, तो अलमेयाए अपत्थियपत्थणाए, वच्चसु नियगेहं । तेण भणियं 'अहं तेरसमो चक्की संजाओ' । कयमालेण भणियं 'भो कोणिय ! किमेयाए असब्भूय भावणाए अप्पाणमावयाण मंदिरं कुणसि ? ता लहुं नियत्तसु त्ति, अवि य-

खरनहरपहरनिद्धलियमत्तमायंगकुंभभायस्स ।

मयगव्विरो विहरिणो कह केसरिणो हवइ सरिसो ? ॥२२६॥

अच्चुब्भडवियडफणाणिहायमाहप्पदप्पकलियस्स ।

दप्पुद्धरो वि भिक्को फणिणो किं होइ सारिच्छे ? ॥२२७॥

१. ला. समत्थब* ॥ २. ला. अव्वो ! जारिसी मम रिद्धी तारिसीए अहं ॥ ३. सं.वा.सु. *भकेसरिणो । मं ॥ ४. सं.वा.सु. कह सरिसो होइ एयस्स ? ॥

नियरूव-कंति-जोव्वणकलाकलाविक्रमंदिरं जइ वि ।
 कह सामण्णनरिंदो उवमिज्जइ तियसनाहस्स ॥२२८॥
 मणहरजिण भवणविभूसियस्स भुवणम्मि सुप्पसिद्धस्स ।
 न कयाइ खुदुसेलो संकासो होइ सुरगिरिणो ॥२२९॥
 इय जइ वि तुमं कोणिय ! नियरिद्धिबलेण गव्विओ भमसि ।
 तह वि न होसि सरिच्छो महानुभावेहिं चक्कीहिं' ॥२३०॥

एवं पि भणिओ तुरयारूढो जाहे न चिट्ठइ ताहे संजायामरिसवसेण उग्घाडियाणि पउलीकवाडाणि । तओ तंदुम्हाए दड्ढो जओ महाचक्कवट्टीणं तुरया पिट्ठओ दुवालस जोयणाणि ओसरंति न तहा तस्स तुरओ ओसक्किउं सक्किओ । मरिऊण य उववण्णो छट्टीए तमाहिहाणाए पुढवीए उक्कोसाऊ महानारगो । सेस रईएहिं य अहिसित्तो तस्स पुत्तो उदाई नाम रायाहिरओ त्ति ।

एवं जं निवकोणिय-हल्ल-विहल्लण सोयरणं पि ।
 जाओ नेहस्सखओ, अइदारुणवेरहेउ त्ति ॥२३१॥
 जं चेडय-कोणियनरवरण अइनिद्धबंधवाणं पि ।
 जाओ वेराबंधो, कालाइनरिंदखयहेऊ ॥२३२॥
 अण्णाण वि बहुविहनरवरण अवरोप्परं सुबंधूणं ।
 जं जाओ संगामौ वरभडबहुकोडिखयजणओ ॥२३३॥
 तं कारणमिह जाया देवी पउमावई महापावा ।
 रयणाण मग्गणेणं सेसित्थीणं पि एस गई ॥२३४॥

पद्मावतीकथानकं समाप्तम् ॥४३॥

[४४. ज्वालावलीकथानकम्]

अधुना ज्वालावलीकथानकं कथ्यते -

अत्थि इहेव जंबुद्वीवे दीवे महाविदेहे वासे गंधिलावईविजए जयउरं नाम नयरं । तत्थ य जयसिरिसंकेयठाणं सिरिचंदो नाम राया । तस्स य सयलंतैउरप्पहाणा भाणुसिरी नाम देवी । सा य निरवच्चत्तणेण देइ उवाइयाइं, आलिहावए मंडलाइ, करेइ ण्हवणयाइं, पियइ ओसहाइं, लिहावए रक्खाओ, पयट्टावए मंत-तंत-जंताइं, बंधावए मूलियाओ, कारावए सव्वदेवयाणं पूयाओ, किं बहुणा ?

१. सं.वा.सु. तदुण्हाए ॥ २. ला. संजाओ नेहस्सओ ॥ ३. सं.वा.सु. *मो बहुमडखयकोडिसंजणओ ॥ ४. ला. महादेवी ॥

पुतत्थिणीए तीए तं नत्थि जयम्मि जं न परिविहियं ।

आसापिसाइयाए विनडिज्जइ अहव सव्वो वि ॥१॥

आसापिसायगहिया जाउंडियलोयभक्खठाणम्मि ।

सा वट्टए वराई इय एवमिमं जओ भणियं ॥२॥

होरा-हस्तनिरीक्षणमन्त्र-वशीकरण-कोमलकथाभिः ।

प्रायो बृहस्पतेरपि नार्योऽनार्यैः प्रतार्यन्ते ॥३७४॥

एवं च तीए खिज्जमापीए बहुकालेणं तहाविहभवियव्वयानियोगेण जाया एगा धूया । 'ताणं जालामालिणी गोत्तदेवय' त्ति काऊण कयं दारियाए नामं जालावलि त्ति । सा य पवड्डुमाणा विसलय व्व जाया सव्वजणउव्वेयकारिणी, अवि य-

कूरा निद्वयकम्मा साहसिया कवडवंचणपहाणा ।

अहियं निम्मज्जाया संजाया वड्डुमाणी उ ॥३॥

एवंविहचिट्टिएहिं य अच्चत्थं खेइओ पिया समत्थपरियणो य । तहावि नियधूय त्ति काऊण जोव्वणत्था समाणी परिणाविया कंचणपुरनयराहिवइदुज्जोहणमहारायसुय-सूरपालकुमारेण । नीया य तेण नियनयरे । ठविया अंतेउरब्भंतरे । तओ तेण वि सह न वट्टए सम्मं, करेइ अविणीयत्तणं, भंजए मज्जायाओ । तओ पइदिणमविणयपराए संताविओ एसो । तओ तेण दिट्ठा अणायरेणं । अभिमाणकोहपरव्वसा य समारूढा पडणत्थं गवक्खगे कम्मधम्मसंजोएण य तेणंतेण बोलेमाणो दिट्ठो तत्थ पओयणागओ महानरिंदमहसेणपुत्ते इंददत्तो नाम । पंचसरपहारविहुरियसरीराए पलोइओ सव्वंगं सो साभिलासं । तेण वि तल्लावण्णावज्जियमाणसेण निरूविया सा सव्वंगं, जाओ साभिलासो । तओ तीए खग्गं दंसिऊण दंसियमप्पाणयं जहा-जइ खग्गदुइओ समागच्छसि तो ममं पावसि त्ति । सो वि तं सव्वं हियए संपहारिऊण गओ निययावासे । जाए य बहले अंधयारे कयवंठवेसो गओ तत्थ । पविट्ठो विज्जुक्खित्तकरणेणं । जाओ वीसंभो । अणुभूयं च दोहिं वि सरससुरयसुहं । भणियं च जालावलीए जहा-नाह ? जइ इओ ममं हरसि तो सोहणं भवइ । तेण वि अच्चंताणुरत्तचित्तेणं उत्तारिया वरत्तापओगेणं । पट्टियाणि निययावास-सम्मूहं । एयं च सव्वं दिट्ठं वीरचरियाए विणिग्गएण सूरपालेण 'हंत ! किमेयं थी-पुरिसजुयलं मम वासभवणाओ समुत्तिण्णं ?' लग्गो पट्टीए । सम्मं निरूवंतेण य दो वि विण्णायाणि । तओ समुच्छलंतकोवानलामरिसवसपरावसीकयमाणसेणं हक्किओ एसो जहा 'रे रे दुरायार ! सारमेयचरिय ! महाकुलसमुब्भवरायपुत्तो वि होऊण एयं उभयकुलविरुद्धं ववससि ?, ता पुरिसो भवाहि' । तओ एयमायण्णिऊण वलिओ एसो ।

तओ दप्पुद्धरणं ताणं दोण्हं वि रयपुत्ताणं आवडियमाओहणं, अवि य-

पहरंति दो वि धणियं दो वि हु वच्चंति दो वि वगंति ।

आरणयमत्तमहागय व्व उम्मुक्कपरिवारा ॥४॥

तो इंददत्तकुमरो कर्हिचि छलिरुण सूरपालेण ।

तह खग्गेणं पहओ जह जाओ दोन्नि खंडाई ॥५॥

दट्टूण ताणं जुज्झं निहयं नारुण इंददत्तं तु ।

जालावली उ पावा भयकंपिरथोरथणवट्टा ॥६॥

बहले तमंधयारे अलक्खिया सूरपालकुमरेण ।

नासित्तु जाइ सिग्घं आवासे इंददत्तस्स ॥७॥

एत्थंतरम्मि य वियलिया रयणी, पणस्संति तारया, निलुक्कंति धूया, करयरंति काया, चुहुचुहंति चिडया, पणस्संति सावया, थुव्वंति देवसंघाया वज्जंति नाणाविहाइं पाहाउयतूरहं, तओ कमेण य जाया आवंडुरा नहलच्छी, अवि य-

वियलियताराहरणा विमुक्कतमकेसिया य पंडुइया ।

कुमरस्स भारिया इव नहलच्छी रुयइ विहगेहि ॥८॥

इत्थंतरम्मि सूरो समुग्गओ पहयत्तिमिरभरपसरो ।

परदारपसत्ताणं इमा गई दंसणत्थं व ॥९॥

तओ पुच्छिओ तीए एगो पुरिसो जहा 'कस्सेसो खंधावारे ?' कहियं च तेण जहा-रयणपुरागयइंददत्तकुमरस्स' । तीए य विण्णायकुमारवहपरमत्थाए जंपियं जहा 'मारिओ तुम्हाण सामी वीरचरियाविणिग्गयसूरपालकुमरेण, जइ न पत्तियह ता निरूवह अमुगट्टाणे' । तओ जाव निरूवियं ताव तहेव दिट्ठं । हाहक्कंदपरायणं अनाययं ति कारुण पणट्ठं इंददत्त सेण्णं । साहिओ य एस वुत्तंतो इंददत्तपिउणो । सो वि महसामग्गीए समागओ सूरपालस्सुवरिं । जाओ य महासंगामो । तओ कर्हिचि वियाणिरुण नियपुत्तदुव्विलसियं खमाविरुण सूरपालं गओ निययट्टाणं इंददत्तपिया महसेणनरवई ।

सा वि जालावली भएण पणस्समाणी मिलिया महापुरनगरगामिणो धणदत्त-सत्थवाहस्स । तेण वि तीए रूवज्जोव्वणऽरिवत्तमाणसेण पडिवन्ना भारियत्तेणं । पत्तो य एसो महापुरं । तत्थ वि दुव्विणीय ति कारुण सिढिलीकया सत्थवाहेण, किं बहुणा ? निव्वासिया नियगेहाओ । तओ पउट्टुचित्ता गया नयरारक्खियसमीवं । तेण वि दट्टूण पडिवण्णा भज्जत्तेणं । पउट्टाए य तीए निवेइयं सत्थवाहसंतियं सुंकचोरियाखूणं । तेण वि

सपच्चयं नाऊण कहियं रइणो । रइणा विरुट्टेण सकुडुंबो पक्खित्तो गुत्तीए सत्थवाहो । महाकट्टेणं सव्वस्सावहारं काऊण मुक्को सत्थवाहो । आरक्खिएण वि कर्हिचि दुच्चिट्ठिए निद्वयं ताडिया सा । तओ तदुवरिं कुविया समाणी निग्गया रयणीए गेहाओ । तहाविहभवियव्वयाए य समासाइया भिल्लचोरेहिं । तेहिं वि आभरणाइयं घेतूण पहाण पाहुड ति काऊण समप्पिया पल्लीवइणो । तेण वि 'अहो ! सोहणं पाहुडं समाणीयं' ति तुट्टेण दिन्नमेएसिं पभूयं पारिओसियं । सा वि कयाऽणेण सव्वासिं पहाणा नियघरिणी । अणुरागपरव्वसो य अच्छए तीए चैव आएसं कुणमाणो । अण्णया य भणिओ तीए पल्लीवई, अवि य-

'पिययम ! जइ सि समत्थो एक्कं पत्थेमि जइ तयं कुणसि' ।

तेण वि भणियं 'सुंदरि ! साहसु जं ते मणभिरुइयं ॥१०॥

तच्चित्तं नाऊणं पयंपए सा जहा 'महपुराओ ।

आणित्तु चंडविरियं मह पुरओ बहु विडंबेहि' ॥११॥

तओ पल्लीवइणा भणिया 'पिए ! जं तवाऽभिरुइयं तं निच्छएण मए कायव्वं' ति । समाणत्ता नियभिल्ल जहा 'अरे ! कर्हिचि चंडविरियं बंधित्ता इहाऽऽणेह' । तओ ते चोरपुरिसेहिं तो तस्स छिडुं जाणंति जहा 'सो अज्ज नयरस्स पंचगाउयमेत्ताडवीए चंडियाययणे मज्जपाणासत्तो चिट्ठइ' । तओ तं नाऊण महावेगेण गया ते भिल्ल, पिच्छंति य, अवि य-

कयआवाणयबंधं, बहुमज्जापियणनीसहसरीरं ।

भूमीए लुढमाणं बीभच्छे वंतिचिक्खल्ले ॥१२॥

तो तेहिं भिल्लेहिं गाढं बंधित्तु निययसामिस्स ।

उवणीओ तेणाऽवि हु भणिया जालावली एवं ॥१३॥

'पिच्छ पिए ! तुह वेरी गाढं बद्धो इहाऽऽणिओ इण्हि ।

जं किंचि तुज्झ रुइयं कुणसु सहत्थेण तं दइए' ॥१४॥

तीए विडंबणाओ नाणारूवाओ तस्स विहियाओ ।

पभणंतीए तइया 'किं जाणसि मं कयत्थंतो' ॥१५॥

तह तीए सहत्थेहिं कयत्थिओ निदयाए सो वरओ ।

जह कहिउं पि न तीरइ तह चैव य पाविओ निहणं ॥१६॥

तओ तेण पल्लीवइणा संह सब्भावसारं सुहमणुहवंतीए वच्चए कालो, अवि य-

जह जह वीसंभो सिं पवड्डुए पइदिणं तह तहेव ।

कामो वि हु परिक्खइ न य तित्ती जायए कह वि ॥१७॥

तणकट्टेहिं व अग्गी नई सहस्सेहिं उअहिनाहो व्व ।

जह न वि तिप्पइ कह वि हु तह सा वि हु मोहणसुहेहिं ॥१८॥

अन्नदिणम्मि य एसा पल्लीवइणा नियत्तवेएणं ।

कह कह वि हु न वि रमिया पभणंती बहुपयारं पि ॥१९॥

तो तीए रुसिरुणं पल्लीवइणो कणिट्ठओ भाया ।

अइमोहमोहियाए विन्नत्तो एरिसं वयणं ॥२०॥

‘भुंजसु मए समाणं विसयसुहं नाह ! निच्चमक्खलियं ।

एयं कट्टहरम्मि पक्खिविय करेहि तह रज्जं’ ॥२१॥

इय भणिओ सो तीए लोहमहामोहमोहिओ संतो ।

भेइत्ता ते भिल्ले बंधइ पल्लीवइं तुरियं ॥२२॥

नियलेरुणं बाढं, पक्खिवई कट्टहरयमज्झम्मि ।

सयमेव कुणइ रज्जं आएसं तह इमीए वि ॥२३॥

अह सो वि पल्लिनाहो अणुदियहं दुक्खिओ वसइ तत्थ ।

अह अन्नया कयाई नियलाई तस्स सिद्धाई ॥२४॥

भवियव्वयावसेणं दढं पमत्ताण रक्खवालाण ।

उट्टित्तु सणियसणियं गच्छइ तव्वासहरयम्मि ॥२५॥

रयणीए तीए समं सुहं पसुत्तस्स तस्स पासाओ ।

गिण्हेउं करवालं छिंदइ लहुभाउणो सीसं ॥२६॥

दारुणरोसवसेणं तीए वि य लेइ कण्णनासोट्टे ।

पक्खिवइ महाघोरंधयारगुत्तीए बंधेउं ॥२७॥

तत्थ बहुवेयणट्ठा अणुहविउं तिक्खदुक्खसंधायं ।

मरिरुणं उववण्णा नेरइओ छट्टपुढवीए ॥२८॥

ततो उव्वट्टित्ता भमिही भवसायरं महादुहयं ।
एवं संतावयरी एसा बहुयाण संजाया ॥२९॥

अवि य-

गब्भठियाए जणिओ संतावो ताव निययमायाए ।
बालत्तणम्मि दुहया जाया डिभाण सव्वाणं ॥३०॥
ततो पवड्डुमाणी पिउणो उव्वेयकारिणी जाया ।
जोव्वणसमए पइणो संतावो दारुणो दिन्नो ॥३१॥
ततो उवप्पईणं कमसो विहियं महादुहं तीए ।
एवं नारी संतावकारिणी होइ अन्ना वि ॥३२॥

जालावलीकथानकं समाप्तम् ॥४४॥

तथा-

नारी विवेगविगला, जहा सा सुकुमालिया ।
नारी वज्ज व्व वज्जेज्जा, दिट्ठंतो कट्टसेट्ठिणा ॥१७०॥

नारी विवेकविकला=सुन्दरा-ऽसुन्दरविवेचनविरहिता यथा सा सुकुमारिका नारी वज्जेव विभक्तिव्यत्यद्वज्जमिव, वर्जयेत्=परिहरेत्, अत्रार्थ दृष्टान्तः=निदर्शनम्, काष्ठश्रेष्ठिना=काष्ठभिधानवणिग्वरेण, यथा तेन काष्ठश्रेष्ठिना निजभार्या परित्यक्तेति श्लोकाक्षरार्थः ॥१७०॥

भावार्थस्तु कथानकाभ्यामवसेयः । तत्र सुकुमारिकाकथानकम्-

[४५. सुकुमारिकाकथानकम्]

अत्थि जंबुद्वीवभरहमज्झट्टिय अणवरयपयट्टमाणमहामहूसवसमुइयजणनियरविराइय-
तिय-चउक्क-चच्चरोवसोहियचंपाभिहाणरायहाणिविहियनिवासो निप्पंदमंदीकयनिय-
डिपरवेरिवारपणइरुत्तमंगमउलिमालामलिय-चलणकमलो सिरिजियसत्तू नाम राया । तस्स
य सिसिरकिरणस्स व रोहिणी, धरणिधरस्स व लच्छी, ससिसेहरस्स व गोरी
अच्चंतवल्लहा सयलंतैउरपहाणा रूवाइगुणगणसमन्निया सुकुमालिया नाम देवी, अवि य-

रूवेण विजियरंभा लावण्णेणं समुह्वेल व्व ।

कंतीए ससिमुत्ती दित्तीए सूरबोदि व्व ॥१॥

गयतालुयं व सुकुमालयाए सोहग्गयाए गोरि व्व ।

वल्लहिया नियपइणो अहियं सुकुमालिया देवी ॥२॥

तओ तीए सुकुमालसरीरफासमोहिओ अणवरय-सुरयवावास्तप्परो अवमन्निय-सयलविलयायणो अवहत्थियरज्जकज्जो अगणियजणाववाओ अपरिभावियहिओ वएसयमहामंतिवयणपरमत्थो असंभावियपच्चंतरायसामत्थो निरत्थीकय विवेयनाणविन्नाणो दूरीकयधम्मसत्थवित्थरसवणवावारो अगुणियकलाकलावो अदिन्नसयलसेवयपरितोस-कारयत्थाणो सव्वहा तम्मउ व्व तयंगंऽगं-ऽगीभावपरिणओ व्व तयणुप्पविट्ठो व्व विमुक्कसेसिंदियविसयविसेसवावारो तीए चेव बहु मन्नियसुकुमालफासिक्कविसओ अंतेउरमज्झगओ चेव चिट्ठइ । तओ 'मारतिमिरंतरियल्लोयणजुयलो नरवई न पस्सइ' ति काऊण पबलीभूयाणि समंतओ परचक्काणि, पाडंति वत्तिणीओ चोर, खणन्ति नयरमज्झम्मि खत्ताणि तक्कर, तौडंति जुवईजणसुवन्नपुण्णकन्ने जूइयरा, छिंदंति वणियजणस्स हिरण्णुत्तरीयगंठीओ गंठिछेयया, रमंति परदारणि पारदारिया, वंदंति ईसरजणं बंदिया, किं बहुणा ?

नायगरहिय व्व पुरी जाया असमंजसा समत्था वि ।

न सुहेणको वि निदं लहइ खणद्धं पि नयरीए ॥३॥

तओ तं तारिसं पुरवरीउवइवमवलोइऊण चितियं विमलमइमहामंतीहि-अहो ! विणट्ठं रज्जमेयं जइ अन्नो राया न कीरइ, जओ बहुभणिओ वि नरवई विसयवसणं न मुयइ । एवं परिभाविऊण भणिओ एगंते जेट्ठपुत्तो राइणो जहा 'भो कुमार ? नीइसत्थ विणिवारियवम्महकीलाभिरओ तुज्झ पिया हारेइ लग्गो परेहि संपयं कुलक्कमागयं रायलच्छि, तं जइ तुम्हारिसा वि रज्जमहाभरधुराधरणदढकंधराधोरेया वि एवमुक्खंति तओ हंत ! हया मणस्सिया, ता केण वि पओगेण एयं नियजणयं निव्वासिऊण वसीकयचाउरंगबलसमुदओ सयं पडिवज्ज रायलच्छि, जेण तुह चरणतरुय (व)रसिसिरच्छायं समासाइऊण नियतसमत्थपरपक्खोवइवतावा सुहं सुहेण चिट्ठामो' । तओ तं मंतिवयणमायण्णिऊण भणियं कुमारेण 'भो भो मंतिणो ? तुब्भे तावाऽवस्समेव जं कीरमाणं सुंदरं भवइ तमुवइसह अन्नहा सचिवपयमेव पुव्वरायाणो नाऽऽरोवियवंतो, अओ जं तुम्हाण अभिरुइयं तमविलंबियं करिस्सामि' । तओ महापसाओ ति भणमाणा हट्ठतुट्ठा पप्फुल्लवयणकमला समुट्टिया मंतिणो । तओ अन्नदिणम्मि नीसेसबलं वसीकाऊण कुमारेण देवीसमन्निओ पाइओ जोगमइरं जणओ, जीए पियाए परव्वसो व्व मुच्छिओ व्व परायत्तो व्व खणमेतेणेव

विवसो जाओ । तओ कुमारेण मयवसपरव्वसो वट्टए इमो त्ति पुरिसेहिं महारिहपल्लंकारूढो सह देवीए नरवई उक्खिविऊण अइगहणमहामहीरुहसमूहसमाउलाए कायरजणजणिय- भयसंभमाए महाडवीए नेऊण मुक्को वत्थंचले य लिहिऊण बद्धं पत्तयं, अवि य-

वसणासत्तो त्ति तुमं कलिऊणं सयलरायलोगेण ।

मुक्को सह देवीए एयम्मि महा अरण्णम्मि ॥४॥

ता एयं नाऊणं नं हु वलियव्वं पुणो इओहुत्तं ।

मा भणिहिसि न हु भणिओ इय नाउं कुणह जहजुत्तं ॥५॥

तओ रयणीविगमे गयमयपसरो पच्चागयजीविओ व्व समुवलद्धसन्नो जाव दिसालोयं करेइ ताव पेच्छइ अइभीमतरुगहणं विविहसावयपयविचित्तिय धरणीयलं महाडविं, तं च पेच्छऊणचित्तियमणेण 'हंत ! किमेयमिदयालं पिव पडिहासइ' । जाव एवं चितइ ताव पेच्छइ नियवत्थंचलनिबद्धं पत्तयं । तं च वाइऊण विण्णायपरमत्थेण भणिया देवी 'पिए ! अइकामासत्ताणि त्ति काऊण परिचत्ताणि नियपरियणेण, ता को मह संतियं रज्जमवहरइ' त्ति । भणिऊण समुट्टिओ खगं गहाय । सुकुमालियाए भणियं 'नाह ! मा एवं करेहि, न परिवारविरहियाणं पुरिसयारो जुज्जइ, ता संपयमिओ अवक्कमामो, पुणो जहाजुत्तं करेज्जासि' । तओ पयट्टाणि उत्तरदिसिमंगीकाऊण । जाव य कियंतं पि भूभागं गच्छंति ताव अइसुकुमालयाए सा सुकुमालिया तिसाए अईव बाहिज्जमाणी नरवई भणइ 'अज्जउत्त ! अइतिसाभिभूयत्तणेण न किंचि महमच्छीहिं पेच्छामि, ता जइ जलं न पाविसि तो निच्छएण मयमिव मं वियाणाहि । नरवई वि सिणेहवसपरवसो 'पिये ! धीरा भवसु जेणाऽऽणेमि पाणियं' ति तमेगत्थ तरुवरच्छायाए धरिऊण गओ जलगवेसणत्थं नाणावणावलि-गुविलगिरिवरनिज्जरेसु, जाव य न किंचि जलमुवलद्धं ताव य दट्टूण पुरओ तुवरट्टियं नियभुयाओ छुरियगेण सिराओ मोत्तूण भरिओ रुहिरस्स पलासपुडओ, तुयरट्टियापओगेण य जलं काऊण समागओ तीए पासे । भणिया य 'पिये ! समासाइयं मए एयं अइकलुसमुदयं अच्छीओ निमीलिऊण सायमगिण्हंती तण्हारोगोवसमण-कडुगोसंहमिव पियसु, अन्नहा ते दुगुंछ भविस्सइ' । तओ सा तह त्ति पडिवज्जिऊण निमीलियच्छी जलबुद्धीए पियइ तं नियपइरुहिरं, जाया य सच्छ, तओ पुणो वि जाव जाइ कित्तियं पि पएसं ताव भणियं सुकुमालियाए-नाह ! संपयमइभुक्खिय त्ति काऊण न सक्केमि गंतुं ता देहि समाणिऊण कुओ वि किंचि भोयणं जइ मए जीवंतियाए कज्जं । तओ सो रया तव्वयणचोइयो जाव न किंचि भक्खमुवलभइ ताव छित्तूण छुरियाए नियऊरु-

मंसाणि संरोहिणीए संरोहिऊण सवणाणि, वणदवग्गिपक्काणि य काऊण आणिरूण दिन्नाणि, तीए भक्खियाणि य । तदुवट्टंभेण य जाया पुणो वि गमणसमत्था । कमेण य लंघिरूण अइभीसणसावयनिनायसवणसंजायरोमंचं महाडविं पत्ताणि वाणास्सीए पुरीए । तत्थगएण य तं तारिसमदिट्ठपुव्वमत्तणोऽवत्थमवलोइरूण परिभावियं “अहो ! भवियव्वयासामत्थं जओ एयाए अवलोइयाण पाणीणं तं नत्थि जं न दीसए, अवि य-

कत्थऽम्हे नरवइसीसमउलिमणिकिणियचरणसरसिरुहा ।

करडतडगलियमयजलजयकुंजरखंधरारूढा ॥६॥

सयलकलापरिपूरियससहरसंकास धरियपुंडरिया ।

उद्धुव्वमाणसियरुइरतंतुवरचामरुक्खेवा' ॥७॥

मत्तकरि-तुरय-रह-भडसंकडअइवियडकडयपरियरिया ? ।

कत्थ व इयरजणोच्चिय बहुदुहया दारुणावत्था ! ॥८॥

सव्वहा नत्थि कोइ सो जमावयाओ न विद्वंति, उक्तं च-

समाहतं यस्य करैर्विसर्पिभिस्तमो दिगन्तेष्वपि नाऽवतिष्ठते ।

स एष सूर्यस्तमसाऽभिभूयते, स्पृशन्ति कं कालवशेन नाऽऽपदः ? ॥३७५॥

तओ अज्ज वि जाव पाणा धरिज्जंति ताव अवस्सं कालजावणाकारणं किंचि कायव्वं, तत्थ न ताव सेवाए मह चित्तमुच्छहइ, जओ सेवाए वट्टमाणेहिं भवियव्वं सेवणिज्जस्स नीयवितीहिं, कायव्वाणि बहूणि चाडुयसयाणि, विहेया तप्पिएण सत्तुणा वि सह मेत्ती, रूसियव्वं नियनिद्धबंधूणं पि तयप्पियाणं, चिट्ठियव्वं सुणहेण व पइक्खणं ‘जीव देव !’ ति भणंतेहिं तदग्गओ, न खलणीयमद्धरते वि तम्मुहविणिग्गयं वयणं, न य एयमम्हेहिं धणलवलाहाभिप्पाएण पाणच्चाए वि चइज्जते काउं ति, तथा न किसिकम्माइए वि मणयं पि अम्हाणं मणो पयट्टइ, जओ किसिकम्माइणि कुणंतेहिं सहियव्वं सिसिरसमए तुहिणकरनियरसंचलियपवणुप्पइयउक्कंपिगत्तयाए दंतवीणं वायंतेहिं सीयं, मरिसियव्वं गिम्हकाले मुम्पुरायमाणपयंडमत्तंडकिरणनियरोवजणियमुहसोसयाए हाहाह ति कुणंतेहिं उण्हं, तित्तिक्खणीओ पाउसे सजलजलहर गज्जियरवबहिरीकयकन्निविवरयाए किमेयमेयं ? ति तसतेहिंनिसियसरसरिसवारिधारपवाओ; एयं पि पुव्वमणणुभूयसीयवाययाए दुक्करमिव पडिहासइ । अओ थोवपयासं वाणिज्जं कुणंतेहिं कालो गमियव्वु” ति परिभाविऊण नियसरीरालंकारेहिं गहिय हट्टं भंडं च जच्चवणिओ व्व ववहरिउमाढतो । कयं च हट्टासने सभवणं । तओ कइहि वि दिणेहिं भणियं सुकुमालियाए ‘अज्जउत्त ! जाव तुमं सव्व-

दिवसं पि ववहरंतो चिट्टुसि ताव अहमेगागिणी एत्थ घरे न सक्केमि चिट्टुं, ता आणेहि किंचि मह दुइज्जयं माणुसं' । तओ रइणा वि 'सच्चं भणइ वराई, जओ जा एसो पुव्वमणेयचेडियाचक्कवालपरिवुडा दिणमइवाहयंती सानिच्छएणं एगागिणी दुक्खेणं चिट्टुइ, अओ किंचि सहायं करेमि' ति चितयंतो गओ हट्टमग्गं । तत्थ दिट्ठो एगो पंगू । तं च दट्टुण चितियं नरवइणा 'हंत ! निखाओ एसो ति, ता करेमि एयं सहायं' ति परिभाविऊण भणिओ सो 'भइ ! जइ मम महिलाए घरपाहरिओ चिट्टुसि ताऽहं ते पइदिणं भोयणं दावेमि' । तेण वि निग्गइयत्तणओ पडिवन्नं तव्वयणं । तओ धरिओ सो निवइणा तीए सहाओ । सो य अच्चंतसुस्सरयाए किन्नरं पि अहरीकरितो तीए समीवे सयलं दिणं कायलीगीयगायणपरो चिट्टुइ । तओ अहियं सा तस्स गीएण रंजिज्जाए, अवि य-

जह जह सो महुरसरं नाणाविहवन्नसंकरसणाहं ।
अइघोलमाणकंठं गायइ नियडट्टिओ तीसे ॥९॥

सुकुमालिया वि तह तह मिगि व्व अहियं परव्वसा होइ ।
वाहेण व तेण तओ बद्धा सा नेहपासेहि ॥१०॥

तओ तीए अण्णदिणम्मि परिचइऊण कुलीणयं, वीसरिऊण लोयायारं, छड्डिऊण धम्मपक्खवायं, अविगणिऊण नियपइसिणेहं अणालोइऊण आवयं पडिवन्नो सो तीए । अन्नया य तम्मोहमोहियाए चितियं, अवि य-

जावेसो नरनाहो जीवइ ता मज्झ एइणा सद्धि ।
अणवरयसुरयलीलासुहं कओ होइ निस्संकं ॥११॥
सासंकमणुहवेज्जं तयं पि न य कुणइ चित्तसंतोसं ।
ता एयं नरनाहं पेसेमि जमालयं कह वि' ॥१२॥

एवं च चितंतीए समागओ को वि महूसवो । तम्मि य रइणा सह कीलानिमित्तं सा सुकुमालिया गंगातीरं गया । तत्थ ण्हाणनिमित्तं विसमतडीसंठिओ दिट्ठो तीए, चितियं च-'अहो ! एस पत्थावो मम समीहियस्स' ति भाविऊण निदयं पिळ्ळिऊण खित्तो गंगाए महानईए जलवेगे य वुज्झिउमाढत्तो, अवि य-

नीसेसकलाकुसलो वि सुरनईतिकखनीखेगेहि ।
उव्वत्तिउं पयत्तो विसमावडिओ वि नरनाहो ॥१३॥

गुणजुत्तो वि नरिंदो कह खित्तो निदयं पणोल्लेउं ।

पावाए तीए सव्वाहमम्मि पंगुम्मि रत्ताए ॥१४॥

राया वि भवियव्वयानिओगेणाऽऽसाइयफलगखंडो दूरदेसं गंतूण समुत्तिण्णो । तत्थ य गओ पच्चासन्ने सुप्पइट्टिए महानयरे । पसुत्तो य बहलतरुवरच्छायाए ।

इओ य तम्मि नयरे मओ अपुत्तो राया । तओ मंतिपुरस्सरेहिं सामंत-पउरेहिं रज्जमहाभरुव्वहणपुरिसगवेसणत्थं अहिवासियाणि पंचदिव्वाणि, अवि य-

हत्थी आसो छत्तं भिंगारो तह पइन्नयाओ य ।

एयाइं देवयाहिट्टियाइं हिंडंति उद्दामं ॥१५॥

सव्वत्थ तिय-चउक्काइएसु नयरस्स मज्झयारम्मि ।

भमिऊण नयरबाहिं पत्ताइं तत्थ ठणम्मि ॥१६॥

जत्थऽच्छइ जियसत्तू तरुवरछायाए सुहपसुत्तो उ ।

तं दट्टुं जयहत्थी करेइ गलगज्जियं सहसा ॥१७॥

हेसारवं च तुरओ तदुवरि संठाइ आयवत्तं पि ।

भिंगारो मुयइ जलं वीयंति य चामराओ वि ॥१८॥

तं च दट्टुण पलोइओ मंतिपमुहेहिं जाव दिट्ठो अनियट्टमाण-तरुच्छायापसुत्तो सव्वंगलक्खणधरो । तओ कओ जयजयारावो । विबुद्धो समाणो अभिसित्तो महारज्जाभिसेएण । जयकुंजरारूढो महाविभूर्इए य पविट्ठो नयरं । जाओ पुव्वं व सामंतमउडकोडितडकिणीकयपायपंकओ महानरिंदो ।

इओ य सा सुकुमालिया तं नरवइविदत्तदविणजायं तेण पंगुणा सह भक्खिऊण अन्नजीवणोवायमपेच्छंती तं पंगुमुत्तमंगारूढं काऊण गाम-नगरा इसु तग्गेयऽक्खित्त जणाओ भिक्खाइणा कयपाणवित्ती परिब्भमइ । लोगो य तीसे रूवाइगुणसंपयं पेच्छिऊण पुच्छइ 'भदे ? किमेवं विहरूवा वि होऊणं तुमं एयं पीढसप्पिणं सीसेणं वहसि ?' सा भणइ-भद्दा ! किं करेमि एवंविहो चेव मे देवेहिं गुरूहिं दिन्नो एस भत्त त्ति, तओ पइव्वयावयमणुसरंती सीसेणं वहामि' । एवं च कमेण परिब्भमंती पत्ता तं सुप्पइट्टिय-नयरं । अन्नदियहम्मि राइणो पुरओ जंपियं लोगेहिं जहा, 'देव ! एत्थ नगरे रूवोवहसियसुरसुंदरी सीससमारोवियकिन्नरस्सरपंगुभत्तारा पइव्वयावयमणुचरंती संपयं गिहे गिहे भिक्खं परिब्भमइ एगा नारी । तओ राइणा 'सा एसा पावा भविस्सइ' त्ति भाविऊण

कोरुहलाऊरियमाणसेण समाइट्टा पडिहारा जहा 'भो ! सदावेह तं जीए पइव्वयावयं चरंतीए गायणो पंगू सीसेण वुब्भइ, पेच्छामो केरिसं गायइ ?' । आएसाणंतरमेवाऽऽणीया सा पडिहारेहिं । दूराओ चेव दट्टूण पच्चभिजाणिरुण सन्निओ एगो पुरिसो जहा 'पुच्छहि एयं 'तओ पुच्छिया तेण भदे ! किं कारणं तुममेयं पीढसप्पिणं परिव्वहसि ?' तीए वि असंभव ति करिय अणोलक्खियनरनाहाए भणियं 'महाभाग ! देव-गुरूहिं एरिसो चेव मे दिन्नो भत्ता, तं च पइव्वयावयमणुचरंतीए न चइउं पारिज्जइ' तओ तारिसनारीचरियस-वणजणियविम्हयभरा-वूरिज्जमाणमाणसेण भणियं नरवइणा, अवि य-

'बाहवो रुधिरमापीतं, भक्षितं मांसमूरुजम् ।

भागीरथ्यां पतिः क्षिप्तः, साधु साधु पतिव्रते ? ॥१९॥

तं च सोऊण 'पच्चभिन्नायाऽहमणेणं' ति लज्जाए ठिया वयणमहोमुहं काउं ति तओ विण्णत्तो राया मंतीहिं 'देव ! को एस वुत्तंती ? रइणा भणियं 'अलमेयाए संकहाए' । मंतीहिं भणियं 'तहावि देव ! महंतमम्हाण कोउगं ता साहिज्जउ जइ अकहणीयं न भवइ' । तओ तन्निच्छयं नाऊण भणियं रइणा-जइएवं ता निसामेह-'अत्थि कयाइ निसामियं तुब्भेहिं जहा-चंपाहिवो जियसत्तू नाम राया सुकुमालियाए देवीए सुकुमालफरिसेण अइप्प सत्तो । सीयंतयं रज्जं नाऊण तीए सह जोगमइश पमत्तो निव्वासिओ परियणेण' । तेहिं भणियं 'देव ! समायन्निय मम्हेहिं' । रइणा भणियं 'जइ एवं तोऽहं सो जियसत्तू एसा य सा सुकुमालिया । तओ अडवीए मज्जे वच्चंताणं एसा तिसाभिभूयाइच्चाइ सव्वं सवित्थरं साहियं नरवइणा । तओ अच्चंतविम्हइया सव्वे, भणंति य 'अहो ! जहन्नत्तणमेईए जमेयाएएरिसं पुरिसरयणं परिच्चइय एसो सव्वाहमो पंगू अंगीकओ, अहो ? विवेयवियलत्तणमेईए' । एयं च निसामिऊण 'अहो ! कहां सो चेव एसो जीविओ रज्जं च पत्तो ?' ति भएण थरथरंतसव्वंगा 'इत्थीणं विसज्जणं दंडो' ति काऊण कया निव्विसया । जं च तीए तारिसं रायाणं मोत्तूण अंगीकओ पंगू तं तीए विवेयविगलत्तणं ति

[गतं सुकुमालिकाकथानकम् ॥४५॥]

अधुना ^३वज्राकथानकम् ।

[४६. वज्राकथानकम्]

अत्थि इहेव जंबुद्वीवे दीवे भारहे वासे अपरिमियगुणनिवासयं सुहावासयं नाम नयरं । तत्थ य पयईए चेव भद्दगो उचियन्नु हि या-ऽहियवियारनिउणो कट्टो नाम सेट्टी । तस्स य विवेयसेलवज्जासणी वज्जा नाम सहचारिणी । ताणं जम्मंतरोवज्जियपुन्नसंभारे

१. सं.वा.सु. "मारिका" ॥ २. ला. वज्राख्यानकम् ॥

पुन्नसारो नाम पुत्तो, अन्नं च पभूयसत्थत्थसूइओ तुंडिओ नाम सूयओ, तह अइफुडक्खगलावगा मयणसलागा नाम सालहिगा, अन्नो य पभूयलक्खणसंपन्नो जुज्झम्मि परकुक्कुडाण अजेओ रयणसेहरो नाम कुक्कुडो । पुत्तभंडाणि विय सिट्ठिणा सयं संवड्डियाणि नियपाणेर्हितो वि सेट्ठिस्स वल्लहाणि । तह नैव्वे(? तच्चे)यल्ले य देवसम्मो नाम दियवरदारगो । ताणं च जहाणुरूवं सुहमणुहवंताणं वच्चए कालो । अन्नया च रयणीए सिट्ठिस्स चिंता जाया, अवि य-

अइसंचिओ वि अत्थो रक्खिज्जंतो वि थोवदिवसेर्हि ।

अप्पवएण वि निट्ठइ जहंजणं खलु सलायाए ॥१॥

उभयभवविहलजीया अत्थविहिणो हवंति गुणिणो वि ।

साहसमाणधणा वि हु पावंति पराभवं पुरिसा ॥२॥

ता सव्वपयारेर्हि वि अत्थत्थं उज्जमो गिहत्थेण ।

निच्चं पि य कायव्वो न य कायव्वं तर्हि वसणं ॥३॥

तओ एवं चित्तिरुण सिट्ठिणा कया गमणसामग्गी, गहियं चउव्विहं भंडं, पगुणीकयाणि पवहणाणि, मेलिओ सत्थो, कओ बर्हि सत्थनिवेशो, भणिया य वज्जा, अवि य-

कंते ! हं अत्थत्थी संपइ देसंतरम्मि वच्चामि ।

ता तुमए भवणमिणं पडियरियव्वं पयत्तेण ॥४॥

पाढेयव्वो य इमो पुत्तो बहुणा वि दव्वदाणेण ।

पालेयव्वाणि तहा जत्तेणं पक्खिरूवाणि ॥५॥

किं बहुणा भणिएणं ? सव्वपयारेर्हि अप्पयं चेव ।

रक्खेयव्वं निच्चं परिहरियव्वा कुसंसग्गी ॥६॥

मा काहिसि उव्वेयं जम्हा थोवेर्हि चेव दियहेर्हि ।

आगच्छिस्सामि लहुं इय भणिउं जाइ सो सिट्ठी ॥७॥

तीए वि सयासे पइदिणं समागच्छइ देवसम्मो, आलावाईर्हि य घडिया वज्जा सह तेण, उक्तं च-

आलावो संवासो वीसंभो संथवो य इत्थीणं ।

परपुरिसेर्हि समाणं अहिओ च्विय नत्थि संदेहो ॥८॥

परिहासरंजणिज्जा परिहासपरा चला य पयईए ।

अविवेगसारहियया परनरसंगं कंहं जिणउ ॥१॥

तओ अकाले वि तस्साऽऽगमणपसंगं आलावाइसमायारं च दट्टुण विन्नाओ परमत्थो सूयगेण सालहिगाए य । तओ चित्तिं सूयगेण 'हंत ! अइजहन्नत्तणमेईए जो वीसारिऊण तायगुणे एवं करेइ ता किं निवारोमि ? अहवा न जुत्तमुवइसिउं रगाउरणं, उक्तं च-

गह-विस-भूय पणासण अत्थि अणेय नर, अत्थि जि वाहि पणासहिं तक्खणि वेज्जवर ।

जाणमि विज्जु सुलक्खु सुसत्थागम वहइ ।

नेहगहिहल्लहचित्तह जो ओसहु करइ ॥१०॥

तहा-

रगाउरहिययाणं विवेगरहियाण एत्थ जीवाणं ।

वियलियकुलसीलाणं जो उवएसो स अप्पवहो ॥११॥

जल-जलण-विसहरणं चोर-विसाणं च रुंभणं अत्थि ।

अणुरत्ताणं कत्थइ हिययाण नियत्तणं नत्थि ॥१२॥

अइसुंदरं पि काले जुत्तीजुत्तं तहा हियं पि सया ।

अणुरायपरवसाणं वयणं सुहिणो वि न सुहाइ ॥१३॥

मित्तो वि होइ सत्तू पिओ वि अपिओ निओ वि होइ परो ।

होइ गुरू वि अगुरुओ पुडिकूलपलाविरो लोए ॥१४॥

ता न किंचि एत्थ भणियव्वं ति । ठिओ मोणेणं । सालहिगा उण थीसहावत्तणओ चवलत्तणओ य कुरुकुरइउं पयत्ता, अवि य-

को एसो निल्लज्जो अकालवेलाए तायगेहम्मि ।

पविसइ तायविहीणे लोगायारं पि नवि मुणइ ॥१५॥

सामिपरोक्खम्मि गिहे परनारीसंजुयम्मि जो विसइ ।

सो लोगाओ निंदं लहइ तहा आवईओ य ॥१६॥

किं तायस्स न बीहसि रे धिट्ठ ! अणज्जकज्ज ! पाविट्ठ ? ।

भणिहिसि जह नवि क्हियं जइ एहिसि पुण वि इह गेहे ॥१७॥

एवं कुरुकुरंती भणिया सूयगेण जहा “भदे ! जो अन्नियाए दइओ तं चेव तायं मन्नाहि अन्नहा न सोहणं पेच्छमि, जओ भणियं-

पडिकूलकरण-जंपण-अप्पियसंगेण मम्मवेहेण ।

दाऊण अदाणेण य पिओ वि अपिओ जणो होइ ॥१८॥

खद्धं पि विसं विसमं, कुविओ वि अरी अही दसंतो वि ।

देज्ज न देज्ज व मरणं देइ च्चिय मम्मिओ मणुओ ॥१९॥

ता जइ पाणे धरिउं इच्छसि सलिलं च सीयलं पाउं ।

चिट्ठसु मूणवएणं आगच्छइ जा परं ताओ” ॥२०॥

अविवेयबहुल्याए नवि चिट्ठइ भणइ ‘जीयलुद्धोऽसि ।

तुंडिय ! तायपसाए नाविक्खसि पइदिणं विहिए’ ॥२१॥

एवं पि भणिया जा न पडिवज्जइ ता अवहीरिया सूयगेण तओ पइदिणं किरिकिरंती दट्ठुण जंपियं बडुएण जहा ‘न सोहणा एरिसा रइविग्घकारिणी जओ अइपभूयं जंपंतीए इमाए लोगो निसामिस्सइ ता विणासेहि एयं’ । तीए भणियं ‘कहं पुत्तभंडतुल्ला एसा वराई विणासिज्जइ’ ? देवसम्मेण भणियं ‘जइ न एवमेयं कीरइ तो अम्हाणं अवस्सं रइविग्घकारिणी जणावण्णवायजणगा य भविस्सइ’ । तीए वि तव्वयणमन्नहा-काउमचयंतीए कंधरं वलिरुण पक्खत्ता चुल्लीजलणम्मि । दिट्ठा सूयगेण चडफडंती, अवि य-

तह तीए पावाए रइरसलद्धाइ निहयमणाए ।

सा सालिगा वराई पक्खत्ता जलणमज्झम्मि ॥२२॥

जह बहुविहं रसंती पंचत्तं पाविआ खणद्धेण ।

कित्तियमेत्तं एयं अहवा वि हु विसयलुद्धाणं ॥२३॥

तं दट्ठु तुंडिओ वि हु चितइ “कह चा वलेणिमा वरई ।

वारिज्जंती वि मए न ठिया नियसामिभत्तिगया ॥२४॥

ता सव्वहा मए नियतुंडं रक्खियव्वं, मा मज्झ वि एसा गई भविस्सइ’ त्ति चितंतो ठिओ अप्पमत्तो । अन्नया य पविट्ठं तग्गिहे भिक्खट्ठा साहुजुवलयं । ताणं च एगेण कुक्कुडलक्खणवियाणगेण साहुणा दिसालोयं कारुण भणिओ बीओ जहा-

‘जइ सच्चं सामुद्दियसत्थं ता कुक्कुडस्स एयस्स ।

जो उवभुंजइ सीसं सो नियमां नरवई होइ’ ॥२५॥

तं च निसुयं कुडुंतरिएण तेण देवसम्मणेण चितियं च-

‘उवसंतवेसधारी तवसुसियंगा अराग-दोसिल्ला ।

जम्हा एए तम्हा सच्चं नियमेण एयं’ ति ॥२६॥

तओ भणिया तेण वज्जा जहा-पिये ! एयं कुक्कुडं विणासेउं देहि एयस्स मंसं जेण भक्खेमि । वज्जाए भणियं-देमि अन्नस्स कुक्कुडस्स मंसं, मा एयं सयं संवड्डियं पुत्तुल्लं निरवराहं विणासेहि । तेण भणियं-एएण चेव मह पओयणं, किंच जइ मए कज्जं ता एयं सिग्घं विणासेहि । तओ तम्मोहमोहियाए पडिवन्नमेईए, गहियो य कुक्कुडो विणासिओ य, अवि य-

तह सो चडप्फडंतो तीए अणज्जाइ दुट्टुवज्जाए ।

वावाइयो जहा सूयगस्स दुगुणं भयं जायं ॥२७॥

चितियं जहा ‘अहो ! संकडं समावडियं, जेण ममं पि मारिस्सए एसा निद्दया’ । ठिओ णिल्लुक्किऊण पंजरेगदेसे । जाव तं कुक्कुडयमंसं रंधइ ताव गओ सो नईए ण्हाणत्थं । एत्थंतरम्मि य भोयणं विमग्गतो समागओ लेहसालाओ तीए पुत्तो पुन्नसारो । विमग्गिया य तेण भोयणं । तव्वावडाए य तीए न किंचि अन्नं कयं । तओ भोयणमलहंतो रोविउं पयत्तो । तीए वि तं रुयंतं दट्टूण ‘एयमज्झाओ चेव किंपि अप्पमंसं देमि’ ति चित्तिऊण डोएण चालिऊण दिन्नं तक्कुक्कुडयस्स उत्तिमंगं । तं च खाइउं गओ लेहसालं । एत्थंतरम्मि य समागओ एसो, भणियं च तेण ‘किं सिद्धं न वंत्ति । तीए भणियं ‘सिद्धं, उवविससु’ । उवविट्ठो य सो हट्टुट्ठो । जाव परिवेट्ठं तं ताव सव्वओ गवेसंतो वि न तं सीसं पेच्छइ । तओ पुच्छिया सा तेण ‘किमित्थ सीसं न दीसइ’ ? तीए भणियं ‘दिन्नं मए तमसारं ति काऊण रुवंतस्स बालयस्स । तेण भणियं ‘दुट्टु कयं, जओ मए तस्स कारणे एसो विणासाविओ, ता अलमेइणा, संपयं जइ मए कज्जं ता तस्स चेव नियपुत्तस्स सीसं देहि । तओ तीए तमइविरुद्धं पि तन्नेहमहामोहमोहियमणाए अज्झवसियं पडिवन्नं च । निसुओ य एस ताण समुल्लावो तस्स चेव पुन्नसारस्स धाईए चितियं च-‘अहो ! महामोहविलसियं, अहो रागुकुडयाए वियंभियं, अहो इंदिद्याणं दुव्विलसियं, अहो ! अन्नाणस्स माहप्पं, अहो ! कम्माणं दारुणया, जमेयाए पावकम्माए एयं पि अकरणीयं पडिवन्नं’ ति चित्तिऊण

१. ला. ‘मा होइ नरनाहो ॥ २. सं.वा.सु. मए पओयणं ता एयं विणा’ ॥ ३. ‘यं च जहा ‘अहो सव्वहा संकडमावडियं’ ॥ ४. ला. तह वावडा’ ॥

गया लेहसालं एगंते य धरिऊण साहिओ सग्भावो पुन्नसारस्स । भएण य एसो रोविउं पयत्तो । संधीरिओ य धाईए 'पुत्त ! मा बीहेहि तहा करिस्सामि जहा तुह सोहणं भविस्सइ' ति । घेतूण तं निग्गया नयरओ । मिलिया य महासालनयरगामिणो सत्थस्स । पत्ता य कमेण तत्थ, जाव य तत्थ नयरबाहिं पसुत्तो कुमारो जंबुरुक्खच्छयाए । तद्विसं च तम्मि नयरे अपुत्तो राया पंचत्तमुवगओ अहिवासियाणि दिव्वाणि सव्वत्थ वि भूमिउं पत्ताणि पुन्नसारस्स समीवं । दट्टूण य सव्वलक्खणसंपुण्णो ति कारुण कओ दिव्वेहिं राया । उच्छलिओ जयजयारवो । पविट्टो महाविभूईए नयरे । पालए पणमंतसामंतरज्जं ।

सो वि कट्टुसेट्ठी विढ्विरुण पभूर्यंदविणजायं समागओ नियनगरे । जाव पविसइ निययोहे ताव केरिसं तं पेच्छइ ?, अवि य-

सव्वत्थ पडियसडियं परियणपरिवज्जियं विगयदव्वं ।

गयगोरुयं असोहं महामसाणस्स सारिच्छं ॥२८॥

तं च तारिसं दट्टूण चित्तिउं पयत्तो सेट्ठी-अहो ? किमेयं मम भवणं चेव न भवइ, उयाहु मज्झ चेव मइमोहो ?, किं वा मया सा वज्जा ?, किं वा अन्नो को वि वुत्तंतो ? । एवं चित्तयंतस्स निग्गया बाहिं सा वज्जा । पुच्छिया य परमत्थं । जाव न किंपि जंपइ, तओ पुणो वि निरुवयंतेण दिट्ठो पंजरमज्जेक्ककूणनिलुक्को सूयओ, भणिओ य 'अरे ! तुमं पि न किं पि साहसि ?' वज्जा य दूरट्ठिया चीरं वलंती अंगुलियाए तज्जेइ 'जाणिहिसि जइ साहसि' ? तओ सेट्ठिणा नायं जहा वज्जाभएण एस वराओ न पंजरगओ वज्जरइ' । तओ मुक्को पंजरगओ । आरूढो तरुसाहाए, भणियं च तेण 'ताय ! पुच्छह संपयं जेण सव्वं साहेमि, सेट्ठिणा भणियं 'वच्छ ! साहेहि को एस घरवुत्तंतो ? तेणाऽवि कहियं सवित्थरं । सेट्ठिणा भणियं-अवि जाणसि सा धाई दारयं गहाय कत्थ वि गया ? तेण भणियं 'ताय ! न याणामि' । तओ तीए चरियसवणायन्नणसंजायवेरगमग्गो चित्तिउं पयत्तो सेट्ठी, अवि य-

रे जीव ! जाण कज्जे आरोहसि भीमजलयररउदे ।

दुत्तारम्मि समुदे ताणित्थीणं इमं रूवं ॥२९॥

रे जीव ! जाण कज्जे पविससि अइतिक्खपहरणकराले ।

दुव्विसहे संगामे ताणित्थीणं इमं रूवं ॥३०॥

रे जीव ! जाण कज्जे किसिकम्मं कुणसि पसुसमो होउं ।

सी-उण्ह-वासदुहिओ ताणित्थीणं इमं रूवं ॥३१॥

१. सं.वा.सु. भमिउव्वायाणि गयाणि पुत्रं ॥ २. ला. दव्वजा ३. ला. अणेण ४. ला. कहिओ सवित्थरो ।

रे जीव ! जाण कज्जे वाणिज्जं कुणसिगरुयदुहहेउं ।
 बहुअलियं जंपंतो ताणित्थीणं इमं रूवं ॥३२॥
 रे जीव ! जाण कज्जे धाउव्वायं धमेसि पइदियहं ।
 मेलेसि मूलजाले ताणित्थीणं इमं रूवं ॥३३॥
 रे जीव ! जाण कज्जे आराहसि भूय-पेय-वेयाले ।
 महमंसविक्कणं ताणित्थीणं इमं रूवं ॥३४॥
 रे जीव ! जाण कज्जे अन्नाणि वि सहसि भीमदुक्खाइं ।
 नाणाविहरूवाइं ताणित्थीणं इमं रूवं ॥३५॥
 रे जीव ! महामोहेण मोहिओ धम्ममवि न चित्तेसि ।
 जासु पसत्तो ताओ परपुरिसेसुं पसज्जंति ॥३६॥
 रे जीव ! जाण रत्तो वंचसि मित्तं सहोयरं पियरं ।
 अइनिग्घणाओ ताओ वज्ज व्व अणत्थपउराओ ॥३७॥
 ता किं इमिणा परिचित्तिएण परिचइय ताओ नारीओ ।
 सग्गा-ऽपवग्गसुहयं करेमि तवसंजमुज्जोयं ॥३८॥
 इय चित्तिऊण सेट्ठी पभणइ 'रे कीर ! खमसु जं बद्धो ।
 एत्तियकालं धरिउं संपइ परिभमसु सेच्छए' ॥३९॥
 इय भणिओ सो कीरो महापसाओ त्ति ताय ? जंपंतो ।
 पणमित्तु सिट्ठिपाए उप्पइओ न ह यलं विमलं ॥४०॥
 सेट्ठी वि जाव वलिओ नियए सत्थम्मि ताव पेच्छेइ ।
 ण्हायं कयबलिकम्मं वच्चंतं लोयसंघायं ॥४१॥
 पुट्ठो य तत्थ को वि हु 'कत्थेसो जाइ जणवओ सव्वो' ।
 तेण वि भणियं 'सुंदर ! वंदणवडियाए सूरिस्स ॥४२॥
 नामेण पसंतस्स उ सुयनीरमहोदहिस्स संतस्स ।
 तीआ-ऽणागय-परिवट्टमाणविन्नायभावस्स' ॥४३॥
 तं सोऊणं कट्ठो पहिट्टमुहपंकओ पयडपुलओ ।
 गंतूण तत्थ सूरिं वंदइ परमेण विणएण ॥४४॥

वंदितु सेसए वि य मुणिणो धरणीयलम्मि उवविट्ठो ।
 भयवं पि गहिरसद्धो आढत्तो देसणं काउं ॥४५॥
 भो भो जीवा ! इहयं अणोरपारम्मि भवसमुद्दम्मि ।
 बुडुंताण जियाणं चउरंगं दुल्लहं एयं ॥४६॥

जओ भणियमागमे-

चत्तारि परमंगाणि दुल्लहाणीह जंतुणो ।
 माणुसत्तं सुई सद्धा संजमम्मि य वीरियं ॥३७६॥
 कम्मणं तु पहाणाए आणुपुव्वि कयाइ उ ।
 जीवा सोहिमणुप्पत्ता आययंति मणुस्सयं ॥३७७॥
 आलस्समोहऽवन्ना, थंभा कोहा पमाय किविणत्ता ।
 भय सोगा अन्नाणा वक्खेवकुऊहला रमणा ॥३७८॥
 एएहि कारणेहिं, लद्धूण सुदुल्लहं पि माणुस्सं ।
 न लहइ सुइं हियकरिं संसारुत्तारणिं जीवो ॥३७९॥
 आहच्च सवणं लद्धं सद्धा परमदुल्लहा ।
 सोच्चाणेयाउयं मगं, बहवे परिभमिस्सइ ॥३८०॥
 ता भो देवाणुपिया ! चउरंगं दुल्लहं लहेऊण ।
 वज्जेऊण पमायं धम्मम्मि समुज्जमं कुणह ॥५२॥
 पुत्त-कलत्ताईसुं वामूढा मा हु एत्थ संसारे ।
 भमह जणा ! सिवसुहकारयम्मि धम्मम्मि उज्जमहा ॥५३॥
 इय सूरिवयणमायन्निऊण संजायचरणपरिणामो ।
 विन्नवइ कट्ठसेट्ठी, रोमंचुच्चइयसव्वंगो ॥५४॥
 'भयवं ! निमज्जमाणं इमम्मि भीमम्मि भवसमुद्दम्मि ।
 उत्तारेहि महायस ! नियदिक्खाजाणवत्तेण ॥५५॥
 भयवं पि भणइ 'जुत्तं एयं तुम्हारिसाण भव्वाण' ।
 सेट्ठी वि तओ दव्वं विणिओयइ कुसलपक्खम्मि ॥५६॥

१. गाथेयमुत्तराध्ययनसूत्रस्य तृतीयेऽध्ययनेऽस्ति ॥ २. इमे द्वे गाथे उत्तराध्ययननिर्युक्तौ १६०-१६१ अङ्गाङ्किते

वर्तेते ॥

गिण्हइ मुणिवरदिक्खं विहेइ तवसंजमं महाघोरं ।

कालेण गहियसिक्खो गीयत्थो भाविओ जाओ ॥५७॥

तओ कमेण संवेगाइसयाओ अणुन्नाओ गुरुणा पडिवन्नो एकल्लविहारपडिमं । विहरंतो यं पत्तो कमेण महासालं नाम नयरं, जत्थ से पुत्तो राया जाओ । भिक्खासमए य पविट्ठो तत्तो रायाइभएण नासिरुण बडुएण सह तत्थ पुव्वागयाए वज्जाए गेहं । दूरओ चेव ओलक्खिओ तीए । न नाया सा तेण । तओ नियचित्तदुट्ठयाए चितियमणाए 'हंत ! भवियव्वं इमाओ इत्थ वि मम लाघवेणं, जओ न चिट्ठइ अयाणियमेयं मह चरियं विसेसओ एएण एत्थ चिट्ठंतेण, तओ निव्वासावेमि एयं केणइ उवाएण' । चितिरुण भत्तमज्झे पक्खिविरुण नियसुवन्नयं पक्खित्तं साहुपत्तए । जाव पयट्ठो साहू ताव पुक्करियं तीए, अवि य-

दे धाह धाह एसो हरिरुण सुवन्नयं महं जाइ ।

तं सोरुणं गहिओ साहू आरक्खियनरेहिं ॥५८॥

निरूवंतेहिं य दिट्ठं सुवन्नयं । सलोद्धो त्ति कारुण नीओ रायउलं । 'लिंगि' त्ति सवियक्केहिं साहिओ रायस्स, तेणाऽवि मीमंसाकोरुहलेहिं य मंतीहिं आणाविओ नियसमीवे । आणिज्जंतो य दूरओ चेव दिट्ठो धाईए, ओलक्खिरुण य 'हा ! ताय' त्ति भणंती पडिया पाएसु रोविउं समाढत्ता । तओ 'कस्स पायवडिया मम जणणी रोवइ' त्ति सवियक्को समागओ सामंतपरिवुडो राया, पुच्छियं च जहा 'अंबे ! को एस' ? तीए निवेइयं जहा 'देव ! एसो तुह जणओ कट्ठो नाम' । चिरदिट्ठं पि ओलक्खिरुण निवडिओ राया वि से चलणेसु । नीओ सहामंडवं । निवेसिओ सीहासणे । भयवया वि कया भवनिव्वेयजणणी धम्मदेसणा । पडिबुद्धो राया पभूयलोगो य । राइणा जाव गवेसाविया दुरायार ताव एयं वइयरं निसामिरुण पणट्ठा वज्जा । राया वि पइदिणं धम्ममायन्नयंतो जाओ जिणधम्मपरायणो । साहू वि अन्नत्थ विहरमाणो 'पच्चासन्नो पाउस'त्ति कारुण विन्नत्तो नरिंदेण, अवि य-

'भयवं ! तुह प्पसायाउ पाविओ दुल्लहो इमो धम्मो ।

चित्तामणिरयणसमो संसारमहासमुद्धम्मि ॥५९॥

जह चितियनीसेसत्थसाहगो सामि ? तुज्झ विरहम्मि ।

लुप्पिहिई कुप्पवयणपासंडियचोरनिवहेहिं ॥६०॥

संसारडविमञ्जे महानिहाणं व पाविओ एस ।
 धम्मो तुह पहु ? विरहे धिप्पिहिई मोहराएण ॥६१॥
 सयलतरुविरहियाए संसारमरुत्थलीय मज्झम्मि ।
 पत्तो कप्पतरू विव कप्पियफलदायगो धम्मो ॥६२॥
 सो सामिय ! तुह विरहे पमायकव्वाडिएण बलिएण ।
 अवहरिउं मज्झ बलं कप्पो(प्पे?)यव्वो न संदेहो ॥६३॥
 ता एयं नाऊणं अम्हाणुवरोहओ इहं चेव ।
 एगं वरिसाकालं कुणह पसायं विहेऊण" ॥६४॥

भयवं पि गुणंतरं नाऊण ठिओ तत्थेव । उवसंतं च समत्थं नयरं । पडिवन्नो सव्वलोगेण जिणप्पणीओ धम्मो । तं च तारिसं पवयणप्पभावणं दट्टूण पउट्टा माहणा । ओहावणानिमित्तं च भयवओ कओ कवडोवाओ । इच्छियद्वव्वप्पाणेण उवयरिया गुव्विणी खुदुकुट्टणी, भणिया य "भदे ? अइक्कंते पाउसे जया सव्वलोग-सामंत-मंतिपरिवुडो एयस्स समणगस्स अणुव्वयत्थं वच्चए राया तया तुमए परिव्वाइयावेसेण पुरओ ठाइऊण भणियव्वं जहा 'भयवं ! मह पोट्टं करिऊण संपयं कत्थ चलिओऽसि ?" । वत्ते य वरिसकाले जया विहारनिमित्तं पट्टिओ भयवं राइणा अणुगम्मंतो तया सा परिव्वाइया-रूवेण पुरओ ठिया, अवि य-

कासायवत्थसंतुयदेहा उद्दाम चमरियविहत्था ।
 कयपुंडयचच्चिका जइपुरओ संठिया एसा ॥६५॥
 जंपइ 'किं मह पोट्टं काउं अन्नत्थ पत्थिओ तं सि ।
 किं तुह जुज्जइ एयं दयापहाणा जओ मुणिणो' ॥६६॥

तं च सोऊण चित्तियं मुणिणा 'अहो ! निल्लज्जत्तणं, अहो ! पावाए धिट्टत्तमं, अहो ! पवयणस्सुवरि पच्चणीयया, अहो ! पावकम्मसमायरणसीलत्तणमेईए, ता सव्वहा पाणाइवाएणावि पवयणस्सुनई कायव्व, त्ति चित्तिऊण भणिया साहुणा, अवि य-

"जइ तुज्जइ इमो गब्भो मज्झ सयासाउ हंत ! उप्पन्नो ।
 ता नियसमए जोणीदारेण विणिग्गमिज्जा उ ॥६७॥
 अह पुण अन्नह एसो निप्फन्नो तो तड त्ति भित्तूण ।
 कुर्च्छि संपयमेव य निग्गच्छउ मज्झ सच्चेणं" ॥६८॥

इय जंपियम्मि मुणिणा चरणपभावेण तस्स विमलेण ।
 भित्तुं तड त्ति कुच्छि पडिओ धरणीयले गब्भो ॥६९॥
 ता विलविउं पयत्ता, “इमेहिं पावेहिं कारिया अहयं ।
 धिज्जाइएहिं एयं तं मह मत्थंतियं जायं ॥७०॥
 धी धी मह बुद्धीए पावाए पावकम्मनिरयाए ।
 एएसिं वयणेण जीए इमं एरिसं विहियं” ॥७१॥
 एवं विलवंतीए करुणाजुत्तेण साहुणा पुण वि ।
 नियतवतेयबलेणं अवहरिया वेयणा तीए ॥७२॥
 गब्भो य तडफडेउं मओ अनिप्फण्णओ त्ति काऊण ।
 सव्वजणम्मि य जाया जिणसासणउन्नई गरुया ॥७३॥
 इय उन्नइं विहेउं धम्मस्स मुणी वि विहरिओऽन्नत्थ ।
 आलोइय पडिकंतो जाओ आराहगो एसो ॥९४॥
 कुविएण माहणा ते निव्विसया कारिया नरिदेण ।
 वज्जा वि भवसमुदे अणोरपारम्मि परिभमिही ॥९५॥

वज्जाकथानकं [समाप्तम्] ॥४६॥

एताश्च कामयमानस्य ये दोषा भवन्ति तान् श्लोकेनाऽऽह-
 कामयंतो वियद्धोवि नारीणं होइ खेळणं ।

दासो व्व आवयाओ य पावो पावेइ दुम्मई ॥१७१॥

कामयमानः=ताभिः सह विषयसुखमनुभवन्, विदग्धोऽपि=पण्डितोऽपि, नारीणां=
 स्त्रीणाम् भवति=जायते ‘खेळणं’ ति क्रीडनकम्, दासवत्=निजकिङ्करवत्, यत् उक्तम् -

नो रक्खसीसु गिज्जेज्जा(ज्ज) गंडवच्छसु गेगचित्तासु ।

जाओ पुरिसं पलोभिय, खेळंति जहा व दासेहिं ॥३८१॥ (उ. अ. ८ गा. १८)

आपदश्च=शरीरादिबाधाः, चकाराद् मानसिकपीडाश्च, पापः=पापकर्मा, प्राप्नोति=
 लभते, दुर्मतिः=दुष्टबुद्धिर्यतः-

जो थीणं वसवत्ती, होइ नरो मोहमोहिओ पावो ।

सो खिवई अप्पाणं, आवइनीरयरे घोरे ॥३८२॥

इति श्लोकार्थः ॥१७१॥ यतश्चैवं तस्मात् एवं तत्तं वियास्ति ततो विरत्तचित्तओ ।
दूरं नारी परिच्चज्ज धम्मारामे रमे नरो ॥१६२॥

एवम्=अनेन प्रकारेण, तत्त्वं=परमार्थं स्त्रीणां सूत्रकारोदितं तं श(तच्छ ?)रीरा
वयवासारतरूपं वा यथा-

गलल्लाकरालेऽपि दृश्याऽस्थिस्थानसङ्कुले ।
मुखाख्ये विवरे सारं मोहात् किमपरं भवेत् ॥३८३॥

मांसासृक्मूतिपिण्डेषु, चर्मणा वेष्टितेषु च ।
पयोधरेषु रागान्धा ! ब्रूत किं रामणीयकम् ? ॥३८४॥

इत्यादि विचार्य=परिभाव्य, ततश्च दूरं=विप्रकृष्टम्, नारी =ललनाम्, परित्यज्य=
त्यक्त्वा । धर्मारामे=धर्मोपवने, रमेत=क्रीडेत । यतस्तत्र विशेषतो नयनमनां स्यारमन्ति,
नरः=पुमानिति श्लोकार्थः ॥१७२॥

किमेतत् सर्वमेवम् ?, अन्यथा वा ? इति परप्रश्ने सत्याह-

एमेयं नऽन्नहा सम्मं, भाविज्जंतं जहट्टियं ।
कीवाणं कायरणं च, राग-द्वोसवसाण य ॥१७३॥

प्राकृतत्वादेवमेतन्नाऽन्यथा सम्यग्निश्चितम्, भाव्यमानं=पर्यालोच्यमानम्, यथास्थितं
=यथावत्स्वरूपम्, क्लीबानां=स्त्रीदर्शनादिष्वपि विह्वलीभवताम् कातराणां=निःसत्त्वानाम्,
राग-द्वेषवशकानां च=तद्वशवर्तिनाम्, ये त्वेतद्विपरीतास्तेषां स्त्रीसम्बन्धेऽपि न चित्तक्षोभः
सम्पद्यते, यत उक्तमागमे-जे णं सव्वुत्तमे पुरिसे से णं पच्चंगुम्भडजोव्वण-सव्वुत्तम-रूव-
लावण्ण-कंतिकलियाए वि इत्थीए सन्निज्जे वाससयं पि वसेज्जा नो णं मणसा वि तं
इत्थियं अभिलसेज्जा ()

अतस्तस्यै तदन्यथाऽपि सम्भाव्यत इति श्लोकार्थः ॥१७३॥

किमेतद्दोषजालं स्त्रीणामेवोच्यते आहोस्वित् पुरुषाणामपि ? इति प्रश्ने श्लोकमाह-

तं च तुल्लं नराणं पि, जं इत्थीणं सवित्थरं ।

दंसित्ता दोसजालं तु, दंसियं समए समं ॥१७४॥

★^३ तच्च=पूर्वोक्तं स्त्रीदोषजालम्, तुल्यं=समम्, नराणामपि यत् स्त्रीणां
सविस्तरं दर्शयित्वा दोषजालं=दूषणकदम्बकम्, दर्शितं=कथितम्, समये=सिद्धान्ते,
समं=तुल्यमिति श्लोकार्थः ॥१७४॥ ततश्च- ★

१. ला. सत्यम् ? अ २. उत्थानिकेयं ला. संज्ञकप्रतावेवोपलब्धा ॥ ३. ★★ एतच्चिह्नद्वयान्तर्गत पाठः
केवलं ला. संज्ञकप्रतावेवोपलभ्यते ॥

जिणागमाणुसारेण, वज्जेयव्वा सुदूरओ ।

सभूमियानिओगेण, कायव्वमुचियं तथा ॥१७५॥

जिणागमानुसारेण=जिनसिद्धान्तकथितानुवर्तनेन 'वज्जेयव्व' त्ति वर्जनीयाः
=परिहर्तव्याः, सुदूरतः=दूरादूरेणेति, तथा स्वभूमिकानियोगेन=निजावस्थासामर्थ्येन,
'कायव्वं' त्ति कर्तव्यं=विधेयम् उचितं=यद्योग्यम्, तथा' इति यथा वर्जनं कर्तव्यं
तथोचितमपि कर्तव्यम्, अयं भाव इति श्लोकार्थः ॥१७५॥

पूर्व वर्जनं महदादरेण प्रतिपाद्य कस्मादुचितमपि तथोच्यते ? इति प्रश्ने
श्लोकमाह-

पुव्वं तित्थंकरेणाऽवि, कयं तित्थं चउव्विहं ।

न तं पुण्ण विणा ताहिं, पहाणंगमिणं पि हु ॥१७६॥

पूर्वम्=आदौ तीर्थकरेणाऽपि कृतं=निर्वर्तितम्, तीर्थं=सङ्घरूपम्, चतुर्विधं=
चतुःप्रकारम्, न=नैव तत् पूर्णं विना =विनैव, ताभिः=स्त्रीभिः, अतः प्रधानाङ्गं=
सारावयवं तीर्थस्येति भावः, इदमपि=स्त्रीलक्षणमिति श्लोकार्थः ॥१७६॥

यतः-

चाउव्वण्णस्स संघस्स, मज्झे सुव्वंति साविया ।

सहंसणेण नाणेण, जुत्ता सीलव्वएहि य ॥१७७॥

यतश्चतुर्वर्णस्य=साधु-साध्वी-श्रावक-श्राविकालक्षणस्य, सङ्घस्य तीर्थस्य, मध्ये
श्रूयन्ते=समाकर्ण्यन्ते, श्राविकाः=श्रमणोपासिकाः सदृशनेन=प्रधानसम्यक्त्वेन,
ज्ञानेन=श्रुतज्ञानादिना, युक्ताः=समेताः, शीलव्रतैश्च=चारित्ररूपैरिति श्लोकार्थः ॥१७७॥

कास्ताः श्राविकाः श्रूयन्ते सङ्घमध्य इति प्रतिपादनार्थं श्लोकमाह-

रेवई देवई सीया, नंदा भद्दा मणोरमा ।

सुभद्दा सुलसाईया, पायडा तियसाण वि ॥१७८॥

रेवती देवकी सीता नन्दा भद्रा मनोरमा सुभद्रा सुलसादिकाः ।

तत्र रेवती=भगवदौषधदात्री, देवकी=वासुदेवमाता, सीता=रामभार्या, नन्दा
अभयकुमारजननी, भद्रा=धन्यकजनेता मनोरमा=सुदर्शनप्रिया, सुभद्रा=चम्पायां
कृतशासनोत्सर्पणा, सुलसा=देवकीसुतप्रतिपालयित्री पूर्वप्रतिपादिता वा, आदिशब्दाद्
नर्मदासुन्दरी-अभयश्रीप्रभृतयः । कियन्त्यः शृङ्ग्राहं कथ्यन्ते 'पायड'त्ति प्रकटः=प्रसिद्धाः,

दीर्घत्वं प्राकृतत्वात् त्रिदशानामपि=देवानामपीति श्लोकाक्षरार्थः ॥१७८॥

[४७. रेवतीकथानकम्]

भावार्थस्तु कथानकेभ्योऽवसेयः । तत्र रेवतीकथानकम्-

अत्थि इह भरहवासे पभूय धण-धणनिब्भ रंम्मं ।

नीसेसगुणनिहाणं मिढियगामं ति वरनयरं ॥१॥

तत्थ य पभूयधण-धन्नरिद्धिविच्छड्डधन्न पूरिया अहियं ।

रेवइनामा निवसइ गाहावइणी गुणसमग्गा ॥२॥

सम्मत्त-नाण-चारित्तरयणपरिमंडिया समणभत्ता ।

तवनियमरया जीवाइवत्थुपरिवित्थरविहण्णू ॥३॥

किं बहुणा तियसेहिं वि धम्मोओ चालितं न जा सक्का ।

खाइयसम्मत्तधरी पसंसणिज्जा मुणीणं पि ॥४॥

आगामिणीइ चउवीसिगाइ होऊणं जिणवरिंदो जा ।

नामेणं सयक्किन्ती दसमो देविंद नयचलणो ॥५॥

अह अन्नया कयाई दिप्पंतो जिणवरिंदरिद्धीए ।

संपत्तो वीरजिणो विहरंतो गाम-नगरेसुं ॥६॥

नामेण सालकोट्टयउज्जाणे विरइयम्मि ओसरणे ।

देव-मणुया-ऽसुराए परिसाए अक्खए धम्मं ॥७॥

अह अन्नया जिणिंदस्स तत्थ देहम्मि रत्तअइसारो ।

संजाओ दाहो वि य जो दुसहो इयरपुरिसाणं ॥८॥

तं दट्टुं रेवइ सावियाए पुच्छित्तु सन्निहियविज्जं ।

पक्का दो बिज्जउय सिरिवीरजिणस्स अट्टाए ॥९॥

पत्तो य तम्मि दियहे सीहो नामेण भगवओ साहू ।

उज्जाणअदूरट्टियमालुयकच्छस्स आसन्ने ॥१०॥

आयावित्तो निसुणइ, "छउमत्थो चेव काहिई कालं ।

वीरजिणो गोसालगतेएणऽऽइद्धओ सत्तो" ॥११॥

१. सं.वा.सु. *यदिअवन्नणियं रम्मं ॥ २. ला. धम्मोओ न चालितं कहवि सक्का ॥ ३. सं.वा.सु. *ण नरवरिंदो ॥ ४. सं.वा.सु. *मो सिज्झिहिइ नयच* ॥ ५. ला. *णायड्ढिओ ॥

तं निरुणितं परुन्नो मालुयकच्छंतरम्मि पविसेउं ।
 सदाविऊण ततो भणिओ सिरिवीरनाहेण ॥१२॥
 “मा कुणसु एत्थ अधिइं पनरस वासाइं सऽद्धयाइं अहं ।
 केवलिपरियाएणं विहरित्तु सिवं गमिस्सामि ॥१३॥
 ता वच्च तुमं रेवइगाहावइणीए भद्द ! गेहम्मि ।
 जे मह अट्टाए कया बिज्जउरा ते पमोत्तूणं ॥१४॥
 अन्ने कुंभंडिफला बहुदेवसिया सअट्टया पक्का ।
 तीए ते मग्गेउं आणेहि” तओ इमं भणिओ ॥१५॥
 रेवइगिहम्मि सीहो पत्तो तं इंतयं इमा दट्टुं ।
 अब्भुट्टिऊण वंदइ परेण विणएण भत्तीए ॥१६॥
 भणइ य ‘आइसह पओयणं’ ति तेण वि इमा तओ भणिया ।
 ‘भदे ! ओसहकज्जे समागओ एत्थ अहयं ति ॥१७॥
 किंतु तुमे बिज्जउरा जे पक्का भगवओ निमित्तेणं ।
 ते मोत्तुं जे सऽट्टा पक्का ते देहि पूसफला’ ॥१८॥
 तो रेवई पयंपइ ‘केणायं तुज्झ सीह ? अक्खायं ।
 मज्झ रहस्सियमट्टुं ‘तिलोगनाहेण’ सो भणइ ॥१९॥
 तो पयडुद्धियरोमंचकंचुया जाइ भत्तहरयम्मि ।
 घेत्तूण तयं वियरइ सीहस्स सुसाहुसीहस्स ॥२०॥
 तो पत्त-चित्त-वित्ताइएहिं सुद्धेण तेण दाणेण ।
 देवाउंए निबद्धे तओ चुयाए जिणिदत्तं ॥२१॥
 उप्पाडियनाणवरा संबोहियसयलभव्वसंघाया ।
 तेलोक्कपणयवरपायपंकया वच्चिही मोक्खं ॥२२॥
 सीहो वि तयं अप्पइ जिणस्स भयवं पि तदुवओगेण ।
 जाओ हट्टसरीरो तुट्टमओ तिहुयणं सयलं ॥२३॥
 धन्ना य पुण्णवंता, पगुणो भयवं जदोसहेणं तु ।
 मणुया-ऽसुर-देवेहिं पसंसिया रेवई एवं ॥२४॥

इय एवमाइएहिं गुणेहिं तियसाण पायडा एसा ।
संखेवेणं एयं रेवइचरियं मए कहियं ॥२५॥

[गतं रेवतीकथानकं ॥४७॥]

इदानीं देवकीकथानकमाख्यायते-

[४८. देवकीकथानकम्]

अत्थि इह जंबुद्वीवे रायगिहं नाम पुरवरं पयडं ।
तत्थऽत्थि जरासंधो राया पडिवासुदेवो त्ति ॥१॥
तस्स य जीवजसाए सुयाइ भत्ता महाबलसमग्गो ।
कंसो त्ति सुप्पसिद्धो, पुत्तो सिरिउग्गसेणस्स ॥२॥
एत्तो य सोरियपुरे समुद्धविजयाइया दस दसारा ।
संति बहुगुणसमग्गा लहुओ अह ताण वसुदेवो ॥३॥
बलविरियसत्तकलिओ तेलोक्कऽब्भहियरूवसोहग्गो ।
तस्स य कंसेण समं वड्डइ परमा दढं पीई ॥४॥
अह अनन्या कयाई पोलासपुराहिवस्स नरवइणो ।
देवयरायस्स सुया नामेणं देवई कन्ना ॥५॥
कंसेण निययपित्तियभणिणी वसुदेवकारणे वरिया ।
गंतुं पोलासपुरे वसुदेवसमन्निएणेव ॥६॥
परिणीया सुहलग्गे तत्तो कंसस्स रायहाणीए ।
महुराए दो वि गया वद्धावणयं तर्हि जायं ॥७॥
तत्थ य पमोयदिवसे अइमुत्तो नाम मुणिवरो पत्तो ।
कंसस्स लहुयभाया वरनाणी गुणगणसमग्गो ॥८॥
सो मत्ताए तीए जीवजसाए खलीकओ अहियं ।
दियरु त्ति भणंतीए तेण तओ सा इमं भणिया ॥९॥
“पावे ! जीए पमोए नच्चसि हल्लप्फला तुमं अज्ज ।
कंठग्गहाइएहिं ममं पि एवं कयत्थेसि ॥१०॥

तीसे सत्तमगब्भो तुह पइ-पिइमारगो न संदेहो ।
 होही' इय भणिऊणं नीसरिओ तीए गेहाओ ॥११॥
 सा वि तयं नियपइणो साहइ एसो वि चितए एवं ।
 'मह भाउगस्स वयणं पलए वि न अन्नहा होइ' ॥१२॥
 तो मत्तयचेड्डुणं गेहे गंतूण भणइ वसुदेवं ।
 दिज्जंतु मज्झ सामिय ! सत्त वि अह देवईगब्भा ॥१३॥
 तब्भावमयाणेउं पडिवन्ना तस्स पत्थणां तेण ।
 तो हट्टतुट्टचित्तो चिट्ठइ जा गब्भसमओ से ॥१४॥
 समयम्मि य रक्खावइ पयत्तओ देवइं सपुरिसेहिं ।
 गिण्हित्तु तीए पुत्ते सिलाए अच्छेडए कंसो ॥१५॥
 एतो य मलयविसए भहिलनयरम्मि नागवरइब्भो ।
 निवसइ तस्स य सुलसा भज्जा अह जायनिंदु त्ति ॥१६॥
 नेमित्तिणसिद्धा आराहइ सा तओ पयत्तेण ।
 हरिणेगमेसिदेवं तुट्ठो सो जंपई एवं ॥१७॥
 'भदे ! एरिसकम्मं तुमए विहियं अहऽन्नजम्मम्मि ।
 पसविहिसि तुमं पुत्ते मइल्लए नत्थि संदेहो ॥१८॥
 किंतु तुह भत्तितुट्ठो परिवत्तिय देमि अन्ननारिसुए ।
 सा भणइ होउ एवं ते वि महं अत्तया चेव ॥१९॥
 ता सो सुरसेणवई समकालं कुणइ गब्भसंबंधे ।
 पसवदिणम्मि य तत्तो वंचित्ता कंसपाहरिए ॥२०॥
 देवइसुयं जियंतं अप्पइ सुलसाइ तीइ मयगं तु ।
 मुंचइ देवइ पासे कंसो वितयं विणासेइ ॥२१॥
 एवं छण्ह सुयाणं सुरेण परिवत्तणं कयं जाव ।
 ता सत्तमम्मि गब्भे वसुदेवं देवई भणइ ॥२२॥
 'रक्खेहि इमं एगं मज्झ सुयं सामि ! पावकंसाओ ।
 किमहं इमस्स दासी जेणेवं हणइ मह पुत्ते' ॥२३॥

१. सं.वा.सु. 'णा चेव ॥ २. ला. पुत्तं ॥ ३. ला. मयल्लए ॥

'एव करिस्सामि पिए ! आसासेउं तयं पसवदियहे ।
 सत्तमगब्भे जायं नवमं अह केसवं जणओ ॥२४॥
 गिण्हत्तु जाइ तुरियं देवीसन्निज्जओ नियवयम्मि ।
 अप्पेइ जसोयाए सा वि तयं गिण्हए बालं ॥२५॥
 'भदे ! बालेण समं भलियव्वं' जंपिऊण वसुदेवो ।
 गिण्हइ अहिणवजायं तद्धयं तीए हत्थाओ ॥२६॥
 वेगेण गओ गेहं, धरइ तयं देवईए पासम्मि ।
 कंसनरा य विउद्धा किं जायं इइ पयंपंता ॥२७॥
 पेच्छंति देवईए पासे तं कन्नयं तओ घेतुं ।
 गंतूण तुरियतुरियं ते वि हु अप्पंति नियपहुणो ॥२८॥
 सो चिंतइ 'कह एसो इत्थीभावेण सत्तमो गब्भो ।
 जाओ अह इत्थीए को हम्मइ' चित्तिऊणेवं ॥२९॥
 ईसिं विदारिऊणं एगं नासाउडं अवज्झ ति ।
 इत्थि ति पुणो वि तयं मेल्लवइ देवई पासे ॥३०॥
 कयक्कणहनामधेओ विद्धिगओ नवमवासुदेवो वि ।
 नियसावक्कयभाइयबलदेवसमण्णिओ गोटे ॥३१॥
 वद्धंतेण य निहओ कंसो मल्लूसवम्मि वट्टंते ।
 जीवजसा पइमरणं साहइ गंतूण नियपिउणो ॥३२॥
 तस्स भएणं नट्टा दस वि दसारा सके सव-बला वि ।
 पच्छिमसमुद्धतीरे बारवई तेहिं निम्मविया ॥३३॥
 हणिऊण जरासंधं भरहद्धं साहियं तओ हरिणा ।
 कुणइ तेहिं सो रज्जं चित्तारहियं भयविमुक्को ॥३४॥
 अह अन्नया कयाई बुद्धो बुद्धारविंदसरिसमुहो ।
 कुवल्लयदलसामतणू समुह्वविजयस्स अंगरुहो ॥३५॥
 अच्चुब्भडनवजोव्वणरायमईसंगचागदुल्ललिओ ।
 सिद्धिपुरंधीसंबंधबंधुरो तिहयणपईवो ॥३६॥

देवा-ऽसुर-नरवरमाणमलणकंदप्पदप्पविह्वणो ।
 देविद-चंद-असुरिदवंदपरिवंदियच्चलणो ॥३७॥
 लोयालोर्यविलोइयकेवलउवलद्धसयलतेलोक्को ।
 तवतणुयवरऽद्वारससहस्समुणिजणियपरिवारो ॥३८॥
 आगासपत्तधयधम्मचक्करिद्धीपंबंधचसुसमिद्धो ।
 जउकुलनहयलचंदो समोसढो रिद्धिनेमिजिणो ॥३९॥
 आयासपत्तसिहरग्गखलियरविरहतुरंगमे दुग्गे ।
 उज्जिते णाणाविहवणस्सईसंकुले रम्मे ॥४०॥

अवि य-

जत्थ हिंताल-तालातला सालया,
 केलि-एला-ऽऽमली- लवलि-वरसरलया ।
 अक्ख-रुद्धक्ख-दक्खा-वड-ऽंक्खोडया,
 बोरि-बिज्जउरि-जंबीरि-साहोडया ॥४१॥
 नाग-पुन्नाग-कडहंग-नारंगया,
 पूग-सागा-ऽंगरू-तगर-वरगंगया । [ग्रंथाग्रम् ११०००]
 निंब-काउंबरीओवरं-ऽंवाडया,
 उंब-काउंब-अंबोइया ताडया ॥४२॥
 केयई-कुडय-कंकेल्लि-कंकोलया,
 कुंद-मचकुंद-करमद्विया करलया ।
 सल्लई-मल्लईवेल्ल-अंकोल्लया,
 मालईपाडला तिलय-विरिहिल्लया ॥४३॥
 लउय-छत्तोय-सत्तच्छया कुज्जया,
 अज्जुणा-ऽणोज्जखज्जूरि-वरसज्जया ।
 चंदणा वंदणा बाण-कणवीरया,
 मयण-मचकोलि-मंदार-साहारया ॥४४॥

१. ला. "यपयप्सो के" ॥ २. सं.वा.सु. "पवंचसु" ॥ ३. ला. "तालीतला" ॥ ४. ला. पूगसा [ग्रन्थाग्रम् ११०००] गागरू ॥ ५. ग्रन्थश्लोकसंख्यात्मक एष पाठः सं.वा.सु. प्रतीनां ज्ञेयः ॥ ६. ला. अंबकायंब ॥ ७. ला. लि-साहार-मंदारया ॥

सिंस्सवा हिंसिवा संति संताणया,
 सत्तली सिरिस-सयवत्ति-जासुयणया ।
 पिप्पलं-ऽबिलिय-जाइप्फला बउलया,
 सिंबली पीलु-नालेर-पेयालया ॥४५॥
 दाडिमी वाइमी चंपयारिट्टया,
 वंस-सीवन्नि-कोसंब-कविअट्टया ।
 खइर-कप्पूर-टिबरुय-कणियारया,
 राइणी खीरिणिया(खीरिणी) करवरी वारया ॥४६॥
 सिंदुवार रुया वरुणफलिहट्टया[?],
 फणस-अइवंतया भुज्ज-हालिदया ।
 महुय-फणिवल्लि-धव-धम्मणा गुंदया,
 किंपि कल्हारि-कंथारि-तयंतिंदुया ॥४७॥
 हरडई जूहिया फरुससोहिंजणा,
 किंकिरी किंसुया सुरतरू अंजणा ।
 अरणिया रलुय-नरहुल्ल-लव-केसर,
 लोद-किरिमालया कुरव-दंतस्सर ॥४८॥
 फलिणि-फुडसिगिया रत्तिरोहीडया,
 लिंब-ऊयारविंजा समी हरडया ।
 जत्थ वणजाइ एमाइया पेगसो,
 तं नगं वण्णऊ कह व अम्हारिसो ? ॥४९॥

किंच-

नाणाविहजाइविहंगरावपूरंतनहयलाभोगे ।
 भोगपरायणजायवमिहुणसमारद्धकीलणए ॥५०॥
 णयणाभिरामकिन्नरजुवइसमारद्धमहरसंगीए ।
 संगीयरवायन्नण निच्चलदीसंतहरिणउले ॥५१॥
 हरि-णउलपमुहभीसणसावयसयसंचरंतमेहलए ।
 मेहलयनीरतम्मिंतसेलपवहंतनिज्जरणे ॥५२॥

१. ला. सित्त्वावा, अशुद्धोऽयं पाठः ॥ २. ला. फललहट्टया ॥ ३. सं.वा.सु. *वल्लि-वरथ* ॥ ४. सं.वा.सु. किंकिरी ॥

निञ्जरणरावपूरियगुरुकुहरसमुच्छलंतपडिसद्दे ।
 पडिसद्दतच्छ-वानरंसीघविमुच्चतबुक्कारे ॥५३॥
 इय एवमाइबहुविह-अच्चभुयसयसमाउले रम्मे ।
 उज्जते नेमिजिणो समोसढो तिजगपणयपओ ॥५४॥
 वद्धावएण ततो कण्हो वद्धाविओ जहा 'देव ? ।
 वड्डसु पीईइ दढं समोसढो रिट्टुनेमिजिणो ॥५५॥
 उज्जतसेलसिहरे सहसंबवणम्मि देवरमणिज्जे' ।
 कण्हो वि तस्स वियइ निउत्तवित्ति समब्भहियं ॥५६॥
 तो जिणवंदणहेउं विणिग्गओ सयलहरिणसमग्गो ।
 वंदित्तु जिणवरिंदं उवविट्टो निययठाणम्मि ॥५७॥
 सक्काईया य सुरा विज्जाहर-नर-तिरिक्ख-मणुया य ।
 वंदिय जिणमुवविट्टा पुच्छंति^३ निए य संदेहे ॥५८॥
 भयवं पि ताण धम्मं कहेइ भवजलहितारणसमत्थं ।
 तं सोउं पडिबुद्धा बहवे अह पाणिणो तत्थ ॥५९॥
 कण्हाइया वि हरिणो वंदित्ता जिणवरस्स पयपउमं ।
 वारवईए पविट्टा जाया सद्धम्मकम्मरया ॥६०॥
 एतो अरिट्टुनेमीजिणस्स सीसा गुणायरा छ च्च ।
 समवयरूवसमग्गा सुरवरकुमर व्व पच्चक्खा ॥६१॥
 वारवईनयरीए इरियासमिया कमेण विहरंति ।
 संघाडगत्तिगेणं घरपरिवाडीए भिक्खट्टा ॥६२॥
 पत्तं च पढमजुयलं कमेण वसुदेव-देवइगिहम्मि ।
 गहणुग्गम-उप्पायणदोसे सव्वे विवज्जंतं ॥६३॥
 तं जुयलं जणणी विव दट्टुणं देवई वि विम्हइया ।
 आणंदमुव्वहंती देवकुमारोवमं पवरं ॥६४॥
 फुरमाणवामनयणा ततो सा रोहिणी इमं भणइ ।
 "मुणिवेसेणं एयं छलणत्थं राम-कण्हाणं ॥६५॥

सुरजुयलं दुद्धरिसं विबुद्धवरकमलसरिसनयणिल्लं ।
 बलरूवगुणसमेयं अणणसरिसं समायायं ॥६६॥
 न य दिट्ठा जेण मए इमेण रूवेण साहुणो एत्थ ।
 ता होज्ज सच्चमेए मायाए सुरा समायाया” ॥६७॥
 अह आह देवइं रोहिणी वि न “फुसंति मेइणि देवा ।
 न य उम्मेसनिमेसो नेय मलो देह-वत्थेसु ॥६८॥
 एएहिं कारणेहिं देवइ ! अमरा न हुंतिमे साहू ।
 रायकुमारा एए लक्खणकलिया जओ पेच्छ ॥६९॥
 ता पडिलाहह एए विउलेणं फासुएण अन्नेणं ।
 न चिरं चिट्ठंति जओ देवइ ! भिक्खागया साहू” ॥७०॥
 ततो रसोइणिं देवई वि साहूण फासुयं अन्नं ।
 पभणइ देह जहिच्छं दिण्णं तीए गया साहू ॥७१॥
 ततो मज्झिमजुयलं समागयं तत्थ गोयरकमेणं ।
 दिट्ठं च देवईए मण्णंतीए पढमजुयलं ॥७२॥
 पुणरवि महारणिसिं तं पभणइ ‘इच्छइ देह साहूणं’ ।
 मण्णंतीए ‘न जुत्तं दिण्णं’ तीए गया ते वि ॥७३॥
 ततो य तइयजुयलं तेणेव कमेण आगयं तत्थ ।
 तं चेव य मण्णंती दट्ठुं तं देवई आह ॥७४॥
 “किं दोण्णि वारदत्ते, भयवं ! पुणरवि समागमो तुम्ह ? ।
 किं होज्ज न पज्जत्तं ? किं वा अक्खं इमं किं पि ? ॥७५॥
 धण-कणयसमिद्धाए किं वा नयरीए वासुदेवस्स ।
 न लहंति जई भिक्खं ? किं वा मइविब्भमो मज्झ ?” ॥७६॥
 सुणिरुण इमं साहू देवजसो नाम पंचमकुमारो ।
 पभणइ “महाणुभावे ? न वयं ते साहुणो होमो ॥७७॥
 जे भिक्खं गहिरुणं विणिग्गया एत्थ तुम्ह गेहाओ ।
 किंतु निसामह कज्जं जेण न नाओ किर विसेसो ॥७८॥

भद्विलपुरम्मि नयरे नागो नामेण अत्थिवरसेट्टी ।
 सुलसा य तस्स भज्जा छत्तणया ताण किर अम्हे ॥७९॥
 अण्णोण्णगयागारा सव्वे वि सहोयरा सरिसरूया ।
 सव्वे वि तवं कुणिमो अण्णोण्णं साणुरागा य ॥८०॥
 पिहुपिहुसंघाडेहिं गेहम्मि समागया य तुम्हऽम्हे ।
 न य अम्ह तए नाओ समरूवाणं इह विसेसो' ॥८१॥
 सुणिऊण देवई वि य, एयं रोमंचकंचुयसरीरा ।
 उत्थाय वंदिऊण य सुद्धन्नं देइ नेहेण ॥८२॥
 सविसेसं च पलोयइ पेच्छइ सिरिवच्छअंकियसुवच्छे ।
 नीलुप्पलदलनयणे कण्हसमे नियसरूवेण ॥८३॥
 मयमत्तपीलुगयगामिणे(?णो) य दट्टूण पत्थिए दो वि ।
 पभणइ य रोहिणिं तं हरिसेणं देवई एवं ॥८४॥
 'निसुणह जं संजायं रुहिरसुए पोलासे पुरा नयरे ।
 अइमोत्तगो त्ति साहू समागओ अम्ह गेहम्मि ॥८५॥
 तेण य मम आइट्टं 'पहाणपुरिसस्स भारिया कण्णा ।
 जीवंतऽट्टुसुयाण य जणणी सिरिवच्छवच्छणं ॥८६॥
 'होहिसि न हु संदेहो भरहद्धमहंतसामिणी' भणिउं ।
 उप्पइओ सो साहू तमालदलसामले गयणे ॥८७॥
 जाया पहाणपुरिसस्स भारिया छस्सुया य मम पढमं ।
 जाया य देवयाए ते नूणं मोहिउं कंसं ॥८८॥
 अवहरिउं सुलसाए समप्पिया होज्ज घाइया अन्ने ।
 कंसेण डिभगा किल एयं सामत्थणं मज्झ ॥८९॥
 वामं च फुरइ नयणं खरंति खीरं पयोहरा दो वि ।
 रूवेण हरिसरिच्छ तेणेए मम सुयाऽवस्सं ॥९०॥

१. सं.वा.सु. विहविहसं ॥ २. सं.वा.सु. वरमत्तपीलुवगामिणे ॥ ३. सं.वा.सु. पोलासए ॥ ४. ला.
 'याणं ज' ॥ ५. सं.वा.सु. होहि त्ति न संदेहो ॥ ६. ला. मह ॥ ७. ला. एयं साहइ मणं मणं मज्झ ॥

मोत्तूण सिवादेवी तुमं च अहयं च नावरा नारी ।
 सिरिवच्छंकियवच्छं तणयं पसवइ जओ का वि ॥९१॥
 किंवा वि वियारेणं ? सव्वण्णुं सव्वदंसिणं नेमिं ।
 पुच्छेउं पच्चूसे, करेमि निस्संसयं एयं” ॥९२॥
 तं आह रोहिणी वि य सव्वं कणहस्स विणयरूवेहिं ।
 सरिसापगे अवस्सं जायइ सुयसंगमो तुम्ह ॥९३॥
 अह सा विगमइ रयणिं किच्छेणं सुयसमूसुगा कह वि ।
 सुण्हा समूहसहिया गया पभाए जिणंतम्मि ॥९४॥
 सव्वसुरा-ऽसुर-जायवसमूहमज्झट्टियं जिणं तत्थ ।
 तिपयाहिणिउं पुरओ पभणइ थुइमंगलं एयं ॥९५॥

“जयहि सिवदेविअंगरुह ! तिजगीसरा !, जयहि सुर-असुरपहुपणय ! परमेसरा ! ।
 जयहि ताला-ऽलि-सिहिगलयसमवण्णया !, जयहि पम्मुक्करायमइवरकण्णया ! ॥९६॥
 जयहि हरिवंससरसलिलसियहंसया !, जयहि इलविलयसुइसोह अवयंसया ! ।
 जयहि नियरूवसोहग्गजियम[य]णया !, जयहि नीसंगपरिचत्तधणसयणया ! ॥९७॥
 जयहि जयसुहडकंदप्पभडदलणया !, जयहि महमोहदढमल्लबलमलणया ! ।
 जयहि भवभीयभव्वाण कयसरणया !, जयहि उज्जितपडिवन्नगुरुचरणया ! ॥९८॥
 जयहि संजमभरुव्वहणधुरधवलया !, जयहि पसरंतजसपसरभरधवलया ! ।
 जयहि कम्मट्ठधरदलणवरवज्जया !, जयहि अपवग्गपुरगमणजिणसज्जया !” ॥९९॥

इय भव भय भीयाऽहं पणया तुह नेमिनाह ! पयपउमे ।
 नीसेसभयविमुक्कम्मि सामि ! मं नेहि सिवनयरे ॥१००॥
 नमिऊण भणइ पुणरवि “भयवं ! अइमुत्तगेण मम मुणिणा ।
 आइट्टं बालत्ते किल ‘अट्ट सुयाण जणणि त्ति ॥१०१॥
 जीवंताण’ किमलियं ? जं किल कंसेण मम सुया निहया” ॥
 भयवं पि आह ‘सच्चं जं मुणिणा तुज्झ आइट्टं ॥१०२॥
 देवइ ! एयं निसुणसु वणिदुहिया अत्थि भदिलपुरम्मि ।
 सुलसा सा बालत्ते निंदू निउणेहिं आइट्टा ॥१०३॥

हरिणेगमेसिदेवो तीए जीवंतसुयनिमित्तेणं ।
 आराहिओ तवेणं तेण य मुणिसाववित्तंतं ॥१०४॥
 नाऊण तुञ्ज तणया कंसे वहणुज्जयम्मि अवहरिउं ।
 पढमम्मि जायमेत्ता सुलसाए समप्पिया नेउं ॥१०५॥
 सुलसाए परियणस्स य हत्थगया नागसेट्टिगेहम्मि ।
 ते देवकुमारा इव पवड्डिया हरिकुलमियंका ॥१०६॥
 पढमो य अणीयजसो अणंतसेणो य अजियसेणो य ।
 तह निहयसत्तुनामो देवजसो सत्तुसेणो य ॥१०७॥
 भुंजंति सुरवरा इव भोए ते नागसेट्टिगेहम्मि ।
 एक्केक्कस्स य तेसिं बत्तीसं रायकण्णाओ ॥१०८॥
 दिण्णाउ सेट्टिणा जाइऊण रूवेण सुरवहूउ व्व ।
 केऊर-कडय-कंठय-मणि-मेहल-हारसोहाओ ॥१०९॥
 कीलंति ताहिं समयं पिहपिहपासायपरिगया सव्वे ।
 अण्णोण्णनेहकलिया अण्णोण्णादेसकारी य ॥११०॥
 एत्थंतरम्मि अहयं देवइ ! गामा-ऽऽगरेसु विहरंतो ।
 संपत्तो तम्मि पुरे समोसढो बाहिरुज्जाणे ॥१११॥
 देवा चउव्विहा वि य समागया तत्थ मम समोसरणे ।
 पुंडो य नखरिंदो भद्विलपुरसामिओ नाउं ॥११२॥
 तं दिव्वसमोसरणं मम आगमणं च जाणिउं सहसा ।
 पउरंतेउरसहिओ वंदणभत्तीए नीहरिओ ॥११३॥
 दूराउ मुक्कजाणो भत्तीए ममंतिगम्मि संपत्तो ।
 तत्थ ममं नमिऊणं उवविट्ठो समसिलावट्ठे ॥११४॥
 ते वि य जे तुञ्ज सुया छ प्पि जणा नागसेट्टिगेहाओ ।
 पिहपिहरहेहिं चलिया वंदणभत्तीए मम तुरियं ॥११५॥
 अवयरिऊण रहाण य दूराउ ममंतिगम्मि संपत्ता ।
 तिपयाहिणिऊण ममं वंदिय भूमीए उवविट्ठा ॥११६॥

१. ला. "लजायसो" ॥ २. ला. पिहुपिहुपा" ॥ ३. पिहुपिहु" ॥

उद्विसिउं ते कुमरे अह अक्खाओ मए दयामूलो ।
 धम्मो सिवसुहफलओ अर्चितचितामणिसरिच्छे ॥११७॥
 सो पुण खंतिविसुद्धो मद्दवजुत्तो तहऽज्जवसमेओ ।
 मुत्तीए संपण्णो तवसहिओ संजमगुणद्धे ॥११८॥
 कयसच्चव्वयसारो सोयसमेओ अर्किचणाइण्णो ।
 नवबंभगुत्तिगुत्तो विसुद्धबंभव्वयजुओ य ॥११९॥
 चारित्त-नाण-दंसणसुविसुद्धगुणंकिओ परमततो ।
 गयकोह-माण-माओ निल्लोहो निम्ममो असढ्ढे ॥१२०॥
 राग-द्वेसविमुक्को मोहविहीणो अमच्छरो अमलो ।
 राईभोयणरहिओ अविरहिओ चरणकरणेहिं ॥१२१॥
 इय एवमाइधम्मं जईण संबंधि सावयाणं च ।
 सोऊणं छ प्पि जणा संवेगगया इमं आह ॥१२२॥
 'कयकरयलंजलिउडा सहरिसरोमंचकंचुयसरीय ।
 भयवं ! मायापियरं आपुच्छेउं ततो अम्हे ॥१२३॥
 सव्वमिमं आएसं काहामो तुम्ह सीसभावेण ।
 संसारभउव्विग्गा मोक्खत्थं सव्वदुक्खाण' ॥१२४॥
 इय भणिउं नमिरुण य तम्मि पुरे नियगिहम्मि गंतूणं ।
 नमिउं माया-पियरं भणंति सव्वे इमं वयणं ॥१२५॥
 'संसारसागरओ भीया जर-मरणवाहिनीराओ ।
 नायं च तदुत्तरणं इच्छामो जइ विसज्जेह ॥१२६॥
 भयवंतसासणम्मी सव्वे वि हु सव्वदुक्खदलणम्मी ।
 होहामो भवभीया सुद्धमणा निम्ममा समणा' ॥१२७॥
 जणयाइ इमं सुणिउं वज्जासणिनिट्टुरं दुसहवयणं ।
 भूमीए निवडियाइं जाओ हाहारवो सयणे ॥१२८॥
 बत्तीसं बत्तीसं तेसिं भज्जाउ सयणवग्गो य ।
 अक्कंदिउं पवत्तो कुररीण कुलं व दीणमणो ॥१२९॥

तं बंधवजणविहियं घोरुवसगं सुदूसहं सहिउं ।
संबोहिरुण जणयं उवट्टिया वयविहाणत्थं ॥१३०॥
तेसिं निक्खमणमहं रिद्धीए कुणइ उच्छुओ सेट्ठी ।
सयणेण य सिबियाओ रइयाउ विमाणसरिसाओ ॥१३१॥
तक्कालविहियवेसा ते वि य सिबिगागया विहाणेण ।
परमाए महिमाए समागया मम समोसरणे ॥१३२॥
सिबिगाण समुत्तरिउं मम पासमुवागया य विणएण ।
विहिणा य मए दिण्णा पव्वज्जा ताण छहं पि ॥१३३॥
अप्पेण वि कालेणं दुवालसंगं पि पवयणमिमेहिं ।
साहुसमायारिजुयं अहिज्जियं गणहरसयासे ॥१३४॥
छट्ट-ऽट्टम-दसम-दुवालसेहिं मास-ऽद्धमासखवणेहिं ।
जुगवं च पारणेहिं अच्चत्थं भाविओ अप्पा ॥१३५॥
एवं च इमे सव्वे मए समाणं कमेण विहरंता ।
इह संपत्ता पत्ता भिक्खट्ठा तुज्झ गेहम्मि ॥१३६॥
ता देवइ ! तुज्झसुया एए सिरिवच्छवच्छसा सव्वे ।
भिक्खागया गिहम्मी जे तुमए वंदिया कल्लं ॥१३७॥
अण्णभवम्मि य देवइ ! तुमए अइनिम्मलाई रयणाइं ।
हरियाइं सवत्तीए छ तेसिं सुय विओय फलं ॥१३८॥
एवं जिणेण भणिया वाहाविललोयणा य हरिजणणी ।
धरिया करेहिं हरिणा निवडंती गरुयमुच्छए ॥१३९॥
तं दट्ठुं रुयमाणिं सव्वे बलभद्द-केसवप्पमुहा ।
रइया जायववसहा वाहाविललोयणा कलुणं ॥१४०॥
तत्तो समुट्ठिरुणं पसूयसुरहि व्व सा सुए सरिउं ।
खीरं पओहरेहिं विक्खरमाणी गया पासे ॥१४१॥
तत्थ य तमणीयजसं नेहेणाऽऽलिं गिरुण सव्वंगं ।
पभणइ सवाहनयणा गगरकंठा इमं वयणं ॥१४२॥

'हा ! सव्वे अवहरिया पसूयमिता सुया इमे मज्झ ।
 अहुणा य मए नाया सिद्धा सव्वन्नुणा सव्वे' ॥१४३॥
 एवं च रुयंतीए आणंदेणं दसारहकुलं पि ।
 आर्लिगिरुण रुन्नं हरिपमुहं देवईतणए ॥१४४॥
 पभणइ य देवई तं जेट्ठसुयं 'भवसु पुत्त ! तं राया ।
 कुलपूइया य सेसा अणंतसेणो य जुवराया ॥१४५॥
 आणाविहो य कण्हो दंडधरो पुत्त ? तुज्झ इह होही ।
 रामो वि वयणकारी सेसा वि हरीसरा सव्वे' ॥१४६॥
 हरिणा वि इमं वयणं समत्थियं तह य चेव हलिणा वि ।
 सेसेहिं वि पडिवण्णं सउरीहिं जायवेहिं च ॥१४७॥
 ततो य अणीयजसो पभणइ "सुण अंब ! एत्थ परमत्थं ।
 रज्जाइया पयत्था हवंति दुक्खाय जंतूणं ॥१४८॥
 तह पुव्वकम्मभवियव्वयाए उववज्जिरुण तुह उयरे ।
 पित्थं च वणियगेहे भमाडिया पावकम्मेण ॥१४९॥
 होरुण रायतणया हरिवंसे पित्थ पागयनर व्व ।
 उववण्णा वणियगिहे एत्तो किं होज्ज कट्टयरं ? ॥१५०॥
 खीवालेण य हरिणा, तह चेव महायसा बलेणाऽवि ।
 पत्ता वियोगदुक्खं जणणी-जणएहिं य समं च ॥१५१॥
 चत्ता य इमे भोगा पुणरवि जइ भुंजिमो भवनिमित्तं ।
 हसणिज्जा होज्ज तओ नराण कुगईगमो तह य" ॥१५२॥
 एत्थंतरे य भयवं अरिट्ठनेमी जिणेसरो कण्हं ।
 पभणइ 'देविदो वि य न समत्थो चालितं एए ॥१५३॥
 सव्वे वि चरमदेहा चरिमभवा वज्जरिसहसंघयणा ।
 अलमेत्थ पलावेणं तुण्हक्का होह हरिवसहा !' ॥१५४॥
 सुणित्तं जिणवयणमिमं थुणित्तं च जिणेसरं च तेहिं समं ।
 संभासेत्तं विहिणा वारवइं जायवा जंति ॥१५५॥

१. ला. 'यं पुत्त ! होहि तं ॥ २. सं.वा.सु. सुयणेहिं ॥ ३. सं.वा.सु. एत्थं ॥ ४. सं.वा.सु. एत्थ ॥ ५.

सं.वा.सु. य तह चेव बंधुणा महयसा ॥ ६. ला. 'भासितं च वि ॥

इयरे वि महापुरिसा विहिऊण महातवं चिरं कालं ।
 नमिउं जिणमणुनाया जउमंतनगं गया सव्वे ॥१५६॥
 तत्थ य पायवगमणं एक्कं मासं नगोवरिं विहिउं ।
 वसुदेवसुया सिद्धि मरिऊण निरंजणा पत्ता ॥१५७॥
 एत्तो य देवई वि हु गिहम्मिगंतूण चितए एवं ।
 नियसुयवियोगदुहिया वाहजलुप्पीलपुण्णऽच्छी ॥१५८॥
 “धण्णा कयपुण्णाओ ताण सुलद्धं च माणुसं जम्मं ।
 जाओ नियकुच्छिमज्झब्भवाणं लहुडिभरूवाणं ॥१५९॥
 कमलदलकोमलेहिं करेहिं घेतूण दिति उल्लवे ।
 मम्मणपयंपिराओ मम्मणवयणे भणंताणं ॥१६०॥
 थणदुद्धलुद्धयाणं मुद्धडयाणं च जाणुठवियाणं ।
 नाणाविहरमणए जाओ जंपंति नेहेणं ॥१६१॥
 अहयं तु पुण अहण्णा एत्तो एगयरमवि न संपण्णा” ।
 इय चित्ताए धणियं अह जाया देवई दीणा ॥१६२॥
 ओलुंग्गपंडुरंगी उम्मंथियनयणकमलजुयलिल्ल ।
 नित्तेयदीणवयणा करयलयलपल्हत्थियकवोला ॥१६३॥
 अट्टज्जाणोवगया झियायमाणी उ चिट्टए जाव ।
 ता जणणिवंदणत्थं समागओ तत्थ महुमहणो ॥१६४॥
 तं तयवत्थं दटुं जोडिय करसंपुडो भणइ एवं ।
 “केणं च तुम्ह आणा न कया ? साहेह मह एयं ॥१६५॥
 जेण तयं पाहुणयं पेसेमि जमस्स नत्थि संदेहो ।
 अहवा वि जं न रुइयं पुज्जइ तुम्हाण तं कहह” ॥१६६॥
 इय भणिया भणइ तओ ‘पुत्तय ! दीहाउओ तुमं होहि ।
 तं नत्थि जं न सिज्जइ तुह प्पभावेण मह कज्जं ॥१६७॥
 किंतु न मे तुम्हाणं अणुहूयं बालचिट्ठियं तेण ।
 जाओ मणसंतावो” इय सुणिउं भणइ नरनाहो ॥१६८॥

१. सं.वा.सु. सिरंजणा ॥ २. सं.वा.सु. “ण निघडि” ॥ ३. सं.वा.सु. जाओ संपत्ति ने” ॥ ४. सं.वा.सु. ओलग्ग” ॥ ५. सं.वा.सु. “णविमणा करयलतलधरियवयणिल्ल ॥ ६. ला. हरिनाहो ॥

'अम्मो ! मुय उव्वेवं तहा करिस्सामि जह महं भाया ।
 होइ कणिट्ठो' एवं वोत्तूणं जाइ नियठाणे ॥१६९॥
 समयम्मि तओ कण्हो पोसहसालाए अट्टमं भत्तं ।
 हरिणेगमेसिदेवं मणम्मि काउं पगिण्हेइ ॥१७०॥
 उम्मुक्कमणि-सुवण्णो ववगयमाला-विलेवणो तत्थ ।
 तणसंथारनिवि(व)ण्णो चिट्ठइ जा अट्टमं पुण्णं ॥१७१॥
 चलियासणो य तत्तो समागओ सुरवरिदसेणाणी ।
 'भणसु महायस ! कज्जं जेण तए सुमरिओ अहयं ॥१७२॥
 तो भणइ वासुदेवो 'धुज्जंति मणोरहा जहंबाए ।
 तह कुण सुरसेणाहिव ?' सो जंपइ "थोवदिवसेहिं ॥१७३॥
 होही मणोरहाणं संपत्ती कण्ह ? तुज्झ जणणीए" ।
 इय भणिऊणं तियसो संपत्तो देवलोगम्मि ॥१७४॥
 जाओ य देवईए कमेण पुत्तो अईव सुकुमालो ।
 गयतालुयसारिच्छे सव्वजणाणंदहेउ त्ति ॥१७५॥
 तो जणणी-जणएहिं गयसुकुमालो त्ति से कयं नामं ।
 जणणीमणोरहम्मी पुण्णे अह जोव्वणं पत्तो ॥१७६॥
 उक्किट्ठरूव-लावण्ण-वन्न-कलकोसलाइसंपुण्णो ।
 पाणेहिंतो वि दढं अइप्पिओ वासुदेवस्स ॥१७७॥
 कमपत्तजोव्वणं जाणिऊण हरिणा नरिंदुहियाओ ।
 जणणीए अणुमएणं वरियाउ पहाणरूयाओ ॥१७८॥
 धूया य सोमसम्मस्स कण्णया रूव-जोव्वण-गुणड्ढा ।
 जाया य खत्तिणीए सोमा सोमाणणा वरिया ॥१७९॥
 गोविंदो जा चितइ अणुयस्स विवाहमंगलं मुइओ ।
 ता भयवं विहरंतो वारवइं जिणवरो पत्तो ॥१८०॥
 मुणिउं जिणआगमणं सव्वे वि विचित्तवाहणा हरओ ।
 भत्तीए जयगुरुणो विणिग्गया वंदणनिमित्तं ॥१८१॥

तं नयरिं दद्रुणं हलहलयं पुच्छए गयकुमारो ।
 'कंचुइ ! नयरीमज्जे किं एयं वट्टए अज्ज ?' ॥१८२॥
 सो जंपइ "कुमर ! तए कह नवि नाओ तिलोगपयडो वि ।
 जउकुलनहयलचंदो समुहविजयस्स अंगरुहो ॥१८३॥
 उप्पण्णदिव्वनाणो सुरिंद-असुरिंदवंदियच्चलणो ।
 दिप्पंतो संपत्तो अणणसरिसाए रिद्धीए ॥१८४॥
 इह चेव समोसरिओ उज्जितमहागिरिम्मि रम्मम्मि ।
 तस्स य वंदणहेउं जंति इमे कुमर ! हेरिक्सहा" ॥१८५॥
 तं सोउं कुमरो वि हु जाओ रोमंचपुलइयसरीरो ।
 नेमिजिणवंदणत्थं गओ य वररहवरारूढो ॥१८६॥
 वंदित्तु जिणवरिंदं भत्तीए तदंतिगम्मि उवविट्ठो ।
 जिणमुहनिहित्तनयणो तव्वयणं सुणइ एगमणो ॥१८७॥
 भयवं कहइ य धम्मं जोयणनीहारिणीए वाणीए ।
 तं सोउं कुमरो वि हु पडिबुद्धो जंपए एवं ॥१८८॥
 'भयवं ! अम्मापियरं^३ आपुच्छित्ताण तुम्ह पासम्मि ।
 घेच्छामि समणधम्मं' इय भणिउं जाइ गेहम्मि ॥१८९॥
 महया कट्टेण तओ जणणी-जणयाइए विमोएउं ।
 निक्खमइ जिणसमीवे महाविभूर्इए सो कुमरो ॥१९०॥
 कण्हाइया वि सव्वे वंदित्ता नियघरेसु संपत्ता ।
 पुच्छइ वियालसमए गयसुकुमालो वि जिणइंदं ॥१९१॥
 'भयवं ! महामसाणे काउस्सग्गेण ठामि रयणीए ?' ।
 अणुजाणइ भयवं पि हु गुणंतरं तस्स नाऊण ॥१९२॥
 जाव ठिओ उस्सग्गे वियालवेलाए सो महासत्तो ।
 ता सोमिलेण दिट्ठो तं दद्रुं चितए पावो ॥१९३॥
 'एएण मज्झ धूया अदिट्ठदोसा विडंबिउं मुक्का ।
 ता सोहणपत्थावो संपइ वेरस्स निज्जवणे' ॥१९४॥

इय चित्तिरुण सीसे बंधिता मट्टियाए से पालि ।
 पक्खिवइ जलजलंते चियाउ आणित्तु इंगाले ॥१९५॥
 एवं करित्तु पावो पविसइ सिग्घं पुरीए मज्झम्मि ।
 मुणिणो वि य संजाओ परिणामो एरिसो चित्ते ॥१९६॥
 'हा हा अहो ! अकज्जं इमस्स जं दुग्गईए पडणम्मि ।
 जाओ अहं निमित्तं कस्स वि जीवस्स एयस्स' ॥१९७॥
 इय चित्तंतस्स तओ उप्पणं तस्स केवलं नाणं ।
 आउक्खएण समयं संपत्तो सिद्धिसोक्खम्मि ॥१९८॥
 कण्हो वि बीयदिवसे वंदित्ता पुच्छए जिणं 'भयवं ! ।
 कत्थञ्छइ गयसाहू ?' जंपइ भयवं पि 'सिद्धिपुरे' ॥१९९॥
 कण्हो वि भणइ 'भयवं ! कह लहुसिद्धो ? कहेह परमत्थं' ।
 भयवं पि भणइ 'नरवर ! उवसग्गो दारुणो सहिओ' ॥२००॥
 कण्हो वि आह 'भयवं ! मज्झ कणिट्टस्स तुम्ह सीसस्स ।
 केणुवसग्गो एवं विहिओ निव्विण्णजीएणं ?' ॥२०१॥
 भयवं पि आह 'नयरीदारे पविसंतयं तुमं दट्ठुं ।
 फुट्टिहिइ जस्स सीसं खंडाई सत्त तं मुणसु' ॥२०२॥
 अह वंदिरुण भयवं कण्हो पविसरइ जाव नयरीए ।
 ता चित्तइ सो पावो "अहो ! अकज्जं मए विहियं ॥२०३॥
 कण्हस्स लहुयभाया निहओ तं जाणिउं जिणिदाओ ।
 मारिहिइ कहं पि ममं न नज्जए ता पणस्सामि" ॥२०४॥
 इय चित्तिरुण तो सो निग्गच्छइ जाव पउलिदारेणं ।
 ताव सहस त्ति कण्हो समागओ सम्मुहं तस्स ॥२०५॥
 फुट्टं च सत्त खंडाणि मत्थयं अइभएण अह तस्स ।
 कणहेण वि नयरीए भमाडिओ कसिणवसहेहिं ॥२०६॥
 इय देवईय चरियं संखेवेणं मए समक्खायं ।
 वित्थरओ पुण जाणह सव्वं वसुदेवहिंडीओ ॥२०७॥

इय सव्वत्थ वि पयडा एसा तियसाण अह विसेसेणं ।
गयसुकुमालुप्पत्ती तेणं एयं मए कहियं ॥२०८॥

इति देवकीकथानकं समाप्तम् ॥४८॥

इदानीं सीताकथानकं कथ्यते ।

[४९. सीताकथानकम्]

अत्थित्थ जंबुदीवे, भारहखित्तस्स मज्झयारम्मि ।

अच्छेरयसयकलियं साकेयपुरं तु सुपसिद्धं ॥१॥

तम्मि यं पुरम्मि रायां, इक्खागकुलुब्भवो महासत्तो ।

अत्थि तिलोगक्खाओ नामेणं दसरहो राया ॥२॥

तस्स ऽत्थी देवितिगं पढमा अवराइतय त्ति सुपसिद्धा ।

बीया सुमित्तनामा तइया पुण केगईनामा ॥३॥

पढमाए रामदेवो पुत्तो बीयाइ लक्खणकुमारो ।

तइयाइ भरहनामो तिण्णि वि सव्वत्थ विक्खाया ॥४॥

मिहिलाहिवजणयसुया सीया नामेण तिजगविक्खाया ।

जियसयलविलयरूवा परिणीया रामदेवेणं ॥५॥

अह अण्णया कयाई केगइदेवीए दसरहो राया ।

सारत्थे तोसविओ देइ वरं सव्वपच्चक्खं ॥६॥

राहवरज्जऽभिसेयं उवट्टियं जाणिरुण तो रायं ।

जंपइ केगइ देवी “देव ! तए जो महं तइया ॥७॥

पडिवण्णो आसि वरो सो संपइ देहिं मह कुमारस्स ।

कीरउ रज्जऽभिसेओ सव्वनरिदाण पच्चक्खं” ॥८॥

तं सोऊणं राया समत्थनरनाहसंजुओ अहियं ।

संजाओ विमणमणो हियएणं चितए एवं ॥९॥

‘पेच्छह कह नारीओ अविवेयपराउ होंति लोयम्मि ।

मोत्तुं रामं रज्जं जेणेसा दावए भरहे’ ॥१०॥

१. ला. सीताख्यानकं ॥ २. सं.वा.सु. ‘हखंडस्स ॥ ३. सं.वा.सु. य कुलम्मि ॥ ४. ला. तस्सऽत्थि य दे’

॥ ५. ला. देह ॥

इय चित्तिरुण राया हक्कारइ राहवं ससोमिन्ति ।
 पभणइ पुत्त ! न जुत्तं तहावि पत्थिज्जसे एवं ॥११॥
 “तुट्ठेण मए दिण्णो आसि वरो केगईए सो तीए ।
 रज्जऽभिसेओ भरहस्स मग्गिओ ता तयं वच्छ ! ॥१२॥
 तस्स करिस्सामि अहं मज्झुवरोहेण ता तुमं पुत्त ! ।
 सोमिन्ति-सीयसहिओ अणुमण्ण तयं” तओ रामो ॥१३॥
 ‘आएसो’ त्ति भणित्ता लक्खण-सीयासमण्णिओ रामो ।
 निग्गंतुं वसिमाओ पविसइ अडविं महाभीमं ॥१४॥
 राया वि तओ भरहं रज्जम्मि निवेसिरुण निक्खंतो ।
 रामो वि य अडवीए हिंडइ सच्छंदलीलाए ॥१५॥
 अह अण्णया कयाई कीलंतो लक्खणो गओ दूरं ।
 पेच्छइ कयबहुपूयं वरखगं च्चदहासं ति ॥१६॥
 तं दट्टुणं कुमरो गिण्हइ कोरुहलेण अप्फुण्णो ।
 वाहइ वंसकुडंगे पाडइ वंसाण पब्भारं ॥१७॥
 तस्स य मज्जे पडियं वरकुंडलमउडभूसियं रम्मं ।
 विज्जाहरस्स सीसं तं दट्टुं लक्खणो सहसा ॥१८॥
 जाव निरूवइ सम्मं ता पेच्छइ उद्धबद्धनियपायं ।
 धूमाऽऽवियणसयण्हं गयसीसं कस्स य धडं ति ॥१९॥
 तं दट्टुणं कुमरो निंदइ बहुयं भुयाबलं निययं ।
 ‘हा हा अहो ! अकज्जं कयं मए एव’ भणिरुण ॥२०॥
 तो घेतुं तं खगं गंतूणं राहवस्स पासम्मि ।
 जं जहवत्तं तं तह केहइ तओ राहवो भणइ ॥२१॥
 ‘कुमर ! न जुत्तं विहियं एयस्स कएण होहिई अम्हं ।
 अइरुदो संगामो’ जावेवं जंपए रामो ॥२२॥

१. सं.वा.सु. ‘ज्जए ॥ २. सं.वा.सु. ‘ण्ण तयंतरोमंवो (? तयन्तरे रामो) ॥ ३. सं.वा.सु. वीरो ॥ ४. ला. तओ रज्जं भरहम्मि नि’ ॥ ५. सं.वा.सु. सुज्जहासं ॥ ६. ला. नियसीसं धूमप्पाणसयण्हं ॥ ७. सं.वा.सु. अह् (हि) यं ॥ ८. सं.वा.सु. केइतारा० ॥

ताव य माया पत्ता भत्तं गहिऊण तस्सकुमरस्स ।
 जो लक्खणेण निहओ संबुक्को नाम नामेणं ॥२३॥
 सा सुप्पनहा भगिणी रावणरायस्स दट्टु नियपुत्तं ।
 गयजीवं विलवंती लग्गा अन्नेसिउं सत्तुं ॥२४॥
 लक्खणपयमग्गेणं संपत्ता जाव ताण पासम्मि ।
 ता दट्टु ताण रूवं मयणेण परव्वसा जाया ॥२५॥
 काउं तरुणतरुं रूवं तो ताण पासमल्लीणा ।
 पत्थेइ बहुपयारं पडिवज्जइ राहवो नेय ॥२६॥
 ता सा रुसिउं तुरियं नहेहि अप्पाणयं वियारित्ता ।
 खरदूसणस्स पुरओ नियपइणो अक्खए एवं ॥२७॥
 “सामिय ! तुमम्मि नाहे निहओ पावेहिं पुत्तसंबुक्को ।
 मज्झं इमा अवत्था विहिया भूगोयेरेहिं दढं ॥२८॥
 सामिय ! अणिच्छमाणी वियारियाकररुहेहि दयरहियं” ।
 तं सोऊणं राया पज्जलिओ पलयजलणो व्व ॥२९॥
 ‘अज्ज दलेमि समत्थं दप्पमहं ताण दुट्टपुरिसाण’ ।
 इय भणिऊणं सहसा सन्नज्जइ बहुभडसहाओ ॥३०॥
 तो आगासतलाओ इंतं विज्जाहराण तं सिन्नं ।
 दट्टूण राहवेणं भणिओ अह लक्खणो एवं ॥३१॥
 ‘वच्छ ! तए जो वहिओ तस्स कुढं आगयं इमं मण्णे ।
 ता रक्खसु वइदेहिं परम्मुहं देमि अहमेयं ॥३२॥
 तो भणइ लक्खणो वि य सामि ! तुमं चिट्ठ इत्थ सीयाए ।
 पासम्मि इमं अहमेव देमि विवरम्मुहं सिण्णं ॥३३॥
 भणिओ य राहवेणं ‘जइ कह विगयस्स तुज्झ संदेहो ।
 होइ तओ मुत्तव्वो वच्छ ! तए सीहनाओ’ त्ति ॥३४॥
 ‘एवं ति होउ पडिवज्जिऊण अब्भिडइ लक्खणो ताण ।
 हणिऊण बहुभडोहं कुमरेणं दूसणो निहओ ॥३५॥

सेसा पुण गयाणो सरणं अह लक्खणं समल्लीणा ।
 हयनायग ति काउं अह सुप्पनही विरोवन्ती ॥३६॥
 साहइ रक्खसवइणो तं सोउं एइ सो वि परिकुविओ ।
 पेच्छइ वणंतरम्मी रामं सीयाइ संजुत्तं ॥३७॥
 दट्टुं सीयारूवं, विद्धो सो कामदेवबाणेहिं ।
 इच्छइ हरिउं सीयं रामसमीवाउ न य चयइ ॥३८॥
 ता विज्जाय बलेणं संकेयं ताण जाणितं सहसा ।
 मुयइ गुरुसीहनायं तं सोउं राहवो जाइ ॥३९॥
 रक्खसवई वि सीयं हरिऊणं जाइ अंतरे तम्मि ।
 रामो वि लक्खणेणं भणिओ 'किं आगओ तं सि ?' ॥४०॥
 'तुह मुक्कसीहनायं सोऊणं' राहवेण भणियम्मि ।
 जंपइ लक्खणकुमरो "न सीहनाओ मए मुक्को ॥४१॥
 सीयाअवहरणत्थं नूणं केणाऽवि होहिई विहिओ ।
 ता गच्छ लहुं राहव । सीयं परिक्खयाहि ति ॥४२॥
 तुह चरणपभावेणं निहओ सत्तू इमो मए चेव ।
 ता सेण्णमिमं घेतुं आगच्छिस्सं तुह समीवे" ॥४३॥
 इय एवं सा हरिया सीया लंकाहिवेण रहुणा वि ।
 छम्मासरणं काउं हणितं लंकाहिवं ततो ॥४४॥
 आणीया नियगेहे समागया सिद्धमद्धभरहं पि ।
 जाओ य वासुदेवो अहऽट्टमो लक्खणकुमरो ॥४५॥
 पउमो वि य बलभद्धो, समागया पुण अउज्झनयरीए ।
 कुव्वंति रज्जमउलं पणमंतमहंतसामन्ता ॥४६॥
 अह अण्णया कयाई सीया नियभत्तुणा सहऽच्छंती ।
 भुंजंती विसयसुहं जाया आवण्णसत्त ति ॥४७॥
 गब्भपभावेण तओ समइक्कंतेसु दोसु मासेसु ।
 संजाओ डोहलओ 'जइ किर वंदामि जिणभवणे' ॥४८॥

१. सं.वा.सु. पुण ॥ २. सं.वा.सु. 'वयणो ॥ ३. ला. 'इ अवंत' ॥ ४. ला. 'वा य न ॥ ५. ला. रामो वि य बलदेवो, ॥

तं नाउं रामेणं पुरेसु चेइयहरेसु आइट्टो ।
 अट्टाहियामहो सयलरिद्धिविच्छडुसंजुत्तो ॥४९॥
 'वंदसु पिए ! जिणिदे' भणिया सा पयडजायरोमंचा ।
 भत्तिभरनिब्भरंगी वंदइ नयरीए जिणबिंबे ॥५०॥
 भणिया य पुणो 'सुंदरि ! वंदाविस्सामि सेसपुहइयले ।
 कारिम-अकारिमाई जिणिदचंदाण भवणाइं' ॥५१॥
 एवं सा वीसत्था संजाया पुण्णडोहला सीया ।
 एत्तो य रामपासे आगंतुं भणइ पडिहारी ॥५२॥
 'देव ! पुरीए महल्ला नीसेसमहायणेण परियरिया ।
 चिट्ठंति दारदेसे तुह दंसणउस्सुगा सव्वे' ॥५३॥
 भणियं च राहवेणं 'लहुं पवेसेहि' तीए ता सव्वे ।
 भणिया 'पविसह' ते वि हु समागया रामपासम्मि ॥५४॥
 मुक्कम्मि दंसणीए भणिया रामेण 'भणह भो ! कज्जं' ।
 भयउक्कंपिरहियया ते वि हु एवं पयंपंति ॥५५॥
 'भयभीयाणं सामिय ! न अम्ह वायां बहिं विनिक्खमइ ।
 अभएण कुण पसायं मुक्कभया जेण विण्णविमो' ॥५६॥
 रामेण वि पडिभणियं 'अभओ तुम्हाण भद्द ! सव्वेसिं ।
 पभणह जं भणियव्वं' इय भणिए ताण मज्झाओ ॥५७॥
 विण्णवइ विजयनामो महंतओ "सामि ! सयलनयरीए ।
 लोओ अणज्जकज्जो परदोसग्गहणतल्लिच्छे ॥५८॥
 जंपइ 'दसाणणेणं अणुरायपरव्वसेण जा भुत्ता ।
 सा सीयारामेणं इहाऽऽणिया अहह ? न हु जुत्तं ॥५९॥
 नीईए कुसलस्स उ इक्खवागकुलुब्भवस्स रामस्स ।
 नवि जुज्जइ इय काउं' एवं भणिरस्स लोगस्स ॥६०॥
 सामिय ! करेहि दंडं' इय भणिए राहवो तओ सहसा ।
 वज्जेण ताडिओ विवि इय चित्तेउं समाढत्तो ॥६१॥

“अहह ! कहां विण्णत्तं इमेहिं अइनिट्ठुरं इमं कज्जं ।
 जं सीयाअववाओ चित्तिज्जंतो वि दुव्विसहो ॥६२॥
 ससहरकरधवलो वि हु एसो इक्खागरायवरवंसो ।
 मह महिलाअववाएण झ त्ति मलिणीकओ सव्वो ॥६३॥
 संभवइ य एवं पि हु अणुणिज्जंती य रक्खसिदेणं ।
 कुसुमायरउज्जाणे ठिया य बहुमन्नियं वयणं ॥६४॥
 ता परिचयामि एयं सुण्णारण्णम्मि अयसभयभीओ ।
 न य अण्णहा पयाणं जायइ चित्तस्स परियत्ती” ॥६५॥
 इय चित्तिय सोमिन्तिं सदावइ सो वि आगओ तुरियं ।
 भणिओ य राहवेणं लक्खण ? निसुणेहि मह वयणं ॥६६॥
 ‘सीयाए अववाओ दुव्विसहो अज्ज पउरलोगेण ।
 विण्णत्तो’ तं सोउं आरुट्ठो लक्खणो भणइ ॥६७॥
 “अवि चलइ मेरुचूला अवि सूरो उग्गमेज्ज अवराए ।
 सीया महासईए न चलइ पलाए वि पुण चित्तं ॥६८॥
 जो पुण अलियपलावी परवसणी एस निहओ लोगो ।
 तं अज्जेव निरुत्तं करेमि सव्वं पि लुयजीहं” ॥६९॥
 दंडकरणुज्जयं तं नाऊणं लक्खणं सुमहुरेहिं ।
 वयणेहिं अणुणेउं अह जंपइ राहवो एवं ॥७०॥
 ‘छड्ढेमि वच्छ ! सीयं कुलाववायस्स सुट्ठु भीओऽहं’ ।
 भणियं च लक्खणेणं “तुह पहु ! नवि जुज्जए एवं ॥७१॥
 अवियारिऊण सहसा दुज्जणवयणेहिं सीलपरिकलियं ।
 नीसेसगुणसमग्गं जं चयसि महासइं सीयं” ॥७२॥
 भणियं च राहवेणं ‘एत्तो पुरओ न किंचि वत्तव्वं’ ।
 इय भणिओ सोमेत्ती विमणो निययं गतो गेहं ॥७३॥
 रामेण वि सेणाणी कयंतवयणो झड त्ति आहूओ ।
 सन्नद्धबद्धकवओ सो पत्तो रहवररूढो ॥७४॥

१. सं.वा.सु. *तो य अइदुसहो ॥ २. सं.वा.सु. अणुरज्जंती इ र” ॥ ३. सं.वा.सु. महायसं ॥ ४. ला.

तं ददुं भणइ जणो 'कस्स वि अवरहियं अइमहंतं' ।
 विण्णवइ सो वि रामं 'सामिय ! मह देहि आणं ति ॥७५॥
 'जिणवंदणच्छलेणं सीयं मोतुं महाअरण्णम्मि ।
 सिग्घं नियत्तियव्वं मह आणत्ती इमा तुज्झ' ॥७६॥
 'जं आणवेसि सामिय !' इय भणिठं जाइ सीयपासम्मि ।
 पभणइ "उट्टसु सामिणि ! आरुहसु महारहे एत्थ ॥७७॥
 वंदसु जिणभवणाइं समत्थतेलोककवंदणिज्जाइं" ।
 इय भणिया जणयसुया आरुहइ रहम्मि परितुट्ठा ॥७८॥
 आपुच्छिरुण सयलं सहीयणं परियणं च वइदेही ।
 जंपइ 'जिणभवणाइं पणमिय सिग्घं नियत्तेमि' ॥७९॥
 एत्थंतरे रहो सो कयंतवयणेण चोइओ सिग्घं ।
 चउतुरयसमाउतो वच्चइ मणवेयसमवेओ ॥८०॥
 अह सुक्कतरुवरत्थं दित्तं पक्खावलिं विहुणमाणं ।
 दाहिणपासम्मि ठियं पिच्छइ रिट्ठं करयतं ॥८१॥
 सूरभिमुही नारी विमुक्ककेसी बहुं विलवमाणी ।
 तं पेच्छइ जणयसुया अन्नाणि वि दुन्निमित्ताणि ॥८२॥
 निमिसियमित्तेण रहो उल्लंघइ जोयणं परमवेगो ।
 सीया वि पिच्छइ महिं गामा-SSगर-नगरसंकिण्णं ॥८३॥
 नग-नइ-निज्झर-तरुवर-सावयसयसंकुलं परमघोरं ।
 रण्णं च सच्चवंती बहुसद्दसमाउलं जाइ ॥८४॥
 एत्थंतरम्मि सहं अइमहुरसरं निसामिठं सीया ।
 पुच्छइ कयंतवयणं 'सद्दो किं राहवस्सेसो ?' ॥८५॥
 तेण वि य समक्खायं 'सामिणि ! सद्दो न होइ रामस्स ।
 एसो खु जण्हवीए सद्दो अइमहुरगंभीरो' ॥८६॥
 जावेवं सो जंपइ ता पत्ता जण्हविं जणय धूया ।
 उभयतडट्टियपायवनिवडियकुसुमच्चियतरंगा ॥८७॥

गाह-झस-मगर-कच्छवसंघट्टुच्छलियवियडकल्लोला ।
 कल्लोलनिवहसंगमनिबद्धफेणावलीपउरा ॥८८॥
 पउमवरकमलकेसरनलिणीगुंजंतमहुयरुग्गीया ।
 उग्गीयरवार्यन्नणसारंगनिविट्टुउभयतडा ॥८९॥
 उभयतडहंस-सारस-चक्कायरमंतऽणेयकल्लोला ।
 कल्लोलजणियकलरवसमाउलाइण्णगयजूहा ॥९०॥
 गयजूहसमायड्डियविसमसमुव्विल्लविडविसंघाया ।
 संघायजलाऽऽपूरियनिञ्जरणझरंतसद्दाला ॥९१॥
 एयारिसगुणकलियं पेच्छंतीए महानइं गंगं ।
 उत्तिण्णा वरतुरया परकूलं चेव संपत्ता ॥९२॥
 अह सो कयंतवयणो^१ वीरो वि य तत्थ कायरो जाओ ।
 धरिउं सुदंसणरहं रुयइ तओ उच्चकंठेणं ॥९३॥
 तं पुच्छइ वइदेही 'किं रुयसि तुमं इहं अकज्जेणं ?' ।
 तेण वि सा पडिभणिया "सामिणि ! वयणं निसामेहि ॥९४॥
 दित्तिगि-विससरिच्छं दुज्जणवयणं पभू निसुणिरुणं ।
 डोहलयमिसेण तुमं चेएइ अववायभयभीओ^२ ॥९५॥
 तीए कयंतवयणो कहेइ नयरहिवाइयं सव्वं ।
 दुक्खस्स य आमूलं सीयाए जं जहावत्तं ॥९६॥
 "लच्छ्रीहरेण सामिणि ! अणुणिज्जंतो वि राहवो अहियं ।
 अववायपरिब्भीओ न मुयइ एयं असग्गाहं ॥९७॥
 न य माया नेव^३ पिया न य भाया नेव^४ लक्खणो सरणं ।
 तुज्झ इह महारण्णे सामिणि ! मरणं तु नियमेणं" ॥९८॥
 सुणिरुण वयणमेयं वज्जेण व ताडिया सिरे सीया ।
 ओयरिय रहवराओ मुच्छविहलंघला पडिया ॥९९॥
 कह कह वि समासत्था पुच्छइ सेणावइं इमं सीया ।
 'साहेहि कत्थ रामो ? केदूरे वा वि साएयं ?' ॥१००॥

१. ला. "यन्नियसा" ॥ २. ला. धीरो ॥ ३. ला. धरिऊण संदणवरं रुं ॥ ४. ला. दोहलयनिहेण ॥ ५.
 सं.वा.सु. चत्ता अववायभीएण ॥ ६-७. ला. नेय ॥ ८. ला. "वइं तओ सी" ॥

अह भणइ 'कयंतमुहो अइदूरे कोसलापुरी देवि ! ।
 अइचंडसासणं पुण कतो च्विय पेच्छसे रामं' ॥१०१॥
 तहवि य निब्भरनेहा जंपइ एयाइं मज्झ वयणाइं ।
 गंतूणं भणियव्वो पउमो सव्वायरेण तुमे ॥१०२॥
 जह "नय-विणयसमग्गो गंभीरो सोमदंसणसहावो ।
 धम्मा-ऽधम्मविहण्णू सव्वकलाणं च पारगओ ॥१०३॥
 अभवियजणवयणेणं भीएण दुगुंछणाइ अइरेणं ।
 सामिय ? तुमे विमुक्का एत्थ अरण्णे अकयपुण्णा ॥१०४॥
 जइ वि य तुमे महायस ! चत्ताऽहं पुव्वकम्मदोसेणं ।
 तहवि य जणपरिवायं मा सामि ! तुमं गणेज्जासु ॥१०५॥
 लोयाववायभयभीयएण जह सामि ! हं तए चत्ता ।
 निद्वोसा-वि अरण्णे तह मा छड्डेज्ज सम्मतं ॥१०६॥
 दुक्खेण जओ लब्भइ एयं भवसायरस्स मज्झम्मि ।
 एएणं चत्तेणं जीवा नरयम्मि निवडंति ॥१०७॥
 चिरसंवसहीए दुहं दुच्चरियं जं कयं तु मे सामि ! ।
 तं मज्झ खमसु सव्वं मउयसहावं मणं काउं ॥१०८॥
 सामिय ! तुमे समाणं मयाए मह होज्ज दरिसणं णूणं ।
 जइवि य अवरहसयं तहवि य सव्वं खमिज्जासु" ॥१०९॥
 सा एव जंपिरुणं पडिया खरकक्रे धरणिवट्टे ।
 मुच्छानिमीलयच्छी पत्ता अइदारुणं दुक्खं ॥११०॥
 दट्टुण धरणिवडियं सीयं सेणावई विगयहामो ।
 चित्तेइ "इहाऽरण्णे कल्लणी दुक्करं जियइ ॥१११॥
 धिद्धी किं च विमुक्को पावोऽहं विगयलज्ज-मज्जाओ ।
 जं निदियमायारो परपेसणकारओ भिच्चो ॥११२॥
 भिच्चस्स नरवईणं दिण्णाऽऽसस्स पावनिरयस्स ।
 न य हवइ अकरणिज्जं निदियकम्मं तु जियलोए ॥११३॥

१. सं.वा.सु. कोसला इ वइदेहि ॥ २. सं.वा.सु. सामि फुडं ग" ॥ ३. सं.वा.सु. "ए बहुं दु" ॥ ४. सं.वा.सु. तुमं ॥ ५. सं.वा.सु. "रण्णे एकल्ली दु" ॥

पुरिसत्तणम्मि सरिसे जं आणा कुणइ सामिसालस्स ।
 तं सव्वं पच्चक्खं दीसेइ फलं अहम्मस्स ॥११४॥
 धिद्धी अहो ! अकज्जं जं पुरिसा इंदिएसु आसत्ता ।
 कुव्वंति य भिच्चत्तं न कुणंति सुहालयं धम्मं" ॥११५॥
 एयाणि य अण्णाणि य विलविय सेणावई तर्हि रण्णे ।
 मोत्तूण जणायतणयं चलिओ साएयपुरहुत्तो ॥११६॥
 सीया य तम्मि विगए रुयइ खणं मुच्छए खणं एक्कं ।
 आससइ पुणरविखणं विलवइ अइगरुयसदेणं ॥११७॥
 "हा पउम ! हा नरुत्तम ! हा वि हलियजणसुवच्छल ! गुणोह ! ।
 सामिय ! भयदियाए किं न महं दंसणं देसि ? ॥११८॥
 तुह दोसस्स महाजस ! थेवस्स वि नत्थि इत्थ संदेहो ।
 अइदारुणाण सामिय ! मह दोसो पुव्वकम्माणं ॥११९॥
 किं इत्थ कुणइ ताओ किं च पई किं च बंधवजणो मे ।
 दुक्खे अणुहवियव्वे संपइ य उवट्टिए कम्मे ॥१२०॥
 नूणं अण्णम्मि भवे घेत्तूण वयं पुणो मए भग्गं ।
 तस्सोदएण एयं दुक्खं अइदारुणं जायं ॥१२१॥
 अहवा पउमसरित्थं चक्कायजुयं सुपीइसंजुत्तं ।
 भिण्णं पावाइ पुरा तस्स फलं मे धुवं एयं ॥१२२॥
 अहवा वि कमलसंडे विओइयं हंसजुयलयं पुर्व्वि ।
 अइनिग्घिणाए संपइ तस्स फलं चेव भोत्तव्वं ॥१२३॥
 अहवा वि मए समणा दुगंछिया परभवे अपुण्णाए ।
 तस्स इमं अणुसरिसं भुंजेयव्वं महादुक्खं ॥१२४॥
 हा ! पउम ! बहु गुणायर ! हा ! लक्खण ! किं तुमं न संभरसि ।
 हा ! ताय ! किं न याणसि एत्थाऽरण्णे ममं पडियं ? ॥१२५॥
 हा ! विज्जाहरपत्थिव ! भामंडल ! पाविणी इहं रण्णे ।
 सोयण्ण वे निमग्गा तुमं पि किं मं न संभरसि ? ॥१२६॥

अहवा वि इहाऽरण्णे निरत्थयं विलविण एण ।
 किं पुण अणुहवियव्वं जं पुव्वकयं मए कम्मं” ॥१२७॥
 एवं सा जणयसुया जावऽच्छइ ताव तं वणं पढमं ।
 बहुसाहणो पविट्ठो नामेणं वज्जजंघनिवो ॥१२८॥
 पुंडरियपुराहिवई गयबंधत्थं समागओऽरण्णे ।
 घेतूण कुंजरवरे निग्गच्छइ साहणसमग्गो ॥१२९॥
 ताव य जे तस्स ठिया पुरस्सरा गहियपहरणा वरणा ।
 सोऊण रुण्णसइं सहसा खुहिया विचिर्तिति ॥१३०॥
 “गय-महिस-सरह-केसरि-वराह-रुरु-चमरसेविए रण्णे ।
 का एसा अइकलुणं रुयइ इहं दुक्खिया महिला ? ॥१३१॥
 किं होज्ज दिव्वकण्णा सुखइसावेण महियले पडिया ? ।
 कुसुमाउहस्स किं वा कुविया य रई इहाऽरण्णे ?” ॥१३२॥
 एवं सवियक्कमणा न य ते वच्चंति तत्थ पुरुहत्ता ।
 सव्वे वि भउव्विग्गा वग्गीहूया य चिट्ठंति ॥१३३॥
 जावेवं तस्स चमू रुद्धा गंग व्व पव्वयवरेणं ।
 ताव कणेरुविलग्गो पराइओ वज्जजंघनिवो ॥१३४॥
 पुच्छइ आसण्णत्था ‘केणं चिय तुम्ह भो ! पहो रुद्धो ? ।
 दीसह समाउलमणा भयविहलविसंतुला सव्वे’ ॥१३५॥
 जाव च्चिय उल्लवं दिंति नरिदस्स निययचारभड ।
 ताव य वरजुवईए सुणइ रुयंतीए कलुणसरं ॥१३६॥
 सरमंडलविण्णाया भणइ निवो ‘जा इहं रुयइ मुद्धा ।
 सा गुव्विणी निरुत्तं पउमस्स हवे महादेवी’ ॥१३७॥
 भणिओ भिच्च्वेहिं पहू ‘एव इमं जं तुमे समुल्लवियं ।
 न कयाइ अलियवयणं देव ! सुयं जंपमाणस्स’ ॥१३८॥
 जाव य एसाऽऽलावो वट्टइ ताव य नरा समणुपत्ता ।
 पेच्छंति जणयतनयं पुच्छंति य ‘का तुमं भद्दे ? ॥१३९॥

१. ला. रेविएण ए” ॥ २. ला. केण च्चिय तुम्ह गइपहो ॥ ३. सं.वा.सु. “स्स चारुसमरभड ॥ ४.

सं.वा.सु. ताव य नरा सम” ॥

सा पिच्छरुण पुरिसे बहवे सन्नद्धबद्धतोणीरि ।
 भयविहलवेविरंगी ताणाऽऽभरणं पणामेइ ॥१४०॥
 तेहिं वि सा पडिभणिया 'किं अम्ह विभूसणेहि एएहिं ।
 चिद्धंतु तुंज्ज लच्छी ववगयसोगा इओ होहि' ॥१४१॥
 पुणरवि भणंति "सुंदरि ! मोत्तुं सोगं भयं च एत्ताहे ।
 जंपसु सुपसण्णमणा किं न मुणसि नरवइं एयं ॥१४२॥
 पुंडरियपुराहिवई सो य इहं वज्जजंघनरवसभो ।
 चारित्त-नाण-दंसणबहुगुणनिलओ जिणमर्याम्मि ॥१४३॥
 संकाइदोसरहिओ निच्चं जिणवयणगहियपरमत्थो ।
 पडिवण्णयसोडीरो सरणागयवच्छलो वीरो ॥१४४॥
 दीणाईणं च पुणो विसेसओ कलुणकारणुज्जुत्तो ।
 पडिवक्खगयमयंदो सव्वकलाणं च पारगओ ॥१४५॥
 एयस्स अपरिमेया देवि ! गुणा को इहं भणित्तामो ।
 पुरिसो सयलतिहयणे जो य महाबुद्धिसंपण्णो ?" ॥१४६॥
 जाव य एसाऽऽलावो वट्टइ तावाऽऽगओ नरवरिदो ।
 अवयरिय करेणूतो करेइ विणयं जहाजोगं ॥१४७॥
 तत्थ निविट्ठो जंपइ 'वज्जमओ सो नरो न संदेहो ।
 इह मोत्तुं कल्लणी(णि?) जो जीवंतो गओ सगिहं' ॥१४८॥
 एत्थंतरे पवुत्तो मंती सच्चाविऊण जणयसुयं ।
 "नामेण वज्जजंघो एसो पुंडरियपुरसामी ॥१४९॥
 पंचाणुव्वयधारी वच्छे ! सम्मत्तउत्तमगुणोहो ।
 देव-गुरुपूयणरओ साहम्मियवच्छलो धीरो" ॥१५०॥
 एवं चिय परिक्हिए सीया तो पुच्छिया य नरवइणा ।
 'साहेह कस्स दुहिया ? कस्स व महिला तुमं लच्छी ? ॥१५१॥
 जं एव पुच्छिया सा सीया तो भणइ दीणमुहकमला ।
 "अइदीहा मज्झ क्हा संपइ निसुणेहि संखेवं ॥१५२॥

१. सं.वा.सु. तुज्ज ॥ २. सं.वा.सु. तु ॥ ३. सं.वा.सु. णनिचओ ॥ ४. ला. धीरो ॥ ५. सं.वा.सु. एत्थंतरं
 ॥ ६. सं.वा.सु. क्हिए ॥ ७. ला. क्हा नरवइ ! नि ॥

जणयनरिदस्स सुया भइणी भामंडलस्स सीयाऽहं ।
दसरहनिवस्स सुण्हा महिला पुण रामदेवस्स ॥१५३॥
केगइवरदाणनिहे दाउं भरहस्स निययरज्जं सो ।
अणरणपत्थिवसुओ पव्वइओ जायसंवेगो ॥१५४॥
रामेण लक्खणेण य समंगया दंडयं महारण्णं ।
संबुक्कवहे नरवइ ! हरियाऽहं रक्खसिदेणं ॥१५५॥
अह ते बलेण सहिया नहेण गंतूण राम-सुग्गीवा ।
लंकापुरीए जुज्झं कुणंति समयं दहमुहेणं ॥१५६॥
बहु भडजीयंतकरे समरे लंकाहिवं विवाएउं ।
रामेण आणियाऽहं निययपुरिं परमविभवेण ॥१५७॥
दट्टूण रामदेवं भरहो संवेगजायसब्भावो ।
घेत्तूण य पव्वज्जं सिद्धिसुहं चेव संपत्तो ॥१५८॥
सुयसोगसमावण्णा पव्वजं केगई वि घेत्तूणं ।
सम्मारहियचरणा तियसविमाणुत्तमं पत्ता ॥१५९॥
मज्झ य गब्भवसेणं जिणवंदणडोहलो समुप्पण्णो ।
ता नगरचेइयाइं पणयाइं मए असेसाइं ॥१६०॥
पुप्फविमाणेण पिओ दंसिस्सइ जाव सेसजिणभवणे ।
ताव य महायणेणं विण्णत्तो राहवो एवं ॥१६१॥
'सामिय ! जणो पयंपइ जा सीया रावणेण परिभुत्ता ।
सा रामेणाऽऽणीया अहह ! न जुत्तं कयं पहुणा' ॥१६२॥
इय तव्वयणं सोउं अयसकलंकस्स बीहमाणेण ।
निद्दोसा वि महायस ! मुक्का इह भीमरण्णम्मि ॥१६३॥
उत्तमकुलस्स लोए न य एयं खत्तियस्स अणुसरिसं ।
बहुसत्थपंडियस्स य धम्मठिइं जाणमाणस्स' ॥१६४॥
एवं चिय वित्तंतं परिकहिऊणं ततो जणयधूया ।
माणसजलणुम्हविया रोवइ कलुणेण सदेणं ॥१६५॥

रोर्यति जणयसुयं ददूण नराहिवो किवावण्णो ।
 संथावणमइकुसलो जंपइ एयाइं वयणाइं ॥१६६॥
 “मा रुयसु तुमं सीये ! जिणसासणतिव्वभत्तिसंपन्ने ? ।
 किं वा दुक्खाऽऽयाणं अट्टज्जाणं समारुहसि ? ॥१६७॥
 किं वा तुमे न नाया लोगठिई एरिसी निययमेव ।
 अधुवत्त-असरणत्ता कम्माण विचित्तया चेव ? ॥१६८॥
 किं ते साहुसयासे न सुयं जह निययकम्मपडिबद्धो ।
 जीवो कम्मेण हओ हिंडइ संसारकंतारे ? ॥१६९॥
 संजोग-विप्पओगा सुह-दुक्खाणि य बहुप्पयाराणि ।
 पत्ताइं दीहकालं अणाइ-निहणाइं जीवेणं ॥१७०॥
 जो सुसमणआरामं दुवयण अग्गीहिं ड्हइ अविसेसो ।
 अयसानलेण सो च्विय पुणरुत्तं डज्जइ अणाहो ॥१७१॥
 धण्णा तुमं कयत्था सलाहणिज्जा य एत्थ पुहइयले ।
 चेइहरनमोक्कारं डोहल यं जा समल्लीणा ॥१७२॥
 अज्ज वि य तुज्ज पुण्णं अत्थि इहं सीलसालिणी बहुयं ।
 दिट्ठाऽऽसि मए जं इह गयबंधत्थं पविट्ठेणं ॥१७३॥
 अहयं तु वज्जजंधो पुंडरियपुराहिवो जिणाऽऽणरओ ।
 धम्मविहाणेण तुमं मह बहिणी होहि निक्खुत्तं ॥१७४॥
 उट्ठेहि मज्ज नयरं वच्चसु तत्थेव चिट्ठमाणीए ।
 तुह पच्छयवतविओ गवेसणं काहिई रामो” ॥१७५॥
 महुरवयणेहिं एवं सीया संथाविऊण(विया य?) नरवइणा ।
 अह धम्मबंधवं तं लद्धुणं सा धिइं पत्ता ॥१७६॥
 अह तक्खणेण सिबिया उवणीया सुरविमाणसंकासा ।
 तीए समारुहिऊणं पुंडरिय पुरं गया सीया ॥१७७॥
 तत्थ य सुहंसुहेणं सा अच्छइ वज्जजंधनरवइणा ।
 पूइज्जंती निच्चं सीया भामंडलेणेव ॥१७८॥

जं जं मणोभिरुदयं तं सव्वं कुणइ धम्मभगिणि त्ति ।
काऊण वज्जजंघो सीयाए पडिच्छए आणं ॥१७९॥
‘जय देवि ! सरस्सइ ! लच्छि ! कित्ति बुद्धी ! सिरीय ! बंभाणी !’ ।
इय भण्णंती सा परियणेण तत्थऽच्छइ सुहेणं ॥१८०॥
सो वि य कयंतवयणो अहियपरिस्संतरहवरतुरंगो ।
सणियं सणियं जंतो संपत्तो पउमपासम्मि ॥१८१॥
पायपडणुट्टिओ सो जंपइ “अइ भीसणम्मि रण्णम्मि ।
तुम्हाऽऽएसेण मए गुरुहारा छड्डिया सीया ॥१८२॥
सीह-ऽच्छभल्ल-चित्तय- गोमाऊरसियभीमसद्दाले ।
खर-फरुस-चंडवाए अण्णोण्णालीढदुमगहणे ॥१८३॥
जुज्झंतवग्घ-महिसय-पंचमुहावडियमत्तमायंगे ।
नउलोरगसंगामे सीहचवेडाहयवराहे ॥१८४॥
सरमुत्तासियवणयरकडयडभज्जंतरुक्खसद्दाले ।
करयररडंतबहुविहतरुच्छडाझडियपक्खउले ॥१८५॥
गिरिणइसलिलुद्धाइयनिज्झरझ्झत्तिझत्तिनिग्घोसे ।
तिव्वऽच्छपरिगहिए अण्णोण्णच्छित्तसावज्जे ॥१८६॥
एयारिसविणिओए भयंकरे विविहसावयसमिद्धे ।
तुज्झ वयणेण सीया सामि ! मए छड्डिया रण्णे ॥१८७॥
नयणंसुदुद्धिणाए जं भणियं देव ! तुज्झ महिलाए ।
तं निसुणसु संदेसं साहिज्जंतं मए सव्वं ॥१८८॥
पायप्पडणोवगया सामि ! तुमं भणइ महिलिया वयणं ।
‘अहयं जह परिचत्ता तह जिणभत्ति म मुंचिहिसि ॥१८९॥
नेहाणुरागवसगो वि जो ममं दुज्जणाण वयणेणं ।
छड्डेहि अमुणियगुणो सो जिणधम्मं पि मुच्चिहिसि ॥१९०॥
निद्धोसाए वि महं दोसो न तहा जणो पहासिहिई ।
जह धम्मवज्जियस्सउ नरवइ ! लज्जाविहीणस्स ॥१९१॥

एयम्मि य एकभवे दुक्खं होही उ मं मुयंतस्स ।
 सम्मत्त-नाण-दंसणरहियस्स भवे भवे दुक्खं ॥१९२॥
 एयं चिय संदिट्ठं सीयाए नेहनिब्भरमणाए ।
 संखेवेण नराहिव ? तुज्झ मए साहियं सव्वं ॥१९३॥
 सामिय ! सहावभीरू अहिययरं दारुणे महारण्णे ।
 बहुसत्तभीसणरवे जणयसुया दुक्करं जियइ ॥१९४॥
 सेणावइस्स वयणं सुणिरुणं राहवो गओ मोहं ।
 पडिकारेण विउद्धो कुणइ पलावं बहुवियप्पं ॥१९५॥
 “हा हा ! दुज्जणवयणेहिं तज्जिएणं मए अणज्जेणं ।
 मूढेणं पक्खित्ता सीया अइदारुणे रण्णे ॥१९६॥
 हा ! पउमपत्तनयणे ! वियसियवरपउमगब्भसमगोरे ! ।
 हा ! गुणरयणनिहाणे ! कत्तो मग्गेमि तं इण्हि ? ॥१९७॥
 हा ! सोमचंदवयणे ! वयणं मे देहि देहिं वैदेहि ! ।
 जाणिसि य तुज्झ विरहे मह हिययं कायरं निच्चं ॥१९८॥
 निदोसा वि मयच्छी ! किवाविमुक्केण उज्झियाऽसि मए ।
 रण्णे उत्तासणए न य नज्जइं किं पि पाविहिसि ? ॥१९९॥
 हरिणि व्व जूहभट्ठा छुहा-तिसावेयणापरिग्गहिया ।
 रविकिरणसोसियंगी मरिहिसि कंते ? महारण्णे ॥२००॥
 किं वा वग्घेण वणे खद्धा सीहेण जइ(अह)व घोरेणं ।
 किं वा वि धरणि सइया अक्कंता मत्तहत्थीणं ? ॥२०१॥
 पायवखयंकरेणं जलंतजालासहस्सपउरेणं ।
 किं वणदवेण दड्ढा सहायपरिवज्जिया कंते ? ॥२०२॥
 को रयणजडीण समो होइ नरो सयलजीवलोयम्मि ।
 जो मज्झ पिययमाए आणइ वत्ताइ विहलाए ?” ॥२०३॥
 पुच्छइ पुणो पुणो वि य पउमो सेणावइं पयलियंसू ।
 ‘कह सा घोरे रण्णे धरिही पाणे जणयधुया ?’ ॥२०४॥

१. ला. होही ममं मु ॥ २. सं.वा.सु. ‘हि पडिवयणं ॥ ३. सं.वा.सु. जइवि ॥ ४. सं.वा.सु. किं वा दवेण ॥

एव भणिओ कयंतो लज्जाभरपिल्लिओ समुल्लावं ।
 न य देइ ताव रामो कंतं सरिउं गओ मोहं ॥२०५॥
 एत्थंतरम्मि पत्तो सहसा लच्छीहरो पउमनाहं ।
 आसासिऊण जंपइ “नाह ? निसामेह मह वयणं ॥२०६॥
 धीरत्तणं पवज्जसु सामिय ? मोत्तूण सोयसंबंधं ।
 उवणमइ पुव्वविहियं लोगस्स सुहा-ऽसुहं कम्मं ॥२०७॥
 आयासे गिरिसिहरे जले थले दारुणे महारण्णे ।
 जीवो सकम्मपडिओ रक्खिज्जइ पुव्वसुकएणं ॥२०८॥
 अह पुण पावस्सुदए रक्खिज्जंतो वि धीरपुरिसेहिं ।
 जंतू मरइ निरुत्तं संसारठिई इहं लोए” ॥२०९॥
 एवं सो पउमो पबोहिओ लक्खणेण कुसलेण ।
 छडेइ किंचि सोयं देइ मणं निययकरणिज्जे ॥२१०॥
 सीयाए गुणसमूहं सुमरंतो जणवओ नयरवासी ।
 रुयइ पेयलंतनित्तो अईव सीयं पसंसंतो ॥२११॥
 वीणा-मुयंग-तिसरिय-वंसरवुगीयवज्जिया नयरी ।
 जाया कंदियमुहला तदियहं सोगसंतत्ता ॥२१२॥
 रामेण भद्दकलसो भणिओ ‘सीयाए पेयकरणिज्जं ।
 सिग्घं करेहि विउलं दाणं च जहच्छियं देहि’ ॥२१३॥
 ‘जं आणवेसि सामिय !’ भणिऊणं एव निग्गओ तुरियं ।
 सव्वं पि भद्दकलसो करेइ दाणाइकरणिज्जं ॥२१४॥
 जुवईण सहस्सेहिं अट्ठहिं अणुसंतयं पिं परिकिण्णो ।
 पउमो सीएकमणो सुविणे वि पुणो पुणो सरइ ॥२१५॥
 एवं सणियं सणियं सीयासोए गए विरल्लभावं ।
 सेसमहिलासु पउमो कह कहवि धिइं समणुपत्तो ॥२१६॥
 अह पुंडरीयनयरिट्ठियाए सीयाए गम्भभावेण ।
 आपंडुरंगलट्ठी सामलवयणत्थणा जाया ॥२१७॥

१. ला. एयं ॥ २. सं.वा.सु. पइलित्तनित्तो ॥ ३. ला. आणवेहि ॥ ४. सं.वा.सु. पि करणिज्जो ॥ ५.

ला. *भभीयाए ॥

मूल. २-३१

बहुमंगलसंपुष्णं देहं अइविब्भमा गई मंदा-
 निव्वायनयणदिट्ठी मुहकमलं चैव सुपसण्णं ॥२१८॥
 पिच्छइ निसासु सुमिणे कमलिणिदलपुडयविमलसलिलेणं ।
 अहिसेयं कीरंतं गएसु अइचारुवेसु ॥२१९॥
 मणि-दप्पणे विसंते निययमुहं असिवरे पलोएइ ।
 मोत्तूण य गंधव्वं सुणेइ णवरं धणुयसहं ॥२२०॥
 चक्खुं देइ अणिमिसं, सीहाणं पंजरो यरत्थाणं ।
 एवंविहपरिणामा गमेइ सीया त्तिहं दियहा ॥२२१॥
 एवं नवमे मासे संपुष्णे सवणसंगए चंदे ।
 सावणपंचदसीए सुयाण जुयलं पसूया सा ॥२२२॥
 अह ताण वज्जजंघो करेइ जम्मूसवं महाविउलं ।
 गंधव्व-गीय-वाइयपडुपडह-मुयंगसद्दालं ॥२२३॥
 पढमस्स कयं नामं अणंगलवणो अणंगसमरूवो ।
 तस्स गुणेषु सरिच्छो बीओ मयणंकुसो नामं ॥२२४॥
 अह ते दोन्नि वि कुमरा पवड्डुमाणा कमेण संजाया ।
 नीसेसकलाकुसला बहुजणमणकयचमक्कारा ॥२२५॥
 संपत्ता य कमेणं बहुकामिणिजणमणोहरमुयारं ।
 नीसेसविलाससहं तारुणमणंगकुलभवणं ॥२२६॥
 अह वज्जजंघराया भोगसमत्थे इमे वियाणेउं ।
 पाणिग्गहणनिमित्तं निरूवए ताण कण्णाओ ॥२२७॥
 लच्छ्रीमईए धूया ससिच्चूला नाम उत्तमा कण्णा ।
 बत्तीसकण्णयजुया पढमस्स निरूविया रण्णा ॥२२८॥
 बीयस्स निमित्तेणं पिहूनरिंदस्स संतियं कण्णं ।
 नामेण कणयमालं सुमरिय दूयं विसज्जेइ ॥२२९॥
 सो जंपइ पिहुरायं 'देव ! अहं वज्जजंघनरवइणा ।
 पट्टविओ तुह पासे इमेण कज्जेण निसुणेसु ॥२३०॥

नामेण कणयमाला जा धूया तुम्ह गुणजुया सा उ ।
मयणंकुसस्स दिज्जंत' इय भणिओ भणइ पिहुराया ॥२३१॥
'जस्स कुलं पि न नज्जइ कह धूयं देमि तस्स रे दूय !' ।
इय भाणिरो तुमं पि हु निग्गहजोगो फुडं होसि ॥२३२॥
इय भणिओ सो दूओ साहइ सव्वं पि वज्जजंघस्स ।
सो वि रुसिरुण वच्चइ विक्खेवेणं पिहुस्सुवरिं ॥२३३॥
तं विग्गहं सुणेउं सनिमित्तं ते तओ कुमारवरा ।
रुब्भंता वि कुमारेहिं झत्ति पत्ता निवसमीवं ॥२३४॥
तो तेहिं कुमारेहिं पिहुरायं सबलवाहणं समरे ।
जिणिरुणं सा कण्णा परिणीया सव्वपच्चक्खं ॥२३५॥
अन्ने यं बहू देसा वसीकया तेहिं बलसमग्गेहिं ।
जाया महानरिंदा विक्खाया सयलभुवणम्मि ॥२३६॥
अह अन्नया कयाई एवं ते नारएण संलत्ता ।
'राहव-लक्खणलच्छि वच्छ ! तुमे देवि पावेह' ॥२३७॥
तेहिं तओ पडिभणियं 'के ते मुणि ! राम-लक्खणा जाण ।
रिद्धीए आसीसह ?' नीसेसं कहइ एसो वि ॥२३८॥
तो तव्वयणं सोउं रुसिरुणं दो वि सव्वरिद्धीए ।
गंतुं जणएहिं समं कुणंतिं समरं महाघोरं ॥२३९॥
जाव य निरत्थयाइं जायाइं ताण सव्वसत्थाइं ।
लवकुमरस्स वहत्थं ता रामो मुयइ हलमुसले ॥२४०॥
ताइं पि निप्फलाइं जायाइं तम्मि खेत्तमेत्ताइं ।
ता चिं तासोयमहण्णवम्मि अह राहवो पडिओ ॥२४१॥
चितइ "विहलाइं कहं जायाइं मज्झ दिव्वसत्थाइं ।
एयं अदिट्ठपुव्वं पच्चक्खं दीसए अज्ज" ॥२४२॥
लच्छ्रीहरो वि रुसिउं गयमाहप्पेसु सव्वसत्थेसु ।
संख-गया-धणुमाइसु सुमरइ अह चक्करयणं तु ॥२४३॥

१. ला. 'त्ता पिहुस' ॥ २. ला. वि ॥ ३. ला. रुसिउं ते दो ॥ ४. सं.वा.सु. 'ति घोरं महासमरं ॥ ५. ला.

निप्पभाइं ॥ ६. ला. सयलस' ॥

करपत्तं तममोहं चक्रं जालासहस्सपरिवारं ।
 लच्छीहरेण मुक्कं कुसस्स तेलोक्कभयजणयं ॥२४४॥
 गंतूण कुससयासं तं चक्रं वियलियप्पहं सिग्घं ।
 पुणरवि य पडिनियत्तं संपत्तं लक्खणस्स करे ॥२४५॥
 तं लक्खणेण चक्रं खेतं मयणंकुसस्स रोसेणं ।
 विफलं तु पडिनियत्तं पुणो पुणो पवणवेगेणं ॥२४६॥
 दट्टूण तहाभूयं रणंगणे लक्खणं समत्थभडा ।
 जंपति विम्हियमणा “किं एयं अन्नहाजायं ? ॥२४७॥
 किं कोडिसिलाईयं अलियं चिय लक्खणे समणुजायं ।
 कज्जं मुणिवरविहियं चक्रं जेणऽन्नहाकुणइ” ॥२४८॥
 अह भणइ लच्छिनिलओ विसायपरिवज्जिओ धुवं एए ।
 बलदेव-वासुदेवा उप्पण्णा भरहवासम्मि ॥२४९॥
 तं लक्खणस्स वयणं सोऊणं लव-कुसाणुवज्जाओ ।
 सिद्धत्थो नामेणं सनारओ सिद्धपुत्तो उ ॥२५०॥
 जंपइ “मा कुण अधिइं लक्खण ! तं केसवो इहं भरहे ।
 रामो य बलो किं होइ अण्णहा जमिह मुणिभणियं ॥२५१॥
 सीयासुया य एए लवणं कुसनाम कुस दोण्णि वि कुमार ।
 गब्भट्टिएसु जेसुं वइदेही छड्डिया रण्णे ॥२५२॥
 सिद्धत्थ-नारएहिं तम्मिय सिट्ठे कुमारवुत्तंते ।
 लक्खण-रामा दोण्णि वि बाहजलोहलियगंडयला ॥२५३॥
 वच्चंति सुयसमीवं ते वि हु दट्टूण ते समायंते ।
 अइनेहनिब्भरंगा पडंति पाएसु दुण्हं पि ॥२५४॥
 अवगूहिऊण पुत्ते कुणइ पलावं तओ पउमनाहो ।
 अइनेहनिब्भरमणो विमुक्कनयणंसु जलनिवहो ॥२५५॥
 ‘हा हा ! मए अणज्जेण पुत्त ! गब्भट्टिया अकज्जेणं ।
 सीयाय समं चत्ता भयजणणे दारुणे रण्णे ॥२५६॥

१. सं.वा.सु. लवस्स ॥ २. ला. “जणणं ॥ ३. सं.वा.सु. लवस” ॥ ४. सं.वा.सु. “णे तक्खणे स” ॥ ५.

सं.वा.सु. ‘हमज्जम्मि ॥ ६. सं.वा.सु. लवण-मयणंकुस दोण्णि ॥

हा ! विउलपुण्णया वि हु सीयाए जं मए वि संभूया ।
 उयरत्था अइघोरं दुक्खं पत्ता उ अडवीए ॥२५७॥
 तुब्भेहिं दिट्ठेहिं सीया जियइ त्ति निच्छयं एयं ।
 एसो य वज्जजंघो परमत्थेणं महं बंधू ॥२५८॥
 इय भणिरुणं दोणिण वि लक्खण-रामा मणोरहसएहिं ।
 कोसलपुरीइ परमं आणंदमहं पयट्ठंति ॥२५९॥
 ततो बिहीसणाई समत्थसुहडा भणंति पउमाभं ।
 “सामिय ! दुक्खं चिट्ठइ जणयसुया परविएसम्मि ॥२६०॥
 ता कारुण पसन्नं चित्तं आणेज्जऊ इहं सीया” ।
 ‘कह जणजणियववायं पेच्छमि तयं’ भणइ रामो ॥२६१॥
 ‘जइ पुहइयलं सयलं एयं सवहेण पत्तियावेइ ।
 तो तीइ समं वासो होहिइ न य अन्नभेएणं ॥२६२॥
 एवं ति खेयेरहिं पडिवज्जिय मेलिओ जणो सव्वो ।
 आवासियो य तुरियं नयरीए बाहिरुद्देसे ॥२६३॥
 मंचा कया विसाला पच्छमिहि मंडवा मणभिरामा ।
 तेसु य जणो निविट्ठो सवहिकखणकंखुओ सव्वो ॥२६४॥
 तो रामसमाइट्ठा सुग्गीवाई भडा खणद्धेणं ।
 पुंडरियपुरं गंतुं सीयाभवणम्मि पविसंति ॥२६५॥
 कारुण य जयसदं सीयं पणमंति खेयर सव्वे ।
 ते वि य ससंभमाए अहियं संभासिया तीए ॥२६६॥
 अह ताण निविट्ठाणं जंपइ सीया सर्निदणं वयणं ।
 “एयं मज्झ सरिरं कयं च दुक्खासयं विहिणा ॥२६७॥
 अंगाइं इमाइं मह दुज्जणवयणाणलेण दड्ढाइं ।
 खीरोयसायरस्स वि जलेण नइ निव्वुइं जंति” ॥२६८॥
 अह ते भणंति “सामिणि ! एयं मेल्लेहि दारुणं सोयं ।
 सो पावाण वि पावो जो तुज्झ लएइ अववायं ॥२६९॥

१. ला. महाबंधू ॥ २. ला. एव भणिरुण ॥ ३. ला. पवट्ठंति ॥ ४. सं.वा.सु. पेच्छमिहि मंडवा ॥ ५.

ला. नय ॥ ६. ला. तुम्ह ॥

को उक्खवइ वसुमइं ? को पियइ फुलिगर्पिगलं जलणं ? ।
 को लेहइ जीहाए ससि-सूरतणूणि मूढप्पा ? ॥२७०॥
 जो गिण्हइ अववायं इत्थ जए तुज्झ सुद्धसीलाए ।
 सो मा पावउ सोक्खं कयाइ लोए अलियवाई ॥२७१॥
 एयं पुप्फविमाणं विसज्जियं तुज्झ पउमनाहेणं ।
 आरुहसु देवि ! सिग्घं वच्चामो कोसलानयरिं ॥२७२॥
 पउमो देसो य पुरी न य सोहं दिति विरहियाणि तुमे ।
 जह तरुभवणागासं विवज्जियं चंदमुत्तीए' ॥२७३॥
 सा एव भणिय संती सीया अववायविहुणणट्टाए ।
 आरुहिय वरविमाणं साएयपुरी गया सुजवा ॥२७४॥
 रामस्स सन्नियासं तच्चरियंतीए जणयधूयाए ।
 सह पत्थिवेहिं अग्घं विहेइ लच्छीहरो विहिणा ॥२७५॥
 दट्टूण आवयंति सीयं चित्तेइ राहवो एत्तो ।
 'कह उज्झिया वि न मुया एसा सत्ताउले रण्णे ?' ॥२७६॥
 कारुण अंजलिपुडं पणिवइया राहवस्स चलणेसु ।
 सीया बहुप्पयारं परिचितंती ठिया पुरओ ॥२७७॥
 भणइ 'जइ वहसि नेहं एव गए वि य पयच्छ मे आणं ।
 होरुण सोमहियओ किं कायव्वं मए एत्थ ?' ॥२७८॥
 रामो भणइ 'तुह पिए ! अहयं जाणामि निम्मलं सीलं ।
 नवरं जणाऽववायं विगयमलं कुणसु दिव्वेणं' ॥२७९॥
 भणिरुण एवमेयं जंपइ सीया सुणेहि मह वयणं ।
 "पंचसु दिव्वेसु पहू लोगमहं पत्तियावेमि ॥२८०॥
 आरोहामि तुलाए जलणं पविसामि लेमि फालं च ।
 उगं च पियामि विसं अन्नं पि करेमि जं भणसि" ॥२८१॥
 परिचितिरुण रामो जंपइ 'पविसरसु पावयं सीए !' ।
 तीए वि य सो भणिओ 'एवमिणं नत्थि संदेहो' ॥२८२॥

पडिवण्णम्मि य समयं तम्मि य सीयाए जणवओ सोउं ।
 पयलंतअंसुनयणो जाओ अइदुक्खिओ विमणो ॥२८३॥
 एयंतरे पवुत्तो सिद्धत्थो “सुणसु नाह ! महवयणं ।
 न सुरेहिं वि सीलगुणा वण्णिज्जंती विदेहाए ॥२८४॥
 पविसिज्ज व पायालं मेरू लवणोयहि व्व सूसिज्जा ।
 न हु सीलस्स विवत्ती होज्ज पहू ! जणयधूयाए ॥२८५॥
 विज्जामंतेण मए पंचसु मेरूसु चेइयहराइं ।
 अहिवंदियाइं राहव ! तवो य चिण्णो सुइरकालं ॥२८६॥
 तं मे हवउ महाजस ? विफलं जं तत्थ पुण्णमाहप्पं ।
 जइ सीलस्स विणासो मणसा वि य अत्थि सीयाए” ॥२८७॥
 पुणरवि भणइ सुभणिओ सिद्धत्थो ‘जइ अखंडियचरित्ता ।
 सीया तो जलणाओ उत्तरिही कणयलट्ठिव्व’ ॥२८८॥
 गयणे खेयरल्लोगो जंपइ धरणीयरो महियलत्थो ।
 ‘साहु त्ति साहु ! भणियं सिद्धत्थ ! तुमेरिसं वयणं’ ॥२८९॥
 सीया सई सइ च्चिय भणइ जणो तत्थ उच्च कंठेणं ।
 ‘न य होइ विगारत्तं पउम ! महापुरिसमहिलाणं’ ॥२९०॥
 एवं सव्वो वि जणो रोवंतो भणइ गगरसरेणं ।
 ‘राहव ! अइनिक्कलुणं मा ववससु एरिसं कम्मं’ ॥२९१॥
 पउमो भणइ ‘जइ किवा तुज्झं चिय एत्थ अत्थि तणुया वि ।
 मा जंपह अइचवला सीयापरिवायसंबंधं’ ॥२९२॥
 रामेण तओ भणिया पासत्था किंकरा खणह वावी ।
 तिण्णेव य हत्थसया समचउरंसावगाढा य ॥२९३॥
 पूरेह इंधणेहिं कालागरू-चंदणाइत्थूलेहिं ।
 चंडं जालेह लहुं वावीए सव्वओ अर्गि ॥२९४॥
 जं आणवेसि सामिय ! भणिरुणं एव किंकरगणेहिं ।
 तं चेव वाविमाई कम्मं तु अणुट्ठियं सव्वं ॥२९५॥

एत्थंतरम्मि केवलवरणाणं सयलभूसणमुणिस्स ।
 तत्थेव समुप्पण्णं उज्जाणे तस्स महिमत्थं ॥२९६॥
 सुरपरिवुडो सुरिंदो समागओ तत्थ दिव्वरिद्धीए ।
 अह सीयावुत्तंतो अवंतरलम्मि सच्चविओ ॥२९७॥
 दट्टुं हरिणगमेसी जणयसुयासंतियं तु वित्तंतं ।
 साहेहि अमरवइणो “पेच्छ पहू ! दुक्करं एयं ॥२९८॥
 देवाण वि दुप्परिसो हुयासणो सव्वसत्तभयजणणो ।
 कह सीयाए महायस ! पवंचिओ घोरउवसगो ॥२९९॥
 जिणधम्मभावियाए पयव्वयाए विसुद्धसीलाए ।
 एवंविहाए सुरवइ ? कह होइ इमो उ उवसगो” ॥३००॥
 सो सुरवइणा भणिओ अहयं वच्चामि वंदित्तं साहुं ।
 तं पुण वेयावच्चं करेहि सीयाए गंतूणं ॥३०१॥
 इय भणिरुणं इंदो पायब्भासं मुणिस्स संपत्तो ।
 हरिणगमेसी वि तओ गओ य सीयासमीवम्मि ॥३०२॥
 तं पेच्छिऊण वारिं तणकट्टसुपूरियं अइमहं तिं ।
 पउमो समाउलमणो चित्तेइ बहुप्पयारं ति ॥३०३॥
 “कतोऽहं वइदेहिं पेच्छिस्सं विविहगुणसमाइण्णं ।
 नियमेण एत्थ मरणं पाविहिइ हुयासणे दित्ते ॥३०४॥
 जंपिहिइ जणो सव्वो जह “एसा जणयनंदणी सीया ।
 अववायजणियदुक्खा मया य जलणं पविसिऊण ॥३०५॥
 तइया हीरंतीए नेच्छंतीए य सीलकलियाए ।
 लंकाहिवेण सीसं किं न लुयं मंडलग्गेणं ॥३०६॥
 एवंविहाइ मरणं जइ न हु हुंतं च जणयतनयाए ।
 निव्वडिओ सीलगुणो हंतो य जसो तिहुयणम्मि ॥३०७॥
 अहवा जं जेण जहा मरणं समुवज्जियं सयललोए ।
 तं तेण पावियव्वं नियमेण न अन्नहा होइ” ॥३०८॥

एयाणिय अन्नाणि य चिंततो जाव तत्थ पउमाभो ।
 चिट्ठइ ताव हुयवहो पज्जलिरुणं समाढत्तो ॥३०९॥
 चंडानिलाहएणं धूमेणं बहलकज्जलनिभेणं ।
 संछण्णं गयणयलं पाउसकाले व्व मेहेहिं ॥३१०॥
 धगधगधर्गितसदो पज्जलिओ हुयवहो कणयवण्णो ।
 गाउयपरिमाणासु य जोणहासु नहं पदीवंतो ॥३११॥
 किं होज्ज दिणयरसयं समुग्गयं किं च महियलं भेतुं ।
 उप्पायनगवरिंदो विणिग्गओ दूसहपयावो ॥३१२॥
 अइधवलचंचलाओ सव्वत्तो विप्फुरंति जालाओ ।
 सोयामणीउ नज्जइ गयणयले उग्गतेयाओ ॥३१३॥
 एवंविहम्मि जलणे पज्जलिए उट्टिया जणयधूया ।
 दारुण काउसग्गं थुणइ जिणे उसहमाईए ॥३१४॥
 सिद्धा य तहाऽऽयरिया साहू जगविस्सुया उवज्जाया ।
 पणमइ विसुद्धहियया पुणो विमुणिसुव्वयं सिरसा ॥३१५॥
 एए नमिरुण तओ जंपइ “सच्चेण साविया सव्वे ।
 निसुणंतु लोगपाला मह वयणं सासणसुरा य ॥३१६॥
 जइ मण-वयण-तणूहिं रामं मोत्तूण परनरो कोइ ।
 सुविणे वि हु अहिलसिओ तो डहउ इमो ममं अग्गी ॥३१७॥
 अह पुण मोत्तूण पइं निययं अण्णो न वासिओ हियए ।
 ता मा डहउ हुयवहो जइ सीलगुणस्स माहप्पं” ॥३१८॥
 सा एव जंपिरुणं तओ पविट्ठाऽनलं जणयतणया ।
 जायं जलं सुविमलं सुद्धा दढसीलसंपण्णा ॥३१९॥
 ण य दारुयाणि न तणं ण य हुयवहसंतिया उ इंगाला ।
 नवरं आलोइज्जइ वावी सव्वत्थ जलभरिया ॥३२०॥
 भेतूण धरणिवट्टं उच्चलियं तं जलं गुलुगुलितं ।
 वियडगभीरावत्तं संघट्टेत्तफेणोहं ॥३२१॥

१. ला. “परिणाहासु ॥ २. ला. न यासि णे हियए ॥

झञ्झं ति झ त्ति कत्थइ, अन्नतो दिलिदिलि ति सद्दालं ।
 पवहइ जलं सुभीमं उम्मगपयट्टकल्लेलं ॥३२२॥
 जाव य खणंतरिक्कं ताव च्चिय खुभियसागरसमाणं ।
 सलिलं कडिप्पमाणं जायं च तओ जणाणुवरिं ॥३२३॥
 सलिलेण तओ लोगो सिग्घं चिय वुब्भित्तं समाढतो ।
 विज्जाहरा वि सव्वे उप्पइया नहयलं तुरिया ॥३२४॥
 वरसिप्पिएसु वि कया संखुभिया तत्थ मंचसंघाया ।
 ताहे जणो निरासो वुब्भंतो विलविउं लग्गो ॥३२५॥
 'हा देवि ! हा सरस्सइ ! परितायसु धम्मवच्छले ! लोगं ।
 उदएण वुब्भमाणं सबालवुड्डाउलं दीणं' ॥३२६॥
 दट्टुण हीरमाणं लोगं ताहे करेसुं जणयसुया ।
 सलिलं फुसइ पसंतं जायं वावीसमं सहसा ॥३२७॥
 ववगयसलिलभओ सो सव्वजणो सुद्धमाणसो वार्वि ।
 पेच्छइ विमलजलोहं कमलुप्पलभरियकुवललयलं ॥३२८॥
 सुरहिसयवत्तकेसरनिलीणगुंजंतमहुयरुग्गीयं ।
 चक्काय-हंस-सारसनाणाविहसउणगुणकलियं ॥३२९॥
 मणि-कंचणसोवाणं तीए वावीए मज्झयारत्थं ।
 पउमं सहस्सपत्तं तस्स य सीहासणं उवरिं ॥३३०॥
 दिव्वंसुयपरिच्छण्णे तत्थ उ सीहासणे सुहनिविट्ठा ।
 रेहइ जणयनिवसुया पउमद्दहवासिणि व्व सिरी ॥३३१॥
 देवेहिं तक्खणं चिय विज्जेज्जइ चामरेहिं दिव्वेहिं ।
 गयणाउ कुसुमवुट्ठी मुक्का य सुरेहिं तुट्ठेहिं ॥३३२॥
 सीयाइ सीलनिहसं पसंसमाणा सुरा नहयलत्था ।
 नच्चंति य गायंति य साहुक्कारं विमुंचंता ॥३३३॥
 गयणे समाहयाइं तूराइं सुरगणेहिं विविहाइं ।
 सद्देण सयललोगं नज्जइ आवूरयंताइं ॥३३४॥

विज्जाहरा य मणुया नच्चंता उल्लवेंति परितुट्ठा ।
 सिरिजणयरायधूया सुद्धा दित्तानले सीया ॥३३५॥
 एत्थंतरे कुमाराः लवणं-डकुस नेहनिब्भरा गंतुं ।
 पणमंति निययजणणिं ते वि सिरे तीए अग्घाया ॥३३६॥
 रामो वि पेच्छऊणं कमलसिरिं चेव अत्तणो महिलं ।
 जंपइ य समीवत्थो मज्झ पिए ! सुणसु वयणमिणं ॥३३७॥
 “एयारिसं अकज्जं न पुणो काहामि तुज्झ ससिवयणे ! ।
 सुंदरि ! पसण्णहियया होहि महं खमसु दुच्चरियं ॥३३८॥
 महिलाण सहस्साइं अट्ट ममं ताण उत्तमं भद्दे ! ॥
 अणुहवसु विसयसोक्खं मज्झ वि आणा तुमं दिती ॥३३९॥
 पुप्फविमाणारूढा खेयैरजुवईसु परिमिया कंते ! ।
 वंदसु जिणभवणाइं समं मए मंदराईणि ॥३४०॥
 बहुदोसस्स मह पिए कोवं मोत्तूण खमसु दुच्चरियं ।
 अणुहव सलाहणीयं सुरलोगसमं विसयसोक्खं” ॥३४१॥
 तो भणइ पइं सीया “नरवइ ! मा एव होहि उव्विग्गो ।
 न य कस्सइ रुट्ठाऽहं एरिसयं अज्जियं पुव्वं ॥३४२॥
 न य देव ! तुज्झ रुट्ठा न चेव लोगस्स अलियवाइस्स ।
 पुव्वज्जियस्स राहव ! रुट्ठाऽहं निययकम्मस्स ॥३४३॥
 तुज्झ पसाएण पहू ? भुत्ता भोगा सुरोवमा विविहा ।
 संपइ करेमि कम्मं तं जेण न होमि पुण महिला ॥३४४॥
 इंदधणु-फेण-बुब्बुयसमेसु भोगेसु दुरहिगंधेसु ।
 किं एएसु महायस ! कीरइ बहुदुक्खजणएसु ॥३४५॥
 बहुजोणिसयसहस्सा परिहिंडंती अहं अपरितंता ।
 इच्छामि दुक्खमोक्खं संपइ जिणदेसियं दिक्खं” ॥३४६॥
 एव भणिऊण सीया ववगयसोगा करेण वरकेसा ।
 उप्पाडइ निययसिरे परिचत्तपरिग्गहारंभा ॥३४७॥

मरगयर्भिगंगनिभे केसे ते पिच्छरुण पउमाभो ।
 मुच्छनिमीलियच्छे पडिओ धरणीयले सहसा ॥३४८॥
 जाव य आसासिज्जइ पउमाभो चंदणाइदव्वेहि ।
 ताव मुणि सव्वगुत्तो दिक्खियअज्जाण अप्पेइ ॥३४९॥
 जाया महव्वयधरी चत्तेक्कपरिग्गहा समियपावा ।
 मयहरियाए समाणं गया य मुणिपायमूलम्मि ॥३५०॥
 गोसीस-चंदणाइसु आसत्थो राहवो निरिक्खेइ ।
 सीयं अपिच्छमाणो रुद्धो आरुहइ मत्तगयं ॥३५१॥
 ऊसियसियायवत्तो सुललियधुव्वंतचामराजुयलो ।
 परिवारिओ भंडेहि नज्जइ इंदो व्व देवेहि ॥३५२॥
 अह भाणिउं पयत्तो "मह घरिणी विमलसुद्धचारित्ता ।
 देवेहि पाडिहेरं किं च कयं एत्थ वि सढेहि ॥३५३॥
 सीयं विलुत्तकेसिं जइ देवा मह लहुं न अप्पंति ।
 देवाण न देवत्तं करेमि सिग्घं न संदेहो ॥३५४॥
 को इच्छइ मरिउं जे कस्स कयंतेण सुमरियं अज्जं ।
 जो मज्झ हिययइट्ठं धरेइ पुरिसो तिहुयणम्मि ॥३५५॥
 जइवि य विलुत्तकेसी अज्जाणं तत्थ मज्झयारत्था ।
 तह वि य आणेमि लहुं वइदेहि संगयसरीरं" ॥३५६॥
 एयाणि य अन्नाणि य जंपंतो लक्खणेण उवसमिओ ॥
 पउमो नरवइसहिओ साहुसयासं समणुपत्तो ॥३५७॥
 सरयरविसरिसतेयं दट्ठुणं सयलभूसणं रामो ।
 ओयरियगयवराओ पणमइ तं चेव तिविहेणं ॥३५८॥
 सोऊण तस्स पासे धम्मं संवेगभाविओ रामो ।
 लक्खणसहिओ पत्तो जत्थइच्छइ साहुणी सीया ॥३५९॥
 रामेण तओ सीया दिट्ठा अज्जाण मज्झयारत्था ।
 सेयंबरपरिहाणा तारासहिय व्व ससिलेहा ॥३६०॥

एवंविहं निएउं संजमगुणधारिणीं पउमनाहो ।
 चित्तेइ “कह पवण्णा दुक्करचरियं इमा सीया ॥३६१॥
 एसा मज्झ भुओयरमल्लीणा निययमेव सुहललिया ।
 कह दुव्वयणचडयरं सहिही मिच्छत्तमहिलाणं ? ॥३६२॥
 जाए बहुप्पयारं भुत्तं चिय भोयणं रससमिद्धं ।
 सा कह लट्टमलट्टा भिक्खा भुंजिहिइ परदिण्णा ? ॥३६३॥
 वीणावंसरवेमं उवगिज्जंती उजासुहं सइया ।
 सा कह लहिही निहं संपइ फरुसे धरिणिवट्ठे ? ॥३६४॥
 सा बहुगुणगणनिलया सीलवई निययमेव अणुकूला ।
 परपरिवाएण मए मूढेणं हारिया सीया” ॥३६५॥
 एयाणि य अन्नाणि य परिचित्तेऊण तत्थ पउमाभो ।
 परमत्थमुणियकरणो पणमइ ताहे जणयधूयं ॥३६६॥
 तो भणइ रामदेवो ‘एकट्ठं चेव परिवसंतेणं ।
 जं चिय तुह दुच्चरियं कयं मए तं खमिज्जासु’ ॥३६७॥
 एवं सा जणयसुया लक्खणपमुहेहिं नरवरिदेहिं ।
 अभिवंदिया समाणी अहियं परितुट्ठहियएहिं ॥३६८॥
 अभिवंदिऊण सीयं लद्धासीसो य राहवो चलिओ ।
 भडचक्केण परिगओ संपतो अत्तणो भवणे ॥३६९॥
 सीया वि निकलंकं सामण्णं पालिऊण पज्जंते ।
 अणसणविहिणामरिउं संजाया अच्चुए इंदो ॥३७०॥
 अन्नभवे सीयाए वेगवईनामियाए लोणेण ।
 पूइज्जंतो दिट्ठो सुदंसणो नाम वरसाहू ॥३७१॥
 तो मच्छरेण तीए कहियं सव्वस्स तत्थ लोगस्स ।
 जह ‘एसो उज्जाणे महिलाए समं मए दिट्ठो’ ॥३७२॥
 ततो गामजणेणं अणायरो मुणिवरस्स आढत्तो ।
 तेण वि य कओ सिग्घं अभिग्गहो धीरपुरिसेणं ॥३७३॥

'जइ मञ्ज इमो दोसो फिट्टिहिइ अलज्जदुज्जणनिमित्तो ।
 तो होही आहारो' भणियं चिय एव साहूणं ॥३७४॥
 तो वेगवईए मुहं मूणंचिय देवयानिओगेणं ।
 भणइ तओ सा 'अलियं तुम्हाण मए समक्खायं' ॥३७५॥
 ततो सव्वो वि जणो परितुट्ठो मुणिवरस्स अहिययरं ।
 सम्माणपीइपमुहो जाओ गुणगहणतत्तिल्लो ॥३७६॥
 जं दाऊणऽववाओ विसोहिओ मुणिवरस्स कण्णाए ।
 तेण इमाए विसोही जाया अह जणयतणयाए ॥३७७॥
 दिट्ठो सुओ व दोसो परस्स न कयाइ सो कहेयव्वो ।
 जिणधम्माहिरएणं पुरिसेणं महिलियाए वा ॥३७८॥
 रागेण व दोसेण व जो दोसं संजयस्स भासेइ ।
 सो हिंडइ संसारे दुक्खसहस्साइं अणुहेतो ॥३७९॥
 एयं सीयाचरियं समासओ पउमचरियमज्झाओ ।
 अक्खायं वित्थरओ ततो च्विय नणु मुणेयव्वं ॥३८०॥
 एयं महासईए सीयाए कहाणयं सुणंताणं ।
 सीले निच्चलभावो होइ दढं मोक्खसोक्खं च ॥३८१॥

सीताकथानकं समाप्तम् ॥४९॥

साम्प्रतं नन्दाख्यानकं कथ्यते -

[५० नन्दाख्यानकम्]

अत्थित्थ जंबुदीवे भारहखेतस्स मज्झखंडम्मि ।
 रायगिहं नाम पुरं विभूसणं पुहइनारीए ॥१॥
 तत्थ य नियगुणनिज्जियसमत्थराओ पसेणईं राया ।
 तस्सऽत्थि सेणियाई पभूयकुमरा गुणसमग्गा ॥२॥
 ताण य परिक्खणत्थं 'को किल रज्जा रुहो ?' त्ति चिंताए ।
 एगत्थुवविट्ठाणं वरपायसपूरिए थाले ॥३॥

भोयणहेउं अप्पाविऊण मुंचावए तओ सुणहे ।
 दढसंकलबंधाओ अइछुहिए वग्घसारिच्छे ॥४॥
 ते आविते दट्टुं सव्वे वि हु उट्टिया लहुं कुमरा ।
 विट्टालणाभएणं न उट्टए सेणिओ नवरं ॥५॥
 पच्चासण्णयथालं उट्टियकुमरस्स संतियं घेतुं ।
 सुणगाणावंताणं पक्खिवई थोवथोवं तु ॥६॥
 जा ते तं खायंती ता सो वि हु भुत्तओ सुवीसत्थो ।
 तं दट्टुणं राया परितुट्ठो सेणियस्सुवरिं ॥७॥
 अन्नम्मि दिणम्मि तओ पच्चग्गकरंडए भरेऊण ।
 वरमोयगाण नवए घडए य तहा जलस्साऽवि ॥८॥
 नियमुद्दाए पुण मुद्दिऊण एक्केक्कयं कुमारणं ।
 अप्पेऊणं छूढा ओ वरगोसुं विभत्तेसुं ॥९॥
 भणिया य 'पुत्त ! एए भोत्तव्वा पाणियं च पायव्वं ।
 मुद्दाउ अभिदंतेहिं तह य छिदं अकाऊण' ॥१०॥
 न य केण वि तं भुत्तं सेणियकुमरो वि निययबुद्धीए ।
 परिचालेइ करंडं जेणं परिगलइ अवचुण्णं ॥११॥
 तं भुंजइ घडगस्स वि हिट्ठा कच्चोलयं ठवेऊणं ।
 पियइ परिगलियनीरं तं दट्टुं नरवई तुट्ठो ॥१२॥
 अण्णम्मि दिणे राया जाए उद्दित्तयम्मि जंपेइ ।
 'जो जं नीणइ कुमरो मह गेहा तस्स तं चेव' ॥१३॥
 सव्वे रयणाईयं कुमरा घेतुं वयंति महमोल्लं ।
 सेणियकुमरो वि तओ भंभं घेतुं विणिक्खंतो ॥१४॥
 तं दट्टुणं राया पुच्छइ 'किं भइ ! कड्डियं एयं ?' ।
 सो भणइ 'देव ! एसा रईणं रज्जसारत्ति ॥१५॥
 ढक्कासद्दवसेणं जम्हा हु पयाणयं नरेदाणं ।
 तेणं चिय रायाणो रक्खंति इयं पयत्तेणं' ॥१६॥

तो तुट्टो नरनाहो नामं सो कुणइ भंभसारो त्ति ।
 एवं परिविखरुणं कुमराणं देइ रज्जाइ ॥१७॥
 मोत्तुं सेणियकुमरं मा एए मारिहंति एयं तु ।
 एएणं चित्तेणं न पसायं देइ से किं पि ॥१८॥
 तो सेणिओ कुमारो अभिमाणेणं विणिग्गओ तत्तो ।
 वच्चंतो य कमेणं पत्तो बिण्णायडं नयरं ॥१९॥
 पविसंतो तत्थ तओ उवविट्टो भद्दसिट्ठिवीहीए ।
 तम्मिय दिणम्मि नयरे महूसवो जणसमाइण्णो ॥२०॥
 तत्थ य पभूयकइगा इति न सि ट्ठीपचारए जाव ।
 ता कुमरो पुडगाई लहुहत्थो बंधिउं देइ ॥२१॥
 एवं पभूयदव्वं कुमरपभावेण विढवियं तेण ।
 तुट्टो पुच्छइ सेट्ठी 'तुब्भे कस्सेत्थ पाहुणया ? ॥२२॥
 कुमरो वि भणइ 'तुब्भं' तो सेट्ठी चितए मणे "नूणं ।
 रयणायरो मह गिहे पत्तो नंदं विवार्हितो ॥२३॥
 दिट्टो सुविणम्मि मए रयणीए अज्ज सो इमो होही" ।
 इय चित्तिरुण भणिओ उट्टुह गेहम्मि वच्चामो ॥२४॥
 संवरिय तओ हट्टं गेहम्मि गया तर्हि च सविसेसं ।
 सव्वं ण्हाणार्इयं आइसइ इमो कुमारस्स ॥२५॥
 तत्तो वरवत्थजुयं परिहाविय भोयणं करावेइ ।
 एवं अक्खुण्णेणं अच्छंतो अण्णदियहम्मि ॥२६॥
 नंदं उवट्टवेउं सो भणिओ सेट्ठिणा 'जहा वच्छ ! ।
 परिणेहि इमं कण्णं अम्हुवरोहेण गुणकलियं' ॥२७॥
 सो जंपइ 'ताय ! 'कहं अन्नायकुलस्स देसि मे धूयं ?' ।
 सो जंपइ 'तुज्झ कुलं गुणेहिं विमलेहिं मे कहियं' ॥२८॥
 तो पडिवज्जिय कुमरो तव्वयणं परिणिउं तयं नंदं ।
 पंचप्पयारभोए भुंजंतो अच्छए तत्थ ॥२९॥

तं सव्वं नरवइणो सविसेसं अक्खियं चरनरेहिं ।
सोउण तयं राया सुत्थो नियमाणसे जाओ ॥३०॥
अह अन्नया नरिदो आयंके दारुणे समुप्पण्णे ।
नियआउयस्स अंतं जाणित्ता पेसए लेहं ॥३१॥
“सिरिजिणमुणिणो नमिउं रायगिह्वाओ पसेणई राया ।
बिण्णायडम्मि कल्लणभायणं सेणियकुमारं ॥३२॥
आइसइ सिग्घमेव य आगंतव्वं पलोइउं लेहं” ।
वरियारूढा सचिवा गंतुं लेहं पणामिति ॥३३॥
गहियत्थेणं कुमरेण जंपिया सा पिया जहा “भदे ? ।
पंडरकुड्ढा अम्हे गोपाला रायगिहनयरे ॥३४॥
जइ अम्हेहिं कज्जं आगंतव्वं तओ तए तत्थ” ।
इय अक्खरा विलिहिउं अप्पिय तीए चडइ वरियं ॥३५॥
रायगिहं संपत्तो तं दट्ठुं हरिसिओ मणे राया ।
अहिंसिचिय तं रज्जे घेत्तूणं अणसणं तत्तो ॥३६॥
पंचनमोक्कारपरो चउसरणगओ समाहिणा मरिउं ।
संपत्तो सुरलोए इमो विजाओ महाराया ॥३७॥
एतो च्चिय सा नंदा गब्भवई चेव भत्तुणा मुक्का ।
परिवड्ढंते गब्भे संजाओ डोहलो तीए ॥३८॥
‘जइ नीसेसजणाणं करिवरखंधट्टिया विभूर्इए ।
कुणमाणी उवयारं अभयपयाणं पयच्छामि’ ॥३९॥
विण्णविउं रायाणं दोहलयं तीए पूरए सेट्ठी ।
पडिपुण्णेषु दिणेषु पसवइ वरदारयं एसा ॥४०॥
सव्वंगसुंदरंगं जणमण-नयणाभिरमयं कंतं ।
वद्धावणयमहूसवमाइसइ सुतुट्ठुओ सेट्ठी ॥४१॥
वत्ते वद्धावणए बारसमदिणम्मि गोण्णमह नामं ।
दोहल अणुसारेणं अभयकुमारो त्ति से ठवियं ॥४२॥

१. सं.वा.सु. अप्पइ ॥ २. ला. रायगिहे ॥ ३. ला. °ओ तओ राया ॥ ४. सं.वा.सु. तत्तो ॥ ५. ला. वित्ते ॥

एवं सो वडुंतो कमेण अह अट्टवरिसिओ जाओ ।
 बाहत्तरीकलाओ साइसयाओ य गहियाओ ॥४३॥
 एत्थंतरम्मि समवयडिभेहिं समं कहिं चि कलहंतो ।
 वुत्तो एक्केणं सो डिंभेणं रोसभरिएणं ॥४४॥
 'रे रे ! किं तं जंपसि जस्स तुहं नज्जए न जणओ वि' ।
 अभएण वि पडिभणिओ 'पाव ! न जाणासि किं भद्दं' ॥४५॥
 सो भणइ 'मुद्ध ! भद्दो तुह जणणिपिया तुमं पुणो अण्णं ।
 जाणेहि किं पि जणयं' इय भणिए संकिओ अभयो ॥४६॥
 पुच्छइ जणणि 'को मह पिया ?' इमा दायए तओ सेट्ठि ।
 सो भणइ 'एस तुब्भं जणओ महसंतियं कहसु' ॥४७॥
 तो अंसुवायपुव्वं नंदा जंपेइ "पुत्त ! केणाऽवि ।
 देसंतरागएणं परिणीया सो वि मं मोत्तुं ॥४८॥
 गम्भट्टियम्मि तुमए कहिं पि पुरिसेहिं दंसिए लेहे ।
 वरियाए आरुहिउं कत्थ वि य गओ न याणामि" ॥४९॥
 अभएण पुणो पुट्टा 'किमंब ! जंतेण जंपियं किं पि ?' ।
 सा अक्खराइं दरिसिय भणइ 'इमं विलिहियं किं पि' ॥५०॥
 अभओ वि हु भावत्थं नाउं तुट्ठो पयंपई 'अम्मो ! ।
 मज्झ पिया नरनाहो रायगिहे तत्थ वच्चामो' ॥५१॥
 सा भणइ 'पुच्छ सिट्ठि' पुट्ठे गहिऊण सो वि भावत्थं ।
 सामगियं विहेउं विसज्जए ताणि तो तुरियं ॥५२॥
 रायगिहे पत्ताइं जणणि मोत्तूण बाहिरुज्जाणे ।
 सयमप्पपरीवारो अभओ पविसरइ नयरम्मि ॥५३॥
 एत्तो य सेणिएणं एक्केणूणाइं पंच उ सयाइं ।
 मंतीण मेलियाइं पहाणमंति गवेसेइ ॥५४॥
 तस्स परिक्खणहेउं सुक्कयकूवम्मि तेण पक्खत्तं ।
 निययं मुद्दारयणं पभणइ य "तडट्ठिओ जो उ ॥५५॥

गिण्हइ इमं करेणं सो मह सव्वुत्तमो हवउ मंती' ।
 इय सोउं सव्वो वि हु लोगो तं इच्छए घेतुं ॥५६॥
 बुद्धिविगलत्तणाओ जाव न सक्केइ कोवि तं गहिउं ।
 ताव य तत्थ पएसे संपत्तो पुच्छए अभओ ॥५७॥
 'किं एयं ?' तेहिं तओ सिट्ठे सव्वम्मि तस्सरूवम्मि ।
 जंपइ 'किं नवि गिण्हह ?' भणंति ते 'जं न सक्केमो' ॥५८॥
 'गिण्हामि अहं' अभएण जंपिए ते भणंति गिण्हहि ।
 तो गोमएण अभओ उवरिं आहणइ तं मुदं ॥५९॥
 तणपूलयअग्गीहिं सुक्कविउं सारणीए उदएणं ।
 भरिऊण तयं कूवं तरमाणं गिण्हए सहसा ॥६०॥
 तो आरक्खियपुरिसा गंतुं सव्वं निवस्स कहयंति ।
 सो वि यं अभयकुमारं आणावइ अप्पणो पासे ॥६१॥
 तो राएणं पुट्ठो 'वच्छ ! तुमं आगओ कओ इहइं' ।
 'बिण्णायडनयराओ पत्तोऽहं' भणइ अभओ वि ॥६२॥
 तो जंपइ नरनाहो 'अवि जाणसि तत्थ भद्दसेट्ठिति ।
 नदं च तस्स धूयं ?' सो जंपइ 'देव ! जाणामि' ॥६३॥
 उल्लवइ निवो 'तीसे किं जायं ?' सो कहेइ 'पहु ! पुत्तो' ।
 'किं तस्स कयं नामं ?' 'अभयकुमारो' त्ति सो भणइ ॥६४॥
 'केरिसओ सो ! साहसु के च गुणा तस्स ?' जंपिए रण्णा ।
 सो भणइ 'ममं दट्ठुं पच्चक्खं मुणसु तं चेव' ॥६५॥
 इय एवमाइउत्तरपच्चुत्तरसंकहाए खणमेक्कं ।
 चिट्ठित्तु अभयकुमारो अप्पाणं अह पयासेइ ॥६६॥
 तो सुयसिणेहपसरंतवाहजलपूरपुण्णयणिल्लो ।
 ठविऊणं उस्संगे अग्घायइ मत्थए कुमरं ॥६७॥
 'कुसलेण तुज्झ माया पुत्त ! ऽच्छइ ?' पुच्छिए तओ भणइ ।
 'ताय ! बहिं उज्जाणे कुसलेणं अच्छए एत्थ' ॥६८॥

तं सोऊण ससंभमसिणेहरसपसरजायरोमंचो ।
 आणवइ 'लहु पवेसह महाविभूर्इए देवि' ति ॥६९॥
 तो पगुणा सामग्गी जाव कया ताव जाइ अभओ वि ।
 जणणीपासे तं पुण पिच्छइ कयफारसिंगारं ॥७०॥
 जंपइ "पवसियभत्तारयाउ अम्मो ! नरिंदपत्तीओ ।
 जाव न दिट्ठो भत्ता न ताव कुर्व्विति सिंगारं ॥७१॥
 ता झ त्ति पवसियपई वेसं विरएहि जेण बलकलिओ ।
 एसाऽऽगच्छइ ताओ अम्मोगइयाइ तुम्हाणं" ॥७२॥
 ता पुत्तसमाइट्टं जाव कयं तीए ताव नरनाहो ।
 संपत्तो दिट्ठा सा पवेसए महविभूर्इए ॥७३॥
 पंचाऽमच्चसयाणं अभयकुमारं पि सामियं ठविउं ।
 नंदाए समं भोगे भुंजइ निच्चितओ राया ॥७४॥
 ततोपाए अभए असरिसनियबुद्धिजायमाहणो ।
 जणणीए समं जाओ तियसाण वि पायडो लोए ॥७४॥
 नंदा-ऽभयाण य गुणा पुव्वं चिय वण्णिया मए किंचि ।
 चरियं पि थोवथोवं कहियं अण्णण्णचरिएसु ॥७५॥

नन्दाख्यानकं समाप्तम् ॥ ५०॥

साम्प्रतं भद्राख्यानकम्-

[५१. भद्राख्यानकम्]

अत्थि इहेव जंबुद्दीवे दीवे भारहे वासे कायंदी नाम नयरी, तत्थ य जियसत्तू नाम
 राया । तत्थ य भद्दा नाम सत्थवाही, उवरय-भत्तुया धण्णयाहिहाणबालपुत्तया
 समत्थमहायणप्पहाणा, जियसत्तुस्स बहूसु कज्जेसु पुच्छणिज्जा, अवि य-

अट्टा य अपरिभूया विच्छड्डियविउलभत्तवरपाणा ।
 आओगसंपउत्ता पओगकलिया धणसमिद्धा ॥१॥
 सयलनयरीपहाणा रण्णो वि हु पउरकज्जपुच्छणिया ।
 उस्सुंका मुक्ककरा अविचलसम्मत्तसंजुत्ता ॥२॥

अहिगयजीवा-जीवा पंचाणुव्वय-गुणव्वयसमग्गा ।
 सिक्खावओववेया जिणमुणिपयकमलवरभसली ॥३॥
 दीणाइदाणपउरा पूइयजिणसमण-समणिवरसंघा ।
 किं बहुणा ? तियसेहिं वि माणिज्जइ सा सयाकालं ॥४॥
 तीए य धण्णनामो बाहत्तरिकलवियक्खणो पुत्तो ।
 जणणीनिक्खत्तभसे बहुविहकीलार्हि उवललइ ॥५॥
 उत्तत्तकणर्यपिगप्पहारिं उत्तुंगथोरथणयार्हि ।
 भज्जाहिं सह रमतो चिट्ठइ दोगुंदुगु व्व सुरो ॥६॥

अण्णया य कयाई तं तारिसं रिद्धिवित्थरं रायसम्माणं च असहमण्णेहिं
 अट्टारससेणिप्पसेणीसमण्णिण्णहिं चितियं महायणपउरेहिं, अवि य-

“एसा हु सत्थवाही भद्दा अम्हाण उक्कडा एक्का ।
 रायस्स वि गोरव्वा पराभवो एस अम्हाणं ॥७॥
 ता होउ समकरेसा नयरीओ वा बहिं विणिस्सरउ” ।
 इय चित्तिऊण तेहिं विण्णत्तो नरवई एवं ॥८॥
 ‘कीरउ देव ! पसाओ सत्थाही होउ समकरा अम्हं ।
 अहवा वि हु निग्गच्छउ नयरीओ किं च बहुएण ?’

एवं च महायणेण विण्णत्ते चितियं राइणा ‘हंत ! कहं एक्काए कारणेण समत्थनयरिं
 दूमेमि ?’ त्ति चित्तितेण भणियं ‘जहा तुम्हाणं संतोसो भविस्सइ तहा करिस्सामि’ त्ति ।
 भणिरुण विसज्जया । तत्तो भद्दा हक्कारिऊण भणिया राइणा जहा ‘भदे ! न
 महायणविरोहेण खणमेक्कं पि अच्छिउं पारेज्जइ, ता महायणेण समकरा भवाहि, नयरीओ वा
 निग्गच्छहि तओ भद्दा ‘जं देवो आणवेइ’ त्ति भणंती गया नियगेहं, चित्तिउं पयत्ता, अवि
 य-

“हंत ! जइ समकराऽहं भवामि तो माणखंडणं गरुयं ।
 इयरह नयरीमज्जे न दिंति वासं इमे लोया ॥१०॥
 ता पुव्वसंगईयं देवं सुमरामि किं च बहुएण ?” ।
 इय चित्तिऊणमच्छइ पोसहसालं वियालम्मि ॥११॥

तओ पुव्वसंगइयदेवस्साराहणट्टयाए पोसहं गिण्हऊण तं देवं मणसीकरेमाणी चिट्ठइ,
ताव य समागओ सो पुव्वसंगइओ देवो, अवि य-

ललियाभरणविभूसियदेहो नियतेयपयडियदिसोहो ।

दिव्वंगवत्थधारी समागओ तक्खणं तियसो ॥१२॥

भणियं च तेण 'भद्दे ! किं निमित्तमहं सुमरिओ ?' भद्दा वि तं दट्टूण हट्टुत्तुट्ठा
भणइ, अवि य-

भद्द ! इमं मम भवणं नयरीओ नेहि बाहिरुद्देसे ।

सो वि तयं पडिवज्जिय उप्पाडइ तीइ तौ भवणं ॥१३॥

विउलम्मि चच्चरम्मी ते मुत्तुं पुरिबहिं तदब्भासे ।

कुणइ महापासायं सोलसविहरयणनियरेहिं ॥१४॥

नियकरपभारेणं उज्जोयंतं समत्थदिसियक्कं ।

कणयखचियंतकम्मं रूवयसयसंकुलमुयारं ॥१५॥

पंचविहविसयसाहणसमग्गसामगियाउलं दिव्वं ।

वरपुण्णुकुरुडं पिव मन्ने धन्नस्स पच्चक्खं ॥१६॥

अन्नं च कीलणसहं धेन्नकुमारस्स कुणइ आरामं ।

सव्वोउयफल-फुल्लोवरेहिरं लोगविम्हयणं ॥१७॥

एवं कारुण भद्दं च संभासिऊण गओ तियसो ।

पभाए य तं तारिसमच्चब्भुयं दट्टूण नरनाहप्पमुहो सयललोगो भणित्तं पवत्तो अवि य-

“एक्क च्चिय वरधण्णा भद्दा इह जियइ जीवलोगम्मि ।

जणजणियचमक्कारो एरिसओ अइसओ जीए ॥१८॥

अहह ! कहमपुण्णेहिं खलीकया इय महासई एसा ।

अम्हे वि पुण्णभाई जं न इमीए खयं नीया” ॥१९॥

तओ एवं साहुक्कारमुहलो गओ सव्वो वि जणवओ नरवइसणाहो भद्दं खामित्तं
पयत्तो, अवि य-

‘खमसु महासइ ! इण्हं जं अवरद्धं अयाणमाणेहिं ।

तुम्हारिसीउ जेणं कुणंति पणयाण कारुण्णं’ ॥२०॥

इय भणिया सा भद्दा नीसेसजणस्स काउमुवयारं ।
जंपइ न मज्झ कोवो तुम्हाणुवरिं मणे अत्थि ॥२१॥

तो भद्दा चरियपसंसणमुहरो गओ सव्वो वि लोगो नियनियघरेसु । धन्नयकुमारो
वि तत्थ पासायवडिसए संपज्जंतसयलसमीहियविसओवभोगसामग्गीकलावो अच्चुब्भ-
डरूवजोव्वणलायणवणसंपुण्णघरिणीवंदमज्झगओ उदारभोगे भुंजंतो चिट्ठइ ।

अण्णया कयाई समोसढो भयवं वद्धमाणसामी तित्थयरो विणिम्मियं तियसेहिं
समोसरणं निग्गओ विसेसुज्जलनेवत्थो समत्थलोगो । तं च दट्ठूण किमेयं ? ति पुच्छियं
कुमारेण । साहियं कंचुइणा, अवि य-

‘पणयसुरा-ऽसुरमणिमउडगलियमंदारचारुमालाहिं ।
सययच्चियकमवीढो समोसढो वद्धमाणजिणो’ ॥२२॥

तं सोउं बहलुब्भिज्जमाणरोमंचकंचुओ धण्णो ।
भणइ ‘जिणवंदणत्थं वच्चामि करेह सामग्गि’ ॥२३॥

तो रहवरमारूढो पत्तो तित्थयरपायमूलम्मि ।
ओयरिय रहवराओ वंदइ परमेण विणएण ॥२४॥

उवविट्ठो सट्ठाणे भयवं पि हु महुरदुंदुहिनिनाओ ।
अह अद्धमागहीए भासाए कहइ नियधम्मं ॥२५॥

अवि य-

पडिवज्जह पंच महव्वयाइं । तत्थ य पढमं सव्वपाणाइवायवेरमणं, तं च
अहिंसाए परिपालिज्जइ, जा य भीयाणं पिवसरणं, समुद्दमज्झे व पोयगहणं, चउप्पयाणं
व आसमपयं, दुहदियाणं व ओसहिबलं, अडविमज्झे व सत्थगहणं, एत्तो वि विसिट्ठतरिया
अहिंसा, जा य पुढवि-दग-अगणि-मारुय-वणप्फइ-बीय-हरिय-बि-ति-चउरिंदिय-जलयर-
थलयर-खहयर-तस-थावरसव्वभूयखेमकरी, एसा भयवई अहिंसा जा अणंतनाण-दंसणधरेहिं
सीलगुण-तव-संजमनायगेहिं तित्थयरेहिं सव्वजगजीववच्छलेहिं तिलोगमहिएहिं सुट्ठु दिट्ठ
ओहिजिणेहिं उजु-विउलमईहिं विण्णयाया, पुव्वधरेहिं य विइया, आमोसहि-विप्पोसहि-
खेलोसहि-जल्लेसहिपत्तेहिं फासिया, खीरासव-महुयासव-अमयासवेहिं चारणविज्जाहरेहिं य
वण्णिया, चउत्थभत्तियजावच्छम्मासिएहिं अंत-पंतलूह-अण्णायचरएहिं सेविया, अकं-डुयण-
आयावण-अणिच्छुभणकरेहिं धूयकेस-मंसरोम-नखेहिं सव्वहा परिकम्मविप्पमुक्केहिं

समणुचिण्णा, जे ते निच्चं सज्झायज्झाणरया पंचमहव्वयचरित्तगुत्ता समिया समीसु छव्विहजगजीववच्छला निच्चमप्पमत्ता एएहिं य अण्णेहिं य जा सा अणुपालिया भयवई इमं च पुढवि-दग-अगणि-मारुय-तरुगण-तस-थावरसव्वजगजीवदयट्टाए सुट्टु उच्छुं गवेसियव्वं, नवकोडीपरिसुद्धं न तिगिच्छामंत-मूल-भेसज्जकज्जहेउं, न लक्खणुप्पाय-जोइसनिमित्तं न वि गारव-पूयणट्टाए, तवनियमट्टयाए भिक्खं गवेसियव्वं । इमं च सुद्धं नेयाउयं अकुडिलं सव्वदुक्खपावाण विओसमणं पाणाइवायवेरमणं । तस्स रक्खवणट्टा जुगमेत्तंतराए दिट्ठीए इरियव्वं, कीड-पयंग-तस-थावर-हरियपरिवज्जएण सव्वपाणाणं हिंसण-निंदण-गरिहण-छिंदण-वहणाणि वज्जणिज्जाणि । एवं इरियासमिईए भाविओ भवइ अप्पा बीयं च मणेण पावएण अहमं दारुणं निस्संसं वह-बंध-परिकिलेसबहुलं भय-मरण-किलेससंकिलिट्ठं न कयाई पावयं किंचि समायरियव्वं, एवं मणसमिओ भवइ । तइयं च वईए पावियाए न कयाई पावयं किं चि भासियव्वं । चउत्थं आहारएसणाए सुद्धं अणाए अगट्ठिए अगिद्धे अदीणे अविमणे अकलुसे अविसाई अपरितंतजोगी भिक्खु समुदाणेऊणं उच्छुं गुरुजणस्स पासं गमणागमणाइयाण पडिक्कंते नट्टचलियवलियाइवज्जियं आलोइत्ता पुणरवि अणेसणाए पयए पडिक्कमेत्ता सुहनिसण्णे मुहुत्तमित्तं च ज्ञाण-सज्झायगोवियमणे सद्धासंवेगनिब्भरमणे उट्टेऊण हट्टुट्टे जहारायणियं निमंतइत्ता भावउदिण्णे गुरुजणेणं उवविट्टे पमज्जिऊण ससीसं कायं अमुच्छिए अतुरियं अपरिसाडियालोयभायणे ववगयसंजोगिगालधूमं णाणुलेवणभूयं भोत्तव्वं । पंचमं पीढ-फलग-सेज्जा-संधारवत्थ-पाय-कंबल-रयहरण-मुहपोत्तियाइयं एयं पि संजमस्स उववूहणट्टयाए रागदोसरहियं उवकरणं परिग्गहियव्वं, पडिलेहणपमज्जणाणि य अहो य राओ य अप्पमत्तेण सययं उवकरणस्स कायव्वाणि, एवं करंतेण अहिंसा संपुण्णा पालिया होइ । तं च तित्थयरमुहविणिग्गयं जइधम्ममायण्णिऊण समुट्ठिओ धण्णओ, वंदिऊण भयवंतं भणइ-जाव जर्णाणि आपुच्छामि ताव तुम्ह पायमूले पव्वज्जागहणेणं करिस्सामि सफलं मणुयत्तणं ति भणिऊण गओ जणणिसमीवे पायग्गहणं च काऊण भणिउमाढत्तो जहा 'अम्मो ! अज्ज मए समणस्स भयवओ महावीरस्स अंतिए धम्मो निसओ' तीए भणियं 'पुत्त ! सोहणं कयं' । तेण भणियं 'जइ एवं ता अहं संसारभउव्विग्गो समणस्स अंतिए पव्वइउमिच्छामि' । तओ तमणिट्टमसुयपुव्वं वयणमायण्णिऊण परसुनियत्तिय व्व चंपयलया, निव्वत्तमहि व्व इंदलट्ठी विमुक्कसंधिबंधणा सव्वंगेहिं धस ति धरणीयलं सन्निवडिया । तओ वाउदाणाईहिं समासत्था विलविउं पयत्ता, "तुमं सि णं जाया मज्झ एगे पुत्ते इट्ठे कंते पिए मणुण्णे भंडकरंडगसमाणे उंबरपुप्फं पिव दुल्लहे सवणयाए, किमंग पुण पासणयाए ? ता चिट्ठाहि

ताव जाव अहं जीवामि” । धण्णएण भणियं ‘एवमेयं किंतु माणुस्सए भवे अधुवे असासए वसणसउवद्वाहिभूए विज्जुलयाचंचले संझभरायसरिसे जलबुब्बुयसमाणे कुसग्गजलबिंदुचंचले सुविणगदंसणोवमे सडण-पडण-विद्धंसण-धम्मे, ता को जाणइ के पुर्व्वि गमणाए ? के पच्छगमणाए ?’ भद्दाए भणियं ‘जइ एवं ता अणुहोहि जाव जा एयं इद्धिसक्कारसमुदयं, अणुभुंजाहि य एयाओ कुलबालियाओ’ । तेण भणियं ‘अम्मो ! एवमेयं, किंतु दव्वं रया-इसाहारणं अणेगपच्चवायबहुलं खणदिट्टनट्टं, कामा वि असुइणो वंत-पित्त-मुत्त-खेल-सुक-सोणियसमुब्भवा, एत्थ वि सविवेयविण्णाणाणं न किंचि पडिबंधट्टाणं’ । भद्दाए भणियं पुत्त ! जुत्ता पव्वज्जा परं दुक्करा, जओ तिकखं चंकमियव्वं गरुयं लंबे यव्वं, असिधारवयं चरियव्वं, महासमुद्दो इव भुयाहि तरियव्वो, गंगा इव महानई पडिसोयं गंतव्वा, जवा लोहमया इव चावेयव्वा, किं च—नो कप्पइ निग्गंथाणं समणाणं आहाकम्मिए इ वा उद्देसिए इ वा कीए इ वा चइए इ वा रइए इ वा दुब्भिकखभत्ते इ वा वद्दलियाभत्ते इ वा गिलाणभोयणे इ वा बीयभोयणे इ वा हरियभोयणे इ वा फलभोयणे इ वा, तहा उच्चावया गामकंटया सहियव्वा, लोओ य दारुणो कायव्वो, इच्चाइ सव्वं दुक्करं, तुमं पुण सुहलालिओ न सक्किहिसि काउं” धण्णेण भणियं - ‘सव्वमम्मो ! दुक्करं कीवस्स कायरस्स, नो चेव णं धीरस्स महासत्तस्स कयववसायस्स, ता अम्मो ! मा करेहि विबंधं’ । तओ सा जाहे नो संचाएइ धारेउं ताहे अकामया चेव महाविच्छड्डेण निक्खमणं करेइ । पुरिससहस्सवाहिणिं सीयं समारुहिऊण गओ भयवओ समीवं । तओ सा भद्दा धण्णकुमारं पुरओ गविऊण एवं वयासी-‘भयवं ? मम एस एगे पुत्ते पाणप्पिए भीए जम्मण-मरणाणं, निव्विण्णे णं संसारवासस्स इच्छइ भयवओ समीवे पव्वइत्तए, तं भयवओ सीसभिकखं पयच्छमि, पडिच्छउ भयवं सीसभिकखं’ । भयवं पि सम्मं संपडिच्छइ । तओ सो धण्णो कुमारो उत्तरपुरत्थिमं दिसिभायमवक्कमइ, सयमेव आभरणमल्ललंकारं ओमुयइ । तए णं सा भद्दा सत्थवाहिणी हंसलक्खणेणं पडगसाडएणं तं आभरणमल्ललंकारं रोवमाणी कंदमाणी विलवमाणी हार-वारिधार-सिंदुयार-छिण्णमुत्तावलिप्पगासाइं अंसूणि विमुयमाणी पडिच्छइ । तए णं से धण्णे सयमेव पंचमुट्ठियं लोयं करेइ । तओ सा भद्दा एवं वयासी जइयव्वं जाया ! परक्कमियव्वं जाया ! अस्सि चणं अट्टे णो खणमवि पमाएयव्वं, अम्हं पि य णं एस चेव निज्जाणमग्गो भवउं’ ति कट्टु जामेव दिसं पाउब्भूया तामेव दिसंपडिगया । सो वि धण्णो भयवया सयमेव दिक्खिओ महाअणगारो जाओ । इरियासमिओ भासासमिओ एसणासमिओ आयाणभंडमत्तनिक्खेवणासमिओ उच्चारपासवणखेलसिघाण-जलपारिद्धावणियासमिओ जद्विसं च णं पव्वइओ तद्विसं च णं इमं एयारूवं अभिग्गहं

गिणहइ-कप्पइं मे जावज्जीवं छट्टं छट्टेणं अणिकखेत्तेणं तवोकम्मेणं उड्डं बाहार्हिं सूरभिमुहस्स आयावणभूमीए आयावितए, पारणगए वि उज्झियधम्मएणं पारावित्तए त्ति कट्टु अभिग्गहं गिणहइ । तेणं च अनिकखत्तेणं तवोकम्मेणं सुक्के भुक्खे निम्मंसे किडिकिडियाभूए अट्टिपंजरावसेसे किसे धवणिसंतए अवचिए मंससोणिएणं उवचिए तवोतेएणं भासरासिपलिच्छण्णहुयासणो व्व जाए ।

तओ भयवं कायंदीओ बहियाजणवयविहारं विहरमाणो जेणेव रायगिहे तेणेव उवागच्छइ । तहेव समोसरणं । सेणिओ सपरिसो धम्मं सोच्चा सगिहं पट्टिओ । अंतराले य पेच्छइ धण्णमणगारं, वंदित्ता सहरिसं जेणेव समणे भगवं महावीरे तेणेव उवागच्छइ, उवागच्छित्ता पुच्छइ 'इमीसे णं भंते ! महइमहालियाए इसिपरिसाए मज्झे को दुक्करगारओ ?' त्ति । तए णं समणे भयवं महावीरे एवं वयासी 'जहा णं सव्वे दुक्करगारया, परं संपयं विसेसेणं धण्णे दुक्करगारए' । तए णं से सेणिए भयवओ अंतिए एयमट्टं सोच्चा निसम्म हट्टुट्टे तिपयाहिणं काऊण धण्णं अणगारं वंदइ नमंसइ, वंदित्ता नमंसित्ता जेणेव सए गेहे तेणेव उवागच्छइ । धण्णो वि नियआउक्खयं नाऊण कयसंलेहणाकम्मो पाओवगमणं पडिवज्जित्ता अणसणविहिणा कालगओ सव्वट्टिसिद्धे महाविमाणे तेतीससागरेवमाऊ देवो समुप्पणो । तओ चुओ महाविदेहे सिंज्झिहि त्ति ।

एवं सा किर भद्दा सीलवई सयलगुणगणसमग्गा ।

सव्वत्थ वि क्खा(खा)यजसा तियसाण वि पायडा जाया ॥२६॥

भद्राख्यानकं समाप्तम् ॥५१॥

इदानीं मनोरमाऽऽख्यानकमाख्यायते-

[५२. मनोरमाख्यानकम्]

अत्थि इहेव जंबुद्दीवे दीवे भारहे वासे अच्चब्भुयगुणगणाहारा चंपा नाम नयरी । तत्थ य सयलनरिंदचक्कचूडामणी दहिवाहणो नाम राया । तस्स य सयलंतैउरप्पहाणा अभया नाम महादेवी, अवि य-

जा रूवं-जोव्वणेहिं सोहग्गेणं कलाकलावेणं ।

नीसेसतिहुयणं पि वि मण्णइ तिण-तूलसारिच्छं ॥१॥

इओ य अत्थि तत्थ नयरीए सयलमहायणप्पहाणो उसभदासो नाम सेट्टी । तस्स य जिणप्पहुप्पणीयपवरपवयणप्पभासियपहाणधम्माणुट्टाणपरायणा अरिहदासी नाम भारिया ।

ताणं च सुभगो नाम महिसीरक्खगो । सो य अन्नया कयाई पभायसमएमहिसीओ गहाय अडविं गओ पडिनियत्तं-तेण एगत्थपएसे निरावरणो पावरणवज्जिओ माहमासे वियालवेलाए काउस्सग्गसंठिओ दिट्ठो महातवस्सी, तं च दट्टुण चितियमणेण, अवि य-

‘धण्णो एस महप्पा जो एवं चिट्ठिही सयलरर्यणि ।

एवंविहम्मि सीए अप्पावरणो निरावरणो’ ॥२॥

इय चित्तंतो सुभगो गेहम्मि गओ पुणो वि रयणीए ।

सरिऊण तयं साहुं धणियं चिताउरो होइ ॥३॥

तओ अप्पभाए चेव महिसीओ गहाय गओ साहुसमीवं । दिट्ठो तहट्ठिओ चेव । तओ भत्तिब्भरनिब्भरंगो पज्जुवासंतो चेव जाव चिट्ठइ ताव उग्गओ अंसुमाली । साहू वि ‘नमो अरहंताणं’ ति भणंतो समुप्पइओ तमालदलसामलं गयणयलं । सुभगो वि तं नमोक्कारपयं ‘आगासगामिणी महाविज्जा एस’ ति मण्णमाणो सम्मं पढइ उच्चिट्ठुकाले वि न मुंचइ । तओ भणिओ सेट्ठिणा ‘भद्द ! कहिं तए एयं भवसमुद्दनिब्बुड्डुमाणजंतु-संताणतारणवरपवहणं पंचपरमेट्टिनमोक्कारस्स पयं पावियं’ ? तेण वि कहियमसेसं तओ सेट्ठिणा भणियं “भद्द ! न केवलमेयमागासगमणकारणं किंतु समत्थकल्लण कारणनिबंधणो एस परमेट्टिनमोक्कारो, जओ-

जं किंचि एत्थ भवणे दीसइ मण-नयणहारयं वत्थु ।

तं सव्वं पि वि लब्भइ जिणनवकारप्पभावेणं ॥४॥

जाइं काइं संसारियाइं सोक्खाइं जीवलोगम्मि ।

सव्वइं ताइं जाणसु जिणनवकारप्पभावेणं ॥५॥

एयस्स पभावेणं लहंति जीवा अणोवमं रिद्धि ।

पुत्त-कलत्ताइयं सव्वं पि हियच्छियं होइ ॥६॥

एयस्स पभावेणं हवंति रयाहिराइणो पुरिसा ।

बल-केसव-वज्जहरा तिलोगसामी जिणिदा वि ॥७॥

इय कित्तियं च भण्णइ परमेट्ठीणं थुईय माहप्पं ।

जम्हा सव्वं भणित्तं जइ पर तित्थंकरो तरइ ॥८॥

ता सुंदरं खु एयं भद्द ! तए पावियं परं किंतु ।

परमगुरूणं नामं न हु उच्चिट्ठेहिं घेत्तव्वं” ॥९॥

तेण वि भणियं 'सामिय ! खणं पि एयं चएमि नो मोतुं' ।

सेट्टी वि भणइ "भदय ! जइ एवं गिण्ह तो सव्वं ॥१०॥

जेण इमाओ जायइ कल्लणं एत्थ अण्णजम्मे वि' ।

इय भणिओ सो तुट्ठो पढइ असेसं पि नवकारं ॥११॥

एवं च तस्स पंचनमोक्कारपरावत्तपरायणस्स वच्चंति जाव केइ दिवसा ताव समागओ पाउससमओ । तत्थ य कलिकालि व्व आपूरियं अंबरतलं मिच्छादंसणपडलेहिं अइकसिणबहलेहिं जीवसरूवं व तमालकालजलयनिवहेहिं, जलियकोवानलपसारिय-गरुयजालाहिं व समंतओ विप्फुरियं सोयामणिलयाहिं, अयंडकुवियपयंडखलयणविसंखलु च्छलियपेसुनयरवो व्व उल्लसिओ गज्जियरवो, दुत्थियजीवसंघाय व्व विरडंति ददुरसंघाया, मलिणजणुण्णइदंसणदूमिया सुयण व्व पणस्संति रायहंसा, खलाणं व पयइमलिणाणं बरहीणवियंभिओ कवडेण व कोमलो केयारवो, रणरोसुब्भडसुहड व्व जलया मुंचंति धारानिवहं, कुलडाउ व्व उभयकूलपाडणपराओ अंतो कलुसाओ कुडिलगइगमणाओ नीयाणुव्वत्तिणीओ पलोट्टाओ सरियाओ ।

उब्भिन्ननवतणंकरनिरंतरं इंदगोवयाइण्णं ।

वेरुलियगब्भमरगयघडियं पिव जत्थ भूवीढं ॥१२॥

गहिउग्गविज्जुदंडो कालो कालो व्व जत्थ घणनिवहो ।

मारेइ विरहिणीओ गज्जंतो गरुयसद्देणं ॥१३॥

नूमइ सूरु सूरु व्व जत्थ लज्जाए अत्तणो रूवं ।

पेच्छंतस्स वि निहया जं नलिणिपिया जडेणावि ॥१४॥

एवंविहे य पाउससमए सो सुभगो महिसीओ गहाय गओ अडवीए । पुणो वियालवेलाए पयट्ठो सगिहाभिमुहं । अवंतरालेय पूरेण समागया महानई दिट्ठा सुभगेण । तओ तं पासिय मणागं भयभीओ । एत्थंतरम्मि य अद्धपविट्ठाओ परकूले अन्नखेत्तम्मि महिसीओ । तओ नवकारं पढंतेण दिण्णा झड त्ति झंपा नईए । तत्थ य कद्दममज्झखुत्तेणं अदिस्समाणेणं खइरकट्टुखोडीखीलएणं विद्धो हिययप्पएसे । पंचनमोक्कारपरावत्तणपरायणो य मम्मप्पहारेणं गओ पंचत्तं । उप्पण्णो तीए चेव नियसामिसालउसभदाससेट्ठिघरिणीए अरिहदासीए कुच्छिसि पुत्तताए । जाओ य तीए दोसु मासेसु विइकंतेसु डोहलो, अवि य-

“वंदेमि जइ जिणाणं बिबे काऊण परमसक्कारं ।
 ण्हवण-विलेवण-जत्तामहूसवे जइ य पिच्छमि ॥१५॥
 पडिलाभित्ता भत्तीए मुणिवरे जइ नमामि अणवरयं ।
 पूएमि समणसंघं दीणाणं देमि तह दाणं” ॥१६॥
 इय एवमाइ उप्पन्नदोहला सा कहेइ सेट्टिस्स ।
 आणंदमुव्वहंतो सो वि तयं पूए सव्वं ॥१७॥

एवं च संपुन्नदोहला नवसु मासेसु अद्धट्टमदिवसाहिएसु विईकंतेसु सव्वंग- सुंदराभिरामं सयलजणसुभदंसणीयं पसूया दास्यं । वद्धाविओ य सेट्टी पियंकरियाहिहाणाए दासचेडीए । कयं च सेट्टिणा महावद्धावणयं, अवि य-

वज्जंत तूरगहिरं नच्चंतविलासिणीसमूहड्डं ।
 दिज्जंतविहदाणं विहियं वद्धावणं परमं ॥१८॥
 सेट्टी वि तस्स नामं विहेइ नीसेससयणपच्चक्खं ।
 होउ सुदंसणनामो जणनयणानंदणो जम्हा ॥१९॥

एवं च कमेण पवड्डमाणो जाओ अट्टवारिसिओ । गहियाओ य साइसयाओ सयलगुणसमणियाओ बाहत्तरिं पि कलाओ । परिणीया य समाणकुल-रूव-जोव्वण-गुणसमणिया मणोरमा नाम कुलबालिया । पेच्छए य राया तं महापीईए, किं बहुणा सव्वनयरं पि जायं तम्मयं चेव ।

इओ य अत्थि तीए चेव नयरीए रइणो अब्भरहिओ कविलो नाम पुरोहिओ । तेण य सह सुदंसणस्स परमपीई, पाएण सुदंसणस्स चेव पासे चिट्ठइ । तओ अन्नया पुच्छिओ कविलो कविलाभिहाणाए भारियाए जहा ‘सामि ! कत्थ तुमं चिट्ठसि ? निययावस्सयवेलं पि न मुणसि’ । तेण भणियं ‘भदे ! सुदंसणपासे’ । तीए भणियं ‘को सो सुदंसणो’ ? तेण भणियं ‘किं तए एत्तियं कालं सुदंसणो वि न नाओ ? अहो ! ते विहलं जीवियं’ । कविलाए भणियं ‘संपयं पि जाणावेहि । कविलेण भणियं “जइ एवं ता सुण, अवि य-

रूवेण पंचबाणो तेएण रवी ससि व्व सुहलेसो ।
 सूरुे सरल्लो सुभगो पियंवओ पढमआभासी ॥२०॥
 किं बहुणा ? एक्केण वि गुणेण अह तेण तिहुयणं विजियं ।
 गुणचूडामणिरयणं अक्खलियं धरइ जं सीलं ॥२१॥

अहवा वि गुणमओ च्विय सो सव्वो निम्मिओ पयावइणा ।

अम्हारिसेहिं कत्तो वण्णिज्जइ मंदबुद्धीहिं' ॥२२॥

एवं च तीए तग्गुणवण्णणं सोऊण संजाओ परोक्खाणुरागो चित्ताए पइदिणं तस्संगमोवायं ।

अण्णदिणम्मि य गओ कविलो रायाएसेण गामंतरं । तओ गया कविला सुदंसणपासं । कवडेण य भणियं जहा 'अज्ज ! तुह मित्तस्स गरुयं सरीरकारणं तेण कारणेण न तुह समीवमागओ, न तुमए विरहिओ खणं पि धिइं लहइ, अओ तुह हक्कारणत्थं अहं पेसिया, ता सिग्घमागच्छहिं' । सुदंसणो वि 'न मए नायं सरीरकारणं' ति भणंतो ससंभममुट्ठिऊण गओ तीए चेव सह तग्गेहं । भणिया य सा 'कत्थ कइलो' ? तीए भणियमब्भंतरे । निव्वियप्पो य पविट्ठो । पुणो वि पुच्छियं 'कत्थ कविलो' ? तीए भणियमब्भंतरयरे । तत्थ वि पविट्ठो । अपिच्छंतेण य पुणो वि पुच्छियं 'कत्थ कविलो' ? तओ तीए दुवारं रंभिऊण उत्तरिज्जपच्छइए वि मयणुक्कोयणनियसरीरावयवे ईसि पयडिऊण पच्छायंतीए दढबंधं नीवीबंधं सिढिलिऊण पुणो वि संजमयंतीए तारतरलसकडक्खविक्खेव- दिट्ठिच्छेहे पयच्छंतीए भणियमणाए, जहा 'नत्थित्थ कविलो किं च तेण ?, कविलाए चेव पढमं पडिजागरणं करेहिं' । सुदंसणेण भणियं 'किं कविलाए पडिजागरियव्वं' ? तीए भणियं, अवि य-

“जप्पभिइं सुहय ! तुहं कविलेणं साहिया गुणा मज्झ ।

तप्पभिइं चेव ममं सरेहिं परिताडइ अणंगो ॥२३॥

एत्तियमेत्तंकालं तुह संगमऊसुया ठिया नाह ? ।

अज्जं पुण कवडेणं इहाऽऽगओ मज्झ पुण्णेहिं ॥२४॥

तुह विरहतावियाइं इमाइं अंगाइं मज्झ ता सुहय ! ।

नियसंगमसलिलेणं निव्वावसु करिय कारुण्णं” ॥२५॥

तओ सुदंसणेण गहियपरमत्थेण तत्थुप्पन्नमइमाहप्पदुल्ललियवियक्खणेण सविसायं जंपियं जहा 'भदे ! जुत्तमेयं मोहवसयाणं पाणीणं, परं अहं पंडगो पुरिसवेसेणं परवत्तियवेसो लोए चिट्ठामि' तओ तीए विरत्तचित्ताए दुवारं दाऊण भणियं 'जइ एवं तो दुअं निग्गच्छहिं' । निग्गंतूण य गओ सुदंसणो नियगेहं चित्तिउं च पयत्तो, अवि य-

“अहह अहो ! नारीणं अकज्जकरणम्मि उज्जमो अहियं ।

अविवेयबहुलया वि य साहस-कवडाण खाणित्तं ॥२६॥

अहवा को जुवईणं पुच्छइ असमंजसाई कज्जाई ।

दोसाण आगरोच्चिय जाण सरीरे वसइ कामो ॥२७॥

मूलं दुच्चरियाणं हवइ य नरयस्स वत्तिणी विउला ।

मोक्खस्स परमविग्घं वज्जेयव्वा सया नारी ॥२८॥

ता कह मणयं छलिओ अज्ज अहं तीए पावकम्माए ।

अहवा किं एएणं ? कज्जे च्चिय निच्छयं कुणिमो ॥२९॥

ता सव्वहा एस निच्छओ जमज्जप्पभिइं एगागिणा परगेहे न गंतव्व” मेवं निच्छयं कारुण जाओ संधम्मकम्मुज्जओ ।

अण्णया कयाई समागओ इंदमहूसवो । तत्थ य कीलानिमित्तं सुदंसणकविलस-
मण्णिओ सुपरजणवओ निग्गओ राया उज्जाणसिरिमणु भविउं । एत्तो य राइणो
दहिवाहणस्स अग्गमहिसी अभया नाम तीए कविलाए सह महरिहजंपाणारूढा
रायाणमणुगच्छइ । सुदंसणपिययमा वि मणोरमा छर्हि पुत्तेर्हि परिवारिया रोहिणी व्व
तारयाणुगया पहाणजंपाणारूढा विणिग्गया । तं च दट्टूण पुच्छियं कविलाए ‘सामिणि ! का
एसा ? सयलवणराईणं पिव कप्पलया नियसोहासमुदएणं सव्वमभिभवन्ती गच्छइ’ ? देवीए
जंपियं ‘हला ? जगविक्खाया वि किं तए न नाया एसा सुदंसण-पिययमा ? तओ
कविलाए भणियं ‘जइ एसा सुदंसणपिययमा ता अहो ! निउणत्तणमेईए जमेत्तियाणि
पुत्तभंडाणि ★ ‘उप्पाइयाणि’ । देवीए लवियं-किमित्थनिउणत्तणं जं नियपियप-
सोयसंपत्तसुरयसुहाए अक्खश्रवायाए (?)समुप्पज्जंति पुत्तभंडाणि । ★ कविलाए जंपियं
‘अत्थि एवं, परमेस सुदंसणो पंडगो’ देवीए जंपियं ‘कहमेयं तए नायं’ तीए भणियं
‘विण्णासिओ सो मए इमिणा य वुत्तंतेण । अभयाए भणियं ‘जइ एवं ता वंचियाऽसि तुमं
वरई डोड्डुणी कामसत्थबाहिरत्ति काउं, जओ सो पंडगो परित्थीणं, न पुण सकलत्ताणं’ ।
तओ कविलाए सविलक्खाए हसिरुण जंपियं ‘जइ अहं कामसत्थबाहिरा वंचिया तो तुमए
कामसत्थनिम्मायाए को अइसओ कओ’ ? अभयाए भणियं ‘किमित्थ चोज्जं जमहमइसयं
करेमि’ । कविलाए भणियं ‘देवि ! अइसोहग्गारवो वि न कायव्वो’ । अभयाए भणियं
‘करेइ सो जस्स नियसामत्थमित्थि’ । कविलाए भणियं ‘जाणामि तुज्झ सामत्थं जइ एयं
चेव सुदंसणं रामेसि’ । देवीए भणियं “हला !

जइ नवि रामेमि इमं तो काउं इत्थिभावविणिवित्ति ।

जावज्जीवं पि अहं पविसामि हुयासणं दित्तं” ॥३०॥

एवं जपंताओ ताओ पत्ताओ तत्थ उज्जाणे ।
रमितं सुइरं कालं गयाओ नियएसु ठणेसु ॥३१॥

तओ भणिया अभयाए नियया पंडिया नाम धाई जहा 'अम्मो ! मए एवं पइण्णा कया ता जहा तेण सह संपत्ती भवइ तहा करेहि' । पंडियाए भणियं "पुत्ति ! न सुट्ठु मंतियं, जओ-

अवि चलइ तियससेलो सुक्कइ जलही वि पडइ गहचकं ।
तह वि सुदंसणचित्तं, मणयं पि हु चालिउमसक्का ॥३२॥
जम्हा सो हु महप्पा परनारीसंगमाउ विणियत्तो ।
इह-परलोगविरुद्धं न एरिसं कुणइ पलए वि ॥३३॥
न य आणेउं तीरइ जम्हा सो सावओ गुणसमग्गो ।
सयलवरनीइकुसलो तम्हा विहला तुह पइण्णा" ॥३४॥

देवीए भणियं 'जइ एवं तहावि एक्कवारं कर्हिचि आणेहि, पच्छाऽहमेव भलिस्सामि' पंडियाए भणियं 'जइ एस ते निच्छओ ता अत्थि एक्को उवाओ जम्हा सो पव्वदियहेसु सुण्णगेहाइएसु काउस्सग्गेण ठाइ, ता जइ परं कर्हिचि तहट्ठिओ चेव आणिज्जइ' । देवीए भणियं 'एवं पि चित्तेहि आणयणोवायं' ।

एवं च वच्चंतेर्हि केर्हिचि दिणेर्हि समागओ कोमुईमहूसवो । तत्थ य समाइट्ठं नरवइणा जहा "घोसेह पंडहेण सव्वत्थ-सयलनरलोएण सव्विड्डीए कोमुईमहूसवदंसण-त्थमुज्जाणे गंतव्वं" । तह चेव घोसिए निउत्तपुरिसेर्हि चित्तियं सुदंसणेण जहा 'अहो ! दुत्तरमेयं जओ जइ उज्जाणे गम्मइ तो चेइयाणं चाउम्मासियपूया न भवइ, चंडं च रायसासणं, ता पढममुवाओ कीरइ' ति । चित्तिरुण गहियोवायणो गओ रायसमीवं, विण्णत्तो य राया जहा 'देव ! एत्थ कोमुईए अम्ह धम्मदिवसो ता जइ देवो पसायं करेइ तो देवपूयाइयं करेमो' । रइणा वि 'मा देवाणं पूयाविघाओ भवउ' ति मण्णमाणेण भणियं जहा 'करेहि कालोचियं धम्माणुट्ठणं' ति । सुदंसणो वि 'देव ! महापसाओ' ति [ग्रं० १२०००] भणिरुण निग्गओ । समाढत्ता जिणाययणेसु पूया । तओ सव्वदिणं पि ण्हवणाईयं महाविच्छड्ढेणं कारुण रयणीए कयपोसहो ठिओ नयरचच्चरे काउस्सग्गेण । तओ भणिया पंडियाए अभया 'पुत्ति ! कयाई अज्ज पुज्जं ति तुह मणोरहा, परं तए वि न गंतव्वमुज्जाणे' । तओ सा वि 'सिरं मे बाहइ' ति रण्णो उत्तरं कारुण ठिया । तओ पंडिया लिप्पमयमयणपडिममुत्तरिज्जपच्छाइयं कारुण पविसमाणी निरुद्धा दारपालेर्हि ।

‘किमेयं ?’ ति पुच्छ्याए भणियमणाए जहा ‘अज्ज महादेवी सरीरकारणेणं न उज्जाणं गया तओ मयणाइदेवयाणं घरे चेव पूयं करिस्सइ, एएण कारणेण एसा मयणपडिमा पवेसिज्जइ, एवमण्णाओ वि पडिमाओ पविसिस्सामि’ । तेहिं भणियं ‘जइ एवं तो दंसेहि एयं पडिमं’ । दंसिया य तीए उग्घाडिरुण । तओ विसज्जिया अणेहिं । एवं दुइयवाराए वि । तइयवाराए पुण सुदंसणं गहाय उत्तरिज्ज पच्छइयं कारुण पविट्ठा । निव्वियप्पेहिं दारवालेहिं न निरुद्धा । समप्पिओ य तीए अभयाए महादेवीए । सा वि बहुप्पयारं खोभिउं पयत्ता, अवि य-

“कुणसु पसायं पिययम ! छलेण आणाविओ तुमं एत्थ ।

मयणमहागहगहियाइ मज्झ तं होहि वरवेज्जो ॥३५॥

तुह विरहमहोरगदसणगरलवसवेविराइं अंगाइं ।

नियसुरयमंतजावेण ताइं मह कुणसु सच्छइं” ॥३६॥

सुदंसणो वि विण्णायपरमत्थो काउस्सग्गट्ठिओ चेव जाओ सुरसेलो व्व निप्पकंपो ।

तो पुण वि हाव-भावाइएहिं उवसग्गिउं भणइ एसा ।

“किं तुह वएण अहियं होही मम संगमाओ वि ? ॥३७॥

अणुरत्तं अइभत्तं सुरयवियड्डं सुजोव्वणं सुभगं ।

माणेहि ममं सामिय ! देवाण वि दुल्लहं किमिणो ? ॥३८॥

मह दंसणं पि सुंदर ! सामन्नरो न पावए कहवि ।

आर्लिगण-सुरयसुहाइं सुहय !-सुविणे वि न हु हुंति ॥३९॥

तुह पुण अणुरत्ताऽहं देमि जहिच्छए ताइं अणवरयं ।

ता मा कुणसु विलंबं मन्नसु मह पत्थणं एवं ॥४०॥

तं सावओ दयालू सुव्वसि ता पसिय कुणसु मह इट्ठं ।

इयरह महमरणेणं थीवज्झा होहिई तुज्झ” ॥४१॥

एवं पिहु पडिभणिओ सुदंसणो जा न जंपए किं पि ।

ता कोमलकमलदलोबभेहिं हत्थेहिं फरिसेइ ॥४२॥

कोमलमुणालदीहरभुयाहिं कंठम्मि घेतु अइगाढं ।

उत्तुंगपीणचक्कलथणेहिं पीडेइ वच्छयलं ॥४३॥

तह तीए तीस्स विहियाउ सुरयकिरियाउ पावहिययाए ।

जह लोहमओ वि नरो सहसा परिगलइ किं बहुणा ? ॥४४॥

सो पुण महाणुभावो जह जह सा कुणइ विविहउवसगं ।
 तह तह धम्मज्झाणे अहिययरं निच्चलो होइ ॥४५॥
 चित्तेइ य 'जइ कह वि हु उवसग्गाओ इमाओ छुट्टेमि ।
 तो पारेमि अहऽण्ह एयं चिय अणसणं मज्झ' ॥४६॥
 रुसिरुण ततो देवी भणइ य "भो ! जइ न कुणसि मह वयणं ।
 तो नत्थि तुज्झ जीयं किं बहुणा एत्थ भणिण्ण ? ॥४७॥
 ता कुणसु मज्झ वयणं निव्विण्णो जइ न निययजीवस्स' ।
 इय भणिओ वि हु एवं धम्मज्झाणं समारुहइ ॥४८॥
 इय नीसेसं रयणिं कयत्थिओ ताव जाव न हु खुहिओ ।
 दट्टुं पभायसमयं दारइ नक्खेहिं अप्पाणं ॥४९॥
 पोक्करइ य 'दे धावह धावह एसो अणारिओ पुरिसो ।
 मज्झ बलामोडीए खंडेउं इच्छए सीलं' ॥५०॥
 तं सोउं पाहरिया धावित्ता जाव जंति तं देसं ।
 काउस्सगेण ठियं पेच्छंति सुदंसणं ताव ॥५१॥

तओ 'असंभवणीयमेयं' ति मण्णमाणेहिं तेहिं वि निवेइयं नरवइणो । सो वि
 संभंतो झ त्ति समागतो । पुच्छिया सा 'देवि ! यं ?' किमे ति । तीए भणियं "नाह ! सुणेहि,
 ठियाऽहंजाव तुब्भे विण्णविऊण सरीरकारणेणमित्थेव ताव कोवि अप्पतक्किओ चेव समागओ
 एसो, भणिया य अहमणेण बहुप्पयारं । तओ भणियं मए 'मूढ ! किमेयं पि तए न सुयं
 पढिज्जमाणं, अवि य-

सीहह केसर सइहि थण, करि आउहु सुहडाहं ।
 मणि मत्थइ दव्वीकरहं, नवि घेप्पइ अमुयाहं ॥५२॥

तओ मए जाव एवं निब्भच्छिओ तावबलामोडी कुणंतस्समए धाहावियं । ततो
 राइणा वि 'न मियं कर्बिबाओ अंगारवुट्ठीओ पडंति' ति सुदंसणाओ तमसंभावयंतेण
 पुच्छिओसायरं जहा 'फुडं साहसु को एत्थ परमत्थो' ? तओ देवीए अणुकंपट्टयाए न किं
 पि जंपियमणेण । एवं च पुणो पुणो पुच्छिज्जमाणो वि न किं पि जंपइ तओ 'एयं पि
 संभवइ' ति मण्णमाणेण समाणत्तो वज्झो जहा 'पउरणमेयं दोसं निवेइऊण पच्छ एयं
 विणासेह' । तओ गहिओ सो दंडवासिएहिं, समारोविओ उब्भडरासहं, विलित्तो रत्तचंदणेणं,

चच्चकिओ तणमसीपुंडर्हि, पक्खित्ता सिरोहरए सरावमाला, कया रत्तकणवीरमुंडमाला,
धरिज्जंतेणं उवरि छित्तरयच्छतेणं, वज्जंतेणं खंडपडहएणं भमाडिउमाढत्तो सव्वत्थ नयरिमज्जे,
उग्घोसिज्जए एयं जहा-

“निसुणंतु सयललोगा जह एसो किर सुदंसणो सेट्ठी ।
अंतेउरेऽवरद्धो त्ति करिय मारिज्जए एवं ॥५३॥

न य राया जुवराओ य को य अवरज्जई सुणह लोया ! ।
अवरज्जंति नियाइं अत्तत्थ इमस्स कम्माइं” ॥५४॥

एवं च निग्घोसणं निसामिऊण समत्थलोगो वि भणिउमाढत्तो अवि य-

“धी धी न जुत्तमेयं विहियं रण्णा जओ न एयस्स ।
गंधो वि एत्थ विज्जइ दोसस्स महाणुभावस्स ॥५५॥
अवि चंदमंडलाओ पडंति अंगारवुट्टिसंघाया ।
नेय सुदंसणसेट्ठी इमाण कम्माण कारि त्ति ॥५६॥

एवं च जंपमाणं लोयाणं पत्तो उसभदाससेट्ठिघरदुवारे, दिट्ठो य बहिणिग्गयाए
मणोरमाए, चितियं च, अवि य-

“अहह ! अणज्जो एसो विही जओ मह पइस्स वि इमेण ।
निद्दोसस्स वि विहिया एवं अइदारुणाऽवत्था ॥५७॥
नूणं भवंतरकयं इमस्स कम्मं उवट्टियं किंचि ।
अकलंकस्स वि जेणं समागया आवया एसा ॥५८॥
राग-द्वोसवसगया जीवा असुहेहिं करणजोगेहिं ।
बंधंति कम्मजालं जमिहाऽसुहलेसजोगेण ॥५९॥
पार्विति नियमसो च्चिय तस्सुदएणं निकाइयस्स पुरा ।
गरुयं विवायदुक्खं पमायरहिया वि निच्चं पि ॥६०॥
अइसयनाणी वि दढं साइसयं वस्तवं तवंता वि ।
साइसयलद्धिया वि ये छुट्ठंति न पावकम्माओ ॥६१॥
गुरुयरपरकम्मा वि हु निम्मलवरसत्तसाहसधणा वि ।
हम्मन्ति अणेगे च्चिय कम्मविवागेण विवसा उ ॥६२॥

अहवा जइ वि हु कम्मं बलिययो तह वि भव्वजीवाणं ।

भवइ य वियंभमाणो अउव्वकरणानलो लोए ॥६३॥

ता किं इमिणा असंबद्धेणं चित्तिणं ? कज्जप्पहाणेहिं चैव होयव्वं, कज्जं च जं विसुद्धभावजोगेण देवयाराहणं” ति । तुरियमेव गया घरचेइयाणं पुरओ । काऊण य जिणपूयं ठिया काउस्सग्गेण, भणियं च-

“भयवइं ! पवयणदेवी !, निसुणसु मह संतियं इमं वयणं ।

कुण सन्निज्झं वर सा-वयस्स एयस्स नणु सिग्घं ॥६४॥

अह नवि करेसि एवं तो नवि पारेमि काउसग्गमहं ।

एवं चिय मह भयवइ ! निच्छयओ अणसणं होही” ॥६५॥

सुदंसणो वि सयलनरनायरजणवयणविणिग्गयं सुणमाणो हाहारवं नीओ मसाणभूमि । समारोविओ सूलाए । पवयणदेवयापभावेण य जाया सा कणयमेयपउमासणं । तओ दिण्णो सिरोहराए करवालप्पहारो । सो विजाओ सियकुसुममालापयरो । तं च दट्टुण भयभीएहिं दंडवासिएहिं निवेइयं रण्णो । तओ सो वि संभंतो समारुहिरुण वारुयाए गओ मसाणं भूमि । खमाविरुण बहुप्पयारं भणिओ-जुत्तं नाम मज्झ वि असाहणं ? किं दिट्ठो कत्थ वि तएऽहमसम्भावेण ववहरंतो जेण मूणव्वयमालंबियं ?’ ति भणमाणेण समारोविओ सहत्थेहिं घेतूण वारुयापरिकयाए । नीओ सबहुमाणं राउलं । ण्हाविओ ‘मंगलकलसेहिं विलित्तो गोसीसचंदणेणं, परिहाविओ पवरवत्थालंकारइं, किं बहुणा ? सम्माणिरुण य अणेगप्पगारेहिं पुच्छिओ परमत्थं, तओ भणियं सुदंसणेण ‘देव ! देहि एत्थ विसए अभयं’ । दिण्णं चैव तुहाऽभिरुइयं तमण्णं पि किं पुण अभयं ?’ ति । तओ साहिओ सवित्थरो रयणिवुत्तंतो । कुविओ अभयाए राया । पाएसु पडिऊण नियत्ताविओ सुदंसणेण । तओ वरकुंजरारूढो वज्जंतोहिं मंगलतूरेहिं, नच्चंतोहिं पायमूलेहिं पढंतोहिं भट्ट-मागहेहिं, वियरंतो महादाणं, अवर्णितो सयलनरनारीयण-हिययसंतावं महाविभूइए सव्वत्थ नयरे भमिरुण पत्तो सभवणं । आणंदिया बंधवा । तुट्ठा जणणि-जणया । पमुइया मनोरमा । कयं तक्कालोचियं । ठिओ कियंतं पि कालं । अभया वि एयं वइयरं समायणिरुण अप्पाणं उव्वंधिरुण मया ।

पंडिया वि पणट्ठा । नस्संती य गया पाडलिपुत्तं नाम नयरं । तत्थ य ठिया देवदत्ताभिहाणाए गणियाए समीवे । वण्णेइ य पइदिणं देवदत्ताए पुरओ सुदंसणगुणा देवदत्ता वि सुदंसणगुणजणियानुरागा चिट्ठइ तदंसणूसुया ।

सुदंसणो वि पुणोपुणो परिभावेतो दुरंतदारुणं कम्मपरिणामं, पेच्छंतो असारयं संसारस्स, निव्विण्णकामभोगो पव्वइओ सुगुरुसमीवे । उग्गतवसोसियसरीरो य एगल्लविहारपडिमापडिवण्णो विहरंतो पत्तो पाडलिपुत्तं नयरं । दिट्ठो य पंडियाए गोयरचरियाए पविट्ठो । कहिओ य देवदत्ताए जहा 'सामिणि ! सो एस सुदंसणो महप्पा जस्स गुणे अहं तुह पुरओ पइदिणं वण्णंती' । तओ तीए भणियं 'जइ एसो ता आपेहि भिक्खाछलेण मम गेहं' । तीए वि तहेवाणीओ । देवदत्ताए विदारं ढक्किऊण बहुविहपत्थणापुव्वयं कयत्थिओ सव्वदिवसं । तओ जाव न खुभिओ ताव वियालवेलाए मुक्को गओ उज्जाणे । तत्थ वि दिट्ठो तीए अभयावंतरीए । पउट्टाए य कयत्थिओ बहुप्पयारं । भयवं पि तहा कयत्थिज्जमाणो वि समारूढो अपुव्वकरणं, खवगसेढीकमेण पत्तो केवलनाणं ति । एत्थंतरम्मि य समागया सुरा-ऽसुरा । साहिओ भयवया धम्मो । पडिबुद्धा बहवे पाणिणो, विसेसेण पंडिया धावी-देवदत्ता-वंतरीओ य । कालंतरेण य संबोहिऊण भव्वलोयं पत्तो भयवं सासयसोक्खं मोक्खं ति ।

ता भो ! जं से तइया मणोरमारहियाए देवीए ।
सन्निज्झं काऊणं निवत्तिओ घोरउवसग्गो ॥६६॥
तत्थ इमा तियसाण वि संजाया पायडा विसेसेण ।
मणुयाण सलाहणिया मणोरमऽक्खा महसइ ति ॥६७॥

मनोरमाख्यानकं समाप्तम् ॥ ५२॥

इदानीं सुभद्राख्यानकमाख्यायते -

[५३. सुभद्राख्यानकम्]

अत्थि समत्थमहोयहिदीवाणं मज्झसंठिओ रम्पो ।
पडिपुण्णचेंदमंडलसंकासो जंबुदीवो ति ।१॥
तत्थ य भरहे वासे दाहिणअद्धस्स मज्झखंडम्मि ।
अंगं ति सुप्पसिद्धो नामेणं जणवओ अत्थि ॥२॥
तत्थ पुरी पोरणा चंपा नामेण अत्थि सुपसिद्धा ।
बहुदिवसवण्णणिज्जा अलयाउरिसरिसवरविभवा ॥३॥

तीए य जियसत्तू नाम राया । तत्थ य जिणसासणाणुरत्तो अत्थि जिणदत्तो नाम सावओ । तस्स य अच्चंतुम्भडरूवाइगुणसमग्गा अत्थि सुभद्दा नाम धूया, अवि य-

रूवाइगुणसुभद्दा, कलकोइलरवसरिच्छवरसद्दा ।
 आगामिचारुभद्दा मणेण निच्चं पि अक्खुद्दा ॥४॥
 सरलसहावा भद्दा, धारियजिणनामधण्णवरमुद्दा ।
 गयर्निदा सुभनिद्दा अद्दंदा साविय सुभद्दा ॥५॥

सा य अण्णया कयाइ दिट्ठा सभवणे ठिया कर्हिचि पओयणागएणं तत्थेव
 वत्थव्वगेण तच्चवण्णियभत्तसेट्टिपुत्तेण बुद्धदासेण, तं च दट्टूण चितियमणेण, अवि य-

“नूणं सो दुट्ठो च्चिय विही अबीओ विणिम्मियं जेण ।
 एसा परजणभोज्जा विहिया अइरूवकलिया वि ॥६॥
 अहवा वि हु अंधलओ जो मुंचइ एरिसं इमं कण्णं ।
 जइ सज्जक्खो हुंतो कह अमयं मुंचए दट्टुं ॥७॥
 जइ पावेमि न एयं तो जायइ नित्तुलं महं मरणं ।
 कामाउरण अहवा एवं चिय हुंति चिताओ ॥८॥
 इय चितंतो एसो विट्ठो बाणेहि पंचबाणेण ।
 तो नियगेहे गंतुं वरणत्थं पेसए नियए ॥९॥

जिणदत्तो वि उचियपडिवत्तीए ते सम्माणिकुण पुच्छइ ‘भणह किमागमणप्प-
 ओयणं’ ? तेहिं वि सिट्ठं निययपओयणं । सेट्टिणा भणियं “सव्वं संपुण्णमत्थि तम्मि
 जाइ-कुल-रूव-जोव्वण-लावण्ण-विहवाइयं, परमण्णधम्मियत्तणेण परोप्परमणणुवत्तीए न
 एयाणं नेहो भविस्सइ त्ति काऊण न देमि” । तओ तेहिं गंतूण सव्वं निवेइयमेयस्स । तेण
 वि चितियं ‘जाव न कवडसावगतणमंगीकयं न ताव एसा लब्भइ’ त्ति । चित्तिऊण गओ
 साहुसमीवे, भणिया य साहुणो-

‘संसार भउव्विग्गो अहयं तुम्हाण सरणमल्लीणो ।
 ता रक्खेह महायस ! निययं कहिऊण मह धम्मं’ ॥१०॥
 तो तेहिं तस्स धम्मो सिट्ठो जिणइंददेसिओ पवरो ।
 सो वि तयं पडिवज्जइ भवभयभीओ व्व कवडेण ॥११॥
 अह पइदिणसवणाओ परिभावंतस्स तस्स अणुदियहं ।
 धम्मो जिणपण्णत्तो सहस च्चिय परिणओ चित्ते ॥१२॥

तो भणइ वंदिरुणं गुरुणो “भयवं ? सुणेह मह वयणं ।
 कण्णाकएण धम्मो पडिवण्णो आसि मे पुव्वं ॥१३॥
 इण्ह तु भावसारं एसो च्चिय मज्झ परिणओ चित्ते ।
 कवडो वि हु सब्भावो संजाओ मज्झ पुण्णेहिं ॥१४॥
 ताऽणुव्वयाइयाइं वयाइं मह देसु सामि ! सव्वाइं ।
 सिक्खावेह य सारं जमेत्थ जिणसासणे किंचि” ॥१५॥

तओ सव्वं सिक्खाविओ गुरूहिं । थैवदियहेहिं चेव जाओ अभयकुमारसारिच्छो
 सावओ, अवि य-

ण्हवण-बलि-पूय-जत्ताइयाइं कारेइ जिणवरघरेसु ।
 पडिलाहइ भत्तीए फासुयदव्वेहिं जिणमुणिणो ॥१६॥
 साहम्मियपडिवर्त्ति करेइ तंबोल-भोयणाईहिं ।
 दीणाईणं दाणं देइ जहिच्छए अणवरयं ॥१७॥
 आवस्सयसज्जाए सामाइय-पोसहेसु उज्जुत्तं ।
 दट्टूण य जिणदत्तो सयमेव य देइ तं कण्णं ॥१८॥

तओ निरूवियं वारिज्जयलग्गं । आढत्ता सामग्गी दोसु वि कुलेसु । जायं
 महाविच्छुडेणं पाणिग्गहणं । ततो जाव वच्चंति कइ वि दियहा ताव भणिओ जिणदत्तो
 जामाउगेण ‘ताय ! विसज्जेह संपयं सुभइं जेण नेमि नियगेहं’ जिणदत्तेण भणियं ‘पुत्त !
 जुत्तमेयं, परं मिच्छदिट्ठीणि तुह माया-वित्ताणि तेण धम्मविपडिवत्तीए दाहिंति इमीए
 कलंकं’ । जामाउगेण भणियं ‘ताय ! जुवगगेहे धरिस्सं’ । तओ विसज्जिया सा सेट्टिणा ।
 तेण वि ठविया जुवगगेहे । तीए य घरे पविसंति अणवरयं भत्त-पाणोसहाइनिमित्तं साहुसंघाडगा ।
 तओ तमसहमाणेहिं [माया-वित्तेहिं ?] भणिओ से पई जहा ‘न सोहणा ते महिला, अच्छइ
 पइदिणं सह समणेहिं । तेण भणियं “मा एवं पलवह, जओ न एवमेयं पलयकाले वि
 संभाविज्जइ, अवि य-

विसमनिवडंतबहुविह विमाणलक्खेहिं संकुला सग्गा ।
 निवडंति नहयलाओ न य एसा चलइ सीलाओ ॥१९॥
 अवि नेरइयसमग्गा असंखदुहसंकुला महानरया ।
 निवसेज्ज व आगासे न य एसा चलइ सीलाओ ॥२०॥

अवि तरइ जले सेलो अविवज्जं भिज्जए तणेणाऽवि ।

अवि पडइ हिमं जलणे न य एसा चलइ सीलाओ ॥२१॥

अवि जलइ जले जलणो सिल व्व अवि होज्ज निच्चलो पवणो ।

अवि निवडइ सिद्धसिला न य एसा चलइ सीलाओ" ॥२२॥

एवंविहं च तव्वयणमायणिरुण दूमियचित्ताणि ठियाणि तुण्हक्काणि सव्वाणि ।

अण्णया य पविट्ठो खवगमुणी सुभद्दागेहे भिक्खट्ठा । तस्स य पवणपेरियं पविट्ठमच्छिम्मि कणुयं, निप्पडिकम्मसरीरत्तणाओ य नाऽवणीयं मुणिणा । तं च दट्टूण चित्तियं सुभद्दाए 'अहो ! महाणुभावया मुणिस्स जं निप्पडिकम्मसरीरत्तणेणमच्छिकणुगं पि नाऽवणेइ ता जइ एयं एमेव चिट्ठइ तो नियमा अच्छिवि घायं पि करेइ' । तओ भतं पयच्छंतीए नियकलालाघवेण जीहग्गेणाऽवणीयं तमेयाए । संकंतो य मुणिणो भालवट्ठे तस्संतिओ चीणपिट्ठतिलओ । अणाभोगजोगओ य न लक्खिओ दोहिं वि सो । ततो चीणपिट्ठतिलयभूसियभालयलं मुणिं तग्गेहाओ निग्गच्छंतं दट्टूण पत्थावो त्ति हरिसियाहिं भणियं जणणि-भगिणीहिं 'पुत्त ! संपयं किमुत्तरं काहिसि ? जइ अम्हाणं ण पत्तियसि तो पेच्छ कहमेयस्स सेयभिक्खुणो भालयले एस से तिलओ संकंतो ? तओ 'दढ्ठे पच्चओ' त्ति निव्वियप्पेण चित्तियमणेण-'अहो ! जइ नाम एसा उभयकुलविसुद्धा विण्णाय-जिणवयणपरमत्था वि संसारभउव्विग्गा वि धम्मपरा वि एवं ववसइ ता किमेईए उवरि पेमाणुबंधेणं' ति । भाविरुण सिढिलीकओ पेमाणुबंधो । तं च जाणिरुण चित्तियं सुभद्दाए, अवि य-

"जं नाम विसयभोगप्पराण संसारमावसंताणं ।

जायंति कलंकाइं तं न हु अच्छेरयं किं पि ॥२३॥

घरवासवावडाए विसैयासत्ताए जं महकलंकं ।

संजायं तं मह माणसम्मि थेवं पि न हु दुक्खं ॥२४॥

जं पुण मह कज्जेणं जायं जिणसासणस्स मालिण्णं ।

ससहरकरधवलस्स वि तं दूमइ माणसं मज्झं ॥२५॥

ता जाव न एयं पवयणस्स मालिण्णमवणियं कह वि ।

ता मह हिययस्स धिई न होइ जीयंतकाले वि" ॥२६॥

इय चित्तिरुण तो सा संज्ञासमयम्मि गेहपडिमाणं ।
 काउं विसिट्ठपूयं पमज्जिउं अह महीवीढं ॥२७॥
 गिण्हइ महापइण्णं “जा नवि जिणसासणस्स मालिण्णं ।
 एयं मएऽवणीयं ता न वि पारेमि उस्सग्गं ॥२८॥
 जो जिणसासणभतो सो देवो होउ मज्झ पच्चक्खो ।
 अवि नवि होइ निरुत्तं एयं चिय अणसणं मज्झ” ॥२९॥
 इय जाव खणं एक्कं काउस्सग्गेण संठिया एसा ।
 ता पयडियदिसियक्कं निययपहाजालपसरेण ॥३०॥
 वरहार-मउड-कुंडल-पलंबपालंबमाणसोहिल्लं ।
 देवंगसंवुयंगं पुरओ सा पिच्छए देवं ॥३१॥
 सो भणइ ‘साविए ! भण, कज्जेणं जेण सुमरिओ अहयं’ ।
 तं पेच्छिरुण तुट्ठा भणइ सुभद्दा तयं एवं ॥३२॥
 ‘जिणसासणाववायं अवणेहि इमं’ ति जंपियं तीए ।
 तुट्ठो जंपइ देवो “मा सुंदरि ! कुणसु इह खेयं ॥३३॥
 नयरीए दुवाराइं चउरो वि अहं पभायकालम्मि ।
 ढक्किस्सामि न को वि हु उग्घाडिस्सइ तुमं मोत्तुं ॥३४॥
 पभणिस्सामि य अहयं जा का वि सई इहऽत्थि नयरम्मि ।
 सा उग्घाडउ दारे चालणिकयदगच्छाहिं तु ॥३५॥
 उग्घाडिस्ससि ताइं तुममेव य नत्थि एत्थ संदेहो” ।
 इय वोत्तूणं तियसो सहसा अइंसणीहूओ ॥३६॥

तओ काउस्सग्गमुस्सारिरुण सा सुभद्दा हट्टुट्ठा रयणिं गमेइ, पभाए य लोणेण जाव उग्घाडिउमाढत्ताणि पउलीकवाडाइं ताव महंतेहिं वि पयत्तेहिं न उग्घडंति, भंजिज्जमाणाणि वि न भज्जंति । तओ खणमेत्तेण आउलीहूओ लोगो आरडभेरडीजातो चउप्पयसंघाओ । ‘देवविलसियं किं पि एयं ति नाऊण अल्लपडसाडगो धूवकडच्छुयहत्थो सपउरो रया विण्णविउ माढतो, अवि य-

‘देवस्स दाणवस्स व जस्सऽवरद्धं अयाणमाणेहिं ।

सो खमउ अम्ह सव्वं पसायपरमं मणं काउं’ ॥३७॥

तओ जंपियं देवेण, अवि य-

“भो भो ! निसुणह लोगा ! महवयणं अवहिया पयत्तेण ।

जा का वि इह पुरीए महासइत्तं समुव्वहइ ॥३८॥

सा चालणीय संठियजलेणऽछेडेउ तिन्नि वाराओ ।

जेणुगघडंति दारा किमित्थ बहुणा पलत्तेण ?” ॥३९॥

एयं च वयणं समायण्णिणरुण अहमहमिगाए राया-ऽमच्च-पुरोहिय-सेणावइ-सामंत-सेट्ठि-सत्थवाहपभिईणं भज्जा-धूया-वहुयाओ महासइत्तणगव्वमुव्वहंतीओ समागयाओ । सव्वाओ वि विगुत्ताओ चालिणीपरिक्खाए अवि य-

इय जाहे विगुत्ताओ ताओ सव्वाउ नयरनारीओ ।

ताहे भणइ सुभद्दा सासुयमाई उ पइपुरओ ॥४०॥

‘तुम्हाऽऽणाए अम्मो ! अहमवि विण्णासयामि अप्पाणं’ ।

ताओ भणंति हसिउं “दिट्ठं च सइत्तणं तुज्झ ॥४१॥

जइ एयाउ संथीओ, उग्घाडेउं चयंति नो दारे ।

तो तं उग्घाडेहिसि जा निच्चं समणपस्सुत्ता” ॥४२॥

तो जंपेइ सुभद्दा ‘अंब ! किमेएण ता परिक्खामि ।

वारंतीण वि ताणं अह गिण्हइ चालणिं एसा ॥४३॥

पक्खवइ तत्थ उदगं जा न वि भूमीए पडइ बिंदुं पि ।

ता दूमियाउ ताओ पई वि परिओसमुव्वहइ ॥४४॥

तो चालणीए उदयं घेतुं सा जाइ जत्थ नरनाहो ।

चिट्ठइ पउरसमेओ सेसित्थिपरिक्खमिक्खंतो ॥४५॥

तो दगपूरियचालिणिहत्थं आवितयं तयं दट्ठुं ।

अब्भुट्ठइ संभंतो समत्थजणपरिवुडो राया ॥४६॥

एहेहि साहुपुत्ते ! महासई ! देववंदियच्चलणे ! ।

उग्घाडेहि कवाडे अम्ह पसायं विहेरुण’ ॥४७॥

तो गच्छइ य सुभद्दा पुव्वपओलीइ रायपरियरिया ।

संपत्ता कोडेणं सुरसिद्धगणा वि तत्थेव ॥४८॥

तो पंचनमोकारं भणिय सुभद्दा उ तिन्नि वाराओ ।
 अच्छेडइ चालणिसंठिएण नीरेण सा सहसा ॥४९॥
 ता महया कुंचारवसदेण समुग्घडंति अररीणि ।
 तो दुंदुहीउ तुरियं पहयाओ सुर-ऽसुर-नरेहिं ॥५०॥
 निवडइ य कुसुमवुट्टी तदुवरि गयणाउ तियसपम्मुक्का ।
 'जय बंभाणि ! महासइ !' इय जयसद्धो समुच्छेलइ ॥५१॥
 'तं धण्णा कयपुण्णा तुज्झ सुलद्धं च माणुसं जम्मं ।
 जं तियसवण्णणिज्जं अक्खलियं धरसि वरसीलं' ॥५२॥
 इय एवं थुव्वंती दाहिण-पच्छिमपओलिदाराइं ।
 उग्घाडिऊण वच्चइ उत्तरपासत्थियं पउलिं ॥५३॥
 तीए य कवाडाइं अच्छेडित्ता जलेण तो भणइ ।
 'जा मह सरिसी का वि हु उग्घाडिज्जा उ सा ऐ' ॥५४॥
 अज्ज वि तहेव चिट्ठइ तं दारं तीए चंपनयरीए ।
 सा वि हु अणुगम्मंती असेसपुरनायरजणेणं ॥५५॥
 वण्णिज्जंती सयणाइएहिं भट्टेहिं तह पढिज्जंती ।
 नारीयणमंगलसद्दसंथुया जाइ जिणभवणे ॥५६॥
 तत्थ वि 'नमो जिणाणं' भणमाणी चेइयाण सा पूयं ।
 कारुण पुणो वंदइ जाइ तओ गुरुसमीवम्मि ॥५७॥
 दाऊण य वंदणयं गुरूण भत्तीए बारसावत्तं ।
 वंदित्तु समणसंघं नियघरहुत्तं तओ चलिया ॥५८॥
 दीणा-ऽणाहाईणं वियरंती इच्छियं महादाणं ।
 जिणसासणमाहप्पं एवं एयं पयंपंती ॥५९॥
 संपत्ता नियभवणे पणमित्ता जंति नरवंगईया ।
 नियनियठाणेसु तओ पई वि परमेण विण्णएण ॥६०॥
 जंपइ 'खमसु महासइ ! मज्झ पिए ! जं अणज्जवयणेहिं ।
 परिभूयाऽसि मणागं, सुरमहिए ! सुदढसम्मत्ते' ॥६१॥

एवं सा सव्वाण वि, देवयभूया निएण सह पइणा ।
धम्माणुट्ठाणरया, भुंजइ सव्वुत्तमे भोगे ॥६२॥

एवं इमा सुभद्दा, महासई पायडा तिलोगम्मि ।
तह सव्वसावियाणं, उवमट्ठाणम्मि जा जाया ॥६३॥

सुभद्राख्यानकं समाप्तम् ॥५३॥

सुलसाख्यानकं तु प्रागुक्तमेव, आदिशब्दसूचितकथानकेषु तु तावद
नर्मदासुन्दरी-कथानकमाख्यायते-

[५४. नर्मदासुन्दरीकथानकम्]

एत्येव जंबुदीवे, दीवे भरहद्धमज्झखंडम्मि ।
अत्थि गुणाण निवासं, वरनयरं वड्ढमाणं ति ॥१॥
तस्स पहू सिरिमोरियवंसप्पभवो कुणालअंगरुहो ।
तिकखंडपुहइसामी, अत्थि निवो संपई नाम ॥२॥
अन्नो वि तत्थ नीसेसगुणमओ उअभसेणसत्थाहो ।
अत्थि जिणधम्मनिरओ, वीरमई तस्स वरभज्जा ॥३॥
तीसे य दुण्णि पुत्ता, सहदेवो तह य वीरदासो त्ति ।
सिरिदत्ता वि य धूया, पभूयनारीयणपहाणा ॥४॥
तीसे य रूवजोव्वणलुद्धा वरया अयंति रिद्धिजुया ।
न य देइ ताण जणओ, मिच्छदिट्ठि त्ति काऊणं ॥५॥
भणइ 'दरिद्दजुओ वि हु रूवविहीणो षि जिणवरमयम्मि ।
जो होही निक्कंपो, दायव्वा तस्स मे एसा ॥६॥
एयं सुणिय पइण्णं, समागओ कूववंदनयरओ ।
नामेण रूद्धदत्तो, महेसरो तत्थ सत्थेण ॥७॥
अह संकामिय भंडं, नियमित्तकुबेरदत्तगेहम्मि ।
तव्वीहीए निव्विट्ठो जावऽच्छइ ताव नयरपहे ॥८॥
निययसहीयणजुत्तं निग्गच्छंतं निएइ सिरिदत्तं ।
तं दट्ठूणं एसो विद्धो मयणस्स बाणेहिं ॥९॥

'का मित्त ! इमा कण्णा' पुट्टे सो कहइ तस्सरूवं तु ।
 तत्तो तल्लोहेणं, गच्छइ सो सूरिपासम्मि ॥१०॥
 जाओ य कवडसड्ढो, जिणमुणिपूयाइएसु बहुदव्वं ।
 वियरइ अहवा पुरिसो रागंधो किं च न हु कुज्जा ? ॥११॥
 तो दट्टुं तच्चरियं, अच्चत्थं रंजिओ उअभसेणो ।
 सयमेव देइ कण्णं, वीवाहं कुणइ रिद्धीए ॥१२॥
 भुंजंतो वरभोए चिट्ठइ जा तत्थ रुद्धदत्तो सो ।
 ता पिउणा से लेहो, आहवणत्थं तु पट्टविओ ॥१३॥
 तब्भावत्थं नाउं, ससुरओ मोइऊण अप्पाणं ।
 सिरिदत्ताए सहिओ, संपत्तो कूववंद्रम्मि ॥१४॥
 अभिनंदिओ य पिइमाइएहिं चिट्ठइ तहिं सुहेणेसो ।
 कवडगहिय त्ति दूरंदूरेणं मुयइ जिणधम्मं ॥१५॥
 सिरिदत्ता वि हु मिच्छत्तसंगदोसेण दूसिया अहियं ।
 मोत्तूणं जिणधम्मं, धणियं निद्धंधसा जाया ॥१६॥
 तं नाउं जणएहिं वि, आलावाई विवज्जियं सव्वं ।
 जोयणदुगमित्तं पि हु संजायं जलहिपारं व ॥१७॥
 मयमत्ताणं ताणं, विसयपसत्ताण अन्नया जाओ ।
 सिरिदत्ताए पुत्तो, रूवेणं सुरकुमारो व्व ॥१८॥
 तस्स महेसरदत्तो ठवियं नामं गुरूहिं समयम्मि ।
 कालेण परिणयकलो उद्दामं जोव्वणं पत्तो ॥१९॥
 एत्तो य वड्डुमाणे पुरम्मि सिरिदत्तजेट्टु भाउस्स ।
 सहदेवस्स उ भज्जा सुंदरिनामा अणन्नसमा ॥२०॥
 जिणधम्मरया निच्चं भुंजंती नियपियेण सह भोए ।
 गब्भवई संजाया उप्पज्जइ डोहलो तत्तो ॥२१॥
 'जाणामि जइ पिएणं समयं मज्जामि नम्मयासलिले ।
 बहुपरिवारसमग्गा' तम्मि अपुज्जंतए तत्तो ॥२२॥

कंठगयपाणा सा जाया अच्चंतदुब्बलसरीर ।
 चिंतावण्णा चिट्ठइ, तं दट्ठं भणइ सहदेवो ॥२३॥
 'किं तुह पिए ! न पुज्जइ, संजाया एरिसा सरीरेण' ।
 भणइ इमा "मह पिययम !, मणम्मि नणु डोहलो गरुओ ॥२४॥
 जाओ गम्भवसेणं जइ किर मज्जामि नम्मयासलिले ।
 तुमए सह' तो एसो आसासिय कुणइ सामग्गि ॥२५॥
 बहुवणिउत्तसमेओ गिण्हिय नाणाविहाइं पणियाइं ।
 काऊण महासत्थं चलिओ अह सोहणदिणम्मि ॥२६॥
 अणवरयपयाणेहिं वियरंतो अत्थवित्थरं पत्तो ।
 नम्मयनईए तीरे आवासइ सोहणपएसे ॥२७॥
 दट्ठूणं नम्मयं तो बहुतरलतरंगरेहिरावत्तं ।
 अइगरुयविभूईए पिएण सह मज्जणं कुणइ ॥२८॥
 संपुण्णे डोहलए तत्थेव य नम्मयापुरं नाम ।
 रम्मनयरं निवेसिय कारवइ वरजिणाययणं ॥२९॥
 ता सोउं सव्वत्तो आगच्छइ तत्थ भूरिवणिलोगो ।
 जायइ य महालाभो पसिद्धमेवं पुरं जायं ॥३०॥
 अह सुंदरी वि तत्थेव वरपुरे नियगिहे निवसमाणी ।
 पसवइ पसत्थदिवसे वरकण्णं तीए सहदेवो ॥३१॥
 कारइ वद्धावणयं परितुट्ठो जेट्ठपुत्तजम्मे व ।
 विहियं च तीए नामं जह नम्मयसुंदरी एसा ॥३२॥
 कमसो परिवड्ढंती जाया नीसेसवरकलाकुसला ।
 सरमंडलं च सव्वं, विण्णायं अह विसेसेण ॥३३॥
 पत्ता य जोव्वणं सा असेसतरुणयणमणविमोहणयं ।
 ततो परा पसिद्धी संजाया तीए सव्वत्थ ॥३४॥
 सोऊण तीए रूवं सिरिदत्ता दुक्खिया विचित्तेइ ।
 'कह मह पुत्तस्स इमा होही भज्जा वरा कण्णा ? ॥३५॥

हा हा ! अहं अपुण्णा विवज्जिया जा समत्थसयणेहिं ।
 अहवा कित्तियमेतं एयं परिचत्तधम्माए ? ॥३६॥
 आलावो वि हु जेहिं परिचत्तो ते कहं महं कण्णं ।
 दिति ?" इय माणसेणं दुक्खेणं रोवए एसा ॥३७॥
 तं दट्टुणं भत्ता पुच्छइ "किं पिययमे ! तुहं दुक्खं ।
 साहीणे विं मम म्मी ? भणसु तयं जेण अवणेमि" ॥३८॥
 तो सा कहेइ सव्वं तं सोऊणं पयंपई पुत्तो ।
 "ताय ! विसज्जेह ममं, जेणाऽहं तत्थ वच्चामि ॥३९॥
 विणयाइएहिं सव्वे आराहिता मए इमा कण्णा ।
 परिणयव्वाऽवस्सं कायव्वो जणणिसंतोसो" ॥४०॥
 तो विविहपणियभंडेहिं पूरियं अइमहंतयं सत्थं ।
 काऊणं जणएणं विसज्जिओ नम्मयानयरे ॥४१॥
 पत्तो य तत्थ बाहिं सत्थस्स निवेसणं करेऊणं ।
 मायामहस्स गेहं पविसइ सुपसत्थदियहम्मि ॥४२॥
 मायामहमाईए सयणे दट्टुण हरसिओ धणियं ।
 गेहागयंति लोगट्ठिईइ गोरवए इयरे हिं ॥४३॥
 विणयाइएहिं सव्वे तत्थ व संतोऽणुरंजए एसो ।
 मग्गइ य आयरेणं तं कण्णं ते वि नो तस्स ॥४४॥
 दिति तओ तेण इमे, अच्चत्थं जाइया ततो ते वि ।
 कारविय विविह सवहे दिति तयं अन्नदियहम्मि ॥४५॥
 जाए धम्मवियारे कण्णावयणेहिं सो हु पडिबुद्धो ।
 सद्धम्मभावियमई जातो अह सावगो परमो ॥४६॥
 तो तुद्धा जणयाई पाणिग्गहणं विहीए कोरंति ।
 भुंजइ विसिट्ठभोए तीए समं धम्मकयचित्तो ॥४७॥
 केणइ कालेण तओ नियनयरं जाइ नम्मयासहिओ ।
 जणयाई पडिवत्तीपुव्वं पविसरइ नियगेहे ॥४८॥

सासू-ससुराईणं पडिवर्ति नम्मया विहेऊणं ।
 चिट्ठइ विणएण तओ अप्पवसं कुणइ सव्वं पि ॥४९॥
 सो वि महेसरदत्तो धम्मम्मि दढो कयत्थमप्पाणं ।
 लाभेण तीए मन्नइ विलसइ नाणाविणोएहिं ॥५०॥
 सिरिदत्ता वि पुणो वि हु पडिवज्जइ पुव्वसेवियं धम्मं ।
 अहअन्नया कयाई सा नम्मयसुंदरी हिट्ठा ॥५१॥
 आयरिसे नियवयणं पलोयमाणा गवक्खमारूढा ।
 जा चिट्ठइ ता साहू तत्थ तले कहवि संपत्तो ॥५२॥
 तो तीए पमायपरव्वसाए अनिरूविऊण पक्खित्ता ।
 पिक्का मुणिस्स सीसे, तो कुविओ जंपए साहू ॥५३॥
 “जेणाऽहं पिक्काए, भरिओ सव्वंगियं पि सो पावो ।
 पियविप्पओगदुक्खं मह वयणेणं समणुभवउ ॥५४॥
 बहुविहदुक्खकिलंतो पभूयकालं तु मज्झ वयणेणं” ।
 तं सोउं नम्मयसुंदरी वि सहस त्ति संभंता ॥५५॥
 उत्तरिय गवक्खाओ, निंदंती अप्पयं बहुपयारं ।
 लूहित्ता वत्थेणं, पणमइ मुणिचलणजुयलम्मि ॥५६॥
 परमेणं विणएणं, खामित्ता भणइ “जगजियाणंद ! ।
 संसारियसोक्खाइं, मा मह एवं पणासेहि ॥५७॥
 धिद्धी ! अहं अणज्जा जीइ पमायाउ एरिसं काउं ।
 बहुविहदुक्खसमुद्दे खित्तो अइभीसणे अप्पा ॥५८॥
 अज्जं चिय सामि ! महं सव्वाइं पणट्टयाइं सोक्खाइं ।
 अज्ज अहं संजाया पाविट्ठाणं पि पावयरी ॥५९॥
 तुम्हारिसा महायस ! कुणंति दुहियाण उवरि कारुणं ।
 ता करुणारससायर ! भयवं ! अवणेहि मह सावं” ॥६०॥
 इय विलवंती बहुहा भणिया उवओगपुव्वयं मुणिणा ।
 “मा मा विलवसु मुद्धे ! एवं अइदुक्खसंतत्ता ॥६१॥

कोववसमुवगएणं दिण्णो सावो तुहं मए भदे ! ।
 संपइ पसण्णहियओ, तुह उवरिं नत्थि मे कोवो ॥६२॥
 किंतु अणाभोगेण वि, भणिओ भावो हु भाविओ एसो ।
 तुमए अन्नभवंतरसुनिकाइयकम्मदोसेणं ॥६३॥
 पियविरहमहादुक्खं अणुभवियव्वं तए चिरं कालं ।
 न हु नियकयकम्माणं संसारे छुट्टए को वि ॥६४॥
 वच्छे ! हसमाणेहिं जं बज्झइ पावयं इह जिएहिं ।
 रेवंतेहिं तयंखलु नित्थरियव्वं न संदेहो” ॥६५॥
 तो नाउं परमत्थं वंदिय साहू विसज्जिओ तीए ।
 तम्मि गए रुवमाणी पिएण पुट्टा कहइ सव्वं ॥६६॥
 आसासिऊण तेण वि भणिया ‘कुण जिणजईण पूयाई ।
 दुरियविघायणहेउं न हु रुन्नेणं हवइ किं पि’ ॥६७॥
 पडिवज्जिय तव्वयणं कुणइ तवं पूयए जिणाईए ।
 कइहिं वि दिणेहिं ततो पुणो वि भोगप्परा जाया ॥६८॥
 एवं परिगलमाणे काले भित्तेहिं एरिसं भणिओ ।
 सो हु महेसरदत्तो एगंते ठविय सव्वेहिं ॥६९॥
 “अत्थोवज्जणकालो मित्त ! इमो वट्टए सुपुरिसाणं ।
 पुव्वपुरिसज्जियत्थं लज्जिज्जइ विलसमाणेहिं ॥७०॥
 ता गंतु जवणदीवं विढवित्ता नियभुयाहिं बहु दव्वं ।
 विलसामो” तव्वयणं पडिवज्जइ रंजिओ एसो ॥७१॥
 अह महया कट्टेणं जणणी-जणयाण मोक्कलावेउं ।
 गिण्हइ बहुप्पयारं जं जं भंडं तहिं जाइ ॥७२॥
 भणिया य नम्मयासुंदरी वि “कंते ! समुद्दपारम्मि ।
 गंतव्वं मह होही चिट्टसु ता तं सुहेणेत्थ ॥७३॥
 जम्हा अइसुकुमालं, तुह देहं न हु सहिस्सई कट्टं ।
 तम्हा देव-गुरूणं, भत्तिपरा चिट्ट अणुदियहं” ॥७४॥

१. ला. “ए बहु का” ॥ २. ला. रुयमा” ॥ ३. ला. “याणि ॥

तो भणइ इमा “पिययम ! मा जंपसु एरिसाइं वयणाइं ।
 जम्हा उं तुज्झ विरहं न समत्था विसहिउं अहयं ॥७५॥
 कुट्टं पि तए समयं वच्चंतीए अईव सुहजणयं ।
 ता निच्छएण तुमए सह गंतव्वं मए नाह ?” ॥७६॥
 तन्नेहमोहियमई पडिवज्जिय तो महंतसत्थेण ।
 गंतूण जलहितीरे आरुहइ पहाणवहणेसु ॥७७॥
 जा जाइ जलहिमज्जे पहाणअणुकूलवायजोगेण ।
 ताव तर्हि केणाऽवि हु उग्गीयं महरसद्देण ॥७८॥
 तं सोऊणं बाला सरलक्खणजाणिया पहिट्टमुही ।
 जंपइ “एसो पिययम ! गायइ कसिणच्छवी पुरिसो ॥७९॥
 अइथूलपाणिजुयलो, बब्बरकेसो रणम्मि दुज्जेओ ।
 उण्णयवच्छे साहस्सिओ य बत्तीसवारिसिओ ॥८०॥
 गुज्झम्मि य रत्तमसो इमस्स ऊरुम्मि सामला रेहा” ।
 इय सोउं से भत्ता, गयनेहो चितए एवं ॥८१॥
 “नूणं इमेण समयं वसइ इमा तो वियाणई एवं ।
 ता निच्छएण असई एसा अच्चंतपाविट्ठा ॥८२॥
 आसि पुरा मह हियए महासई साविया इमा दइया ।
 किंतु कयं मसिकुच्चयदाणमिमीए कुलदुगे वि ॥८३॥
 ता किं खिवामि एयं उयहिम्मि उयाहु मोडिउं गलयं ।
 मारेमि आरडंती किं वा घाएमि छुरियाए” ॥८४॥
 इय चितइ जावेसो बहुविहमिच्छवियप्पपरिकलिओ ।
 ता कूवयट्टियनरो जंपइ ‘रि ! धरह वहणाइं ॥८५॥
 एसो रक्खसदीवो, गिणहह इह नीर-इंधणाईयं” ।
 ते वि तयं पडिवज्जिय धरंति तत्थेव वहणाइं ॥८६॥
 पेच्छंति तयं दीवं गिणहंती इंधणाइयं सव्वं ।
 सो वि महेसरदत्तो मायाए जंपए एवं ॥८७॥

'अइरमणीओ दीवो सुंदरि ! ता उत्तरित्तु पेच्छमो' ।
 सा वि परितुट्टुचित्ता तेण समं भमइ दीवम्मि ॥८८॥
 अण्णण्णेषु वणेसुं कमेण पिच्छंति सरवरं एक्कं ।
 उत्तुंगपालिसंठियनाणाविहतरुवरसणाहं ॥८९॥
 अइसच्छ-साउ-सीयलजलपुण्णं सयलजलयरसणाहं ।
 दट्टूण तयं मज्जंति दो वि तत्तो वि उत्तरिउं ॥९०॥
 जा तव्वणगहणेसुं भमंति ता सच्चवंति एगत्थ ।
 रमणीयलयाहरयं तम्मज्जे करिय सत्थरयं ॥९१॥
 दोण्णि वि णुवण्णयाइं खणेण ★^२ निद्दावसंगया बाला ।
 तो चित्तइ से भत्ता निग्घणहियओ जहा "एत्थ ॥९२॥
 मुंचामि इमं जेणं मरइ सयं चेव एगिया रण्णे" ।
 इय चित्तिरुण सणियं सणियं उस्सक्किउं जाइ ॥९३॥
 वहणेसुं विलवंतो माइल्लो उच्चउच्चसद्धेहिं ।
 सत्थिल्लएहिं पुट्ठो, 'रुयसि किमत्थं ?' ति सो भणइ ॥९४॥
 "सा मम भज्जा भाउय ! ख द्धा घोरेण छुहियरक्खेण ।
 तं दट्टुं भयभीओ अहमेत्थ पलाइउं पत्तो ॥९५॥
 तो पूरह वहणाइं मा एत्थ समागमिस्सई रक्खो" ।
 ते वि तओ भयभीया पूरंति झड त्ति वहणाइं ॥९६॥
 सो वि हु आहाराई दुक्खकंतो व्व मुच्चइ खणेण ।
 रोवइ विलवइ कुट्टइ उर-सिरमाईणि मायाए ॥९७॥
 हियएणं पुण तुट्ठो चित्तइ 'नणु सोहणं इमं जायं ।
 जं लोगऽववाओ वि हु हु परिहरिओ एवविहियम्मि' ॥९८॥
 सत्थिल्लएहिं तत्तो पडिबोहिय भोइओ इमो वि तओ ।
 अइमहया कट्ठेणं संजाओ विगयसोगो व्व ॥९९॥
 पत्ता य जवणदीवं सव्वेसि वि हिययवंछियाओ वि ।
 जाओ अहिओ लाभो कमेण गिण्हित्तु पडिपणिए ॥१००॥

वलिऊणं खेमेणं पत्ता सव्वे वि कूववंद्रम्मि ।
 सो वि महेसरदत्तो अक्खइ सयणाण रोवंतो ॥१०१॥
 जह 'मह दइया खद्धा रक्खसदीवम्मि घोररक्खेण' ।
 ते वि तओ दुक्खत्ता कुणंति तीसे मयगकिच्चं ॥१०२॥
 परिणाविओ य एसो अण्णं कुलबालियं अइसुरूवं ।
 तीए य बद्धनेहो भुंजइ भोगे अणण्णसमे ॥१०३॥
 एत्तो य नम्मयासुंदरी वि जा उट्टिया खणद्धेण ।
 तो न हु पिच्छइ कंतं तत्थ तओ चितए एवं ॥१०४॥
 नूणं परिहासेणं ल्हिक्को नणु होहिई महंदइओ' ।
 वाहरइ तओ "पिययम ! देसु महं दंसणं सिग्घं ॥१०५॥
 मा कुण बहु परिहासं बाढं उत्तम्मए महं हिययं" ।
 जा एइ न एवं पि हु सासंका उट्टिउं ताव ॥१०६॥
 परिमग्गइ सव्वत्तो तह वि अपिच्छंतिया सरे जाइ ।
 भमइ य वणविवरेसु कुणमाणी बहुविहे सहे ॥१०७॥
 'हा नाह ! ममं मोत्तुं, दुहियमणाहं कर्हि गओ इण्ह ?' ।
 सोऊणं पडिसदं, धावइ तो तम्मही बाला ॥१०८॥
 विज्झंती खाइरकंटएहिं पाएसु गलियरुहिरोहा ।
 गिरिविवरे भमिऊणं पुणो वि सा जाइ लयहरए ॥१०९॥
 एत्थंतरम्मि सूरो दट्टूणं तीए तारिसमवत्थं ।
 पडिकाउं अचयंतो लज्जाए व दूरमोसरिओ ॥११०॥
 अत्थगिरीए सूरो ल्हसिउं अवरोयहिम्मि निब्बुड्डो ।
 अहवा अत्थमइ च्चिय सूरो पडिकाउमचयंतो ॥१११॥
 एत्थंतरम्मि तो सा तत्थेव लयाहरम्मि परिखिन्ना ।
 सोगत्ता बीहंती नुवज्जए पल्लवत्थरणे ॥११२॥
 उत्थरइ य हिमनियरो सव्वत्थोवहयलोयणप्पसरो ।
 अहव पसरंति मलिणा परितुट्ठा मित्तनासम्मि ॥११३॥

इय जा खणंतरेक्कं चिट्ठइ सा दुक्खिया तर्हि बाला ।
 ता उग्गमेइ राया राय व्व तमारिखयकारी ॥११४॥
 तं दट्टूणूससिया मण्णइ उज्जीवियं व अप्पाणं ।
 अहवा पीऊसरुई आसासइ जं किमच्छेरं ॥११५॥
 तो बहुविहं चिंतावाउलाइ अइदुक्खियाए सा रयणी ।
 चउजामनिम्मिया वि हु जामसहस्सं व वोलीणा ॥११६॥
 अह उग्गयम्मि सूरे सा नम्मयसुंदरी दुगुणदुक्खा ।
 पुण रेविउं पयत्ता, सुमरिय नियनाहगुणनियरं ॥११७॥

अवि य-

हा ! पडिवण्णय वच्छल ! दक्खिन्नयनीरपूरसरिनाह ! ।
 हा ! करुणायर ! अहयं, कह मुक्का एक्किया रण्णे ॥११८॥
 एवं विलवंती सा पुणो वि गच्छइ सरोवरंतेण ।
 पुणरवि हिंडइ रण्णे पुच्छंती हरिणमाईए ॥११९॥
 किं दिट्ठो मह भत्ता कत्थइ तुब्भेहिं एत्थ भमडंतो ? ।
 पडिसइं सोऊणं पविसइ गिरिकुहरमज्झम्मि ॥१२०॥
 तत्थ वि तमपेच्छंती पुणो वि निग्गच्छई तओ एवं ।
 वोलीणा पंच दिणा आहारविवज्जियाइ दढं ॥१२१॥
 अह छट्टम्मि दिणम्मी भमडंती जाइ उयहितीरम्मि ।
 जत्थाऽऽसि पवहणाइं चितइ तं सुण्णयं दट्टुं ॥१२२॥
 'रे रे ! जीव ! अलक्खण ? मुहाए किं खिज्जसे तुमं एवं ।
 जं अन्नभवोवत्तं तं को हु पणासिउं सत्तो ? ॥१२३॥
 रे जीव ! तया मुणिणा आइट्टुं जं तयं इमं मण्णे ।
 ता सम्मभावणाए सहसु तयं किं वरुण्णेणं ?' ॥१२४॥
 इय चित्तिरुण तो सा गंतूण सरोवरम्मि नियदेहं ।
 षक्खालिय संठाविय ठवणं तो वंदई देवे ॥१२५॥
 काऊण पाणवित्तिं फलेहिं तो गिरिगुहाय मज्झम्मि ।
 मट्टियमयजिणपडिमं काउं वंदेइ भत्तीए ॥१२६॥

पूयइ वरकुसुमेहिं कुणइ बलिं बहुफलेहिं पकेहिं ।
रोमंचंचियदेहा संथुणइ मणोहरगिराए ॥१२७॥

अवि य-

“जय संसारमहोयहिनिबुडुजंतूण तारणतरंड ? ।
जय भवभीयजणाणं सरणयं ! जिणनाह ! जगपणय ! ॥१२८॥
जय दुहियाणं दुहहर ! रगदोसारिविरियनिह्लण ! ।
जय मोहमल्लमूरण ! जय चिताव(च ?)त्त ! जिणनाह ! ॥१२९॥
जय निदापरिवज्जिय ! छुहा-पिवासा-जरा-भयविमुक्क ! ।
मय-माय-खेयवज्जिय ! गयजम्मण-मरण ! जयनाह ! ॥१३०॥
जयहि अविमहय अपमाय देव ! सासयसुहम्मि संपत्त ! ।
सिवपुरपवेसणेणं कुणसुदयं मज्झ दुहियाए” ॥१३१॥
इय जिणथुइजत्ताए सुनिकाइयकम्ममणुहवंतीए ।
जा जाइ कोइ कालो ता चितइ अन्नया एसा ॥१३२॥
‘जइ कहवि भरहवासे गमणं मह होइ पुण्णजोगेण ।
तो सव्वसंगचायं काऊण वयं गहिस्सामि’ ॥१३३॥
इय चित्तिऊण रयणायरस्स तीरम्मि उब्भियं तीए ।
चिधं महामहंतं जं पयडइ भिन्नवहणित्तं ॥१३४॥
एत्थंतरम्मि तीसे चुल्लपिया वीरदासनामो जो ।
बब्बरकूलं जंतो संपत्तो तप्पएसम्मि ॥१३५॥
दट्टूण तयं चिधं लंबाविय पवहणं समुत्तरिडं ।
पयमग्गेणं पत्तो थुणइ जिणं नम्मया जत्थ ॥१३६॥
सोऊण तीए सहं सासंको ‘नम्मया किमेस ?’त्ति ।
जा पत्तो दिट्ठिपहे ता सहसा उट्ठिया बाला ॥१३७॥
दट्टूण चुल्लपियरं कंठम्मि विलगिडं घणं रुन्ना ।
सो वि तयं ओलक्खिय, मुंचइ नयणेहिं सलिलोहं ॥१३८॥

पुट्टा य 'किं गुणोयहि ! वच्छे ! तं इत्थ एक्किया रण्णे ?' ।
सा वि असेसं वत्तं जं जहवत्तं परिकहेइ ॥१३९॥

पेच्छह विहिणो दुव्विलसियं ति भणिऊण नेइ तं वहणे ।
ण्हाणाई काराविय भुंजावइ मोयगाईयं ॥१४०॥

चलिओ य ततो कमसो पत्तो अणुकूलवायजोगेण ।
बब्बरकूले तत्तो ताडावइ पडउडि रम्मं ॥१४१॥

उत्तारिय भंडाई पडउडिमज्झम्मि नम्मयं ठविउं ।
गिण्हिय उवायणाई गच्छइ नरनाहपासम्मि ॥१४२॥

नरवइणा सम्माणे विहिए तो जाइ निययठाणम्मि ।
जावऽच्छइ कइ वि दिणे ता जं जायं तयं सुणह ॥१४३॥

अत्थि तर्हि वत्थव्वा हरिणी नामेण सुंदर गणिया ।
नीसेसकलाकुसला गोरव्वा नरवरिदस्स ॥१४४॥

वेसायणप्पहाणा उब्भडलावण्णजोव्वणुम्मत्ता ।
सोहग्गवरपडागा सुपसिद्धा रिद्धिपरिकलिया ॥१४५॥

सा रण्णा परिभणिया समत्थ वेसाण भाडियविभागं ।
गिण्ह तुमं मज्झं पुण विढविसि जं तं तयं देयं ॥१४६॥

जो य इह पोयसामी आगमिही सो य अट्टसहसं तु ।
दीणारणं देही तुज्झं मज्झ प्पसाएण ॥१४७॥

एसा तत्थ ववत्था वेसाणं अत्थि राइणा समयं ।
हरिणीए तओ चेडी पट्टविया वीरदासस्स ॥१४८॥

पासम्मि तीए भणिओ सो जह 'वाहरइ रिण्णिया तुब्भे' ।
तेण वि सा पडिभणिया "जइ वि हु रूवाइगुणकलिया ॥१४९॥

अण्णित्थी तह वि अहं भुंजामि न वज्जिउं नियकलत्तं" ।
तीए वि तओ भणियं 'आगंतव्वं तए तह वि' ॥१५०॥

तो जाणिय भावत्थो, अप्पइ दीणारसहसमट्टहियं ।
सा वि तयं घेत्थुणं, वच्चइ हरिणीए पासम्मि ॥१५१॥

सा तं ददुं जंपइ 'किमेइणा ? एउ वणियपुत्तो' त्ति ।
 सा वि पुणो गंतूणं अक्खइ हरिणीए जं भणियं ॥१५२॥
 तं सुणिय वीरदासो चितइ हियएण "किं मह इमाओ ।
 कार्हिति जओ सीलं भंजेमि न पलयकाले वि ॥१५३॥
 गच्छामि ताव तहियं पच्छा काहामि जं जहाजुत्तं" ।
 इय चित्तिऊण गच्छइ तीए भवणं अइसुम्मं ॥१५४॥
 तो महरमंजलार्हि वियड्ढभणिईर्हि साणुरागार्हि ।
 सा जंपइ सवियारं तहवि न सो चलइ मेरु व्व ॥१५५॥
 एत्थंतरम्मि कण्णे कहियं हरिणीए तीए चेडीए ।
 जह "सामिणी ! एयघरे अच्छइ महिला अणणसमा ॥१५६॥
 सा जइ कर्हिचिं तुब्भं आएसं कुणइ तो हु रयणाणं ।
 पूरइ निस्संदेहं, तुह गेहं कित्थ बहुएणं ? ॥१५७॥
 जम्हा हु रूव-जोव्वणलावण्णगुणेर्हि तीए सारिच्छ ।
 दीसइ न मच्चलोए" तं सोउं हरिणिया लुद्धा ॥१५८॥
 चितइ अवहरिऊणं, आणेतु धरेमि कहवि पच्छण्णं ।
 तत्थुप्पणमई सा तो भणइ तयं वणियपुत्तं ॥१५९॥
 'अप्पेहि नाममुद्दं खणमेक्कं जेण ईए सारिच्छं ।
 अण्णं नियकरजोगं मुद्दं कारेमि' तो एसो ॥१६०॥
 अप्पइ य निव्वियप्पो सा वि तयं देइ दासचेडीए ।
 हत्थम्मि ततो एसा गंतूणं नम्मयं भणइ ॥१६१॥
 'सो वीरदाससेट्ठी, हक्कारइ पच्चयत्थमह तेण ।
 एयं मुद्दारयणं पट्टवियं तुज्झ ता एहि' ॥१६२॥
 दट्टूण वीरदासस्स संतियं नाममुद्दियारयणं ।
 तो सा वि निव्वियप्पा, तीए समं जाइ तत्थ गिहे ॥१६३॥
 अवदारेण पवेसिय छूढा गुत्तम्मि भूमिहरयम्मि ।
 मुद्दं पि वीरदासस्स अप्पियं कुणइ पडिर्वत्ति ॥१६४॥

उट्टित्तु ततो एसो सट्टाणे जाइ तत्थ तमदट्टं ।
 गविसइ सव्वत्तो च्विय, पुच्छंतो परियणं सव्वं ॥१६५॥
 जाव न केण वि सिट्ठा तीए वत्ता वि तो गवेसेइ ।
 उज्जाण-हट्ट-माइसु तत्थ वि नो जाव उवलद्धा ॥१६६॥
 तो दुक्खपीडियंगो इमं उवायं विचित्तए एसो ।
 'जेणऽवहरिया बाला किं सो पयडेइ मह पुरओ ?' ॥१६७॥
 तो वच्चामि इओऽहं बालं पयडेइ जेण सो दुट्ठो ।
 इय भावणाइ भंडं, घेतूणं चलइ घरहुत्तं ॥१६८॥
 पत्तो भरुयच्छपुरे संजत्तियवणियसंकुले रम्मे ।
 तत्थऽत्थि तस्स मित्तो जिणदेवो नाम वरसट्ठो ॥१६९॥
 तस्सऽक्खइ सो सव्वं भणिओ 'तं जाहि तत्थ वरमित्त ! ।
 कत्थ च्चि गवेसिऊणं तं बालं एत्थ आणेहि' ॥१७०॥
 सो वि तयं पडिवज्जिय सामग्गि करिय जाइ तत्थेव ।
 जाणाविया य वत्ता नम्मयपुरिसव्वसयणाणं ॥१७१॥
 सोऊण तयं ताणि वि दुक्खत्ताइं रुवति अइकलुणं ।
 एत्तो य नम्मयाए जं वित्तं तं निसामेह ॥१७२॥
 नाऊण वीरदासं गयं तओ हरिणियाए सा वुत्ता ।
 "भदे ! कुण वेसत्तं माणसु विविहाइंसोक्खाइं ॥१७३॥
 सह-रस-रूव-गंधे फासे अणुहवसु मणहरे निच्चं ।
 महघरवत्ता एसो, सव्वा वि हु तुज्झतणिय" त्ति ॥१७४॥
 तं सोउं नम्मयसुंदरी वि विहुणित्तु करयले दो वि ।
 पभणइ 'मा भण भदे ?, कुल-सीलविदूसणं वयणं' ॥१७५॥
 तो रुसिऊणं हरिणी ताडावइ तं कसप्पहारेहिं ॥
 फुल्लियकिंसुयसरिस्ता, खणेण जाया तओ एसा ॥१७६॥
 'अज्ज वि न किंचि नट्टं, पडिवज्जसु मज्झ संतियं वयणं' ।
 इय मेहरीए भणिए भणइ इमा 'कुणसु जं मुणसि' ॥१७७॥

१. ला. सयलं ॥ २. सं.वा.सु. जा न वि के ॥ ३. ला. विविहाणि सोक्खाणि ॥

गाढयरं रुसिरुणं जाव पवत्तेइ तिक्खदुक्खाइ ।
 सा वेसा ता इयरा सुमरइ परमिट्टिवरमंतं ॥१७८॥
 तस्स पभावेण तओ, तड ति पाणेहिं हरिणिया मुक्का ।
 रण्णो निवेइयम्मि, तम्मरणे भणइ तो राया ॥१७९॥
 'किंचिसरूवं अण्णं तट्टाणे ठवसु गुणगणसम्मगं ।
 भो मंति ! ममाऽऽणत्ति सिग्घं संपाडसु इमं' ति ॥१८०॥
 नरवइणो आणाए मंती जा तत्थ जाइ ता सहसा ।
 दट्टूण नम्मयं सो अच्चंतं हरिसिओ चित्ते ॥१८१॥
 जंपइ 'मेहरियपयं भदे ! तुह देमि रायवयणेणं' ।
 सा वि तयं पडिवज्जइ परिभाविय निग्गमोवायं ॥१८२॥
 ठविऊण मेहरिं तं मंती वि हु जाइ निययठाणम्मि ।
 सा वि हु हरिणीदव्वं, वेसाणं देइ परितुट्टा ॥१८३॥
 तं कहियं केणाऽवि हु रण्णो तेणाऽवि जंपियं एवं ।
 आणेह तयं एत्थं जंपाणं जाइ तो रम्मं ॥१८४॥
 आरोविऊण तम्मि जा पुरिसा निति नयरमज्जेणं ।
 ता चिंतइ "मह सीलं को खंडइ जीवमाणीए ? ॥१८५॥
 को पुण इत्थ उवाओ ?" चिंतंती नियइ एगठाणम्मि ।
 अइकुहियदुब्धिगंधं पवहंतं गेहनिद्धवणं ॥१८६॥
 तं पेच्छिऊण जंपइ 'भो भो बाढं तिसाइया अहयं' ।
 तो मेल्लवइ जाणं जाणवई दरिसिउं विणयं ॥१८७॥
 जा आणंति जलं ते ताव इमा उत्तरित्तु जाणाओ ।
 सव्वंगियमप्पाणं चिक्खिल्लेणं विलिपेइ ॥१८८॥
 पियइ तयं दुग्गंधं अमयं नीरं ति भाणिउं बाला ।
 लोलए महीइ पंसुं खिवइ सिरे देइ अक्कोसे ॥१८९॥
 पभणइ य 'अहो लोया ! अहयं इंदाणिया ममं नियह' ।
 गायइ नच्चइ रोवइ भयभीया सीलभंगस्स ॥१९०॥

पुरिसेहिं तयं सिद्धं निवस्स सो मण्णिउं गहं लगं ।
 पेसेइ मंत-तंताइवाइणो तेहिं किरियाए ॥१९१॥
 आढत्ताए भाले चढाविउं लोयणे फुरुफुरंती ।
 आकोसिरुण गाढं अहिययरगहं पदंसेइ ॥१९२॥
 तो तेहिं परिचत्ता हिंडइ नयरस्स मज्झयारम्मि ।
 डिंभेहिं परियरिया, हम्मंती कट्टलिट्टूहिं ॥१९३॥
 इय एवमाइ सव्वं कवडगगहदंसणं पयासेइ ।
 सीलस्स रक्खवणत्थं, धम्मं हियएण सरमाणी ॥१९४॥
 अह अण्णया कयाई बहुविहलोए हिं परिवुडा बाला ।
 निम्मल्लमालियतणू गायइ जिणरासयं रम्मं ॥१९५॥
 तं दट्टुं जिणदेवो पुच्छइ 'को तं गहोऽसि जिणभत्तो ?' ।
 सा भणइ 'ससागारं तेण न साहेमि नियनामं' ॥१९६॥
 बीयम्मि दिणे उज्जाणसम्मूहं जाव चल्लिया एसा ।
 तो डिंभाई लोगो नियत्तिउं जाइ सट्टाणे ॥१९७॥
 सा वि हु एगंतठिया वंदइदेवे विहीए जा तावए ।
 कत्तो वि हु जिणदेवो समागओ तो तयं दट्टुं ॥१९८॥
 वंदामो त्ति भणित्ता पणमइ सीसेण सा वि वरसट्टुं ।
 नाऊणं नियचरियं अक्खइ सव्वं जहावत्तं ॥१९९॥
 तो जंपइ जिणदेवो "वच्छे ! तुह गविसणत्थमायाओ ।
 भरुयच्छओ अहयं पट्टविओ वीरदासेण ॥२००॥
 जम्हा सो मह मित्तो, पाणपिओ पेसिओ अहं तेण ।
 ता परिचयसु विसायं सव्वं पि हु सुंदरं काहं ॥२०१॥
 पर किंतु हट्टमग्गे घडगसहस्सं घयस्स महतणयं ।
 जं चिट्टइ तं तुमए लउडपहारेहिं भेत्तव्वं" ॥२०२॥
 इय संकेयं काउं दोन्नि वि पविसंति नयरमज्झम्मि ।
 विहिउं च बीयदिवसे सव्वं जं मंतियं आसि ॥२०३॥

तो निवई हकारिय जिणदेवं भणइ “हा कहं तुज्झ ।
 हाणी महामहंता विहिया एयाइ पावाए ॥२०४॥
 ता रयणायरपारे अम्हऽवरोहेण खिवसु एयं ति ।
 जेणित्थं अच्छंती कुणइ अणत्थंतरे बहुए” ॥२०५॥
 आएसो त्ति भणित्ता नियलाविय नेइ निययठाणम्मि ।
 छेडित्ताण्हावेउं परिहाविय भोइउं विहिणा ॥२०६॥
 वहणे चडाविरुणं पत्तो खेमेण पुण वि भरुयच्छे ।
 पविसित्तु निययगेहे जाणावइ नम्मयपुरम्मि ॥२०७॥
 जा ते संवहिरुणं चलंति ता एइ सो तयं घेतुं ।
 जणयाई दट्टुणं कंठविलग्गा रुवइ तो सा ॥२०८॥
 ता उसभसेण-सहदेव-वीरदासाइ बंधवा सव्वे ।
 सरिरुणं बालत्तं तीसे रोयंति अइकलुणं ॥२०९॥
 पुट्ठा य तेहिं सव्वं जा सा साहेइ निययवुत्तंतं ।
 सुणमाण्णं दुक्खं, सव्वाण वि तक्खणे जायं ॥२१०॥
 अह तीए संगमम्मी विहिया पूया जिणंदचंदाणं ।
 सम्माणिओ य संघो दिण्णाणि महंतदाणाणि ॥२११॥
 विहियं वद्धावणयं विम्हयजणणं समत्थलोयाणं ।
 जिणदेवसावओ वि हु जाइ पुणो निययनयरम्मि ॥२१२॥
 जा नम्मयसुंदरिसंगमम्मि दिवसा सुहेण वोळित्ति ।
 कइ वि तर्हि ता पत्तो विहरंतो साहुपरियरिओ ॥२१३॥
 तियसाइवंदणिज्जो दसपुव्वपगासपयडियपयत्थो ।
 भव्वारविदभाणू सूरी सिरिअज्जहत्थि त्ति ॥२१४॥
 तो नाऊणं सूरिं समागयं तस्स वंदणट्टाए ।
 भत्तिभरनिब्भराइं सव्वाइं जंति उज्जाणे ॥२१५॥
 वंदित्तु तओ सूरिं, नच्चासन्नम्मि सन्निविट्ठाइं ।
 सूरी वि ताण धम्मं कहेइ जिणदेसियं रम्मं ॥२१६॥

जह 'एत्थं संसारे सकम्मफलभोइणो इमे जीवा ।
 पार्विति सुहं दुक्खं जं विहियं अण्णजम्मम्मि' ॥२१७॥
 तं सुणिय वीरदासो पुच्छइ करसंपुडं सिरे काउं ।
 "भयवं ! किमण्णजम्मे विहियं मह भाइधूयाए ? ॥२१८॥
 जेणं सीलजुया वि हु पत्ता एवंविहं महादुक्खं" ।
 सूरी वि भणइ "सावय ! जं पुट्टं तं निसामेह ॥२१९॥
 अत्थि इह भरह्वासे, मज्झिमखंडम्मि पव्वओ विइओ ।
 उत्तुंगसिहरसंचयसमाउलो खलियरविपसरो ॥२२०॥
 ततो इमा पसूया, महानई नम्मया जइणवेगा ।
 तीए य अहिट्टाइगदेवी वि हु नम्मया अत्थि ॥२२१॥
 सा मिच्छतोवहया नम्मयतडसंठियं महासत्तं ।
 धम्मरुई अणगारं दट्टुणं कुणइ उवसगे ॥२२२॥
 नाणाविहे सुघोरे निच्चलचित्तं मुणिं मुणेऊण ।
 उवसंता संजाया सम्मत्तधरा ततो चविउं ॥२२३॥
 एसा हु नम्मयासुंदरि त्ति जाया सुया उ तुम्हाण ।
 पुव्वभवब्भासेण य एईए नम्मया इट्टा ॥२२४॥
 जं तइया सो साहू खलीकओ दुट्टचित्तजुत्ताए ।
 तं सुनिकाइयकम्मं भुत्तं एयाइ दुव्विसहं" ॥२२५॥
 तो सोउं नियचरियं संजायं तीए जाइसरणं तु ।
 संवेगगयाए तओ गहिया दिक्खा गुरुसमीवे ॥२२६॥
 दुक्करतवनिरयाए ओहिण्णाणं इमीए उप्पण्णं ।
 ततो पवत्तिणित्ते ठविया सूरीहिं जोग्ग त्ति ॥२२७॥
 विहरंती य कमेणं संपत्ता कूववंदनगरम्मि ।
 सिरिदत्ताए गेहे वसहिं मग्गित्तु उत्तरिया ॥२२८॥
 बहुसाहुणीहिं सहिया कहइ य धम्मं जिणिदपण्णत्तं ।
 सुणइ महेसरदत्तो सिरिदत्तासंजुओ निच्चं ॥२२९॥

अह अण्णम्मि दिणम्मी संवेगत्यं इमस्स सा गुणइ ।
 सरमंडलं असेसं, जहा इमेयारिससरेण ॥२३०॥
 होइ नरो इयवन्नो तहा इमेयारिसेण इयवरिसो ।
 एवंविहेण य पुणो इयआऊ होइ अवियप्पो ॥२३१॥
 एवंविहसहेणं होइ मसो गुञ्जदेसभायम्मि ।
 एवंविहेण य पुणो, रेहा ऊर(रु)म्मि संभवइ' ॥२३२॥
 एमाई अन्नं पि हु सव्वं सरलक्खणं सुणेऊण ।
 सो हु महेसरदत्तो चित्तम्मि विभावए एवं ॥२३३॥
 'नूणं मह दइयाए सरलक्खणजाणियाए आइट्ठो ।
 गुञ्जपएसम्मि मसो, रेहा वि य तस्स पुरिसस्स' ॥२३४॥
 तो विलविउं पयत्तो, 'हा हा ! अइनिग्घिणो' अहं पावो ।
 कूरो अणज्जचरिओ अवियारियकज्जकारि त्ति ॥२३५॥
 जेण मए सा बाला सरलक्खणजाणिया अरण्णम्मि ।
 एगागिणी विमुक्का ईसावसविनडियमणेण ॥२३६॥
 करपत्तं वररयणं हारवियं निच्छयं अपुण्णेण ।
 मरणेण विणा सुद्धी नत्थि महं किं बहुएण ?' ॥२३७॥
 इय विलवंतं सोउं भणइ इमा 'नम्मया अहं साउ ।
 कहइ य जं जहवत्तं, नीसेसं अप्पणो चरियं ॥२३८॥
 ता संपइ मह भाया तुमं अओ कुणसु संजमं विउलं' ।
 सो वि तयं सोऊणं खामइ परमेण विणएण ॥२३९॥
 'खमसु तयं जं तइया अइनिद्दयकूरचित्तजुत्तेण ।
 घोरम्मि दुहसमुदे पक्खित्ता सुद्धसीला वि' ॥२४०॥
 तो भणइ नम्मयासुंदरी वि 'संतप्प मा तुमं एवं ।
 अणुभवियव्वे कम्मे निमित्तमित्तं तुमं जाओ ॥२४१॥
 जंपइ तओ महेसरदत्तो गिण्हामि संजमं इर्णिह ।
 नीसेसकम्मदलणं आगच्छइ को वि जइ सूरी ॥२४२॥

एत्थंतरम्मि पत्तो अज्जसुहत्थी गुरू तओ एसो ।
 तस्स सयासे गिण्हइ सिरिदत्तासंजुओ दिक्खं ॥२४३॥
 काऊण तवं दोण्णि वि पवरविमाणम्मि सुखरा जाया ।
 तत्तो वि चुया कमसो मोक्खं जाहिति गयदुक्खं ॥२४४॥
 मयहरिया वि हु निययं जाणित्ता आउयस्स पज्जंतं ।
 विहिउं विहिणाऽणसणं तियसो तियसालये जाया ॥२४५॥
 तत्तो चविउं होही अवरविदेहे मणोरहो नाम ।
 रायसुओ गुणकलिओ भोत्तुं रज्जं तर्हि विउलं ॥२४६॥
 लद्धूण संजमसिरि, उप्पाडित्ता य केवलं नाणं ।
 संबोहिऊण भविए, गच्छिस्सइ सासयं ठाणं ॥२४७॥
 इय पवरसईए नम्मयासुंदरीए,
 चरियमइ पसत्थं कारयं निव्वुईए ।
 हरिजणयसुहिंडीमज्झयाराउ किंची,
 लिहियमणुगुणाणं देउ सोक्खं जणाणं ॥२४८॥
 इति नर्मदासुन्दरीकथानकं समाप्तमिति ॥५४॥
 तदनन्तरमभयश्रीकथानकं कथ्यते-

[५५. अभयश्रीकथानकम्]

जंबुद्दीवे दीवे भारहखेत्तम्मि अत्थि सुपसिद्धं ।
 रयणावासयनयरं बहुविहवरनयरगुणकलियं ॥१॥
 तत्थ य अभग्गसेणो अत्थि निवो नवररिदविक्खाओ ।
 तस्सऽट्ट सुया जाया देवीए विजयसेणाए ॥२॥
 सव्वे वि रज्जभरधरणधोरिया रणपयंडया धीरा ।
 दुम्मुहपमुहा सिरिसेणम्मच्छिमा ताण सिरिसेणो ॥३॥
 जोगो त्ति करिय रण्णा-रज्जे संठाविओ इमेहिं पिं ।
 पणयसिरेहिं सम्मं पडिच्छिओ तस्स वरदेवी ॥४॥
 नामेणं अभयसिरी महासई णेयगुणगणसमग्गा ।
 तीए वि य पवरसही अत्थि सुभइ त्ति नामेणं ॥५॥

वरसाविया वणियसुया तीए सगासम्मि जाइ अणवरयं ।
 सा देवी तीए वि य विबोहिया जिणवरमयम्मि ॥६॥
 अह अण्णया कयाई पसवई देवी अणोवमं पुत्तं ।
 तस्स पियामहनामं अभग्गसेणो त्ति परिविहियं ॥७॥
 सो जाव किंचि वत्तो जाओ ता मेलिऊण एगं तै ।
 निययसहोयरवंदं पभणइ अह दुम्मुहो रया ॥८॥
 'पिउणो पुट्टीए सुओ पालइ रज्जट्टिई जओ एसा ।
 एएण कारणेणं रज्जं तुम्हाण नत्थि त्ति ॥९॥
 इयरेहिं तओ भणिओ 'दुम्मुह ! मा भणसु एरिसं वयणं ।
 सिरिसेणंपिट्ठओ नणु जं जोगं तं करिस्सामो' ॥१०॥
 तो दुम्मुहेण भणियं 'जो भणिही तस्स अग्गओ एवं ।
 सो जमरायस्स गिहे वच्चिस्सइ पाहुणो सिग्घं' ॥११॥
 एयं च तक्कुमंतं सोउं एगेण मंतिणा कहियं ।
 धावीए सा वि तओ अभयसिरीए कहइ सव्वं ॥१२॥
 तीए वि पइणो सिट्ठं सो च्चिय आलोचिऊण सह तीए ।
 निग्गमणं मह जुत्तं इय हियए निच्छयं कुणइ ॥१३॥
 अभयसिरी वि सहीए पुत्तं घेतूण जाइ पासम्मि ।
 अक्खइ सव्वं कज्जं सग्गयं सा ततो भणइ ॥१४॥
 'कह वच्चिहिसि धराए अइखरफरुसाए भगिणि ! पाएहिं ।
 किंतु नियकम्मवसया जीवा पावेति सुह-दुक्खे' ॥१५॥
 तो जाव छण्णवेसो समागतो नरवई ततो ताणि ।
 निग्गंतुं नयराओ मग्गम्मि कमंति दुक्खेणं ॥१६॥
 चलइ सुहदा वि तओ अब्भणुवंचेवि ताणि वि कमेण ।
 रयणीए जंताइं पडियाइं महा अरण्णम्मि ॥१७॥
 संपीडियाइ अहियं छुहा-तिसाईहिं गिम्हकालो त्ति ।
 वारंवारेण तयं वहंति कुमरं सुदुक्खेण ॥१८॥

एत्थंतरम्मि सूरु समुग्गओ तदुवयारहेउं व ।
 किं वा चोज्जं मित्तो गोरवइ जमेत्थ पहियजणं ॥१९॥
 अह तक्खणम्मि ताइं सत्थं पेच्छंति रण्णमज्झम्मि ।
 मित्तेण व नियगेहं पयासियं चित्तसुहजणयं ॥२०॥
 तं पेच्छऊण ताइं सत्थे वच्चंति हिट्टुचित्ताइं ।
 पुट्टाइं धणएणं सत्थाहेणं 'कुओ तुब्भे' ? ॥२१॥
 तो जंपइ अभयसिरी "एसो रज्जाउ टलिओ ताय ! ।
 नियदाइएहिं एत्थं पडिओ भीमम्मि रण्णम्मि ॥२२॥
 के दूरे नंदपुरं ? गंतव्वं ताय ? तत्थ अम्हेहिं ।
 ता जंपइ सत्थाहो "दूरे तं पुखरं पुत्त ! ॥२३॥
 किंतु भए सह तुब्भे वच्चंताइं सुहेण पाविहह' ।
 तो ता इं तेण समयं वोर्लिति सुहेण तमरण्णं ॥२४॥
 कुमरो वि नियगुणेहिं हत्थं हत्थेण तत्थ संचरइ ।
 सत्थम्मि इय कमेणं पत्ताइं तत्थ नयरम्मि ॥२५॥
 आपुच्छवि सत्थाहं विमणमणाइं नियत्तिउं तत्थ ।
 बहुसुक्कतरुवरम्मी आरामम्मी पविट्टाइं ॥२६॥
 तत्थ य मालागारिं पुप्फसिरीं भणइ अभयसिरिदेवी ।
 'किं भद्दे ? आरामो बहुसुक्को दीसए एसो' ? ॥२७॥
 तो जंपइ पुप्फसिरी 'भगिणि ! न जाणामि कारणं एत्थ ।
 किंतु अकम्हा सुक्का जे जे रुक्खा इह पहाणा' ॥२८॥
 'उप्पाउ' त्ति मुणित्ता नियसीलगुणेण साविउं झ त्ति ।
 अप्पुव्वपत्त-फल-फुल्लेहिंरं कुणइ तं देवी ॥२९॥
 तो रोमंचियदेहा पुप्फसिरी गिण्हउं तयं कुमरं ।
 खिल्लवंती जंपइ 'तुब्भे कस्सित्थ अतिहीणि' ? ॥३०॥
 देवीइ तओ भणियं 'तुब्भं चिय भगिणि ?' तो इमा तुट्टा ।
 घेतूण ताणि सिग्घं वच्चइ निययम्मि गेहम्मि ॥३१॥

ष्णाणाईयं सव्वं कयं तओ भणइ पुप्फसिरिजणणी ।
 वच्छे ! तं मह धूया एसो जामाउओ तम्हा ॥३२॥
 चिट्ठह निच्चिताइं मह गेहे तो इमाणि तत्थेव ।
 चिट्ठति तओ देवी कोड्डेणं गुहइ पुप्फाणि ॥३३॥
 पुप्फसिरीए भणियं 'भगिणि ! तुमं कुणसि जइ इमं कम्मं ।
 तो आरामतिभागो तुह दिण्णो' मण्णइ तमेसा ॥३४॥
 जाणित्तु तयं निवई माणसियमहादुहेण अक्कंतो ।
 जंपइ "हा दिव्व ? तए किं एयं दारुणं विहियं ? ॥३५॥
 जा हिंडंती जंपाणजाणमाईहिं वाहणेहिं सया ।
 सा कह परकम्मकरी भूमीए भमइ विसमाए ? ॥३६॥
 जा विविहचाडुएहिं सामिणि ! परमेसरि त्ति भण्णंती ।
 सा कह ईर्णिह देवी भणिज्जए मालगारि त्ति ? ॥३७॥
 ता जीविण्ण इर्णिह किमिष्णा एवं विडंबणपरेणं" ।
 तं सोऊणं देवी जंपइ "मा सामि ! भण एवं ॥३८॥
 सत्थेसु जओ सुव्वइ को वि निवो सह नियग्गमहिसीए ।
 रज्जब्भट्ठो माहणवेसेणं वलइ सुत्तं ति ॥३९॥
 तं विक्किणई देवी कालमुविक्खंतओ ठिओ एवं ।
 समएणं संजाओ पुणरवि सो नाह ! नरनाहो ॥४०॥
 ता मा कुणसु विसायं एयं चिय एत्थ पत्तयालं ति" ।
 इय संबोहिय रयं तं कम्मं कुणइ अभयसिरी ॥४१॥
 विज्जाहरबंधाइं अपुव्वगुंफेहिं गुंफिउं कुसुमे ।
 हट्टम्मि नेइ जा ता कइगेहिं न लब्भए मग्गो ॥४२॥
 तो सुंदरिमालागारिणि त्ति लोगेहिं से कयं नामं ।
 एवं विढविय दव्वं समप्पए नरवरिदस्स ॥४३॥
 तेणं दव्वेणं सो वाणिज्जं कुणइ जच्चवणिओ व्व ।
 अप्पेण विकालेणं वित्थरिओ किंच रिद्धीए ॥४४॥

जाओ य तत्थ पुत्तो बीओ वद्धावणाइ काऊण ।
सोहणदिणम्मि नामं तस्स कयं पुप्फचूलो त्ति ॥४५॥
एत्थंतरम्मि संखो पत्तो नाइत्तगो विदेसाओ ।
तेण य देवी दिट्ठा हट्ठे पुप्फाणि विक्रंती ॥४६॥
दट्टूण तस्स रगो जम्मंतरकयनियाणदोसेण ।
जाओ तत्तो दाउं दो दीणारे इमो भणइ ॥४७॥
‘कल्लं वेलाऊले घेतुं पुप्फाणि एज्ज तं भदे ?’ ।
सा वि तयं पडिवज्जिय जायपहायम्मि तो तत्थ ॥४८॥
पुप्फाणि अप्पणत्थं जावाऽऽरूढा इमा तर्हि वहणे ।
लोगेण समं ताव य पूरावइ सो तयं वहणं ॥४९॥
घाहावंती देवी हरिया तेणं अणज्जकज्जेणं ।
रोवइ कलुणसरेणं नवि ठाइ कर्हिच्चि तो तेण ॥५०॥
भणिया “सामिणि एवं मा रोवसु कुण पसण्णयं चित्तं ।
मह उवरिं जेण अहं सपरियणो किंकरो तुज्झ ॥५१॥
एयाण अणेगाणं धणकोडीणं विहेहि उवरि करं” ।
तं सोउं अभयसिरी जंपइ ‘भाया तुमं मज्झ’ ॥५२॥
तो सासंकमणेणं भणिया संखेण ‘मा भणसु एवं ।
सामिणि ! मए समाणं भुंज अणण्णस्समे भोगे’ ॥५३॥
देवीए तओ भणियं ‘आ पाव ! किमेरिसं असंबद्धं ।
जंपसि जेणं जायइ कुलम्मि मसिकुच्चयपयाणं’ ॥५४॥
तो रुसिय इमो जंपइ ‘भंजेमी सीलगव्व तुहमेयं’ ।
इय भणिय ताडणाई हेउं जावुट्टई ताव ॥५५॥
सासणदेवी कुद्धा सहसा उप्पाइयाइं काऊण ।
वोलेऊणाऽऽढत्ता तं वहणं नीरनाहम्मि ॥५६॥
तो भयभीओ संखो थीवेसं करिय चलणजुयलम्मि ।
अभयसिरीए पडिओ ‘सरणं सरणं’ति जंपंतो ॥५७॥

विण्णवइ “खम महासइ ! महमोहविमोहिण्ण जं सि मए ।
 खलियरिया इण्ह पुण मह भगिणी तं सि अवियप्पं ॥५८॥
 एत्तो य पडिनियत्तो मेलिस्सं भगिणि ! निव्वियप्पेण ।
 सयणाणमओ सोयं मुय मह उवरिं दयं काउं” ॥५९॥
 इय सोऊणं देवी उवसामइ तस्स तं उवस्सगं ।
 अभयसिरी वि य चितइ किं मेलइ एस सयणाणं ॥६०॥
 जो इय अवहरिऊणं आणइ तो अणसणं महं जुत्तं ।
 इय चितिय जाऽणसणं गिण्हइ ता देवया झ त्ति ॥६१॥
 पयडीहोउं जंपइ “भदे ? मा कुणसु अणसणं जम्हा ।
 मिलिहिसि पइ-पुत्ताणं बारसमे वच्छे तंसि ॥६२॥
 पउमिणि खेडम्मि पुरे” तो सा पडिवज्जिऊण तं कुणइ ।
 छट्ट-ऽट्टम-दसम-दुवालसाइ विविहं तवच्चरणं ॥६३॥
 एत्तो य निवो जंपइ पुप्फसिरिं ‘किंपि नणु चिरवेइ ।
 सा तुह भगिणी भदे ! ता गंतुं तं गवेसेहि’ ॥६४॥
 तो सा चउहट्टय-देवभवणमाईसु भमइ पुच्छंती ।
 ‘सुंदरिमालागारी किं दिट्ठा केणवि कर्हिचि ?’ ॥६५॥
 जाव न तीए लद्धं पउत्तिमित्तं पि ताव आगंतुं ।
 अक्खइ निवस्स जह ‘सा मण्णे केणावि हरिय’ त्ति ॥६६॥
 तं सोऊणं राया वज्जेणं ताडिओ व्व सव्वंगं ।
 सोयइ बहुप्पयारं दोण्णि वि कुमरे पलोयं तो ॥६७॥
 ते वि कुमार दो वि हु जणणिमदट्टुं रुवंति रयणीए ।
 दुक्खेण रोयइ निवो तेसु पसुत्तेसु सयमेव ॥६८॥
 निगंतुं सवत्थ वि गवेसए जाव सव्वरयणि त्ति ।
 दिवसस्स बि पहरम्मी गयम्मि अच्चंतपरिखिण्णो ॥६९॥
 वलिऊण गओ गेहं ते वि कुमार अपेच्छिउं जणए ।
 विलवंति बहुपयारं इंतं दट्टुं तओ जणयं ॥७०॥

कंठे विलगिऊणं विमुक्ककंठं अणेगहा रुण्णा ।
 राया वि हु सोगतो संठवइ जलाविलच्छीओ ॥७१॥
 ण्हविओ पुप्फसिरीए भणइ तयं भोयणावसाणम्मि ।
 “भदे ! कुण संबलयं जोगं कुमराण नणु किं पि ॥७२॥
 जेणऽप्पिऊण एए दो वि सुहहाए तं गवेसामि ।
 जइ लद्धा तो जीयं महऽण्णहा निच्छयं मरणं” ॥७३॥
 निवनिच्छयं मुणेउं कुणइ इमा संबलं तओ राया ।
 कुमरे घेतुं चलिओ पच्चूसे सा वि दुक्खत्ता ॥७४॥
 वलिया वोलावेउं राया वि हु जाइ अग्गओ कुमरं ।
 अंगुलियाए लाइय जेटुं लहुयं करिय कंघे ॥७५॥
 कम्मवसेण य एसो बहुसावयजूहसंकुले विसमे ।
 गिरि-तरु-सरिसंघट्टे, पडिओ भीमे महारण्णे ॥७६॥
 ततो वियालसमए पन्नूरं अत्थरेइ नरनाहो ।
 एगत्थ तरुतलम्मी वीसमणट्टाए पह खिण्णो ॥७७॥
 पुणरवि जणणिं सरिउं ‘अम्मो ! अम्मो ! पर्यंपिरे कुमरे ।
 दट्टुं सोयप्पुण्णो राया भणिउं समादुत्तो ॥७८॥
 “हा देवि ! इमे बाला अइभोला सयलगुणगणविसाला ।
 कस्स (त्थ?)तए नणु मुक्का अहं च अइनेहसंबद्धो ? ॥७९॥
 हा देवि ! कत्थ सि गया ? मह विरहे कहवि धारिहिसिपाणे ? ।
 लब्भिसि किं वाऽणत्थं ? किं वा वि गया दिसाभागं ?” ॥८०॥
 इय एवं सोयंतो जा सोवइ ते कुमारए ताव ।
 सहस त्ति अंबरतलं अप्फुण्णं जलयवलएहिं ॥८१॥
 गज्जियरवेण समयं चमक्किया विज्जुला खणद्धेण ।
 अह वरसिउं पवत्ता जलया अइगरुयधारहिं ॥८२॥
 निवई वि सुए तणुणा वत्थेहिं य आवरित्तु संठइ ।
 मेहा वि सयलरयणिं वरसिय थक्का पभायम्मि ॥८३॥

सीएणं वाएणं विञ्जडिओ जलपवाहवुडियंगो ।
 ५१ सूरुगमम्मि चिक्खल्लबोले(लि)ए खो(खा)लिय कुमारे ॥८४॥
 जा जाइ अग्गओ नीरपूरसंपूरियम्मि मग्गम्मि ।
 ता पेच्छइ पूरेणं समागयं गिरिनइं पुरओ ॥८५॥
 तां चितइ तत्थ निवो 'कह नित्थरिहामि नणु इमं सरियं ? ।
 हुं एक्केकं कुमरं तरिऊणं नेमि परतीरं' ॥८६॥
 तो संठाविय जेटुं लहुयं घेतुं तरित्तु परकूले ।
 ठविऊण जा नियत्तइ ता कहवि हु ठाइ नो बालो ॥८७॥
 तं रुक्खे संजमितं नईए मज्झम्मि देइ सो झंपं ।
 तत्थ विलग्गाउ तले अदिस्समाणम्मि जंघाओ ॥८८॥
 सुक्कयरुक्खम्मि तओ तेण वि सो वुब्भिउं समाढत्तो ।
 तं दट्टूणं कुमरा विलवहि 'हा ताय ! ताय !' त्ति ॥८९॥
 दूरं गए नरिंदे उभयतड्डा विओइया कुमरा ।
 कुरुलंति दो वि अहियं रयणीए जहा रहंगाइं ॥९०॥
 चितइ अभग्गसेणो 'हा हा किं एरिसंमह संजायं ।
 जं आसि एगमच्छि तं पि हु उप्पाडियं विहिणा' ॥९१॥
 ते विलवंते दट्टुं सिरिसेणो चितइ य "हा दिव्व ! ।
 किं अइदारुणमेयं विहियमवत्थंतरं मज्झ ? ॥९२॥
 जइ ता रज्जुबंभंसो दिव्व ! कओ मज्झ नणु अउण्णस्स ।
 ता किं परकम्मकरी मालागारी कया देवी ? ॥९३॥
 जइ ता तयं पि विहियं ता किं अवरं विणिम्मियं एयं ? ।
 जं तीए समं विरहो चित्तिज्जंतो वि दुव्विसहो ॥९४॥
 जइ ता तीए वि समं नणु विरहो मह कओ तए दिव्व ? ।
 ता किं सुएहिं समयं एवमयंडे विसंघडिओ ? ॥९५॥
 जइ ता विओइओऽहं सुएहिं तो किं थ मज्झ पच्चक्खं ।
 एए वि हु दो तणए निग्घिण ! विहडा विया एवं ? ॥९६॥

जइ नाम विसंघडिया एए ता किं नईए मज्झमि ।
एवमहं पक्खित्तो संदेहे जीवियस्सावि ?” ॥१७॥
एवं बहुप्पयारं सोयंतो नियमणम्मि सिरिसेणो ।
कट्टेण तेण नेउं पउमिणिखेडे पुरे खित्तो ॥१८॥
कट्टम्मि तम्मि कूले लग्गम्मि विमोइऊण जंघाओ ।
वीसमइ तरुतलम्मी उज्जाणे पुरवरस्स बहिं ॥१९॥
एत्तो य तत्थ नयरे अपुत्तराया परं भवं पत्तो ।
अहिवासियाइं तत्तो मंतीहिं वि पंच दिव्वाइं ॥१००॥
बत्तीसलक्खणधरं रज्जरिहनरं गवेसयंताइं ।
पत्ताइं तत्थ ठाणे सिरिसेणो जत्थ वीसमइ ॥१०१॥
तो तेहिं तस्स अग्घो दिण्णो पंचहिं वि करिवरेणा वि ।
उक्खिविऊणं कंधे नियए आरोविओ सहसा ॥१०२॥
तो सो राया जाओ पविसइ नयरम्मि नदिघोसेणं ।
रायसहाए सीहासणम्मि उवविसइ विमणमणो ॥१०३॥
तं दट्टूणं मंती जंपइ ‘किं देव ? दुम्मणा तुब्भे ? ।
रज्जभिसेओ जेणं पच्चूसे होहिई तुब्भं’ ॥१०४॥
तो जंपइ पुहइवई ‘मंति ? न रज्जेण किंचि मह कज्जं’ ।
‘किं कारणं ?’ ति मंती पुच्छइ सो कहइ नीसेसं ॥१०५॥
तं सोऊणं मंती जंपइ “देवेण दारुणं दुक्खं ।
अहह अहो ! अणुभूयं संपइ मण्णेमि तं खीणं ॥१०६॥
जम्हा रज्जसिरीए तुब्भे च्चिय नरवई इहं विहिया ।
ता तं चियरयणीए पुच्छह सव्वं किमण्णेण ?” ॥१०७॥
राया वि ‘जुत्तिजुत्तं मंति ! तुमे मंतियं’ ति भणिरुण ।
रयणीए सिरिदेविं पूइत्ता कुणइ पणिहाणं ॥१०८॥
पयडीहोऊण तओ जंपइ देवी वि “मा कुण विसायं ।
देवी-सुएहिं जम्हा, मिलिहिसि तं नत्थि संदेहो ॥१०९॥

जइया तुह मेलावो होही तइया य चंपओ एसो ।
फुल्लिहिइ दुवारत्थो" इय भणिकुणं गया देवी ॥११०॥
रण्णा वि तयं सव्वं पहायकालम्मि मंतिणोसिट्ठं ।
सो जंपइ "जइ एवं सिंचिज्जउ तो इमो सययं ॥१११॥
फुल्लइ जेणं अयाले" पडिवन्ने तम्मि नरवरिदिण ।
विहिओ रज्जभिसेओ एवं सो भुंजए रज्जं ॥११२॥
एत्तो ते वि कुमारो दो वि हु विलवंति जा खणं एक्कं ।
ताव तर्हि गोवाला पत्ता पुच्छंति लहुकुमरं ॥११३॥
जा सो किं पि न जंपइ ता इयरं आणिकुण पुच्छंति ।
तेण वि सिट्ठं 'जणओ अम्हाण नईए नणु हरिओ' ॥११४॥
तेर्हि वि करुणाइ तओ नेउं गोट्टम्मि अप्पिया दो वि ।
धणसेणाए नियमयहरीए बहुरिद्धिजुत्ताए ॥११५॥
पुत्तरहियाए तीए वि पुत्ते पडिवज्जिकुण नियगोट्ठं ।
मेलेऊणं भणियं 'सव्वस्स वि सामिया एए' ॥११६॥
विहियाइं नामाइं दोण्णि वि नणु राम-लक्खणा एए ।
एवं सुहेण ते वि हु दोण्णि वि चिट्ठंति रममाणा ॥११७॥
अह अन्नया कयाइं धणसेणा गिण्हिकुण ते कुमरे ।
रायस्स दंसणत्थं वच्चइ अह पउमिणीखेडे ॥११८॥
ते दट्ठूणं राया कुमरे रोमंचकंचुइज्जंतो ।
चित्तइ जइ जीवंती तो पुत्ता मज्झ नणु एए ॥११९॥
तो भणिया धणसेणा "भदे ! तुह पुत्तया इमे दो वि ।
जणयंति मज्झ चित्तस्स निव्वुइं तेण एत्थेव ॥१२०॥
चिट्ठसु पुत्तेर्हि समं मह गेहे चेव निव्वियारेण" ।
सा वि तयं पडिवज्जिय चिट्ठइ हिट्ठा नरिंदघरे ॥१२१॥
कुमरो वि निवं दट्ठुं एवं चित्तेइ 'मज्झ जणयस्स ।
अणुहरइ इमो राया ता अम्हं जणयतुल्लो त्ति ॥१२२॥

एवं चिट्टंताणं सुहेण कुमराण रायपासम्मि ।
 अह अन्नया कयाइ वसंतमासो समणुपत्तो ॥१२३॥
 घोसावियं च रण्णा पडहयसद्देणं सव्वनयरम्मि ।
 जह 'सव्वो वि हु लोगो कीलउ उज्जाणमाईसु' ॥१२४॥
 सयमवि उज्जाणत्थो कुमरसमेओ विसिट्टुकीलार्हि ।
 चिट्टइ अभिरममाणो पिच्छंतो नाडयसयाइं ॥१२५॥
 एत्तो वि य सो संखो अभयसिरीए समण्णिओ जंतो ।
 वहणेण समुद्धम्मी परकूलम्मी समणुपत्तो ॥१२६॥
 बब्बर-पारसकूले सुवण्णभूमीतियालबहुतित्थे ।
 वज्जरयमाइएसुं बारस वरिसाणि भमिऊण ॥१२७॥
 पत्तो तम्मि पुरम्मी पअमिणिखेडम्मि विविहपणियाण ।
 भरिऊणं वरवहणं देवीए समं विभूईए ॥१२८॥
 लंबावियं च वहणं वेलाकूलम्मि नंगरसिलार्हि ।
 देवीए वि य भणिओ एगो पुरिसो जहा पुत्त ! ॥१२९॥
 जइ कहवि जाइ संखो पअमिणिखेडम्मि तो मह कहिज्ज' ।
 तेण वि भणियं 'सामिणि ? एयं तं पअमिणीखेडं' ॥१३०॥
 एत्थंतरम्मि संखो थालं भरिऊण विविहरयणाणं ।
 जाइ निवदंसणत्थं सहसा तत्थेव उज्जाणे ॥१३१॥
 तो दिट्ठो नरनाहो उवविट्ठो पिच्छणम्मि रम्मम्मि ।
 संखो वि तयविखत्तो वियालवेलेलं ठिओ जाव ॥१३२॥
 गेहम्मि पत्थिएणं भणिओ संखो निवेण वच्चंतो ।
 'सिट्ठि ! तुमं पाहुणओ अम्हाणं होसु अज्ज' ति ॥१३३॥
 संखेण तओ भणियं "एवमिणं किंतु मज्झ बोहित्थं ।
 भणिणीए समं सुण्णं होही ता को वि पच्चइओ ॥१३४॥
 पेसिज्जउ तत्थ'" तओ रण्णा ते दो वि पेसिया कुमरा ।
 आएसो ति भणित्ता इ ति गया तम्मि वहणम्मि ॥१३५॥

१. ला. ण नयरमज्झम्मि ॥

कोउगवसेण ततो आरूढा जावतत्थ ते ताव ।
 अभयसिरी दट्टुणं आगयपण्हा विचितेइ ॥१३६॥
 'नूणं मह पुत्तेहिं पच्छण्णेहिं इमेहिं होयव्वं ।
 एएणं वेसेणं' जाया एत्थंतरे रयणी ॥१३७॥
 कट्टोवरयम्मि ठिया देवी कुमरा य तहुवारम्मि ।
 उवविट्ठा तो भणिओ लहुएणं भाउओ जेट्टो ॥१३८॥
 कहसु कहाणयमेगं भणइ इमो अम्ह संतिओ चेव ।
 वुत्तंतो नणु भाउय ! कहाणयं किंच अन्नेण ?' ॥१३९॥
 इयरेण वि पडिभणियं तं चेव य कहसु कोउयं मज्झ ।
 सो जंपइ "रयणउरे सिरिसेणनिवग्गमहिसीए ॥१४०॥
 अभयसिरीए पुत्ता अम्हे णणु वच्छ ! दो वि निसुणेहि ।
 अहयं अभग्गसेणो नाम तुमं पुप्फचूल ति ॥१४१॥
 वच्छ ! अजायम्मि तए रज्जब्भट्ठाणि अम्हि नंदपुरे ।
 पत्ताणि तत्थ अंबा मालागारित्तणं कासी ॥१४२॥
 ताओ पुण वाणिज्जं चिट्ठंताणं कमेण तं जाओ ।
 तो केणावि हु अंबा अवहरिया नेय जाणामो ॥१४३॥
 तो अम्हे घेतूणं ताओ वि हु तग्गवेसणट्ठाए ।
 वच्चंतो अडवीए नईए उत्तारिओ तं सि ॥१४४॥
 जा मह आणणहेउं आगच्छइ ता नईए सो नीओ ।
 अम्हे वि हु धणसेणाए अप्पिया गोवपुत्तेहिं' ॥१४५॥
 जावेवं सो कुमरो जंपइ ता पयडपुलइया देवी ।
 भणइ 'अहं सा पुत्तय ! अभयसिरी तुम्ह जणणि' ति ॥१४६॥
 तो एवं सोऊणं कंठम्मि विलगिउं इमे रुण्णा ।
 जंपइ अभग्गसेणो 'केण तुमं अंब ? अवहरिया ?' ॥१४७॥
 भणइ इमां 'जो पुत्तय ! इमस्स वहणस्स सामिओ संखो ।
 तेणऽवहरिया अहयं' कुविओ तं सुणिय सो कुमरो ॥१४८॥

जंपइ 'अम्मो ! अज्जं इमस्स सीसं लएमि निवपुरओ ।
अइगरुयकिलेसायासकारिणो पावकम्मस्स' ॥१४९॥
तं सोउं भणइ इमा "जंपसु मा पुत्त ! एरिसं वयणं ।
जेण इमो तुम्हाणं असमाणो माउलो होज्जो ॥१५०॥
जम्हा पडिवण्णाऽहं तेण य भगिणी न खंडियं सीलं" ।
कुमरो वि हु जणणीए भावं नाऊण उवसंतो ॥१५१॥
चितइ देवी वि मणे 'मिलिया कुमरा न अज्ज वि नरिदो' ।
एत्थंतरम्मि रयणी पविहाया उग्गओ सूरो ॥१५२॥
तो जणणिं घेतूणं ते वि हु पविसंति नयरमज्झम्मि ।
एत्थंतरम्मि सो वि हु पप्फुल्लो चंपओ सहसा ॥१५३॥
तं दट्टुणं राया चितइ नणु एस पच्चओ पुण्णो ।
तहवि हु न मिलइ देवी' इय चितंतस्स ते कुमरा ॥१५४॥
पत्ता जणणिसमेआ सा वि निवं पेच्छऊण सहस त्ति ।
रोमंचंचियदेहा पणमइ सीसेण नरनाहं ॥१५५॥
राया वि हु परितुट्ठो पडिवत्ति कुणइ तीए सविसेसं ।
भणइ य अभग्गसेणो देव ! इमा अम्ह जणणि त्ति ॥१५६॥
नंदपुराओ पुव्वं इमेण संखेण अवहिया आसि ।
एसा पुण धणसेणा पडिवन्ना होइ माइ" त्ति ॥१५७॥
तं सोऊणं राया आणंदपवाहपुण्णतरलच्छे ।
उच्छंणे ठविऊणं दो वि हु कुमरे इमं भणइ ॥१५८॥
'हा हा ! पुत्तय ! तुब्भे एत्थ वसंता वि नो मए सम्मं ।
विण्णाया किंतु मणे संदेहो आसि मे गरुओ' ॥१५९॥
तो पुट्ठा धणसेणा 'कत्थ तुमे पाविया इमे भदे ! ?' ।
तीय वि सव्वं कहियं अभयसिरी तो इमं भणइ ॥१६०॥
'भगिणि ! तुमं चिय धण्णा जीए इमे पालिया गुणविसाला' ।
जायं च संगमम्मी परोप्परं ताण वरसोक्खं ॥१६१॥

अहं आणिया सुभद्दा पुप्फसिरी वि य तओ य सव्वाइं ।

चिट्ठंति ललंताइं रज्जसिरिं अणुहवंताइं ॥१६२॥

संखो वि हु सामंतो देवीवयणाउ राइणा ठविओ ।

एवं अच्छंताणं अन्नदिणे तत्थ वरसूरी ॥१६३॥

संपत्तो विहरंतो चउविहवरनाणपयडियपयत्थो ।

मुणिसुव्वओ त्ति नामो सुसाहुगणपरिवुडे भयवं ॥१६४॥

तं नाउं पुरलोगो वंदणवडियाइ निग्गओ ज्ञ त्ति ।

कहियं च सुभद्दाए केण वि वरसूरिआगमणं ॥१६५॥

तं सोऊणं सा वि हु भत्तिवसुल्लसियबहलरोमंचा ।

देवी-पुप्फसिरीणं अक्खइ तं ताउ तीए समं ॥१६६॥

गंतूण निवसंमीवे भणंति “विण्णत्तियं पहु ? सुणेहि ।

जं एत्थं वरसूरी समागओ अम्ह पुण्णेहिं ॥१६७॥

ता तस्स वंदणत्थं गम्मउ’ रया वि तं निसामेउं ।

सव्विड्डीए गच्छइ ताहिं समं मुणिवरं नमिउं ॥१६८॥

वंदित्तु मुणिं धरणीयलम्मि उवविसइ नाऽइदूरम्मि ।

गुरुणा वि य पारद्धा धम्मकहा भव्वसुहजणणी ॥१६९॥

अवि य-

जं किं चि इत्थ जीवा लहंति संसारवासमज्झम्मि ।

सोक्खं वा दुक्खं वा तं सव्वं पुव्वकम्मफलं ॥१७०॥

जेणेत्थ जए जीवा रग-दोसेहिं मोहिया संता ।

तं चिय पावं कम्मं कुणंति नणु जस्स दोसेण ॥१७१॥

पावेंति आवईओ नाणारूवाउ बहुदुहकरीओ ।

जं पुण विविहं सोक्खं तं सव्वं पुण्णमाहप्पं ॥१७२॥

एत्थंतरम्मि देवी भणइ ‘किमम्हेहिं अण्णजम्मम्मि ।

सामिय ! विहियं कम्मं असुहसुहो जस्स उ विवागो ?’ ॥१७३॥

तो जंपइ सूरिवरो "भदे ! निसुणेहि अण्णजम्मम्मि ।
 वंसुहातलम्मि नयरे, आसि निवो सिद्धसेणो त्ति ॥१७४॥
 अण्णो वि तत्थ निवसइ भीमो नामेण ठक्कुरो तस्स ।
 भज्जाए धारिणीए धूया तं आसि गुणमाला ॥१७५॥
 रूवाइगुणगणजुया संपत्ता जाव जोव्वणं ताव ।
 जणणीए तुमं दिण्णा नियभाइसुयस्स संखस्स ॥१७६॥
 जणएण तमवगण्णिय दिण्णा तं सिद्धसेणनरवइणो ।
 परिणीया य कमेणं भुंजसि भोए अण्णसमे ॥१७७॥
 सो वि हु माउलभाया अभिमाणधणो इमं विचित्तेइ ।
 'हंत ! मए भोत्तव्वा अवहरिऊणं इमा बाला' ॥१७८॥
 रण्णा वि अग्गमहिंसी तुमं कया नेय पावियं छिहं ।
 संखेण तओ एसो अन्नाणतवं बहुं कुणइ ॥१७९॥
 पत्ते य मरणसमए नियाणमेवंविहं इमो कुणइ ।
 "जइ अत्थि तवस्स फलं इमस्स तो अन्नजम्मे वि ॥१८०॥
 जह अवहरामि एयं इमस्स पासाउ तह हविज्जामि" ।
 इय चित्तिऊण मरिउं सो आइं वंतरो जाओ ॥१८१॥
 अह अण्णया य तुमए कीलंतीए नरिंदजुत्ताए ।
 भवणुज्जाणसिरीए दिट्ठाइं चक्कवायाइं ॥१८२॥
 रइकेलिपसत्ताइं धणियं अण्णोण्णबद्धनेहाइं ।
 एगत्य रमंताइं उड्ढावित्ताणि सहस त्ति ॥१८३॥
 विच्छ्रेइयाइं तुमए मयणुम्मत्ताइ केलिकलियाए ।
 रण्णा वि तओ भणियं 'देवि ! कयं सुट्ठु सुट्ठु' त्ति ॥१८४॥
 ताणि वि कुरुलंताइं चिरेण मिलियाइं तुज्झ वि कमेण ।
 संजाया^३ दुण्णि सुया कुसला बाहत्तरिकलासु ॥१८५॥
 कइया वि तेहिं दोहिं वि कीलाहेउं गएहिं उज्जाणे ।
 वानरडिभा दुन्निउ दिट्ठा जणयाण पासम्मि ॥१८६॥

तो भेसिरुण एए एकेकं गिण्हिरुण ते दो वि ।
 पत्ता गिहम्मि चवले दट्टुं तुब्भे वि तुट्टाई ॥१८७॥
 ताणि वि पुत्त विओए कंदंती वानराइं तो तुज्झ ।
 गोवेहिं तयं सिट्ठं करुणावन्नाए तुमए वि ॥१८८॥
 भणिया कुमरा “पुत्तय ! मुंचह एए तर्हि चिय जओ उ ।
 अइदुक्खिया इमेसिं जणया तेहिं पि तत्थेव ॥१८९॥
 नेरुणं परिमुक्का मिलिया जणयाण बारसमपहरे ।
 इयचरियाइं चिट्ठह जा तुब्भे धम्मरहियाइं ॥१९०॥
 ताव य तुम्ह घरम्मी अह एक्को मुणिवरो समणुपत्तो ।
 विहरंतो तुब्भेहिं वि भणियो ‘मुणि ! भणसु नियधम्मं’ ॥१९१॥
 भिक्खागयाण जइ वि हु न कप्पए जंपिउं बहुं तह वि ।
 नारुण बहुगुणकरं सो अक्खइ तुम्ह जिणधम्मं ॥१९२॥
 तं सोरुणं तुब्भे अहियं सद्धम्मभावियमणाइं ।
 चत्तारि वि पडिवज्जह सावयधम्मं अणणसमं ॥१९३॥
 पडिलाहह भत्तीए य तं मुणिं भत्त-पोत्त-पत्तेहिं ।
 विगए य तम्मि चिट्ठह तग्गुणगणरंजियमणाइं ॥१९४॥
 एत्थंतरम्मि पव्वा इयाउ पत्ताउ तिण्णि तुह पासे ।
 एगा तुह माउसिया दोण्णि उधूयाउ तस्सेव ॥१९५॥
 ताण तुमे जिणधम्मो कहिओ जह साहुणा विणिहिट्ठो ।
 कम्मखओवसमेण य ताण वि सो परिणओ सम्मं ॥१९६॥
 भणियं च ताहिं ‘तुब्भे धण्णाइं जेहिं पाविओ धम्मो ।
 अम्हे अज्ज प्पभिइं दुदसंगमिमं करिस्सामो’ ॥१९७॥
 इय वोत्तूणं ताओ तिण्णि वि पत्ताउ निययत्तणम्मि ।
 इइ पालिरुण धम्मं गयाणि सव्वाणि सुरलोगं ॥१९८॥
 तत्तो चवित्तु इहइं जायाणि पुणो वि तह य मिलियाणि ।
 जा गुणमाला सा तं गया वि इमो निवो जातो ॥१९९॥

पुता वि इमे कुमरा माउसिया वि हु इमा सुभद् त्ति ।
 पुप्फसिरी-धणसेणाउ ताउ भगिणीउ जायाओ ॥२००॥
 संखो वि भवं भमिउं जाओ एसो पुणो वि संखो त्ति ।
 तेण नियाणवसेणं अवहरिया तं सि एएणं ॥२०१॥
 जं चक्काइं तइया विओइयाइं तए निवेणावि ।
 अणुमन्नियाइं तेणं तुम्ह विओगो इमो जाओ ॥२०२॥
 जं ते वानरडिभा बारस पहेरे विओइया तेण ।
 बारस वरिसो जाओ परोप्परं तुम्ह विच्छेहो ॥२०३॥
 जं केलीए कम्मं हसमाणेहिं निबज्झए तं तु ।
 वेइज्जंतं दुसहं संजायइ जह य तुम्हाणं ॥२०४॥
 इय सूरिवयणमायण्णिऊण सव्वाण ताण संजायं ।
 जाईसरणं ततो भवण्णवुव्विग्गचित्ताइं ॥२०५॥
 काऊण रज्जसुत्थं गहिया दिक्खा तहेव सिग्घं च ।
 उप्पाडिऊण नाणं पत्ताइं सासयं ठाणं ॥२०६॥
 एसा सा अभयसिरी महासई पायडासुरणं पि ।
 संखेवेणं चरियं तीए एयं समक्खायं ॥२०७॥

अभयश्रीकथानकं समाप्तम् ॥५५॥

एवमन्यान्यपि कथानकानि भावनीयानी ति श्लोकार्थः ॥१७८॥

किं कारणमाश्रित्य तासामेवंविधा त्रैलोक्यानुयायिनी कीर्तिः इति प्रश्ने श्लोकमाह-

तेलोककमक्कमित्ताणं, किन्ती ताणं तु निम्मला ।

ठिया जं कारणं तत्थ, सइत्तं सीलसंपया ॥१७९॥

त्रैलोक्यं=त्रिभुवनम्, आक्रम्य=व्याप्य, कीर्तिः=प्रसिद्धिः, 'ताणं तु' तासाम्, तुशब्दाद् अन्यासां चैवं विधानाम्, निर्मला=प्रोज्ज्वला, स्थिता=व्यवस्थिता, 'जं' यत्, कारणं=साधकम्, तत्र=तस्मिन्, सतीत्वं=पतिव्रतात्वम्, चकारस्य गम्यमानत्वात् शील-सम्पच्च=चारित्रविभूतिश्चेति श्लोकार्थः ॥१७९॥

आस्तां कीर्तिरन्यदपि यत्सतीनां सामर्थ्यं तत् श्लोकाष्टकेनाऽऽह-

सईणं सुद्धसीलाणं, तिक्खदाढासुभासुरे ।

खुद्धो रुद्धो विकूरो वि, केसरी नेय अक्कमे ॥१८०॥

सतीनां=पतिव्रतानां शोभितानां वा, शुद्धशीलानां=निर्मलचरित्राणाम्, तीक्ष्णदंष्ट्रा-
सु भासुरः=दुतभेदकारिदंष्ट्राविकरालः, क्षुद्रः=क्षोदनशीलो मायाशीलो वा, रौद्रोऽपि=
भीषणोऽपि, क्रूरोऽपि=मांसाशित्वेन दुष्टाध्यवसायोऽपि, अपिशब्दावेवमेवैतदिति प्रति-
पादनार्थो, केसरी=सिंहः, 'नेय' त्ति नैव, 'अक्कमे' त्ति आक्रमयति=चम्पयति
क्रमदानेनेति श्लोकार्थः ॥१८०॥ तथा-

सईणं सुद्धसीलाणं, फारफुक्कारकारओ ।

दुट्ठो दिट्ठीविसो सप्पो, निव्विसो सिंदुरं पिव ॥१८१॥

सतीनां शुद्धशीलानां स्फारफूत्कारकारकः=महाशब्दविधायकः, दुष्टः=प्रचण्डरोषः,
दृष्टिविषः=नयनविषः, सर्पः=कञ्चुकी, निर्विषः,=विषरहितो जायत इति गम्यते,
सिंदुरमिव=रज्जुवदिति श्लोकार्थः ॥१८१॥

सईणं सुद्धसीलाणं, अग्गी जालाकरालिओ ।

साविओ सच्चवायाए, चंदणं पिवसीयलो ॥१८२॥

स्पष्टः, नवरं श्रावित्तं=शब्दा(प्तः), सत्यवाचा=सत्यवचनेन 'यद्यहमेतेषां कर्मणां
कारिणी ततो मां दग्धुमर्हसीत्यन्यथा न' इत्यादिरूपया, चन्दनमिव=श्रीखण्डमिव, शीतलः,
पिवशब्दः इवार्थः शीतवीर्य इति श्लोकार्थः ॥१८२॥

सईणं सुद्धसीलाणं, तिक्खसोया महानई ।

भीसणा वि दुरुत्तार, समा भूमीव भासए ॥१८३॥

तीक्ष्णस्रोताः=शीघ्रवेगा, महानदी=बृहदापगा, भीषणाऽपि=भयजनकाऽपि,
दुरुत्तरा=दुःखोत्तरणीया, समा=अनिम्नोन्नता, भूमीव=धरणीवद्, भासते=प्रतिभातीति
श्लोकार्थः ॥१८३॥

सईणं सुद्धसीलाणं, अगाहो गाहदुग्गमो ।

महल्लहल्लकल्लेलो, समुद्धो गोपयं पिव ॥१८४॥

अगाधः=अलब्धतलः, ग्राहदुर्गमः=ग्राहाः=जलचरास्तैर्दुर्गमः=दुःखसञ्चरणीयो
ग्राहदुर्गमः, 'महल्लहल्लकल्लेलो'त्ति महद्धल्लकल्लेलो महान्तः=बृहत्प्रमाणा हल्लन्तः=चलन्तः
कल्लेलाः=जलोत्पीला यत्र स तथा, समुद्रः=जलधिः, गोष्पदमिव=गोश्चरणगर्तेव,

प्राकृतत्वादत्रापि पिवशब्द इवार्थः, सुखोत्तारे भवतीत्यध्याहार इति श्लोकार्थः ॥१८४॥

सईणं सुद्धसीलाणं, डाइणी-रक्खसाइणो ।

संता वट्टंति निद्देसे, किंकुव्वाणा वि किंकरा ॥१८५॥

डाकिनी-राक्षसादयः=शाकिनी-प्रेतप्रभृतयः, शान्ताः=उपशमं गताः, वर्तन्ते=प्रवर्तन्ते, निर्देशे=आज्ञायाम्, किंकुर्वाणाः='किं कुर्मः?' इत्येवमादेशं मृगयन्तः तच्छब्दस्य व्यवहितसम्बन्धात् किंकरा व=कर्मकरवदिति श्लोकार्थः ॥१८५॥

सईणं सुद्धसीलाणं, सक्काईया सुरा-ऽसुरा ।

हिट्ठा कुव्वंति केज्जाइं, कुणंता गुणकित्तणं ॥१८६॥

शक्रादयः=वज्रधरप्रभृतयः, सुरा-ऽसुराः=देव-दानवाः हृष्टाः=तुष्टाः, कुर्वन्ति=विदधति, कार्याणि=सतीप्रयोजनानि, 'कुणंता' विदधतः, गुणकीर्तनं=गुणप्रशंसां 'धन्या एता या एवं गुणवत्यः' इत्येवंरूपमिति श्लोकार्थः ॥१८६॥

सईणं सुद्धसीलाणं, मोक्खमग्गठियाण उ ।

तेलोए नत्थि तं किं पि, जं असज्झं पओपणं ॥१८७॥

सतीनां शुद्धशीलानां तुशब्दस्याऽवधारणार्थत्वाद् मोक्षमार्गस्थितानामेव ज्ञान-दर्शन-चारित्रलक्षणनिर्वाणपथव्यवस्थितानाम्, त्रैलोक्ये=त्रिभुवने, नाऽस्ति=न विद्यते तत् किमपि यदसाध्यं=यन्न सिध्यति, प्रयोजनं=कार्यं तत्प्रभावेनेति श्लोकाष्टकार्थः [१७९-१८७] ॥१८७॥ ततश्च-

एवं कालानुरूवेण जाव तित्थं पवत्तई ।

सच्चसिरीवसाणं तु, सावियाणं पि संतई ॥१८८॥

एवम्=अमुना प्रकारेण, कालानुरूपेण=दुःषमाकालानुभावक्षीयमाणगुणत्वेन, यावत् तीर्थं प्रवर्तते=यावज्जनदर्शनमास्त इति, सत्यश्रयवसानानां=दुःषमाकालपर्यन्तभावे सत्यश्रयभिधानश्राविकापर्यन्तानाम्, श्राविकाणां तु सन्ततिः=प्रवाह इति श्लोकार्थः ॥१८८॥

यस्मादेवंविधगुणयुक्ताः श्राविकास्तस्मात् तासां वात्सल्यं विधेयमिति प्रतिपादनार्थं श्लोकमाह-

साहम्मिणीण वच्छं, जं जं अण्णं पि सुंदरं ।

कायव्वं सव्वसो सव्वं, सव्वदंसीहि दंसियं ॥१८९॥

साधमिणीनां=समानधर्मयुक्तानाम्, वात्सल्यं=वस्त्राऽऽसनताम्बूलादिभिर्वत्सलता, श्राविकाणां यथोचितं=यथायोग्यं कर्तव्यं=विधेयम्, सर्वशः=सर्वप्रकारैः, सर्वम्=अशेषम्, सर्वदर्शिभिः=सर्वज्ञैः दर्शितं=प्रतिपादितमिति श्लोकार्थः ॥१८९॥

साम्प्रतं तत्कृत्योपदेशं प्रकरणोपसंहारं च वृत्तेनाऽऽह-

सिद्धंतसुत्ताणि मणे धरित्ता, गुणे य दोसे य वियमइत्ता ।
सुसावियाणं उचियं विहीए, कुज्जा बुहो सिद्धिसुहावहं ति ॥१९०॥

सिद्धान्तसूत्राणि=राद्धान्तवचनानि-

साहम्मियवच्छल्लम्मि उज्जुया उज्जया य सज्जाए ।

चरणकरणम्मि य तहा, तित्थस्स पभावणाए य ॥३८५॥

इत्यादीनि, मनसि=चित्ते, धारयित्वा=व्यवस्थाप्य, गुणांश्च दोषांश्च विचार्य= 'यदुतैवंविधीयमाने एते गुणाः, अविधीयमाने त्वेते दोषाः' इत्येवं परिभाव्य, सुश्राविकाणां=शोभनश्रमणोपासिकानाम्, उचितं=योग्यम्, विधिना=विधानेन, कुर्याद्=विदध्यात्, बुधः=पण्डितः, यस्मात् सिद्धिसु-खावहं=शिवशर्मकारि, इति=प्रकरणपरिसमाप्ताविति वृत्तार्थः ॥१९०॥

इति श्रीदेवचन्द्राचार्यविरचिते मूलशुद्धिविवरणे

सप्तमस्थानकं विवरणतः समाप्तम् ॥७॥

व्याख्यातं सप्तमस्थानकम् । अधुना सर्वस्थानककृत्यशेषं शेषप्रतिमास्वरूपं च प्रकरणशेषेणाऽऽह । तदादिश्लोकश्चाऽयम्-

सामत्थेणं व अत्थेणं, सुद्धबुद्धीइ सिद्धिए ।

सओ य परओ चैव, सत्तट्टाणाणि फावए ॥१९१॥

सामर्थ्येन=स्वशरीरशक्त्या, वाशब्दोऽग्रे योक्ष्यते, अर्थेन=द्रव्येण, शुद्धबुद्ध्या=निरवद्यधिया, सिद्धयवा=पिण्डसिद्ध्या, स्वतः=आत्मना, चकारस्य व्यवहित-सम्बन्धात् परतश्चैव=अन्यैः, सप्तस्थानकानि=पूर्वोक्तानि, 'फावए' त्ति स्फावयेद्=वृद्धिं नयेदिति श्लोकार्थः ॥१९१॥

'तत्र सामर्थ्यादिभिः स्थानकस्फातिकरणं सुकरं युक्तं च, यत्पुनरर्थे न तन्न युक्तम्, तस्य दुःखोपार्जनत्वाद् दुर्व्ययत्वाच्च' इत्यारेकायामाह-

संतं बज्जं अणिच्चं जो, ठाणे दाणं पि नो दए ।
 वराओ तुच्छओ एसो, कह सीलं दुद्धरं धरे ॥१९२॥
 सन्तं=विद्यमानम्, बाह्यं=शरीरात् पृथग्भूतम्, अनित्यम्=अशाश्वतम्, उक्तं च-
 इन्द्रजालमिवाऽनेकदर्शिताद्भुतविभ्रमम् ।
 क्षणदृष्टविनष्टं च नीरबुद्धदसन्निभम् ॥३८६॥
 गन्धर्वनगरकारं पश्यतामेव देहिनाम् ।
 तद्धमं क्षणमात्रेण क्वाऽपि न ज्ञायते गतम् ॥३८७॥
 अर्जितं बहुभिः क्लेशै रक्षितं जीवितं यथा ।
 नष्टं च यादृग् नृत्यत्सु नटेष्वपि न वीक्षितम् ॥३८८॥
 येऽपि थुत्कृत्य फूत्कृत्य, पादमञ्चन्ति भूतले ।
 तेषामपि क्षणार्धेन, नश्यतीदं न संशयः ॥३८९॥

स्थाने=सत्पात्रे जिनसङ्घसाधुरूपे, यत उक्तम्-

त्रैलोक्येऽपि जिनादृते वरतरं निक्षेपधामाऽपरं,
 गन्तृणां परलोकमार्गमतुलं वित्तस्य नो विद्यते ।
 येनाऽनीप्सितमप्यहो ! प्रतिकृतौ न्यस्तं दृढं विस्मृतं,
 कोटीकोटिगुणं भवान्तरगता प्रत्यर्पयत्यादरात् ॥३९०॥
 अत्यन्तं यदि वल्लभं धनमिदं त्यक्तुं त्वया नेष्यते,
 सौहार्दाद्यदहं ब्रवीमि वचनं तद्भद्र ! शीघ्रं शृणु ।
 भक्त्या सत्कृतिपूर्वकं गुणवते पात्राय यच्छ स्वयं,
 येनाऽन्येन सुरक्षितं बहुविधं जन्मान्तरे प्राप्यते ॥३९१॥

तथा-

प्रायः शुद्धैस्त्रिविधविधिना प्रासुकैरेषणीयैः,
 कल्प्यप्रायैः स्वयमुपहितैर्वस्तुभिः पानकाद्यैः ।
 काले प्राप्तान् सदनमसमश्रद्धया साधुवर्गान्,
 धन्याः केचित् परमवहिता हन्त सन्मानयन्ति ॥३९२॥
 आरंभनियत्ताणं अकुणंताणं अकारर्विताणं ।
 धम्मद्वा दायव्वं गिहीहिं धम्मे कयमणाणं ॥३९३॥

तथा -

सम्यग्दृग्ज्ञान-चारित्रनिवासाय महात्मने ।

सङ्घाय दीयते दानमासन्नभवसिद्धिकैः ॥३९४॥

‘दाणं पि’ त्ति दानमपि दीयत इति दानं द्रव्यम्, न ददाति=न प्रयच्छति, वरकः= दयास्थानम्, तुच्छकः=निःसत्त्वः, एषः=पूर्वोक्तः, ‘कह’ त्ति कथम्, शीलं=चारित्र- प्रतिमाप्रतिपत्तिविशेषो देशचारित्ररूपं सर्वविरतिरूपं वा, प्रतिपादित-श्रावक धर्मस्य तत्प्रतिपत्ते- रुक्तत्वात्, दुर्धरं=दुःखधारणस्वभावम्, ‘धरे’ त्ति विभक्तिव्यत्ययाद् धारयिष्यति, निःसत्त्वत्वात् तस्येति भाव इति श्लोकार्थः ॥१९२॥

सूत्रकार एवाऽर्थस्याऽनित्यतां श्लोकत्रयेणाऽऽह-

अत्थं चोरा विलुंपंति, उद्दालिति य दाइया ।

राया वा संवरावेइ, बलामोडीए कथ वि ॥१९३॥

अर्थ=द्रव्यम्, चौरः=तस्करः, विलुम्पन्ति=विनाशयन्ति, उक्तं च-

खातदानादिना गेहान्मार्गे सार्थादिघाततः ।

तस्करैर्हियते द्रव्यं, निःपुण्यस्येह देहिनः ॥३९५॥

उद्दालयन्ति च=आच्छिन्दन्ति, ‘दाइय’ त्ति दायादाः=भागहारकाः, उक्तं च-

संस्थाप्या भोजने नोच्चैर्नीत्वा राजकुलादिषु ।

लान्ति द्रव्यमपुण्यानां, दायादा बलवत्तया ॥३९६॥

राजा वा ‘संवरावेइ’ त्ति ग्राहयति बलामोट्या बलात्कारेण, तथाहि-

अविद्यमानमप्यालं, दत्त्वा किञ्चिन्महीपतिः ।

गृह्णात्यर्थं मनुष्येभ्यो, मोटयित्वा कृकाटिकाम् ॥३९७॥

‘कथ वि’ कुत्राऽपीति श्लोकार्थः ॥१९३॥ तथा-

जलणो वा विणासेइ, पाणियं वा पलावए ।

अवहारेण निगच्छे, वसणोवहयस्स वा ॥१९४॥

ज्वलनो वा=वैश्वानरः, विनाशयति=भस्मीकरोति, तथा च-

द्रव्येणाऽऽपूरितं गेहं, क्षणाद्भस्मीकरोत्यलम् ।

कुतोऽप्युद्दीपितो वह्निर्लसज्ज्वालाकुलाकुलः ॥३९८॥

पानीयं वा=जलं प्लावयति, तथा च-

तीरस्थो नीरपूरेण, पोतभङ्गेन सागरे ।

याति पापात्मनां नाशमतिस्वानां धनोच्चयः ॥३९९॥

अपद्वारेण=वेश्याव्यसनादिना, निर्गच्छति=गेहान्निःसरति, व्यसनोपहतस्य
च=व्यसनेनाऽऽहितस्य, तथा च-

वेश्या-द्यूत-मद्यादि व्यसनोपहतचेतसः ।

याति क्षयं धनं सर्वं, पापबुद्धेर्नरस्य हि ॥४००॥

तथा-

मोहेनाऽन्धीकृतानां तु, स्पर्शव्याकुलचेतसाम् ।

याति वेश्यानिशान्तेषु, केषाञ्चिद्धनसञ्चयः ॥४०१॥

इति श्लोकार्थः ॥१९४॥

भूमीसंगोवियं चेव, हरंती वंतरा सुरा ।

उज्झिता जाइ सव्वं पि, मरंतो वा परं भवं ॥१९५॥

'भूमीसंगोवियं चेव' धरणीनिखातमेव, हरन्ति=अदृश्यं कुर्वन्ति, व्यन्तरसुराः
=द्वितीयभेदेदेवाः, तथा च-

भूमीसङ्गोपितं यत्नाद्, भूरिलाञ्छनलाञ्छितम् ।

व्यन्तरा अधितिष्ठन्ति, पुण्यहीनवसूत्करम् ॥४०२॥

'उज्झित' ति प्रोज्झ्य=परित्यज्य, याति=गच्छति, सर्वमपि=अशेषमपि, 'मरंतो
व' ति प्रियमाणो वा, परम्=अन्यभवं=जन्मान्तरम् तथा च-

सर्वोपद्रवसङ्घाताद्रक्षितं चेत्कथञ्चन ।

तथाप्यन्यभवं याति, हित्वा किं बहुभाषितैः ॥४०३॥

इति श्लोकत्रयार्थः [१९३-१९५] ॥१९५॥

पापानुबन्धिपुण्यानामेषु स्थानेष्वर्थो व्रजति, पुण्यानुबन्धिपुण्यानां तु सुस्थानेऽतः
श्लोकमाह-

पुण्णाणुबन्धिपुण्णाणं, पुण्णमंताण काणइ ।

पडिमाइसु संघेवा, सुट्टाणे जाइ संपया ॥१९६॥

पुण्यानुबन्धिपुण्यानां=पुण्यं=शुभम् अनुबध्नाति=अनुगच्छति[इति?] पुण्यानु-
बन्धि । तच्च तत्पुण्यं च पुण्यानुबन्धिपुण्यं तद्विद्यते येषां ते तथा तेषाम्,
पुण्यवतां=भाग्यवतां 'काण्ड' ति केषाञ्चित्, प्रतिमादिषु सङ्घे वा सुस्थाने=शोभनस्थाने,
याति सम्पत्, तथा चोक्तम्-

एकेषां दुःखलब्धा न पहरति हठात्पार्थिवोऽर्थानकस्मादन्येषां कृष्णवर्त्मा दहति
विषयिणां यान्ति वेश्यागृहेषु ।

बिम्बे स्नात्रे गृहे वा विबुधपतिपतेरर्हतः पुण्यभाजां,
वस्त्रादौ चोपयोगं प्रतिदिनमपरे यान्ति सत्साधुसङ्घे ॥४०४॥

इति श्लोकार्थः ॥१९६॥

स्थानककृत्यं निगमयन्नुपदेशं च श्लोकेनाऽऽह-

सरूवं सत्तठणाणमुत्तं सुत्ताणुसारओ ।

किंची गुरूवएसेणं, कायव्वं तु जहारिहं ॥१९७॥

स्वरूपं=यथावत्स्वभावम्, सप्तस्थानकानां प्राकृतत्वात् स्थानकसप्तकस्य,
उक्तं=कथितम्, सूत्रानुसारतः=सिद्धान्तानुसारेण न स्वैरेण, न स्वमनीषिकयेति भावः, किं
सामस्त्येन ? नेत्याह-किञ्चिद्=अल्पम्, कथमुक्तमित्याह-गुरूपदेशेन=गुरुशिक्षयेत्यर्थः ।
ततश्च कर्तव्यम्, तु शब्दस्यैवकारार्थत्वात् कर्तव्यमेव, यथाहं=यथायोग्यं कृत्यमिति शेष
इति श्लोकार्थः ॥१९७॥

किमेतदेव कृत्यं यद्भवद्भिरुक्तमुताऽन्यदपि ? इति प्रश्ने श्लोकमाह-

इत्थेव अण्णहा किं पि, जं पि जंपंति केइ वि ।

जं जं आगमियं किच्चं, तं तं अण्णं पि सूइयं ॥१९८॥

अत्रैव=मद्भणिते, अन्यथा=अपरथा, किमपि=यदपि, जल्पन्ति केचनाऽपि=
अन्ये, तत्राऽपि यद्यदागमिकम्=आगमोक्तम्, कृत्यं=कार्यम्, तत् तदन्यपि सूचितं=
कथितमत्रैव द्रष्टव्यमिति शेष इति श्लोकार्थः ॥१९८॥

एतच्च सर्वं दर्शनप्रतिमास्वरूपमिति प्रतिपादनार्थं शेषप्रतिमासम्बन्धनार्थं च
श्लोकमाह-

अणुट्टाणमिणं पायं, दंसणप्प डिमागयं ।

सप्पसंगं समासेण सेसं सेसाण सासई ॥१९९॥

अनुष्ठानं=कृत्यम्, इदम्=एतत्, प्रायः=बाहुल्येन, दर्शनप्रतिमागतं तत्सम्बद्धम्, तस्या एवाऽऽदावाक्षिप्तत्वात्, सप्रसङ्गं=सविस्तरं भणितमित्यध्याहारः, समासेन=संक्षेपेण, दर्शनप्रतिमास्वरूपं चैतत् -

संकाइसल्लविरहियसम्मदंसणजुओ उ जो जंतू ।

सेसगुणविप्पमुक्को तस्सेसा हो इ मासं तु ॥४०५॥

सम्यग्दर्शनप्रतिपत्तिश्च तस्य पूर्वमप्यासीत् केवलमिह शङ्कादिदोषराजाभियोगाद्य-
पवादवर्जितत्वेन तथाविध-

सम्यग्दर्शनाचारविशेषपालना-ऽभ्युपगमेन च प्रतिमात्वं सम्भाव्यते, कथमन्यथा ? प्रथमैकमासम्, द्वितीया द्विमासम्, यावदेकादशेकादशमासान्, सर्वाश्च सार्धानि पञ्चवर्षाणि भवन्तीत्यागमे प्रतिपादिता इति । 'सेसं' ति शेषं प्रक्रमादनुष्ठानम्, शेषाणां सामायिक-
प्रतिमादीनाम्, सा(शा)स्यते कथ्यत इति श्लोकार्थः ॥१९९॥

उक्ता सविस्तरा दर्शनप्रतिमा । साम्प्रतं शेषप्रतिमास्वरूपं संक्षेपेण श्लोक-
षट्केनाऽऽह-

बीया य पडिमा नेया, सुद्धाणुव्वयं पालणं ।

सामाइयपडिमा उ सुद्धं सामाइयं चिय ॥२००॥

द्वितीया च प्रतिमा श्रावकोचिताऽभिग्रहविशेषतया, ज्ञेया=अवबोद्धव्या, शुद्धाणु-
व्रतधारणम्=अतिचारविशुद्धाणुव्रतप्रतिपालनम् उक्तं च-

दंसणपडिमाजुत्तो पालंतो-ऽणुव्वए निरइयारे ।

अणुकंपाइगुणजुओ जीवो इह होइ वयपडिमा ॥४०६॥

चशब्दाद् दर्शनप्रतिमानुष्ठानयुक्तस्येवेयमिति योज्यम् । 'सामाइयपडिम' ति सामायिकप्रतिमा, तुशब्दः पुनरर्थे, 'शुद्धं' सामायिकमपि' शुद्धं=मनोदुष्प्रणिधानाद्यति-
चारभावादनवद्यम्, इतरथा तु निरर्थकं तद्भवति यत उक्तम्-

सामाइयम्मि उ कए घरचितं जो य चितए सड्ढो । अट्टवसट्टोवगओ निरत्थयं तस्स
सामइयं ॥४०७॥

इत्यादि सामायिकं=समभावरूपम्, उक्तं च-

जो समो सव्वभूएसु, तसेसु थावरेसु य ।

तस्स सामाइयं होइ, ईई केवलिभासियं ॥४०८॥ (आव० नि० गा० ७९८)

१. ला. एवादावुत्तिस्तं ॥ २. ला. संक्षेपत एव श्लो ॥ ३. ता. विना सर्वासु प्रतिषु यथारणं ॥ ४. ला.

यत्प्रतिमा प्रतिपाल्यत इति क्रियासम्बन्धः, अपि चेति पूर्वप्रतिमानुष्ठानयुक्तस्येति प्रतिपादयति, उक्तं च-

वरदंसण-वयजुतो सामइयं कुणइ जो उ संझासु ।

उक्कोसेण तिमासा, एसा सामाइयप्पडिमा ॥४०९॥

अट्टमीमाइपव्वेसु, सम्मं पोसहपालणं ।

सेसाणुट्टाणजुत्तस्स, चउत्थी पडिमा इमा ॥२०१॥

अष्टम्यादिपर्वसु = अष्टमी-चतुर्दशी-पूर्णा मास्यमावास्यालक्षणेषु, यत उक्तमागमे श्रावकवर्णके-

चाउद्दसट्टमुद्धिपुण्णमासिणीसु पडिपुण्णं पोसहं सम्मं अणुपालेमाणे ।

सम्यग् = अतिचारवर्जनतः, पौषधपालनं = धर्मपौषधानुष्ठानकरणम्, शेषानुष्ठानयुक्तस्य = पूर्वप्रतिमास्वरूपसमन्वितस्य चतुर्थी प्रतिमैषेति, उक्तं च-

पुव्वोइयपडिमजुओ पालइ जो पोसहं तु संपुण्णं ।

अट्टमि-चउद्दसाइसु चउरो मासे चउत्थेसा ॥४१०॥

निक्कंपो काउसगं तु, पुव्वुत्तगुणसंजुओ ।

करेइ पव्वराईसु, पंचमी पडिमा इमा ॥२०२॥

निष्कम्पः = निश्चलकायः, कायोत्सर्गं = प्रतीतम्, तु = पूरणे, पूर्वोक्तगुणसंयुक्तः करोति = विदधाति, पर्वरात्रिषु पञ्चमी प्रतिमैषा, उक्तं च-

सम्ममणुव्वय-गुणवय-सिक्खावयवं थिरो य नाणी य ।

अट्टमि-चउद्दसीसुं पडिमं ठाएगराईयं ॥४११॥

असिणाण-वियडभोई ★^२ अस्नातोऽरात्रिभोजी चेत्यर्थः ★ मउलिकडो ★

मुत्कलकच्छ इत्यर्थः ★ दिवसबंधयारी य ।

नियदोसपच्चणीयं

राईपरिमाणकडो पडिमावज्जेसु दियहे सु ॥४११॥

झायइ पडिमाइ ठिओ तिलोगपुज्जे जिणे जिअकसाए ।

नियदोसपच्चणीयं अण्णं वा पंच जा मासा ॥४१२॥

छट्टीए बंभयारी सो, फासुयाहार सत्तमी ।

वज्जे सावज्जमारंभं, अट्टमीपडिवण्णओ ॥२०३॥

षष्ठ्यां ब्रह्मचारी=स्त्रीसङ्गवर्जितः, स इति=श्रमणोपासकः उक्तं च-

पुव्वोइयगुणजुत्तो विसेसओ विजियमोहणिज्जो य ।

वज्जइ अबंभमेगं तओ य राइं पि थिरचित्तो ॥४१३॥

सिंगारकहाविरओ इत्थीए समं रहम्मि नो ठाइ ।

चयई अइप्पसंगं तहा विभूसं च उक्कोसं ॥४१४॥

एवं जा छम्मासा एसो हि गओ उ इयरहा इट्टं ।

जावज्जीवं पि इमं वज्जइ एयम्मि लोगम्मि ॥४१५॥

‘फासुयाहार सत्तमी’ त्ति विभक्तिलोपात् प्राशुकाहारः=निर्जीवभोजी, विभक्तिव्य-
त्यात् सप्तम्याम्, ‘भवति’ इति क्रिया सर्वत्र सम्बध्यते, उक्तं च-

सच्चित्तं अहारं वज्जइ असणाइयं निरवसेसं ।

सेसवयसमाउत्तो जा मासा सत्त विहिपुव्वं ॥४१६॥७

‘वज्जे सावज्जमारंभं’ त्ति वर्जयति=परिहरति, सावद्यं=सपापम्, आरम्भं=व्यापारम्,
‘अट्टमि’ त्ति अष्टमी ‘पडिवण्णओ’ त्ति प्रतिपन्नः तत्रस्थः, उक्तं च-

वज्जइ सयमारंभं सावज्जं कारवेइ पेसेहिं ।

वित्तिनिमित्तं पुव्वयगुणजुत्तो अट्ट जा मासा ॥४१७॥८

अवरेणाऽवि आरंभं, नवमी नो करावए ।

दसमीए पुणुद्धिट्टं, फासुयं पि न भुंजइ ॥२०४॥

अपरेणाऽपि=आस्तां स्वयम्’ आरम्भं=व्यापारम्, नवम्यां न कारयति=न
विधापयति, उक्तं च-

पेसेहिं वि आरंभं सावज्जं कारवेइ नो गरुयं ।

पुव्वोइयगुणजुत्तो नव मासा जाव विहिणा उ ॥४१८॥९

‘दस मीह’ त्ति दशम्याम्, ‘पुण’ त्ति पुनः, उद्धिट्टं=तदर्थनिष्पादितं भक्तादीति
शेषः, ‘फासुयं’ पिति प्राशुकमपि=निर्जीवमप्यास्तां सचित्तम्, ‘न भुंजइ’ त्ति न भुङ्क्ते=
नाऽभ्यवहरति, उक्तं च-

उद्द्विकडं भत्तं पि वज्जए किमुय सेसमारंभं ।
 सो होइ उ खुरमुंडो सिहलिं वा धारए कोइ ॥४१९॥
 दव्वं पुट्टो जाणं जाणावइ वयइनो य नो वेइ ।
 पुव्वोइयगुणजुत्तो, दस मासा कालमाणेणं ॥४२०॥१०
 एगारसीए निस्संगो, धरे लिंणं पडिग्गहं ।
 कयलोओ सुसाहु व्व, पुव्वुत्तगुणसायरो ॥२०५॥

एकादश्यां निःसङ्गः=समस्तप्रतिबन्धरहितः, धारयति=बिभर्ति लिङ्गं=रजोहरण-
 मुखवस्त्रिकारूपम्, चकारस्य गम्यमानत्वात् पतद्ग्रहं च पात्रम्, कृतलोचः=विहित-
 शिरोलुञ्चनः, सुसाधुवत्=प्रधानयतिवत्, पूर्वोक्तगुणसागरः=पूर्वोक्तो गुणसागरः=गुणसमुद्रो
 यस्य स तथा, उक्तं च-

खुरमुंडो लोएण व रयहरणं उग्गहं च घेतूणं ।
 सम्मणब्भूओ विहरइ धम्मं काएण फासंतो ॥४२१॥
 एवं उक्कोसेणं एक्कारस मास जाव विहरेइ ।
 एगाऽहाइय रेणं धम्मं काएण फासंतो ॥४२२॥११

गृहं गतश्च 'पडिमापडिवण्णस्स समणोवासगस्स भिक्खं दलाह' ति भणइ,
 प्रतिमासमाप्तौ च व्रतं गृह्णाति, प्रतिमास्थितो वा तिष्ठति गृहे वा व्रजतीति श्लोकषट्कार्थः
 ॥२००-२०५॥

प्रतिमास्वरूपनिगमनाय श्लोकमाह-

नाममेत्तं इमं वुत्तं, किंचिमेत्तं सरूवओ ।
 उवासगपडिमाणं, विसेसो सुयसागरे ॥२०६॥

नाममात्रं=अभिधानप्रमाणं 'संक्षेपत एव तत्स्वरूपमभिधास्यामि' इत्यादावुत्क्षिप्त-
 त्वात्, 'इमं' ति एतत्, 'वुत्तं' ति व्युक्तं=प्रतिपादितम् । किं नाममात्रमेव व्युक्तम् ? अत-
 आह-किञ्चिनमात्रम्=अल्पम्, स्वरूपतः=स्वरूपेण, उपासकप्रतिमानां=श्रावकाभिग्रह-
 विशेषाणाम्, विशेषः=विशिष्टतापरिपूर्णमिति भावः, श्रुतसागरे=श्रुतसमुद्रे दशाश्रुतस्कन्धादा-
 विति श्लोकार्थः ॥२०६॥

यत्कृत्यं तत् प्रतिपाद्योपदेशमाह-

किञ्चमिणं कुणंताणं, मूलसुद्धी भविस्सइ ।

तीए विणा उ सव्वं पि, उच्छुफुल्लं व निप्फलं ॥२०७॥

कृत्यं=कर्तव्यम् 'इणं' ति इदम् कुर्वतां=विदधताम्, मूलशुद्धिः=विनयशुद्धिः, भविष्यति=सञ्जनिष्यते, यतः तथा विना तु=तां विनैव, सर्वमपि=अशेष-मपीक्षुपुष्पमिव निष्फलं=फलरहितं भवतीति गम्यते, सम्यग्दर्शनविनयस्य तत्राऽन्त-र्भूतत्वादिति भावइति श्लोकार्थः ॥२०७॥

मूलस्यैव प्रतिपादनार्थं श्लोकमाह-

मूलं च विणओ धम्मे, सो य नाणाइ पंचहा ।

मूलसुद्धीइ जीवाणं, सव्वा कल्लणसंपया ॥२०८॥

मूलं च=आदिः, विनयः=कर्मविनयनसमर्थः, उक्तं च-

जम्हा विणइयकम्मं अट्टुविहं चाउरंतमोक्खाए ।

तम्हा उ वयंति विदू विणओ ति विलीणसंसारो ॥४२३॥

धर्मे=दानादावर्हदुक्ते । यद्येवं ततो विनयस्य किं स्वरूपम् ? इत्यत आह-स च ज्ञानादिपञ्चधा=पञ्चप्रकारः, ज्ञान-दर्शनचरित्र-तप-औपचारिकलक्षणः लोकोपकारादिपञ्च-प्रकारविनयमोक्षलक्षणपर्यन्तस्वभावः, उक्तं च दशकालिकनिर्युक्तौ-

लोगोवयारविणओ अत्थनिमित्तं च कामहेउं च ।

भयविणय मोक्खविणओ विणओ खलु पंचहा होइ ॥दारगाहा ॥४२४॥

अब्भुट्टाणं अंजलि आसणदाणं च अतिहिपूया य ।

लोगोवयारविणओ देवयपूया उ विभवेणं ॥४२५॥ दारं।

अब्भासवित्ति छंदाणुवत्तणा देसकालेदाणं च ।

अब्भुट्टाणं अंजलिआसणदाणं च अत्थकए ॥४२६॥ दारं ॥

एमेव कामविणओ भए य णेयव्वु आणुपुव्वीए ।

मोक्खम्मि वि पंचविहो परूवणा तस्सिमा होइ ॥४२७॥ दारं ॥

दंसण-जाण-चरित्ते तवे य तह ओवयारिए चेव ।

एसो य मोक्खविणओ पंचविहो होइ णायव्वो ॥ दारगाहा ॥४२८॥

दव्वाण सव्वभावा उवइट्टा जे जहा जिणवरेहिं ।

ते तह सद्दहइ नरो दंसणविणओ हवइ तम्हा ॥४२९॥ दारं ॥

नाणं सिक्खइ नाणं गुणेइ नाणेण कुणइ किच्चाइं ।
 णाणी णवं ण बंधइ नाणविणीओ हवइ तम्हा ॥४३०॥ दारं ॥
 अट्टविहं कम्मचयं जम्हा रित्तं करेइ जयमाणो ।
 नवमण्णं च न बंधइ चरित्तविणओ हवइ तम्हा ॥४३१॥ दारं ॥
 अवणेइ तवेण तमं उवणेइ य सग्ग-मोक्खमप्पाणं । -
 तवविणयनिच्छियमई तवोविणीओ हवइ तम्हा ॥४३२॥ दारं ॥
 अह ओवयारिओ पुण दुविहो विणओ समासओ होइ ।
 पडिरूवजोगजुंजण तह य अणासायणा विणओ ॥४३३॥

व्याख्या-

पडिरूवो खलु विणओ काइयजोगे य वाय माणसिओ ।
 अट्ट चउव्विह दुविहो परूवणा तस्सिमा होइ ॥४३४॥ दारं ॥
 अब्भुट्ठाणं अंजलि आसणदाणं अभिग्गह किई य ।
 सुस्सूसण अणुगच्छण संसाहणया य अट्टविहो ॥४३५॥ दारं ।
 हिय-मिय-अफरुसवाई अणुवीईभासि वाइओ विणओ दारं ।
 अकुसलमणो निरोहो कुसलमणउईरणं चेव ॥४३६॥
 पडिरूवो खलु विणओ पराणुवत्तिमइओ मुणेयव्वो ।
 अप्पडिरूवो विणओ नेयव्वो केवलीणं तु ॥४३७॥
 एसो भे परिकहिओ विणओ पडिरूवलक्खणो तिविहो ।
 बावन्नविहिविहाणं बिंति अणासायणाविणयं ॥४३८॥ दारं ।
 तित्थयर-सिद्ध-कुल-गण-संघ-किरिय-धम्म-नाण-नाणीणं ।
 आयरिय-थेरु-वज्झाय-गणीणं तेरस पयाणि ॥४३९॥
 अणसायणा य भत्ती तह बहुमाणो य वण्णसंजलणा ।
 तित्थयरई तेरस चउग्गुणा हुंति बावण्णा ॥४४०॥ (गा० ३१०-३२६)

यद्येवं विनयो मूलशुद्धिस्ततः किम् ? अत आह-

मूलशुद्ध्या=दर्शनशुद्ध्या, जीवानां=प्राणिनाम्, सर्वाः=समस्ताः कल्याणसम्पदः=
 सौख्यश्रिय इति श्लोकार्थः ॥२०८॥

समस्तप्रकरणोपसंहारमुपदेशं च वृत्तेनाऽऽह-

गिहत्थधम्मं परिपालिऊणं, अप्पाणमेवं परितोलिऊणं ।

अट्टारसीलंगसहस्स भारं, धरेह धोरेयसुधारियं ति ॥२०९॥

गृहस्थाः=श्रावकास्तेषां धर्मं=श्रुतचारित्ररूपम्, परिपाल्यनिर्वाह्य आत्मानं=स्वम् एवं=पूर्वोक्तप्रकारेण, परितोल्य=परिकर्मकरणतः क्षममिति ज्ञात्वा, 'अट्टारसीलंगसहस्स भारं' ति शीलाङ्गाष्टादशसहस्रभारं महाभाररूपम्, 'धरेह' ति धारयत, 'धोरेयसुधारियं' ति धोरेयसुधारितं=गणधरादिधुर्यमहावृषभातिशयधृतम्, इति=प्रकरणपरिसमाप्तौ ॥२०९॥

समर्थितप्रकरणश्च ग्रन्थकृद्रागादिनोत्सूत्रप्ररूपणाद्याज्ञाभङ्गे मिथ्यादुष्कृतं प्रयच्छति-

तेलोक्कणाहाण जिणाणमाणा, समत्थलोए वि अलंघणिज्जा ।

रागेण दोसेण व लंघिया जं, तं मज्झ मिच्छामिह दुक्कडं ति ॥२१०॥

त्रैलोक्यनाथानां=जगत्पतीनाम्, जिनानाम्=अर्हताम्, आज्ञा=तदादेशरूपा, समस्तलोकेऽपि=निःशेषजनेऽपि, अलङ्घनीया=नाऽतिक्रमणीया, रागेण=प्रेमानुबन्ध-लक्षणेन, द्वेषेण वा=अप्रीतिरूपेण वा, लङ्घिता=अतिक्रान्ता, 'जं' तियत् 'तं' ति तत् 'मज्झ' इत्यात्मनिर्देशे, 'मिच्छामिह दुक्कडं' ति मिथ्या=विपरीतम्, भवत्विति शेषः, इह=प्रकरणकरणे, 'दुक्कडं' ति दुष्कृतम्, इति=समाप्तौ ॥२१०॥

मिथ्यादुष्कृतदानानन्तरमात्मौद्धत्यपरिहारं वृत्तेनाऽऽह-

अन्नाणमूढेण विसंतुलं पि, पलावमित्तं व कुणंतयस्स ।

जो मज्झ भावो विमलो तओ य, भव्वाणमण्णाण वि होउ सिद्धी ॥२११॥

अज्ञानमूढेण विभक्तिव्यत्ययाद् अज्ञानमूढस्य, 'विसंतुलं पि'=विसंस्थुलमपि असमञ्जसमपि, प्रलापमात्रं वा=बालप्रलपितमात्रं वा, कुर्वतः=विदधतः 'जो' ति यो मम भावः=परोपकारकरणशुद्धपरिणामः, विमलः=निर्मलः, 'तओ य' ति तस्मात्, भव्यानां=मुक्तिगमनयोग्यानाम् अन्येषामपि=आत्मव्यतिरिक्तानाम्, भवतु=सम्पद्यताम्, सिद्धिः=मुक्तिरिति वृत्तार्थः ॥२११॥

आत्मौद्धत्यं परिहृत्य प्रकरणस्वरूपं निजनाम च वृत्तेनाऽऽह-

सिद्धंतसाराणमिणं महत्थं मुद्धाण भव्वाणमणुग्गहत्थं ।

महामईणं च महंतसत्थं, पज्जुन्नसूरीवयणं पसत्थं ॥२१२॥

सिद्धान्तसाराणां=राद्धान्तप्रधाननिष्यन्दानाम्, इमम्=एतत्, 'महत्थं'ति महार्थं प्रधान-

वाच्यरूपम्, उद्धृतमिति शेषः । किमर्थम् ? आह-‘मुद्धानं’ति मुग्धानां=मुग्धबुद्धीनाम्, भव्यानां=मुक्तिगमनयोग्यानाम्, ‘अणुगहत्थं’ति अनुग्रहार्थम्=उपकारनिमित्तम् । किं मुग्धानामेव केवलानामुपकारकमिदमाहोस्विदन्येषामपि ? इति, अत आह-महामतीनां च महच्छास्त्रम् । महार्थत्वात् पारवश्यतामाह-प्रद्युम्नसूरिवचनं=वृद्धाचार्यवाक्यम्, प्रशस्तं=मङ्गलालयमिदमिति शेषः । अन्यत्र प्रद्युम्नसूरिवचनं प्रद्युम्नसूरिरिति ग्रन्थकारस्य नाम, तद्वचनं=तद्वाक्यमिति वृत्तार्थः ॥२१२॥

इति श्रीदेवचन्द्राचार्यविरचितं मूलशुद्धिस्थानकविवरणं समाप्तम् ॥

[विवरणकारप्रशस्तिः]

आसीच्चन्द्रकुलाम्बरैकशशिनि श्रीपूर्णतल्लीयके, गच्छे दुर्धरशीलधारणसहैः सम्पूरिते संयतैः ।

निःसम्बन्धविहारहारिचरितश्चच्चरित्रः शुचिः ।

श्रीसूरिर्मलवर्जितोर्जितमतिश्चार्वाऽऽम्रदेवाभिधः ॥१॥

तच्छिष्यः श्रीदत्तो गणिरभवत् सर्वसत्त्वसमचित्तः ।

नरनायकादिवित्तः सद्दत्तो वित्तनिर्मुक्तः ॥२॥

सूरिस्ततोऽभूद् गुणरत्नसिन्धुः श्रीमान् यशोभद्र इतीद्धसंज्ञः ।

विद्वान् क्षितीशैर्नतपादपद्मः सन्नैष्ठिको निर्मलशीलधारी ॥३॥

नीरेगोऽपि विधानतो निजतनूं संलिख्य सर्वादरात्,

सर्वाहारविवर्जनादनशनं कृत्वोज्जयन्ते गिरौ ।

कालेऽप्यत्र कलौ त्रयोदशदिनान्याश्चर्यहेतुर्जने,

शस्यं पूर्वमुनीश्वरीयचरितं सन्दर्शयामास यः ॥४॥

तच्छिष्यो भूरिबुद्धिर्मुनिवरनिकरैः सेवितः सर्वकालं,

सच्छास्त्रार्थप्रबन्धप्रवरवितरणाह्लब्धविद्वत्सुकीर्तिः ।

येनेदं स्थानकानां विरचितमनघं सूत्रमत्यन्तरम्यं,

श्रीमत्प्रद्युम्नसूरिर्जितमदनभटोऽभूत् सतामग्रगामी ॥५॥

राद्धान्त-तर्क-साहित्य-शब्दशास्त्रविशारदः ।

निरालम्बविहारी च, यः शमाम्बुमहोदधिः ॥६॥

सिद्धान्तदुर्गममहोदधिपारगामी, कन्दर्पदर्पदलनोऽनघकीतियुक्तः ।
दान्ताऽति दुर्दमहृषीकमहातुरङ्गः, श्रीमांस्ततः समभवद् गुणसेनसूरिः ॥७॥

जगत्यपि कृताश्चर्यं सुराणामपि दुर्लभम् ।
निशाकरकरकारं, चारित्रं यस्य राजते ॥८॥

तच्चरणरेणुकल्पः सूरिः श्रीदेवचन्द्रसंज्ञोऽभूत् ।
तच्छिष्यो गुरुभक्तस्तद्विधधिषणो विनिर्मुक्तः ॥९॥ किञ्च-

श्रीमदभयदेवाभिधसूरैर्यो लघुसहोदरः स इह ।
स्थानकवृत्तिं चक्रे, सूरिः श्रीदेवचन्द्राख्यः ॥१०॥

मतिविकलेनापि मया गुरुभक्तिप्रेरितेन रचितेयम् ।
तस्मादियं विशोध्या, विद्वद्धिर्मयि कृपां कृत्वा ॥११॥

आवश्यक-सत्पुस्तकलेखन-जिनवन्दना-ऽर्चनोद्युक्तः ।
शय्यादानादिरतः, समभूदिह वीहकः श्राद्धः ॥१२॥

तद्गुणगणानुयायी, श्रीवत्सस्तत्सुतः समुत्पन्नः ।
तद्वसतावधिवसता, रचितेयं स्तम्भतीर्थपुरे ॥१३॥

रस-युग-रुद्रैर्वीतैर्विक्रमसंवत्सरात् समाप्तेयम् ।
फाल्गुनसितपञ्चम्यां, गुरुवारे प्रथमनक्षत्रे ॥१४॥

अणहिलपाटकनगरे, वृत्तिरियं शोधिता सुविद्वद्धिः ।
श्रीशीलभद्रप्रमुखैराचार्यैः शास्त्रतत्त्वज्ञैः ॥१५॥

साहाय्यमत्र विहितं निजशिष्याशोकचन्द्रगणिनाम्ना ।
प्रथमप्रतिमालिखता विश्रामविवर्जितेन भृशम् ॥१६॥

प्रत्यक्षरं निरूप्यास्य ग्रन्थमानं विनिश्चितम् ।
अनुष्टुभां सहस्राणि, सम्पूर्णाणि त्रयोदश ॥१७॥

१. 'हृषी' इत्येतदनन्तरं सं.वा.सु. प्रतिषु 'ग्रंथाग्र १३०००' इति लिखित्वा ग्रन्थसमाप्तिः सूचिता, अर्थात् सूचितासु तिसृषु प्रतिषु विवरणकारप्रशस्तिरपूर्णा व्रतन्ते ॥ २. ला. समभव-रिः ॥ ३. पु. गुणसेमसूरिः, एतत्पाठगत'सेम' इत्यस्य स्थाने पु. प्रतिशोधकेन 'सोम' इति कृतमस्ति, किन्तु विवरणकार श्रीमद्देवचन्द्रसूरिरचित'संतिनाहचरियं'ग्रन्थस्य ग्रन्थकारप्रशस्तिगतपाठधारेणात्र 'गुणसेनसूरिः' इति पाठः स्वीकृतोऽस्ति ॥

अङ्कतोऽपि सहस्र १३०००० ॥ छ ॥ शुभं भवतु ॥ मंगलं महाश्रीः ॥ प्रावृ[ड
 मा]र्दङ्गिकोऽयं पिक्कुलरसितैर्गीतगायी वसन्तो, हेमन्तो दन्तवीणापटुरथ शिशिरो वात-
 विध्मावंशः । श्रीमद्वीरस्य कीर्तिर्नट--(नप)दुतरा चन्द्रसूर्यौ च सभ्यौ, यावत्
 सङ्गीतमास्ते भुवि[सु]विजयतां पुस्तकस्तावदेषः ॥१॥

राजहंसाविमौ यावत्, क्रीडतः पृथुपुष्करे ।
 सङ्घस्तावदयं नन्द्यान्तः सर्वसुरा --[?सुरैः] ॥२॥



